

37 14.2





MAG 1156



7, 26.5.2

25.8



MAG 1156

34, 26.5.2

25.8

---



*Sanctissimo Patri, ac Domino Noſtro*  
**CLEMENTI XII.**  
PONT. OPT. MAX.  
**HUMANÆ INFIRMITATIS**  
**R O B U R;**  
*I D E S T*

**DE DIVINA GRATIA.**  
*A U C T O R E*

**D. FORTUNATO VENERIO**

Presbytero Congregationis S. Pauli Barnabita &c.

*Quæſtionum Scholaſtico-Dogmaticarum.*

**T O M U S II.**



**ROMÆ, MDCCXXXVII.**

Ex Typographia Petri Rosati, & Joſephi Borgiani in via Parionis.

---

*S U P E R I O R U M F A C U L T A T E.*

THE END OF THE WORLD

Sanctissimo Patri , ac Domino Nostro

CLEMENTI XII.

PONT. OPT. MAX.

*Omnem felicitatem.*

FORTUNATUS VENERIO PRESBYTER

CONGREGATIONIS S. PAULI BARNABITA.



UPREMÆ Dignitati , ac omnium maxime Majestati Tue BEATISSIME PATER, studiorum meorum labores & me facros, ac devotos semel fieri posse, maximum erat

Monarchicæ Clementiæ Tuæ argumentum ; nec mihi  
eximium magis aut beneficium, aut præmium tribui  
posse jure merito existimaveram, quippe quod illius  
erat munificentia, quem Christus in terris sibi Vica-  
rium constituit, & cui, tanquam Pastori Summo, re-  
liquos omnes velut agnos, & oves Divina commisit  
auctoritas, ut Te rerum dispensatorem, ac caput,  
moderatorem, ac Judicem instituerit, & declaraverit.  
Sed jam expectationem meam angusti animi Tui vicit  
magnitudo, quum etiam hoc secundum Opusculum  
meum, qualecumque futurum sit, æque sacro, ac ma-  
ximo nomini Tuo inscriptum iri, Tua ingenita be-  
nignitate donatum esse, glorier, & exultem. Id ta-  
men, ut verum fatear, Divinæ Sapientiæ Tuæ consi-  
lio peractum esse, quisque prudens, ac sapiens haud  
difficili negotio percipiet, si perarduam, pluribusque  
periculis obnoxiam materiam, quæ in hoc pertra-  
ctanda, ac statuenda suscipitur, justa lance perpen-  
det. Agitur siquidem, BEATISSIME PATER, non de  
naturalium rerum origine, non de syderum motu,  
non de maris æstu, aut quopiam alio, quod sub Cœ-  
lo positum esse, conspiciamus, sed de sublimi illo,  
inacessoque Mysterio, quod sibi Divina Gratia, qua  
ad Patrem trahimur, vindicavit, quamve nobis Ver-  
bum Patris Caro factum, sui Sanguinis pretio acqui-  
sivit, enixisque precibus flagitandam esse proposuit.  
Hæc quot vulneribus antiquioribus sæculis fuerit in-  
Africa à Pelagianis lacerata; Hanc quot calumniis, &  
conviciis in Germania Lutherani, ac Calviniani per-  
sequantur. Quantum vero nostris hisce temporibus  
in Galliis deprimant, ac evertant Janfenii propagi-  
nes, exhorrescentibus auribus audimus, nec sine cor-  
dis suspiriis, ac oculorum lacrymis intuemur. Quid  
igitur



igitur ipsi solatii , quid præsidii , quid securitatis supererat , quam ad firmam petram , & columnam veritatis confugere ? nimirum se Tuum in conspectum producere , Tuisque manibus se fidenter committere , ut in sinu Tuo , tanquam in tutissimo portu , conquiesceret , immo Tua auctoritate , constantia , ac fortitudine , quibus Dei causam agere nunquam desinis , vasserrimos suos hostes prosterneret , ac profligaret .

Quanquam , BEATISSIME PATER , etsi hæc omnia , quæ certe non levia sunt , mihi argumenta deessent , non alteri tamen , quam Tibi , librum hunc devovendum esse , cogitanti mihi poteram suadere . Tuus hic erat , priusquam publicam in lucem prodiret , nec Verbum ullum aut mente conceperam , aut calamo exaraveram , quod etiam à Te procul Tibi non sisterem obsequentiissimus , immo nec inpræsentiarum illam aspiceret , nisi eximiæ , ac Regalis munificentiae Tuæ beneficio id actum esset . Efferant igitur alii Tuam in difficilioribus negotiis mentem , dexteritatem , ac studium . Tuam alii in Urbe augenda , ac ultra admirationem exornanda , magnificentiam . Tuam alii in adversis fortitudinem , in prosperis moderationem ; in pauperum inopia sublevanda liberalitatem ; in Ecclesiasticis Juribus vindicandis constantiam , in rebus deliberandis prudentiam ; in servanda , propagandaque Fide vigilantiam ; Tuam tandem in toto Orbe curam , ac sapientissimum regimen . Illam ego certe summis , etsi imparibus , laudibus eminus , & cominus prædicabo , ut inde noscant , non tam studii mei , quam Divinæ propemodum CLEMENTIS XII. beneficentiæ librum hunc opus fuisse .

Quod

Quod igitur titulis omnibus Tuum est , Tuum accipito , semperque Tuum esse memineris ; & me Pontifex Optime Maxime , quem ad annos plurimos , Fidei incremento , Apostolicæ Sedis gloriæ , Totius Ecclesiæ utilitati , Deus servet incolumem , Tuis beatissimis pedibus humillime provolutum Sanctissima Tua Benedictione prosequi non dedigneris.





## LECTORI THEOLOGO.



**U**NTER Divina Myſteria , de quibus Doctores Theologi diſputationes ſuas inſtituere conſueverunt , illud ſemper maximum , perdifficile , ac ſerme inexplicabile , quod de Divina Gratia inſcribitur , omnibus , etſi Sapientiſſimis Viris , viſum eſt . In ſplendidiffimos ejusdem radios ita mentis aciem homines intenderunt , ut magis cæcutientes evaſerint , immo et excecati ; atque ipſi evenit , quod olim ſoli legimus contigiffe . Habuit iſte quosdam ita ſui cultores , ut ei , ſummo veluti numini rerum omnium moderatori , tibia adolerent , et ſacrificia ; quosdam vero ſic inſenſos , ut jacula jacentes eum obruere , ac ſerme necare contenderent . Habuit et gratia quosdam de ſe ita ſentientes , ut quidquid agerent homines , ipſi foret tribuendum , nihil libero arbitrio , quod nullum eſſet . Hoſce noſtri Calvinum , et Lutherum ; quosdam vero ita aſſerentes , ut , vel quidquid operarentur homines , à libero progrediretur arbitrio , vel , ſi aliquid à gratia , hoc non ad primos ſalutares actus , fideique initium , ſed ſolummodo ad augmentum referendum eſſet . Hoſce noſtri Pelagianos , ac Semipelagianos ; Mitto reliquos , qui à Michaeli Bajo , et Cornelio Janſenio nomen habuerunt . Optime quidem contra hoſce omnes mentem ac calamum impenderunt Doctores Catholici , qui tamen Sacra Dogmata feliciter ac ſecuriſſime propugnantes , nondum id aſſequuti ſunt , quo rem banc declararent . Omnes ex utraque parte Scripturas proferunt , Patres congerunt , Concilia producant , rationes proponunt , quid eligendum , quid reprobandum ? Hiſce adde gratiæ efficacitatem , neceſſariamque cum arbitrii libertate concordiam ; quod quanto diſcrimine , ac periculo plenum ſit , nihil dicam , cum pro omnibus ſufficiat illud Auguſtini lib. 2. de Pec Mer. et Rem. cap 18. hac habentis : Ipſa ratio , quæ de hiſ rebus à talibus , quales nos ſumus , iniri poteſt , quemlibet noſtrum quærentem vehementer anguſtat , ne ſic defendamus gratiam , ut liberum arbitrium auferre videamur , ruſus , ne ſic liberum aſſeramus arbitrium , ut ſuperba impietate ingrati Dei gratiæ judicemur .

Hæc

*Hæc tamen omnia , & si quæ sint alia , quæ certe plura reperies , in hoc secundo Opusculo meo , pro ingenii mei tenuitate , brevi , ac clara methodo , ut opinor , tuum in conspectum producere ausus sum . Dum brevem methodum audis , nollem , à te rem ita accipi , ut aliquid , quod ad Quæstiones ex integro resolvendas , aut me latuerit , aut omisserim ; Sed tantum intelligas , in eo laborem studiumque meum impendisse , ut unum semel dixisse sufficeret , & quæ idem significant , non per plura explicari , sed ad unum punctum revocare judicaverim . Unica certe Quæstio ; vel de scientia Dei , vel de modo , quo hominibus Divina Gratia , confertur , integrum volumen , si mea hæc mens fuisset , sibi vindicasset ; quod quam verum sit , ex aliis Doctoribus facillime percipies .*

*Placuit etiam post Quæstiones , quas Divina Gratia sibi postulare videbatur ; alias addere , quæ de Peccatis instituuntur ; atque eo ductus consilio fui , ut hoc pacto non solum gratiæ dignitas , ac beneficium à Deo suavissimo Patre nostro clementissime collatum relucerent , sed etiam , ut Pelagiani , ac Lutherani errores detecti validius refellerentur .*

*Utrumque res à me peracta sit , eam non tam oculis tuis subjicio , quam animi tui benignitati commendo . Legere te non pigeat quod me elaborantem delectavit . Alia continuo typis committam , alacriore quidem mente , si quod commissum est , tibi , ut exopto , acceptum ac gratum intelligam .*



# DON MARIUS MACCABEI

*Congregationis Clericorum Regulararium  
Sancti Pauli*

## PRÆPOSITUS GENERALIS.

**C**Um Librum cui titulus est : *Humana infirmitatis robur : De Divina Gratia* : à Patre D. Fortunato Venerio Congregationis nostræ Presbytero professo compositum , duo ejusdem Congregationis nostræ eruditi Viri , quibus id commisimus , accurata lectione , ac gravi judicio recognoverint , & posse in lucem edi probaverint . Nos ut typis mandetur , quantum in nobis est , facultatem facimus . In quorum fidem has fieri , sigilloque nostro muniri jussimus . Datum Romæ in Collegio Nostro SS. Blasii , & Caroli die 26. Septembris 1737.


*D. Marius Maccabei Præpositus Generalis ;*

*Don Valentinus Viani Cancellarius .*

# IMPRIMATUR,

Si videbitur Reverendis, P. Magistro Sacri Palatii  
Apostolici,

*N. Baccarius Episcopus Bojanen. Vicegerens.*




**P**Rava Hæreticorum Dogmata strenuè, sapienterque refellere, ac Theologorum perdifficiles Quæstiones non minus clara, quam brevi methodo explicare pergit Reverendissimus P. D. Fortunatus Venerius Clericus Regularis S. Pauli Barnabita in hoc altero Libro, cui titulus est: *Humane infirmitatis robur: De Divina Gratia*. Illum jubente Reverendissimo P. Jo: Benedicto Zuannelli Sacri Apostolici Palatii Magistro attente legi, atque in eo omnia Catholicæ Fidei, ac bonis moribus consona utque publicam lucem aspiciant digna deprehendi. In cujus fidem &c.

*D. Antonius Andreas Galli Abb. Can. Reg. Congræg.  
Sanctissimi Salvatoris, et Sac. Cong. Ind.  
Consultor.*

**J**USSI Reverendissimi P. Jo: Benedicti Zuannelli Sacri Palatii Magistri, legi Tomum secundum Theologicum, cui titulus est: *De Divina Gratia* à Reverendissimo Patre D. Fortunato Venerio Clerico Regulari S. Pauli Barnabita, pari ingenio, & eruditione elucubratum; Cumque nihil Orthodoxæ Fidei, & Morum Disciplinæ contrarium contineat: Immo ubertate Doctrinæ, Sententiarum delectu; ac perspicua styli facilitate, Reipublicæ literariæ utilitatem non mediocrem afferre possit; illum planè dignum censco, qui typis mandetur,

*Joseph Carpani Societatis Jesu Cleri Rom.  
Examinator, & in Coll. Rom. Generalis  
Studiorum Præfectus.*



*I M P R I M A T U R,*

Fr. Jo: Benedictus Zuannelli Ord. Præd. Sacri Palatii  
Apost. Mag.

# I N D E X Q U Æ S T I O N U M.

Atque eorum, quæ in ipsis resolvuntur.

## Q U Æ S T I O I.

De Gratia generatim accepta.

|           |  |         |
|-----------|--|---------|
| Art. I.   | <b>Q</b> uid, & quodplex sit Gratia.         | pag. 2. |
| Art. II.  | De aliquibus circa Divinam Gratiā erroribus. | 4.      |
| Art. III. | Explicantur diverſi ſtatus naturæ humanæ.    | 7.      |
| Art. IV.  | An potuerit condi homo in ſtatu naturæ puræ. | 8.      |

## Q U Æ S T I O II.

De Homine in ſtatu Innocentiæ.

|           |   |     |
|-----------|---|-----|
| Art. I.   | <b>A</b> N Alam habuerit rerum omnium ſcientiam.  | 14. |
| Art. II.  | An homo in primo ſtatu decipi potuiſſet.  | 17. |
| Art. III. | An homo fuerit creatus in gratia.   | 19. |
| Art. IV.  | An in primo parente fuerint paſſiones animæ, omneſque virtutes.                           | 21. |
| Art. V.   | De dominio hominis in ſtatu innocentia.   | 22. |
| Art. VI.  | De præcepto impoſito in Paradifo.   | 23. |
| Art. VII. | Utrum homines in ſtatu innocentia fuiſſent nati perfecti in gratia, juſtitia, & ſcientia. | 25. |

## Q U Æ S T I O III.

De neceſſitate Gratia in Homine lapſo.

|            |   |          |
|------------|---|----------|
| Art. I.    | <b>A</b> N homo lapſus ſit debilior homine in ſtatu naturæ puræ ſi fuiſſet.                             | 27.      |
| Art. II.   | Utrum homini lapſo ſit neceſſaria gratia ad cognoscendas omnes veritates naturales.                     | 33.      |
| Art. III.  | Utrum neceſſaria ſit ſpecialis gratia ad veritates practicas.   | 37.      |
| Art. IV.   | Utrum ad quodlibet opus naturale bonum ſit neceſſaria gratia ſpecialis.                                 | 39.      |
| §. I.      | Utrum omnia opera hominis ſint peccata.   | Ibid.    |
| §. II.     | Utrum ad omne opus bonum ſit neceſſaria gratia ſanctificans.  | 42.      |
| §. III.    | An ad bene naturaliter operandum ſit neceſſaria gratia actualis ſupernaturalis, autem ſuſtem naturalis. | 46.      |
| Art. V.    | An ad diligendum Deum ſuper omnia neceſſaria ſit &c.  | 47.      |
| Art. VI.   | Utrum ad vincendas tentationes neceſſaria ſit gratia &c.  | 53.      |
| Art. VII.  | Utrum ſine gratia ſpeciali vitari poſſint omnia omnino peccata.   | 60.      |
| Art. VIII. | Utrum ad ſalutares actus ſit neceſſaria gratia &c.  | 65.      |
|            |   | Art. IX. |



|          |   |     |
|----------|---|-----|
| Art.IX.  | <i>Utrum sine gratia speciali possit homo se disponere ad gratiam.</i>                            | 70. |
| Art.X.   | <i>Quomodo sit intelligendum commune illud: Facienti quod est in se Deus non denegat gratiam.</i> | 73. |
| Art.Ult. | <i>Utrum ad finalem perseverantiam sit necessaria gratia &amp;c.</i>                              | 78. |

## Q U Æ S T I O IV.

De modo, quo confertur hominibus actualis Gratia.

|          |   |     |
|----------|---|-----|
| Art.I.   | <b>A</b> <i>N sit admittenda divisio gratiae sufficientis, &amp; efficacis.</i> | 82. |
| Art.II.  | <i>A quo proveniat, gratiam sufficientem esse inefficacem.</i>                  | 84. |
| Art.III. | <i>Utrum gratia efficax inferat homini necessitatem.</i>                        | 87. |

## D I S P U T A T I O U N I C A.

De Divina scientia circa futura.

|          |  |      |
|----------|--|------|
| Art.I.   | <b>A</b> <i>N Deus cognoscat futura.</i>                                   | 90.  |
| §. I.    | <i>Utrum Deus cognoscat certissime omnia futura absoluta.</i>              | 91.  |
| §. II.   | <i>Utrum Deus cognoscat certissime omnia futura conditionata.</i>          | 93.  |
| §. III.  | <i>Refelluntur argumenta contraria.</i>                                    | 96.  |
| §. IV.   | <i>In quo medio Deus futura cognoscat.</i>                                 | 98.  |
| §. V.    | <i>Utrum Deus videat futura libera in decretis antecedentibus.</i>         | 99.  |
| §. VI.   | <i>In quo medio videat Deus futura libera conditionata.</i>                | 103. |
| §. VII.  | <i>Utrum, ideo cognoscatur futurum, quia est futurum, vel ab opposito.</i> | 108. |
| §. VIII. | <i>Quid sit, &amp; an admittenda scientia media.</i>                       | 113. |
| §. IX.   | <i>Refelluntur argumenta contra scientiam mediam.</i>                      | 116. |

## S E Q U I T U R Q U Æ S T I O IV.

|           |   |      |
|-----------|---|------|
| Art.IV.   | <b>U</b> <i>trum gratiae efficacia consistat in aliqua physica qualitate, quae sit ab intrinseco efficax.</i> | 120. |
| Art.V.    | <i>Idem stabilitur ex testimoniis Scripturae.</i>   | 123. |
| Art.VI.   | <i>Idem probatur etiam ratione.</i>   | 125. |
| Art.VII.  | <i>Afferitur in oppositum S. Augustinus.</i>  | 127. |
| Art.VIII. | <i>Afferuntur in oppositum Scripturae, &amp; satisfi.</i>   | 130. |
| Art.IX.   | <i>Afferuntur in oppositum rationes, &amp; refelluntur.</i>   | 132. |
| Art.X.    | <i>Utrum praedestinatio fiat ante, vel post meritum praevisionem.</i>   | 137. |
| Art.XI.   | <i>Refelluntur argumenta contraria.</i>   | 142. |
| Art.XII.  | <i>An Deus omnibus conferat auxilia sufficientia ad salutem.</i>  | 146. |
| §. I.     | <i>An in Deo sit sincera voluntas salvandi omnes, &amp; Christus pro omnibus, &amp; singulis mortuus sit.</i> | 146. |
| §. II.    | <i>Refelluntur argumenta in oppositum.</i>  | 150. |
| §. III.   | <i>Utrum Deus conferat omnibus &amp;c.</i>  | 153. |

## S E C T I O U N I C A.

De Janzenio, & ejus Systemate.

162.

QUÆ-

## Q U Æ S T I O V.

### De Gratia Habituali.

- Art. I. **P**LVRA, quæ de habituali gratia sunt à Theologis pertrata. 170.
- Art. II. Virum gratia habitualis sit quædam qualitas inherens physice animæ. 174.
- Art. III. Virum in peccatori sit necessaria aliqua dispositio ad gratiam habitualement. 176.
- Art. IV. Vtrum ultima dispositio ad gratiam sit effective ab ipsa gratia. 180.
- Art. V. Quanam sit causa efficiens gratiæ habitualis. 186.
- Art. VI. Expenduntur plura de gratia habituali. 190.

## Q U Æ S T I O VI.

### De Justificatione.

- Art. I. **Q**Uædam circa justificationem Vestibula. 193.
- Art. II. Vtrum justificatio nostra consistat formaliter in iustitia Christi nobis imputata, & utrum vere in ipsa deleantur peccata &c. 194.
- Art. III. Refelluntur Hæreticorum argumenta. 196.
- Art. IV. Vtrum actus contritionis habeat sine gratia inherente vim justificandi. 200.
- Art. V. Virum gratia habitualis ex propria natura sit forma &c. 209.
- Art. VI. Refelluntur argumenta contraria. 212.
- Art. VII. Vtrum in eodem subiecto componi possint gratia & peccatum. 214.
- Art. VIII. An sine gratiæ infusione remitti possit peccatum. 217.
- Art. IX. An homo possit perfecte justificari, seu infundi gratia sine aliquo actu peccatoris. 220.
- Art. X. Vtrum aliquis possit esse certus sine speciali Dei revelatione, se esse justificatum. 221.
- Art. Ult. Vtrum justificatio conveniat tantum electis &c. 225.

## Q U Æ S T I O U L T I M A :

### De Merito.

- Art. I. **Q**uid, & quodplex sit meritum, & an in hominum operibus detur. 228.
- Art. II. Plures conditiones ad meritum requisitæ examinantur. 233.
- Art. III. Quid possit homo mereri sibi, & aliis. 237.
- Art. Ult. An, & quomodo in justificatis merita reviviscant, 241.

# Quæstiones aliquæ de Peccatis.

## Q U Æ S T I O I.

### De Peccato Originali.

|          |  |      |
|----------|--|------|
| §. I.    | <b>A</b> N peccatum originale ex Adamo in posteris derivaverit.          | 247. |
| §. II.   | Afferuntur argumenta contraria, & refelluntur.                           | 252. |
| §. III.  | De peccati originalis essentia.  | 256. |
| §. IV.   | Refelluntur argumenta Hereticorum.                                       | 260. |
| §. V.    | Referuntur & expendantur aliæ in hac re Catholicorum sententiæ.          | 265. |
| §. VI.   | Utrum peccatum originale ad fidelium filios pertranseat.                 | 269. |
| §. VII.  | An peccatum originale etiam ad Beatam Virginem pertransierit.            | 272. |
| §. VIII. | Refelluntur argumenta in oppositum.                                      | 276. |
| §. IX.   | Quomodo peccatum originale traducatur.                                   | 280. |
| §. X.    | De pœna peccati originalis post hanc vitam.                              | 284. |
| §. XI.   | Refelluntur argumenta, quæ producantur contra secundum nostrum assertum. | 291. |
| §. XII.  | Quid de mente Sancti Augustini sentiendum sit.                           | 294. |
| §. XIII. | Perpenduntur alia argumenta in oppositum.                                | 296. |
| §. XIV.  | Nonnulla alia perpenduntur.  | 300. |

## Q U Æ S T I O II.

### De Peccato Actuali.

|          |  |      |
|----------|--|------|
| §. I.    | <b>A</b> N recte dividatur peccatum actuale in veniale & mortale.    | 301. |
| §. II.   | Per quid peccatum veniale differat à mortali.                        | 305. |
| §. III.  | An peccatum veniale conjunctum mortali puniatur pœna æterna.         | 308. |
| §. IV.   | Quenam sit causa peccati effetrrix physica.                          | 312. |
| §. V.    | Refelluntur argumenta in oppositum.                                  | 315. |
| §. VI.   | Traduntur nonnulla de distinctione specifica, & numerali peccatorum. | 318. |
| §. VII.  | An peccatum mortale sit infinitum sub consideratione offensæ.        | 319. |
| §. VIII. | Refelluntur argumenta contraria.                                     | 323. |
| §. IX.   | De pœna debita peccato lethali.                                      | 327. |
| §. X.    | De pœna debita peccato mortali dimisso quoad culpam.                 | 331. |
| §. XI.   | Afferuntur argumenta Hereticorum, & refelluntur.                     | 336. |
| §. XII.  | Fidelium orationes prosunt Defunctis.                                | 339. |

100  
101  
102  
103

104

105

106  
107  
108

109  
110  
111

112  
113  
114

115  
116  
117



# IN LIBRUM SECUNDUM SENTENTIARUM. DE DIVINA GRATIA.



Ucundum magis, an magis arduum Theologiae Tractatum explicaturus aggrediar, dum de Divinae Gratiae excellentia & arcanis dicturus accedo, me penitus ignorare, fateri non erubesco. Nihil in ea, quod miram suavitatem, eximiamque pulchritudinem non effundat, contemplandum proponitur, sed nihil etiam quod vel in maxima profunditate non deliteat, vel inaccessibili sublimitate non resideat, mentibus nostris objicitur. Delectat in ea Divinae benignitatis profusio, quam nos Divinae naturae consortes efficiat, & ita è tenebris in admirabile lumen perducatur, ut quondam filii irae, Filii Dei nominemur & simus, & quos peccatum justissime aeterna morte damnaverat, hac misericorditer aeternae vitae restituat; Quidquid in Coelis gloriosum refulget, quidquid in Terris Sanctum. Deoque gratum aut germinat aut consistit, gratiae tribuendum. Non lilia de virginitate candida, non rosae de passione purpureae in sponsi hortulo floruis-

Tom. II.

sent, si Divina Gratia semen, pluviam, solem, fecunditatem, incrementum non praestitisset, atque superna ope ab inimicis hominibus non servasset, ita ut quisque cum Apostolo testari debeat: *Gratia Dei sum id quod sum*. Sed haec ipsa dulcissima gratiae munera, quam imperscrutabilia sint, & investigabilia quis cum eodem Paulo non fatebitur? Suaviter Deus & fortiter omnia per gratiam disponit, quia suaviter, delectatione perfundor; quia fortiter, totis artubus contremisco. Si tanta gratiae excellentia, felix, cui dabitur; prorsus miser, cui negetur. Hisce cogitationibus obruo, quid dicam, quid intelligam ipse nescio. Agamus tamen quantum possumus, ipsiusque gratiae subsidium imploremus, ne ita profundè effodere, ut altius nos erigere prohibeamur. Si quid verò vel intelligere vel explicare mens calamusque non poterunt, non audaçter disputandum, sed humillimè excipiendum existimabimus.

De hac Divina Gratia agit Magister in secundo Libro Sententiarum, quem reliqui praecipui Doctores effusè exposuerunt atque explicant; Sanctus ve-

A

ro

rò Thomas in prima secundæ quem sequuti sunt alii plures Theologi. Ut clarius res omnes pertractentur, opus omne in varias quæstiones dividemus, agentes in prima de gratia generatim accepta, diversoque statu naturæ, in

secunda de primo homine in statu innocentie, in tertia de gratiæ actualis in natura lapsæ necessitate, in quarta de modo, quo datur hominibus, in quinta de gratia habituali, in sexta de justificatione, in septima de merito.

## QUÆSTIO I.

### De Gratia generatim accepta.

#### ARTICULUS I.

*Quid & quodplex sit Gratia.*

**I**PSIS sub hujus tractatus vestibulis pudet ea exponere de quibus est sermo. Adeo omnibus nota, & clara sunt, ut in hac res persuum, quod scribimus, jure merito existimabitur. Hæc tamen & à me scribi Lectoris patientia non irascitur, ut faciliorem viam ad alia difficiliora parare non prohibear. Gratia nomine hic non intelligimus aut pulchritudinem, quæ proverb. 31. fallax dicitur gratia, neque morum, gestuum, loquutionisquæ suavitatem, de qua psal. 44. *Diffusa est gratia in labiis tuis*. Neque alicujus amorem & benevolentiam, de qua Esther 5. *Si inveni in conspectu Regis gratiam*. Neque beneficiorum compensationem, de qua David 2. Reg. *Sed & ego reddam gratiam*. Sed intelligimus donum Dei gratuitum supernaturale naturæ rationali collatum, ipsique non debitum per ordinem ad salutem eternam. Definitionis istius particulas explicare non audeo, ne videar Tyrones in scholis edocere.

2. Porro multas partitiones gratia sic descripta sortitur. Primo dividitur in eam, quæ datur non dignis & in eam, quæ dignis conceditur. Primi generis illa est, quæ in creatione Angelis & pri-

mis parentibus ante peccatum collata fuit, tum unio hypostatica Christi humanitati concessa; Secundi generis illa est, quæ post originale peccatum hominibus tribuitur.

3. Dividitur secundo in creatam & increatam, seu temporaneam ac æternam. Hæc ipse Deus est, Divinusque amor, quo ab æterno dilexit nos, tum illa charitas, quam Apost. ad Rom. 8. ait diffusam esse in cordibus nostris per Spiritum Sanctum, & de qua Joan. 14. dicitur: *Ad eum veniemus, & mansionem apud eum faciemus*. Illa verò consistit in beneficiis creatis vocationis, sanctificationis &c. ab increata gratia omninò descendens, de qua idem Apostolus ibidem; *Quos prædestinavit hos & vocavit, & quos vocavit, hos & justificavit*.

4. Hæc autem gratia creata, de qua sermo noster, alia est externa, alia interna. Hæc intimè recipitur in anima, & complectitur omnia dona nobis infusa, intellectus illuminationes sanctasque inspirationes voluntatis. Illa verò extrà animam est, & relucet in concionibus, in alienis exemplis, in malorum occasionum remotionibus, & hujusmodi, de qua gratia inquit Augustinus 23. contra Quintum: *Ut adulterium non committeres suasor defuit, ut deesset ego feci, locus & tempus defuit, ut hæc deesset ego feci*; deinde concludit, *cognosce ergo gratiam*.

5. Alia insuper dicitur gratia gratis data,

data, & alia gratum faciens. Illa non conceditur ut præcipuè subjectum, cui datur, fiat Sanctum, sed ad aliorum utilitatem & sanctorum comparandam, proinde etiam peccatoribus concedi potest, atque ad ipsam revocantur ea, quæ recenset Paul. 1. ad Corint. 12.

*Alii per spiritum datur sermo sapientiæ, alii sermo scientiæ, alii gratia sanitatum, alii operatio virtutum, alii prophetia, alii discretio spirituum, alii genera linguarum, alii interpretatio sermonum.*

Utrum verò hæc divisio recta sit nec ne, non est cur disputationem instituiamus.

Gratia gratum faciens è contra conceditur, ut Sanctum fiat subjectum, cui confertur, de qua dictum fuit Paulo 2. ad Corint. 12. *Sufficit tibi gratia mea.*

Et idem Apostolus post recensitas gratias gratis datas inquit: *Adhuc excellentiorem viam vobis ostendo; & æmulamini charismata meliora.* Huiusmodi autem gratiæ divisio tradita est, non quia

etiam gratia gratum faciens non sit gratia gratis data, sed ad uniuscujusque diversos fines innuendos, & idem genus tanquam ad duas species contractum declarandum. Ultra discrimen allatum inter utramque aliud assert Sanctus Augustinus, nimirum dona gratiæ gratum facientis huiusmodi esse naturæ, ut licet homo possit ipsis non uti, nequeat tamen abuti, è contra verò donis gratiæ gratis data possit etiam abuti, ut manifestum est.

6. Gratia gratum faciens dividitur in habitualement, & actualem. Illa donum permanens est fidei, spei, charitatis aliarumque virtutum habitus infusus complectens. Hæc verò habetur per auxilia specialia transeuntia, quibus ad operationes naturam propriam excedentes, quibus auxilium generale non sufficit, anima movetur. Atque hic breviter adnotandum censeo, operationem aliquam trifariam naturæ vires excedere posse. Primo absolutè & secundum se, quando scilicet operatio eminentis ac supernaturalis ordinis est, ut sunt

actus Theologicarum virtutum; Secundo non absolutè, sed propter statum, in quo homo post peccatum reperitur; quemadmodum enim homo laborans ægritudine, non potest sine alterius auxilio ingentem molem movere, quam tamen solus, si sanus esset, moveret; ita homo post peccatum infirmus sine speciali auxilio non potest, quod tamen posset, si sanus, idest innocens perseverasset. Tertio neque absolutè, neque secundum vires, sed propter circumstantias modi, loci, temporis, ut contingit in homine, qui ingentem molem movere posset, si ejusdem robor spectetur, attamen si propter angustias loci utramque manum adhibere nequeat, aliena indigebit ope; atque ita fiet, hominem justum præceptum aliquod servare posse, attamen si aliqua adveniat tentatio, sine speciali auxilio servare non poterit.

7. Hæc autem actualis gratia, seu auxilium speciale, aliud est operans, aliud cooperans, quam divisionem apertis verbis tradidit S. August. de gr. & lib. arb. cap. 17. dicens: *Cooperando Deus in nobis perficit, quod operando incipit, quoniam ipse, ut velimus, operatur incipiens, qui volentibus cooperatur perficiens.* Operans sine actione nostra in nobis est, cooperans è contrario; Per illam voluntas nostra tantum movetur, per hanc movetur, & movet; Hinc illa vocatur etiam excitans, quia qui illam recipit est veluti dormiens, hæc vocatur adjuvans, quia illam recipiens jam ad opus se parat excitatus à somno. Utriusque meminit sub hisce nominibus prælaudatus Doctor 2. de pec. mer. & remis. cap. 18. inquit: *Quod ad Deum nos convertimus, nisi ipso excitante & adjuvante non possumus,* & Concil. Trident. sess. 6. cap. 6. dicit: *Disponuntur autem ad justificationem &c. dum Divina gratia excitati & aduti fidem ex auditu concipientes &c.* Ad hæc gratias revocatur illa, quam prævenientem, concomitantem, & subsequenter apud



Scripturas, Concilia, & Patres nuncupatam esse reperimus, de qua Trident. sess. 6. cap. 16. hisce verbis: *Ipsę Christus Iesus, tanquam caput in membra, & tanquam vitis in palmites, in ipsos justificatos jugiter virtutem infundit, quę virtus bona ipsorum opera semper antecedit, & comitatur, & subsequitur.* August. verò in Ench. cap. 31. & de Nat. & Gr. cap. 32. omnia sic explicat: *Pręvenit, ut sanemur, subsequitur, ut sanati utegemur, pręvenit ut pię vivamus, subsequitur, ut cum illo semper vivamus, quod pluries repetit dicens, pręvenit ut velit, subsequitur, ne frustra velit;* Posset tamen per gratiam subsequenter, juxta illa verba, *ut cum illo semper vivamus* etiam gratia perseverantię finalis intelligi, de qua alibi sermo.

8. Tandem gratia hæc actualis dividitur in sufficientem & efficacem. Prima illa est, qua Deus ita hominem vocat & excitat, ut ad hominis conversionem, & actus quoscumque supernaturales sit ad cooperandum paratus, atque istius vi possit homo velle converti, omne sive hujusmodi actus exercere, attamen nec converti velit, nec exercere; Secunda verò illa est, qua homo sic excitatur & vocatur, ut infallibiliter velit. Pro hujusce gratię divisione audi Augustinum de correp. & gr. cap. 11. de Adamo dicentem: *Istam gratiam nunquam habuit primus homo, qua nunquam vellet esse malus (en gratiam efficacem) sed sane habuit, in qua si permanere vellet, nunquam esset malus; en gratiam sufficientem, quod magis explicat Sanctus Doctor per subsequencia circa finem. Acceperat posse, si vellet, sed non habuit velle quod posset.* De hoc puncto alibi.

Contra expositas divisiones plurę possent opponi, sed pro instituto nostro non sunt ad rem, nec alicujus momenti censenda sunt.

## ARTICULUS II.

De aliquibus circa Divinam gratiam erroribus.

9. **P**Rimi, qui temerè impięque de Divina gratia,enserunt, etiam postquam à cordis duritię recedentes in Christum crediderunt, fuerunt Judæi. Horum autem error ad duo capita revocatur. Primum est, gratiam Christi sine veteris legis observatione salutis non sufficere, quod etiam primo Antiochię, deinde in Galatia ex gentibus conversis persuadere cęperunt; Secundum est, Evangelii gratiam omnibus gentibus communem non esse, sed peculiariter propter legis custodiam Judæis esse concessam, proinde gentibus in Ecclesia Christi Judæos esse præferendos, immo neque illis prædicandum esse Evangelium, nisi prius ad circumcissionem inducerentur, quod colligitur ex Act. cap. 14. ubi dicebant Judæi: *Nisi circumcidamini secundum morem Moysi, non potestis salvari;* & in Concilio Apost. *quia oportet circumcidi eos, præcipere quoque servare legem Moysi.* Ad hoc dicendum nōverī poterant, ut arbitror, quia Christum ejusque gratiam solis Abrahę filiis promissam esse existimabant, filii autem esse non poterant, nisi vel naturales, atque ex Abrahę semine propagati, vel adoptivi per circumcissionem; aut quia putabant, legem Moysaycam, utpote datam à Deo virtute sua salutis sufficere, & perpetuo duraturam, proinde licet admittendum crederent Evangelium, non tamen ex se sufficiens neque ut excludens legem, sed ut illi miscendum esse contendebant; aut tandem, quia solis Judæis Christi gratiam conferendam esse, gentiles verò, utpote idololatrię servientes tanto indignos esse beneficio arbitrabantur. Contra utrumque errorem agit Paulus in epist. ad Galat. in Act. Apost. præsertim verò in epist. ad Ro-

man.



man. neque est, cur à nobis ulterius refellatur.

10. Anno verò Domini quadrigentesimo quinto fuit Pelagius Natione Britannus, professione Monachus, tanta quidem fama illustris, & virtutum præclarus insignibus, ut S. Joan. Chrysost. ejusdem lapsum deplorans in ep. 4. ad Olimp. hæc verba faciat. *De Pelagio Monacho magno dolore affectus sum &c. cum viros, tam pios ac sanctos tantaque cum tolerantia viventes abripi, atque in fraudem impelli videamus.* Ibi tamen errorem, in quem incidit, Doctor egregius non declarat. Certum est, teste Baron. ann. 411. & prius Augustino lib. de peccato originali cap. 21. Pelagium una cum Celestio ex Oriente in Occidentem pertransisse, & Romæ suam hæreticam seminasse sententiam, quæ tamen suum habuit exordium ab Evagrio, Rufino, Valentino, & Marcione, ut colligitur ex S. Hieronymo in Proemio Dialog. contra Pelag. & S. August. de peccato origin. cap. 2. & ex Clem. Alexand. lib. 5. Strom.

11. Plures autem errores hæresis Pelagiana complectitur, quos omnes recenset S. August. pluribus in locis, præsertim verò in lib. de hæresibus hæresi 88. sed omisissis illis, quibus docuit, Adamum etiam innocentem fuisse moriturum, proinde non peccati poena, sed naturæ conditione mortuum esse; Adæ peccatum ipsi soli nocuisse, non verò toti generi humano; Infantes nasci in eo statu, in quo conditus fuit primus homo, ideoque peccatum originale nequaquam contrahere, & baptizandos esse non ut à peccato mundarentur, sed ut in Regnum Cælorum admitterentur; quantum attinet ad rem nostram, satis sit indicare, homines juxta ejus sensum solis liberi arbitrii naturalibus viribus absque gratiæ adiutorio posse omnia mandata servare, & ad summum gratiæ auxilium conferre ad facilius totam legem implendam, non autem necessario, vel ipsam liberum arbitrium gratiam

esse appellandum, cum gratis à Deo nobis concedatur; vel totam gratiam tribuendam esse doctrinæ & revelationi, per quam nobis innuitur, quid faciendum sit, proinde omnem gratiam internam negavit, externam solum concessit, atque hanc tribui dixit juxta merita uniuscujusque, ne Deus personarum acceptator diceretur; immo adeo internæ gratiæ hostem se exhibuit, ut fatentibus Bellarm. lib. 4. de gr. cap. 8. & Abul. in 19. Mat. qu. 178., nullus actus esset liber, si Deus ad illum suum concursum præberet. Hinc rejiciebantur orationes omnes, quas adhibet Ecclesia live pro infidelibus ut convertantur, live pro fidelibus, ut in fide & gratia perseverent, cum hæc omnia non à Deo accipere, sed à semetipsis homines habere contenderent. Hæc est hæresis Pelagianæ summa, reliqua verò, quæ apud Doctores inveniuntur, valde incerta sunt, nec ad examen & resolutionem vocare nostri muneris est censendum.

12. Hujusmodi hæresis multoties damnata fuit; & primo in Concilio Provinciali Diospolitano, in quo Pelagius ne anathematis poenam subiret, erroribus illis dixit anathema; deinde in pluribus Conciliis Africa, quibus interfuit S. Augustinus, & contra ipsum octo Canones sub nomine Concilii Milevitani circumferuntur; tum ab Innocentio I. & Zosimo Successore, postea in Concil. Ephes. gener. una simul cum Nestorianis; & tandem, ne diuturna series contextatur, à Trident. sess. 5. & 6.

13. Omnino contrarium docuerunt Prædestinatiani, qui in quondam Africæ Monasterio dicto Adrumentinorum habuerunt. Cum enim teste S. Augustino epist. 47. quidam Florus epistolam ejusdem Augustini 105. ad Sixtum legeret, & diffidillimam quæstionem de gratiæ & libero arbitrio explicare niteretur, aliqui non bene intelligentes ita gratiam cœperunt attollere, ut liberum nega-

negarent arbitrium, & sic actum est, ut Pelagiani omnia tribuerent arbitrio, nihil gratiæ, isti omnia tribuerent gratiæ, nihil arbitrio. Aliqui verò ex istis per librum præclarissimi Doctoris de grat. & lib. arbitr. primum errorem derelictos, in alium prolapsi sunt, ut asserere coeperint. Si non possumus non peccare, nisi Deus per gratiam dederit, ut non peccemus, postulandum est à Deo, ut per gratiam suam non peccemus, sed si peccamus, corripiendi non sumus, quem errorem profligaturus Augustinus ad eosdem Monachos scripsit librum de corrept. & gr. ostendens, & postulandum esse à Deo, ne quis peccet, & corripiendum esse, si peccat, quia voluntarie & libere peccat; quæ omnia videri possunt in libris prælaudatis. Utinam tamen hæresis ista suis fuisset contenta temporibus. Ad postrema sæcula suum fervavit ac venenum effudit, siquidem Lutherani, Calvinistæ, Bajani, & Jansenistæ eam gratiæ notam injecerunt, ut liberi arbitrii usum & indifferentiam demeret, ac impediret, contra quos agit Concil. Trident. sess. 7. cap. 4. 5. & 6. tum Bullas ediderunt Summi Pontifices Pius V. Greg. XIII. Urban. VIII. Innoc. X. Alex. VII. contra Bajum & Jansenium.

14. Pelagianorum & Prædestinationum erroris proscripto damnatoque ortum habuit alia secta, quæ Semipelagiana nuncupata est, quia ejusdem auctores in aliquo à Pelagio recederent, in aliquo ipsi adhererent, atque istos fuisse Joannem Cassianum, & inde Faustum communissimè notant Doctores, quamvis excusentur, & ut Catholici habeantur, præsertim primus, quia nondum contra ipsos quidpiam fuerat definitum; Plures habuerunt Sectatores in Gallia, præcipue Massiliæ Episcopos & Presbyteros, & propterea Massiliensium error fuit appellatus. Recedebant profecto à Pelagio, docentes, ut colligitur ex epistolis Prosperi & Hilarii, omnes homines peccato originali ob-

noxios nasci, nec à peccato, nisi per Jesu Christi gratiam liberari posse; adhærebant verò, asserentes, huius salutis initium, seu primum actum fidei esse à naturalibus viribus liberi arbitrii, & à Divina gratia solam conservationem, & fidei augmentum præstari. Hic est præcipuus ipsorum error, cui deinde, tanquam fundamento alii additi sunt in ædificium; videlicet, gratiam Christi, æternamque salutem omnibus sine exceptione propositam esse, & ita quicumque per naturæ vires ad fidem & baptismum accesserint, eam, qua salvi fieri possint, gratiam consequerentur; Prædestinationem, per quam Deus nullis præcedentibus meritis aliquos eligit, & aliquos in massa perditionis relinquit, esse omnino rejiciendam tanquam à Patribus alienam, & fatalis necessitatis inductivam; Deum per legem, vel per prædicationem omnes homines ad salutem vocare, sed sicut illi, qui vocationi non obediunt, hoc ex libero solum faciunt arbitrio, ita & qui obediunt, & hoc pacto tantam vim ad bonum habere, quantam ad malum, ita ut si eligant bonum, subsequenter gratiæ donum mereantur, si malum gratiæ subtractione mulcentur; Aliquos infantes merito proprio baptismum suscipere & salvos fieri, aliquos nequaquam, quia qui baptismum suscipiunt, suscipiunt ob præmium honorum operum, quæ facturos fuisse Deus prævidit, si vixissent, alii è contrario, quod & asserabant rationem reddentes, cur ad unam Provinciam Evangelii gratia perveniat, ad aliam minimè. Christum æqualiter mortuum esse pro omnibus, & æqualiter Deum velle, omnes homines salvos fieri, unde salutis consequutio non ad Divinam prædestinationem, sed ad proprium spectabat arbitrium, atque ex hoc fiebat, quod, cum ad salutem requireretur obedientia hominis, & gratia Dei, prius esset hominem obedire, quam Deum gratiam elargiri, & sic voluntas hominum sibi Divinam opem-

com-

compararet, non gratia humanam dis-  
poneret ac sibi subderet voluntatem.  
De hisce omnibus per epistolas Prosperi  
& Hilarii admonitus Augustinus de  
prædestinatione Sanctorum, & dono  
perseverantiae libros scripsit, sed frustra;  
cum Semipelagiani correcti non sint,  
immo defuncto Augustino ita ejus do-  
ctrinam voce ac scripto persequi ausi  
sunt, ut Prosperum & Hilarium hæreti-  
cos appellaverint, qui cum ipsorum  
pertinaciæ resistere non valerent, ad  
Celestinum Papam Romam confuge-  
runt, à quo ad Episcopos Galliæ data  
sunt epistolæ, in quibus Augustini do-  
ctrina commendatur, ac Semipelagia-  
nus error damnatus fuit, quod & factum  
in secundo Arausicano Concilio per  
25. Canones & tandem à Concilio Tri-  
dentino. Et hæc satis dicta sint tam ad  
agnoscendas hæreses, earumque diver-  
sitates, quàm ad clarius ea decernenda,  
quæ in hoc opere statuenda erunt. Ve-  
rum ad aliis faciliorem viam parandam,  
ad aliam partem hujus quæstionis pro-  
grediamur.

### ARTICULUS III.

*Explicantur diversi status naturæ  
humanae.*

15. **N**omen hoc *status* multifariam  
accipi solet, prout diversæ  
materiæ postulat ratio. Si juxta sensum  
juris civilis loquamur, significat condi-  
tionem personæ vel servi, vel inge-  
nui &c. ut habetur §. de statu hominum;  
si juxta morem Theologiæ moralis, ex-  
primit rationem quamdam vivendi cum  
aliqua speciali obligatione, & sic ap-  
pellatur status Matrimonii, Religio-  
nis &c. Neutro tamen modo in præsen-  
tiarum usurpatur, sed præcisè ut expli-  
cat conditionem & modum, quo se habet  
humana natura per ordinem ad suum  
ultimum finem secundum Divinæ Pro-  
videntiæ consilium, quemque defini-  
vit Scot. in 1. dif. 3. qu. 3. art. ult. *Sta-*

*tilem permanentiam legibus Divinæ Sa-  
pientiæ firmatam. Legibus* inquam, nam,  
cum homo liberi arbitrii facultate in-  
utramque partem verti possit, necesse  
est, ut in aliquo statu certa lege firme-  
tur, ex qua in natura humana stabilis  
& permanens obligatio progrediatur.

16. Generatim loquendo duplicem  
statum hominis distinguunt Theologi,  
nimirum termini & viæ, idest statum  
hujus vitæ, qua ad acquirendam bea-  
titudinem labores impendimus, & sta-  
tum patriæ, qua beatitudinem acqui-  
sitam jam possidemus, atque hic anto-  
nomasticè dicitur status, quia solus est  
omnium bonorum aggregatione com-  
pletus, & perfectam præferat stabili-  
tatem, ut ait Boetius. (Statum damna-  
tionis hic non recenseo,) nam licet hic  
etiam sit status termini, attamen cum  
non sit gratiæ capax, ad rem nostram  
non facit. De statu beatitudinis nihil  
dicendum occurrit, cum de hoc sermo  
contingat, ubi de beatitudine pertra-  
ctatur. Statum vero viæ veteres Theo-  
logi duplicem assignarunt, videlicet  
illum innocentie, in quo conditi fue-  
runt primi parentes, & illum naturæ  
lapsæ, in quo post originale peccatum.  
ipsi cum suis posteris permanserunt.  
Recta quidem divisio, si status illos ve-  
limus complecti, qui revera fuerunt,  
diminuta vero, si illos non velimus  
omittere, qui vel esse possunt, vel po-  
tuisse, proinde à Theologis nostro-  
rum temporum quinque status commu-  
nissimè inferuntur, idest, justitiæ ori-  
ginalis, gratiæ gratum facientis, naturæ  
integræ, naturæ lapsæ, & naturæ puræ.

17. Status justitiæ originalis habet-  
ur per rationem perfectè subjectam  
Deo ut fini naturali ac supernaturali,  
& per sensum perfectè subjectum ratio-  
ni, ita ut ex hujus ordinis perfectione  
non solum habeatur gratia gratum fa-  
ciens cum habitibus infusis virtutum  
Theologicarum & Moralium, sed etiam  
immunitas à quacumque molestia &  
dolore, immo immortalitas, non qui-  
dem

dem positivè ita ut mori non posset, sed negativè, ita ut posset non mori; Qui tamen effectus, quantum ad corpus attinet, permanente ipsa originali iustitia separari possunt, ut constat in Beatissima Virgine & ipso Christo Domino contigisse.

18. Status gratiæ gratum facientis, qui dici solet novæ Legis ac Evangelii, est quasi integralis perfectio iustitiæ originalis, ab ipsa tamen distinguitur, cum communis sit tam homini in origine iusto, quam etiam iusto post lapsum, atque huius status perfectio explicabitur, cum de gratia habituali agendum erit. Appellatur etiam status naturæ reparatæ, & libertatis, cum in eo liber evaserit homo à servitute & Dæmonis potestate, sub qua miserrimè detinebatur.

19. Status naturæ integræ sumitur hic strictè, non scilicet pro integritate naturæ juxta perfectiones sibi naturaliter debitas in sensu Durandi, sed prout habet quamdam specialem perfectionem relidentem in carentia fomitis & rebellis concupiscentiæ, seu in subjectione appetitus sensitivi rationali. Ex hoc plures Theologi cum S. Thom. 1. 2. qu. 106. art. 1. & 2. Sot. lib. 1. de nat. & gr. cap. 5. naturam integram ab innocente originaliter non distinxerunt. Illi verò qui distinguunt, ut communiter fit, vel dicunt, hoc esse discrimen, quod natura origine innocens ultra naturam integram involvit etiam pactum & promissionem transfundendi in posteros naturæ integritatem; vel quod iustitia originalis haberet indefectibilem ordinem subjectionis, quam integritas naturæ non habet; vel quod (& hoc asserere magis placet) naturæ integræ non sit necessàrio annexa gratia sanctificans aut aliquod donum in substantia supernaturale, è contra iustitiæ originali, & sic hæc illam includat, non ab opposito, & ita fiat distingui ad instar includentis & inclusi, ut inquirunt.

20. Status naturæ lapsæ ita appel-

latur post Adæ peccatum transfusum in omnes homines, vi cujus tota natura humana remanet infecta; requiritur autem huiusmodi transfusio ad talem denominationem, & ideo licet plures Angeli peccaverint, non dicitur lapsa natura Angelica, quia peccatum Luciferi non fuit in alios transfusum. Per huiusmodi lapsum remanet nunc natura humana destituta donis integritatis, immortalitatis, & gratiæ sanctificantis, quibus intrinsicè ad supernaturalem beatitudinem tendebat, remanet tamen adhuc ordo ad illum finem antecedentem.

21. Status naturæ puræ explicatur per hoc, quod natura humana habeat omnes perfectiones sibi naturaliter debitas, concursum ac providentiam generalem, nihil tamen illi sit superadditum boni vel mali in linea morali saltem in sui primordiis. De hoc autem quaritur, utrum esse potuerit. Quapropter.

#### ARTICULUS IV.

*An potuerit homo in statu naturæ puræ creari à Deo.*

22. **E**T si à quæstionibus, quas de possibili instituunt Theologi, summopere abhorream, aliquæ tamen ex istis sunt, ex quarum resolutione multa utilia, immo & necessaria colliguntur. Huiusmodi est proposita difficultas, ex qua clarius apparebit illorum donorum dignitas, ex quorum destitutione natura pura consurgeret.

Quod inquiritur, à Deo ut auctore supernaturali fieri posse, certissimum est apud omnes Doctores, cum in hoc nulla appareat repugnantia. Posse etiam creari independenter in natura à quocumque peccato libera, ita de fide censendum est, sicut Dogma Fidei est Deum esse non posse auctorem peccati, & ideo condendo naturam, ipsi non potest culpam infundere, quæ solum vel

ab aliqua radice infecta, vel à propria voluntate proficiscitur. Quæstio igitur reducitur ad Deum, ut authorem naturalem, & ad puritatem naturæ juxta carentiam donorum spectantium ad integritatem, immortalitatem, & gratiam gratum facientem ad supernaturalem, finem conducentium.

23. Dixi in titulo, *an potuerit*. Nam si loquamur de eo, quod factum est, nulla fuit intellectualis natura, quæ ordinem ad finem supernaturalem non habuerit, proinde caruerit mediis ad eundem conducentibus, hæc enim à Deo condita, vel fuit angelica, vel humana, de illa autem loquitur Sanctus Augustinus 12. de Civit. cap. 9. quod *Deus simul erat in eis condens naturam, & largiens gratiam*. Et fundamentum desumitur ex Scripturis illis, quas in tractatu de Angelis Theologi congerunt; De humana vero legitur Eccles. 7. *Deum fecisse hominem rectum*, & Trid. sess. 5. in decreto de peccato originali inquit: *Adam peccando amisisse sanctitatem, & iustitiam, in qua constitutus fuerat*.

24. Sed si etiam revocari posset in dubium, utrum primo creationis instare gratiam hanc ipsis Deus fuerit largitus, attamen in puris perfectionibus naturalibus non fuisse conditos, certissimum esset existimandum; Siquidem, etsi gratia habituali sanctificante caruissent, attamen ad finem supernaturalem assequendum fuerunt creati, debuerunt ergo habere auxilium paratum, & vim proximam ad gratiam consequendam, per quod auxilium, & per quam vim potuissent non peccare, & gloriam promereri, si voluissent. His prænotatis tamquam certis.

25. Dicendum. Potuisse à Deo, ut authore naturali produci statum naturæ puræ. Est contra Bajum & Janfenium, tum contra Estium & Contensonium, qui tamen diversis innituntur fundamentis.

Prob. Potest Deus hominem creare sine donis gratiæ, integritatis, im-

mortalitatis, & ordine positivo ad finem supernaturalem, sed ita homo esset in statu puræ naturæ, ergo. Prob. maj. Potest Deus creare hominem absque omnibus præfatis donis, si hæc non sint homini connaturalia & debita, sed hæc non sunt homini connaturalia & debita, ergo. Minor plures amplectitur partes, singulæ probandæ sunt.

26. Prob. prima, quæ est de dono gratiæ, quam esse beneficium singulare, & omnino à creatione distinctum, docent contra Pelagium Sancti Patres, præsertim S. August. ep. 95. & ubique; ratione sic. Si gratia esset donum connaturale & debitum homini, etiam amicitia Dei, jus ad gloriam, & beatitudo æterna essent aliquid connaturale & debitum, cum hæc omnia vel sint effectus, ut ajunt, formales primarii gratiæ, aut gratiæ consecratoria, sed illud non est dicendum, ergo. Prob. min. Primo quia eo admissio, jam error Pelagii tutissimè subsisteret, ac merito dici posset, hominem solius naturæ viribus hæc sibi comparare, sicuti quia facultas visiva est ipsi connaturalis, dicitur viribus suæ naturæ videre. Secundo quia Dei filiatio, & vita æterna non bene dicerentur in Scripturis *gratia Dei*, & *quidem in Christo Jesu*. Nec teneret quod ait August. contra Maximum, cap. 55. *Homo ad Dei similitudinem factus non est verus filius, & ideo fit gratia filius, quia non natura*. Nec quod inquit Cyrillus lib. 1. in Joan. cap. 13. *Creatura, cum serva sit, solum voluntate Patris ad supernaturalia elevatur*. Justè propterea damnata fuit à Pio V. & Gregorio XIII. hæc propositio 21. Baii. *humana naturæ sublimatio, & exaltatio in consortium Divinæ naturæ debita fuit integritati primæ conditionis, & proinde naturalis dicenda est, non supernaturalis*.

27. Prob. secunda pars primæ minoris, quæ est de dono integritatis, quod connaturale homini esse fatentur duo authores citati in oppositum, & juxta



juxta hoc sententia nostræ contraria, non est censuræ obnoxia, sicut in sensu Baii & Jansenii. Donum integritatis est perfecta sensus rationi subiectio, & rationis Deo, ita ut concupiscentiæ motus rationem non præveniat, & magis homo non moveatur ab objecto purè delectabili, & ab honesto retrahatur, sed hujusmodi subiectio non est homini connaturalis, ergo neque donum integritatis. Prob. iii. Connaturale est homini percipere delectabile immediatè per sensum; honestum vero mediatè per rationem sensuum ministerio, ergo connaturale est magis, quia immediatè, moveri à bono delectabili, minus vero & mediatè ab honesto. Hæc est doctrina Sancti Augustini dicentis lib. 4. contra Julianum cap. ult. *Gratia magna ibi erat, ubi terrenum & animale corpus bestialem libidinem non habebat*. Hinc, quemadmodum delectabile fere semper opponitur honesto, ita sensus in sui natura spectatus opponitur rationi, proinde illius subiectio nequaquam connaturalis censenda est.

28. Prob. tertia pars, quæ est de dono immortalitatis, idest perpetuæ animæ corporisque conjunctionis, si enim de immortalitate animæ disseramus, hæc procul dubio, utpote substantia spiritualis, immortalitate gaudet, ut probatur in tractatu de anima, & tamquam Dogma Fidei est definitum. Animam à corpore separari, quod est hominem mori, est omnino connaturale homini, ergo non est ipsi connaturalis immortalitas. Prob. ant. Animam à corpore separari exigitur à principiis intimis naturæ constitutivis, etenim si loquamur de principio substantiali, hæc est materia, quæ ubicumque sit, semper est principium corruptionis, si de principiis accidentariis & quodammodo extrinsecis. hæc sunt primæ qualitates, quæ naturaliter inter se pugnant, & subiectum ad corruptionem, & interitum disponunt. Ergo. Hæc est Sanctorum Patrum doctrina, Sancti Au-

gustini 13. de Civit. cap. 30. de Adami immortalitate dicentis: *Qui status ei de ligno vitæ, quod in medio Paradysi cum arbore vitæ simul erat, mirabili Dei gratia præstabatur*. Et Sancti Cyril. 1. in Joan. cap. 15. hæc habentis. *Homo à Deo productus, quia natura sua incorruptibilis, atque perpetuus esse non poterat, spiritu vitæ signatus immortalitatis bonum supra naturam suam consecutus est*. Justissimè propterea damnata fuit hæc propositio Baii. *Immortalitas primi hominis non erat gratiæ beneficium, sed naturalis conditio*. Tandem pro quocumque ex hisce donis à naturæ legibus excludendo, valet axioma illud Theologicum acceptum à S. Dionys. 4. de Div. Nom. nimirum. *Naturalia hominis & Angelorum post peccatum integra permansisse*. Atqui nec gratia, nec integritas, nec immortalitas permanserunt, ergo quia non sunt homini connaturales,

29. Quod probat primam partem minoris probat & quartam; sed ad advertendum est, duplicem finem posse ac distinguere debere, supernaturalem unum, alium naturalem; Ille consistit in æterna beatitudine, & intuitiva Dei visione, de qua dicitur 1. ad Corint. 2. *Nec oculus vidit, nec auris audivit, nec in cor hominis ascendit, quæ præparavit Deus iis, qui diligunt illum* quemve non nisi gratiæ virtute possunt homines comparare, *gratia enim Dei vitæ æterna*. Naturalis vero collocatur in cognitione naturali & mediata Dei habita per creaturas. Iste conveniret homini in statu puræ naturæ, non ille, & ita convenirent media servantia proportionem cum uno, nequaquam cum alio. Sicuti vero cognitio in naturalem & supernaturalem distinguitur, ita & distinguitur amor, qui naturam sequitur cognitionis, propter quod damnata fuit illa propositio Baii. *Distinctio duplicis amoris, quo amatur Deus, ut auctor naturæ, & gratiæ, quo Deus amatur, ut glorificator, vana est & commentitia*.

At-

Atque hoc satis colligitur ex Concil. Trident. quod sess. 6. Can. 3. definiens, auxilium Spiritus Sancti necessarium esse ad diligendum Deum sicut oportet, ut justificationis gratia conferatur, indicat alium amorem præter supernaturalem possibilem esse.

30. Hæc prætermissa non sunt, ut occurramus primo argumento, quod promoveri solet, videlicet, in homine esse connaturalem ordinem ad Dei visionem & beatitudinem, quod tamen sic magis contra doctrinam datam proponitur. Primo quia etiam in statu puræ naturæ esset servanda lex, & resistendum gravissimis tentationibus, immo agenda pœnitentia, ut oportet, ut à culpa liberarentur qui peccassent, & Deus super omnia diligendus, atqui hæc omnia sine gratia haberi non possunt, ergo etiam huic statui fuisset gratia connaturalis. Secundo; quia beatitudo naturalis præcisè ultimus finis hominis esse non potest, siquidem in ultimo fine debet homo perfectè quiescere, at in sola naturali beatitudine quæ perfecta quies? Carens supernaturali, maximo bono careret, & tanto crescit animi anxietas, quanto crescit bonum, cujus carentiam experitur. Tertio quia ex S. Th. 3. contra gen. cap. 6. & Scoto in 4. dis. 49. qu. 9. est in homine appetitus naturalis videndi Deum intuitivè, qui appetitus in naturæ capacitate consistit, ergo debent esse in homine naturaliter media, per quæ hujusmodi appetitus expleri non prohibeatur.

31. Sed contra ad primum. Ea omnia vera sunt, sed semper in linea naturali, ad hæc autem non requiritur gratia supernaturalis, de qua sermo noster, sufficit naturalis, quæ nequaquam extraheret naturam illam à sua puritate, præsertim quia non esset ad instar qualitatis permanentis, sed merè auxilii actualis. Quod dico de naturali gratia, dico etiam de actuali peccato, quod esse potuisset in sensu composito ejusdem naturæ, non enim peccatum

illud esset lapsus à gratia supernaturali, & cum dicitur natura puræ quacumque gratia & peccato carere, intelligitur quantum ad ejusdem primordia, non ad totius vitæ decursum, cum deficere & peccare connaturale sit cuicumque naturæ defectibili & peccabili. Ad secundum; in beatitudine naturali perfectissimo modo juxta propriæ naturæ exigentiam illa natura quiesceret, & quidem tamquam in bono increato sed naturaliter se explicante, neque carentia beatitudinis supernaturalis aliquam animi anxietatem affert, tunc enim solum privatio boni torquet ac angit, cum bonum cognoscitur & amatur, in nostro autem casu Deus ut author supernaturalis neque cognosceretur, neque amaretur. Ad tertium dico, dari hunc appetitum innatum in natura, quæ de facto est, vel esse appetitum innatum, sed tantummodo remotum, situm in non repugnantia, in quo sensu dici posset, creaturam etiam appetere unionem hypostaticam, & scientiam per se infusam, quod ad rem nostram non est. Suarez tamen, alique Doctores absolute negant.

32. Opp. secundo. Subjectio sensus rationi debet naturaliter convenire creaturæ rationali, ergo integritas est donum connaturale. Antecedens multifariam ostenditur. Primo quia naturaliter creatura subicitur Deo, ergo etiam sensus rationi. Secundo quia natura postulat, inferiorem subdī superiori. Tertio quia, etsi appetere bonum delectabile rationi contrarium, proprium sit appetitus sensitivi, ut sensitivus est, non tamen, ut hominis est. Quarto ex S. Th. 1. 2. qu. 82. art. 3. ad 1. *Quia in homine concupiscibilis naturaliter regitur ratione, in tantum concupiscere est homini connaturale, in quantum est secundum rationem, concupiscentia autem, quæ transcendit limites rationis, inest homini contra naturam.* Ergo.

33. Resp. tria priora argumenta, vera esse de subiectione physica & ci-

vili, non morali perfecta, & disposita: Subjectio enim moralis, quæ est ad rem nostram, commensuratur amoris, amor autem in Deum naturalem est imperfectus & cum reluctantiâ; Est insuper sensus, ut docet S. Th. 1. par. qu. 81. art. 3. ad 2. subjectus rationi sicut Civis Principi, & femina viro, non vero sicut servus Domino, datur itaque in eo facultas resistendi, ipsamque præoccupandi, præsertim ubi agitur de proprio bono. Auctoritati S. Th. aliisque similibus, quas habet S. August. lib. 6. contra Jul. cap. 5. dicendum; ibi sermonem esse de concupiscentia, quæ à peccato originali ortum deduxit, & per respectum ad naturam à Deo in iustitia originaria creatam; ait enim S. Doctor immediatè post exposita verba. *Et talis est concupiscentia originalis peccati.* Ubi est etiam advertendum, huiusmodi concupiscentiam in natura pura non futuram fuisse aut culpam aut poenam, quia ut inquit idem Doctor in 2. dis. 31. art. 2. ad 3. *Hæc ex principiis naturæ consequitur, non tamen isto defectus in se rationem culpæ vel pænæ habuisset, quia non per voluntatem causatus esset.* Atque ita sit, concupiscentiam pro hoc statu non propriè tribuendam esse Deo tanquam auctori, sed ipsi naturæ, quæ utpotè secundum se finita, defectibilis, & corporea exigit divisionem inter partem inferiorem & superiorem, aut si posset tribui Deo, esset tantum in sensu negativo, quatenus Deus noluit à natura huiusmodi defectus remove, sed nihil mirum, non enim tenetur Deus ad id, quod est melius ex parte objecti, alioquin debuisset etiam creare naturam sine facultate peccandi, quod tamen neque in creatione Angelorum, nec hominis in statu innocentie, non evenit.

34. Oppon. 3. Status naturæ puræ, ut dictum est, excludit peccatum, ergo etiam pugnat inter carnem & spiritum, consequentia tenet, nam sensui contra rationem insurgenti connaturale est

peccatum. Secundo: Si &c. potuissent post primum creationis instans excitari motus contrarii, tunc ratio vel fuisset superior, vel non, si primum, hoc gratiæ beneficio factum esset, & sic natura pura non fuisset; Si secundum, jam peccasset, & sic lapsa esset, ergo. Tercio. Concupiscentia est aliquod vitium cum ad malum inclinet, sed naturæ puræ nequit esse connaturale aliquod vitium, ergo neque concupiscentia. Quarto. Natura rationalis, cum in se bona sit, nequit connaturaliter habere materiem iustæ erubescentiæ, quæ tantum de malo est, sed concupiscentia seu divisio &c. est iusta materies erubescentiæ, ergo. Tandem motus concupiscentiæ essent naturæ consentanei, non esset igitur laudabile illos reprimere, quod dici nequit,

35. Responsio jam data est utrique argumento; Sed potius dici deberet, connaturalem esse facultatem peccandi. quàm peccatum, & quidem in linea purè naturali, ut discrimen sit inter naturam puram, & lapsam, quæ nunc est; Si vero ratio fuisset superior, per gratiam actualem in linea naturæ fuisset; quod si inferior, natura evasisset lapsa, sed solummodo à iustitia naturali, atque ita fuisset in natura mutatio tantum accidentaria, non in substantia, & in ordine. Quod si etiam per huiusmodi lapsum destrueretur status naturæ puræ, non ideo impossibilis probaretur, aliter etiam status iustitiæ originalis impossibilis fuisset, cum tam brevi duraverit; ratio autem esse potest, quia ad rationem status requiritur posse permanere, non autem necessario permanere, cum semper habeatur libertas. Constat pariter, quid respondendum sit tertio, id est, concupiscentiam esse quodam vitium physicum naturæ juxta doctrinam Sancti Thomæ superius adductam; quod si ad malum inclinat, huiusmodi inclinatio ad malum non determinat, sed contra ipsam agendi facultatem relinquit. Ad quartum, Si defectus



fectus physici sunt iuxta materias erubescientia, nego majorem, & concupiscentia convenit naturæ, non ut bona est, sed ut necessario defectibilis est, ut à Divina distinguatur; & pariter ejusdem motus non sunt naturæ consentanei juxta id, quod boni est in natura, sed juxta id, quod est defectus, & ideo laudabile censeri debet, si motus isti cohibeantur, Per quod refellitur ultimum.

36. Oppon. 4. Ubi nullum est peccatum, neque mors, hæc enim per peccatum, tanquam peccati poena, intravit in mundum, sed in natura pura non est peccatum, ergo neque mors, est igitur immortalitas donum conaturale & debitum. Hæc est doctrina Concilii Arausici 2. Can. 2. definientis, injustitiam Deo tribuere asserentes, homines morituros quamvis non peccassent. Præterea. Morerentur ergo homines in illo statu, inquitur: resurgerent ne corpora? Si affirmetur, ergo fuisset opus aliquod miraculo adscribendum, & supernaturale, sicut est resurrectio mortuorum, quod est contra dicta; Si negetur, ergo homo non erit capax neque beatitudinis naturalis, immo anima erit semper in statu violento, semper cum ordine ad corpus, & nunquam corpori reunienda.

37. Resp. in presenti rerum dispositione mortem esse poenam peccati; quia natura condita fuit à Deo cum dono immortalitatis, & justitiæ originalis; atque in hoc sensu loquuntur Apostolus & Concilium, attenta verò sola conditione naturæ, mors non est poena peccati, sed quid consequens ipsam naturam, uti probatum fuit; Hoc pacto dicendum foret, neque sitim neque famem naturæ secundum se convenire. Quod igitur homines non essent morituri, si non peccassent, non erat ex naturali jure, sed solum, ex pacto inito à Deo cum Adamo, quando dixit, quacumque die comederis, morte morieris. Ad 2. respondent aliqui,

corporum resurrectionem in eo statu non fuisse futuram propter rationem in argumento adductam, & beatitudinis capacitatem esse in anima à corpore separata non conjuncta, qua propter animam post separationem non esset in statu violento, neque fervaret ordinem conaturalem ad corpus, cum non esset amplius ejus forma; Quod si dicatur, corpus fuisse poenarum particeps in via, proinde etiam debere esse consolationum in termino, inquitur, corpus fuisse tantum instrumentum, non causam liberam, meritariam, & principem. Aliqui verò dicunt, etiam tunc futuram resurrectionem, sed à Deo ut authore naturali; Si enim Deus ut author naturæ potuit corpus & animam creare, cur etiam non poterit corpus, & animam separatam iterum unire? Quod si in presenti providentia resurrectio miraculo adscribitur, & supernaturalis saltem, quo ad modum existimatur, non miror, cum directa sit ad finem supernaturalem, & ad Divinam Fidem confirmandam, quod in statu puræ naturæ non evenisset. Admissa autem hac resurrectione traheretur natura ad statum integritatis, immortalitatis, immo & impeccabilitatis, quæ dotes ipsi convenirent, non quia natura est, sed quia in termino est, ut constat etiam in natura lapsa. Utraque responsio sufficiens est.

38. Oppon. ultimo. Quamvis hujusmodi dona non essent debita aut ex merito creaturæ, aut ex naturæ dignitate, fuissent tamen debita ex voluntate & munificentia Creatoris; hanc debitam esse titulo promissionis Divinæ, ita non obstat natura, illam debitam esse titulo munificentie conditoris; decebat enim creaturam innocentem participem fieri naturæ Divinæ, & factam ad imaginem Dei suum aliquando exemplar posse videre, dedecebat verò, ipsam tot miseriis atque ærumnis obnoxiam esse, quas secum affert carentia integritatis ac immortalitatis. Hinc generatim loquendo

do inquirunt Sancti Patres, huiusmodi dona connaturalia fuisse, & Celestin. in ep. ad Episc. Gallie ait: *Homines in prævaricatione Adg naturalem possibilitatem & innocentiam perdidisse.*

39. Resp. argumentum jam ex se ipso corruere; si enim hæc dona sunt ex munificencia Creatoris, potuit sine istis natura creari; neque in hoc aliquid actum esset, quod Divinæ tribueretur imperfectioni, ut supra dictum fuit; non obstat autem gratiæ ordini debitum ex Divina promissione resultans, quia cum ipsa promissio ex actu Dei gratuito oriatur, ad gratiæ ordinem spectat, obstaret autem naturæ puræ debitum ex Divina munificencia derivatum, quia si vellet Deus gratuite quidem ipsi dona dicta conferre, jam amplius natura pura non esset. Particeps sit ista naturæ Divinæ, & ad Dei imaginem facta suum videat exemplar, sed modo sibi consentaneo, ut dictum fuit. Neque verò quid in oppositum probant

arum, quibus hæc natura subjecta foret, siquidem naturales essent, & debita substantiæ corporeæ, sicut fuit probatum. Sanctis Patribus respondet Sanctus Thomas inquiriens, aliquando id naturale dici, quod natura recepit incipiens, & in hoc sensu vera est etiam propositio Celestini; Nunc autem naturale id intelligimus, quod non solum incipit cum natura, sed etiam ab ipsa natura exigitur, nec singulari gratiæ tribuitur; Nos ab Apostolo vocamur naturæ filii iræ, nec tamen hoc convenit naturæ, ut natura est.


Dices. Cur ergo Augustinus pluribus in locis contra Julianum ex ærumnis & morte probat, peccatum originale in omnes derivasse? Argumentum hoc nullum esset, si essent debita naturæ. Dico, bene Augustinum probare, quia loquebatur in suppositione etiam admitta à Juliano, nimirum hominem fuisse conditum in iustitia, quæ si perseverasset, ærumnæ nullæ fuissent.

## QUÆSTIO II.

### De Homine in statu Innocentiæ.

#### ARTICULUS I.

*An Adam habuerit rerum omnium scientiam.*

1. UM quælibet perfectio à Deo clementissimo conditore Adamo concessa in ipsius intellectu & voluntate refulserit, ut ipsam in medium producamus, ejusdem intellectum & voluntatem necesse est consideremus. Hinc primo inquirimus, quod in titulo exposuimus.

Sentiendum affirmativè. Quod quidem colligitur, ex pluribus Scripturæ locis. *Adduxit enim Deus omnia anima-*

*lia ad Adam, ut videret quid vocaret ea.* Gen. 2. Ipse autem imposuit nomina juxta eorumdem proprietates, quod sine eorum cognitione evenire non poterat. Ecclesiast. 17. legitur: *Disciplina intellectus replevit illos, creavit illis scientiam spiritus, sensu implevit cor illorum, & mala & bona ostendit eis.*

2. Si autem ratio quæritur, hæc primo affertur ex parte Dei, cujus perfecta sunt opera, si autem condidit Adam perfectum secundum corporis perfectionem, multo magis secundum animæ dotes, quas licet temporis decursu potuisset acquirere, atamen magis congruum fuit à principio infundere, sicut licet corporis statura annorum processu comparari possit, & arbores juxta

juxta anni temperiem fructus valeant producere, attamen ipsum constituit in statura perfecta, & plantas cum fructibus procreavit. Assertur secundo ex parte ipsius hominis, factus enim erat Adam non solum quantum ad corpus, ut alios posset homines generare, sed etiam quantum ad animam, ut homines posset instruere & gubernare, atqui ut alios generare posset, habuit in ipsa creatione perfectam virtutem, ergo ut alios posset instruere & gubernare habuit in ipsa creatione perfectam scientiam.

3. Est tamen distinguenda cum Sancto Thoma hic qu. 49. art. 3. in corp. duplex scientia, una necessaria ad vitam gubernationem, alia nequaquam. Prima data fuit Adæ etiam secundum ea, quæ vim naturalem excedunt, cum Deus non deficiat in necessariis; Secunda minimè, ut ver. gr. sunt lapilli in flumine, arenæ in mare, & cogitationes in hominibus, cum Deus non impertiatur superflua, immo nec ista efficiat.

4. Cum autem res ab homine cognoscibiles sint in triplici ordine, nimirum materiales, summè immateriales, ut est Deus, & mediæ inter materiales & immateriales, ut spirituales creaturæ, quæri potest, utrum circa istas omnes infusa fuerit Adæ scientia, & jam quantum ad primas patet ex dictis; Quantum verò ad Deum, nullam video dubitandi rationem, cum enim possit Deus naturaliter cognosci, immo sit præcipuum humanæ cognitionis objectum, hanc procul dubio Adamo concessam esse contendo. Talis autem fuit ejus scientia, ut specie cum nostra conveniret, quamvis in perfectione accidentaria multum excederet præsertim in actuali consideratione, cum ea non ferret impedimenta, quæ in nobis experimur; atque hinc est, quod ait S. Thom. *Non impediri per res exteriores à clara & firma contemplatione intelligibilium effectuum, quos ex irradiatione primæ veritatis percipiebat*; nisi forte hoc sit explicandum de supernaturalium re-

rum cognitione, de qua infra dicemus. Coeterum quod habetur in Scriptura, *Deum nemo vidit unquam* cum sit propositio universalis, etiam ad Adamum referendum esse, non est cur ambigamus. Quod si Deus ad formandam Evam immisit soporem in Adam, quem aliqui explicant pro elevatione mentis ejus ad claram Dei visionem, dico, hanc explanationem omninò gratis afferri, nec ullum fundamentum habere vel in Scriptura, vel in Sanctis Patribus.

5. Quantum verò ad Angelos fortasse magis dubitari posset, quia licet homo minus distet ab Angelis, quam à Deo, tamen in cognitione magis distat ab Angelis, cum res creatæ non ab Angelis pendeant, sed à Deo, & ideo in Dei notitiam, non in Angelorum cognitionem promovere possunt. Attamen Affirmativam sententiam amplecti debemus; Si enim de facto ex motu Cælorum cognovit Aristoteles intelligentias motrices & substantias separatas supra Cælum habitantes, ut ex 1. de Cælo colligitur, hoc potiori jure concedendum Adæ videtur.

6. Immo adeo excellentem tum Dei, tum Angelorum cognitionem. Adæ aliqui existimarunt, ut tam Deum, quam Angelos per essentiam vidit, protulerint. Utraque tamen pars tanquam falsa est rejicienda; Et primo, si Adam cognovisset Deum per essentiam, nequaquam peccasset, nam fuisset Beatus, & per talem visionem ita homo constituitur & in Dei amore stabilitur, ut vel formaliter, vel radicaliter saltem, juxta diversorum principia, peccare non possit; peccavit autem Adam, adeoque Deum per essentiam non vidit, quod quidem clarè colligitur ex Apostol. 1. ad Corinth. 15. ubi ait: *Non prius quod spirituale est, sed quod animale maxime autem spirituale est Deum per essentiam videre*. Quod si Adam in illo felici statu beatus nuncupatur, ut habetur ex S. August. 4. de Civit., non est sermo de illa beatitudine, in quam trans-

transferendus erat, & quam ab essentia Divinæ visionis progredi affirmamus, sed solummodo secundum quemdam modum; idest, secundum integritatem & perfectionem naturalem, ut tradit idem S. August. 11. super Gen. ad lit. Nec obstat, Adam vidisse Deum sine medio, ut innuit Magis. Sent. in 1. dist. 4. & sine aliqua obscuritate, ut docet S. Aug. 15. de Trinit. cum hæc obscuritas introducta sit per peccatum; Duplex siquidem medium distinguendum est; Unum, per cuius notitiam in aliquod ignotum devenimus, sicut est in demonstratione, & secundum hoc primus homo Deum non vidit, cum non oporteret in Dei cognitionem per demonstrationem sumptam ab aliquo effectu procedere; Aliud, in quo simul videtur quod per medium videri dicitur, ut homo qui videtur per speculum, & simul cum speculo, & secundum hoc primus homo vidit Deum, cum in ipsis effectibus ipsum suo tamen modo cognosceret. Duplex etiam obscuritas est distinguenda; Una, quæ ortum duxit à peccato, prout homo abstractus à sensibilibus impeditur à consideratione intelligibilium, & sine huiusmodi obscuritate fuit Adami cognitio; Alia, quæ oritur ex conditione cujuslibet creaturæ, quæ censetur quodam obscurum si claritati Divinæ comparetur, & sic Adam vidit obscure Deum, quia per effectum creatum.

7. Dicendum etiam, Adam per essentiam non cognovisse Angelos, nam anima ejus erat in eadem specie, in qua nostra, sed nostra non cognoscit Angelos per essentiam, ergo neque anima Adami; ratio autem est, quia anima primi parentis erat accommodata ad tribuendam corpori vitam, quapropter dicitur, factus est homo in animam viventem; prout autem est ita accommodata, dependet in sui cognitione a conversione ad phantasma, proinde apta non est ad cognoscendas per essentiam res spirituales, sicut sunt Angeli.

8. Cognovit utique Adam Angelicam substantiam perfectiore modo, quam nos cognoscamus, cum iis impedimentis, quibus nos detinemur, non teneretur, ejusdemque notitia esset magis certa, & fixa circa interiora intelligibilia, propterea ait Gregor. IV. Dial. *Hominem in Paradiso verbo Dei perfrui, bonorum Angelorum spiritibus cordis munditia, & celsitudine visionis interesse.* Neque officit, unam substantiam separatam cognoscere aliam cognoscendo se ipsam, nam hoc est verum, si in alia non detur excessus: sicut certum est, Angelos se ipsos cognoscere, nec tamen cognoscendo se ipsos cognoscunt per essentiam Deum propter maiorem excellentiam, quæ reperitur in Deo; Quod si corpus Adæ nullo gravamine ipsius animam afficiebat, hoc non probat, nam carentia cognitionis non oriebatur ex corpore animæ non subdito, sed ab objecto longè excellentiori, & à phantasmate nimis remoto; in nobis autem propter utrumque contingit.

9. Nunc de Scientia Adæ circa res supernaturales aliquid definiendum; Qua in re plura nostræ fidei mysteria sunt recensenda; neque verò ea placet asserere ita nota Adæ, ut ipsorum scientiam habuerit, sed tantummodo revelationem, seu evidentiam, ut inquirunt, in attestante, alioquin fides esset ab eo excludenda, quod consonum non videtur, nam Adam in statu innocentie placuit Deo, & justus fuit; *Justus autem ex fide vivit* 2. ad Hebr. 10. & *sine fide impossibile est placere Deo* ad Hebr. 11. & *dum sumus in corpore, & peregrinamur à Domino, per fidem ambulamus.* Adam autem verè fuit in corpore & viator. Sed posset etiam excludi ab Adamo evidentia in attestante, primo quia non spectat ad fidem haberi necessario per externam loquutionem, sed haberi etiam potest per interiorem inspirationem, juxta illud psal. 83. *Audiam quid loquatur in me Dominus Deus.* Secundo quia potuerunt manifestari mysteria

steria per Angelum; tertio quia licet fuissent à Deo immediatè revelata, non videbat clarè personam loquentem, quæ omnia dicta sunt, ut fidem asseramus in Adamo, licet componi non posset cum evidèntia in attestante, ut plurimum fert Theologorum opinio, contra quos nos diximus in fidei tractatu.

10. Incipiendo autem à Divinitatis Mysterio, dicendum, hanc primi parentis cognitioni fuisse concessam; nam quod ait Apostolus: *Accedentem ad Deum, oportet credere quia est, & inquirentibus se remunerator sit*, fuit omni tempore ad salutem necessarium, ergo etiam Adami in statu innocentiae. Si vero de Trinitatis Mysterio fiat sermo, clara est autoritas Epiph. contra hæres. in præf. *Novit Patrem, Filium, & Spiritum Sanctum, Propheta enim erat, quia novit, quod Pater dixit Filio. Faciamus hominem ad imaginem & similitudinem nostram*. Quod si hoc valet pro toto tempore vitæ Adæ, ut plures Epiphanium intelligunt, multo magis pro statu innocentiae, non enim concedendum est majus privilegium ipsi in natura lapsa, quam in natura integra.

11. Magis dubitare possumus, utrum etiam mysterium Incarnationis fuerit primo parenti revelatum. Videtur enim negativè sentiendum præsertim in illorum sententia, qui dicunt ante Christum fuisse prædestinatum, tum aliorum, asserentium Adamo non peccante Verbum Divinum non fuisse carnem assumpturum; & tandem quia sicut gratia Adæ non fuit ex meritis Christi, ita neque fuit ex fide.

12. Rationes tamen istæ non movent; nam quantum ad primam consultius dicimus, si dicamus Christum fuisse primum prædestinatum, & caput omnium prædestinatorum, ut passim colligitur ex Epistolis S. Pauli, & nos in tract. de Verbi Divini incarnat. ex instituto probabimus. Quantum ad secundam, jam in primis falsum est dictum juxta Scotistarum principia, quæ à me

Tom. II.

propugnantur; deinde dico, Incarnationis mysterium fuisse Adæ revelatum, non quatenus ordinem servabat ad liberationem à peccato, sed quatenus tendebat ad gloriæ consummationem, & in hoc sensu etiam gratia Adæ fuit ex meritis Christi, unde patet ad tertiam. Concludamus ergo cum S. Prosp. in primo cap. de prædest. & promiss. Dei. *Sacramentum magnum Christi & Ecclesie fuisse promissum Adæ, quod promissum ipse speravit*. Si autem speravit, planè cognovit & credidit; inquit enim Adam. *Hoc nunc os ex ossibus meis, & caro de carne mea, propter hanc relinquet homo Patrem & Matrem & adherbit Uxori suæ, in quibus verbis jam Christum & Ecclesiam prænuntiavit juxta Apost. ad Ephes. 5. dicentem, Sacramentum hoc magnum est, ego autem dico de Christo & Ecclesia.*

## ARTICULUS II.

*An homo in primo statu decipi potuisset.*

13. **C**UM in antecedenti dictum fuerit de scientia Adæ, merito modo inquiritur, utrum tanta fuerit, ut in aliquam deceptionem, seu errorem potuisset incidere, seu aliis terminis, utrum Adam non tantum habuerit perfectionem cognoscendi veritatem, sed etiam evitandi falsitatem. Qua in redistinguendum est judicium certum, & determinatum ab incerto, dubio, vel opinativo, neque enim quando rem aliquam judicamus ex conjecturis vel levibus rationibus tunc erramus, vel decipimur, sed ulterius ad errorem & deceptionem debemus rem aliquam judicare aliter quàm sit in se, nostroque judicio determinatè firmiterque assentiri. Cum Adam circa res omnes evidentem non habuerit cognitionem, ut dictum fuit, potuit quidem de re aliqua dubitare, vel opinari, attamen errare non potuisse, vel decipi, sentio cum



cum S.Th. 1. par. qu. 94. art. 4. cum S. Bonavent. in 2. dif. 23. art. 2. qu. 2. quod quidem multo ante tradidit S. August. lib. 3. de lib. arbitr. cap. 18. dicens: *Approbare falsa pro veris, ut erret invitus, non est natura instituti hominis, sed pœna damnati.*

14. Verbis illis, *ut erret invitus* fortasse ductus P. Molina in tract. de opere 6. dierum. dif. 26. duplicem deceptionem erroremque distinxit; voluntarium scilicet, ac involuntarium. Primum inquit potuisse in Adamo contingere, ita ut pro libera sui determinatione decipi potuerit; atque ita evitat difficultatem illam quæ promovetur, ex quo de facto serpens deceperit Evam; Secundum verò negat; Sed quidquid sit de hoc, assertum meum ita suadeo.

15. Atque in primis dixi, potuisse Adamum de re aliqua dubitare, vel opinari, quod licet neget P. Suarez, cum, ut ipse inquit, quamvis non sit deordinatio culpæ, sit tamen magna imperfectio, & malum quodam natura, attamen id apertè docet S. Th. loco citato dicens: *Quantum ad ea, quorum scientiam non habebat, decipi poterat, longe accepta deceptione pro existimatione qualicumque sine assensu credulitatis, quia existimare falsum in rebus non est noxium boni* proinde non est imperfectio, nec malum quodam indebitum statui innocentie.

16. Nunc verò positivè ad aliud punctum devenio. Intellectus non potest decipi, vel errare circa proprium objectum, nisi hoc falso, & cum deceptione ipsi reprehensetur, sed in statu innocentie non poterat falso & cum deceptione reprehenseri, ergo. Prob. min. Non poterat falso & cum deceptione reprehenseri, nisi per facultatem inferiorem, puta phantasiam; sed non per hanc, ergo. Prob. min. In statu innocentie facultates inferiores erant subditæ superioribus, nec istæ per illas poterant impedi, ita postente dono integritatis, ergo.

17. In re nostra argumentatur etiam S. Augustinus inquit, omnem deceptionem esse malum hominis pertinens ad pœnam, quæ ante culpam nequam infigitur; Et si homo perseverante illo statu nullum malum passus esset in corpore, non famem, non sitim, non ægritudinem, non mortem, potiori ratione nullum malum sensisset in anima, proinde nullam deceptionem.

18. Nunc verò proponamus argumenta, quæ in oppositum possent afferri; & primo. Quamvis B. Virgo nullius peccati labe foret infecta, attamen & ipsa decepta fuit, quando Luc. 2. existimavit Christum fuisse in comitatu, cum revera esset disputans cum Doctoribus in Templo, ergo quare non potuerunt decipi primi Parentes etiam in statu innocentie? Secundo ex Apostol. 1. ad Corinth. 2. *Mulier seducta in prævaricatione fuit.* De qua loquens Magis. Sent. lib. 2. dif. 21. inquit, ideo Mulierem non timuisti serpentis sermonem, quia loquendi munus à Deo accepisse putavit, quod tamen falsum erat. Tertio. In somniis contingunt deceptiones plures, & interdum similitudinibus, & apparitionibus tanquam rebus adhæremus, sed Adam in statu innocentie, sicut comedisset, ita etiam dormisisset, ac somniatus esset, ergo. Quarto. Cum Adamo non fuisset indita notitia futurorum, potuisset tunc aliquis ipsi dicere falsum circa futura, & tunc Adam credendo fuisset deceptus. Tandem. Cum natura oculi non sit per peccatum infecta, sicut nunc errat circa rem visam, ita potuisset ante peccatum, consequenter &c.

19. Ad primum. Solummodo de Sancto Josepho, ita ut per Sineechen numerus pluralis pro singulari sumatur, potest illud explicari; deinde, propter mysterium potuit Christus hanc Matri veritatem occultare; Tandem, verbum illud *existimantes* non explicat iudicium falsum, aut erroneum, sed præcisè opinionem, aut dubium; quod atten-

attentis circumstantiis ad prudentiam spectabat, non ad deceptionem. Ad secundum, acceptando doctrinam Molinæ superius adductam, quid respondendum sit compertum est; Sed adhaerendo authoritati Sancti Augustini 11. super Genes. ad lit. *Mulier verbum serpentis non crederet, nisi jam inesset menti ejus amor propriae potestatis, & quædam de se superba præsumptio*. Quare ante deceptionem jam in animo præcessit peccatum; Unde ait S.Th. qu. cit. art. eodem in fine, *jam præcesserat peccatum in animo, & ad Divinum auxilium recursum non habuit*; quod dicendum etiam de Adamo. Rationi adductæ ex Magistro Sententiarum respondet S.Th. in hac parte ejus sententiam sequi, necessarium non esse. Ad tertium; Si aliquid per sensum, vel phantasiam primi hominis fuisset reprehensatum, quod revera non esset, per rationem veritatem dijudicasset; per quod refellitur ultimum. Ad quartum. Adam non credidisset, sed rem esse possibilem ad summum judicasset, in quo judicio nullum errorem contingere quisque percipiet.

### ARTICULUS III.

*Utrum homo fuerit creatus in gratia.*

20. **H**ominem ante prævaricationem sanctificantis gratiæ dono fuisse Dei liberalitate insignitum, habendum est tanquam certum. Hoc enim disertè Sancti Patres docuerunt, quorum ne innumeras sententias proferam, afferam solummodo illam August. lib. 6. Gen. ad lit. c. 24. ubi ait: *Renovamur spiritu mentis nostræ secundum imaginem ejus, qui creavit nos, quam peccando Adam perdidit, gratiam amittendo*, & lib. de corrept. & gr. cap. 11. *Quid ergo? Adam non habuit gratiam? immo vero magnam*. Sufficiat verò pro omnibus Patribus omnibusque Conciliis,  
Tom. II.

quæ possent afferri, Trid. sess. 5. can. 1. dicens: *Si quis non confitetur, primum hominem Adam, cum mandatum Dei in Paradiso fuerit transgressus, statim sanctitatem, & justitiam, in qua constitutus fuerat, amisisse, anathema sit*.

21. Ex his tamen non satis probatur, Adam primo creationis instante, gratiam accepisse, & si rationem aliquam placeat nobis afferre, hæc tantum congrua existimabitur. Quamobrem non defuerunt plures Theologi, inter quos Ricchar. Aegidius, immo Scotus, S. Bonavent., & Magister Sentent. in 2. dis. 24. dicentes, collatam quidem fuisse gratiam primo parenti ante peccatum, non tamen in ipsa creatione, contrarium docet S. Thom. 1. par. qu. 95. artic. 1. Alber. Magnus in 2. dis. 24. artic. 1. Suarez lib. 3. de op. 6. dierum cap. 17.

22. Rationes subdam utriusque sententiæ, nam utramque satis probabilem puto, & primo pro sententia prima, produci possunt plura Sanctorum Patrum testimonia, præsertim Sancti Cypriani ep. 74. ad Pomp. *Ut spiritum jam natus accipiat, sicut in primo homine factum est*. Ex quo textu eruitur etiam ratio, nimirum, ut gratia recipiatur, debet prius esse quod recipiat, sed ita jam prius est homo, quam sit in homine gratia, ergo Adam priusquam gratiam reciperet, jam erat, S. August. lib. 2. contra Manich. cap. 8. ubi post infusionem animæ, per quam homo naturaliter vivit, adjungit. *Nondum tamen hominem spirituales debemus intelligere, qui factus est in animam viventem; Tunc enim spiritualis effectus est, cum in Paradiso, hoc est in beata vita constitutus præceptum etiam perfectionis accepit, ut verbo Dei consummaretur*. Ex quo apparet, quod, cum homo creatus fuerit extra Paradisum, & gratiam in Paradiso receperit in primo creationis instanti illi collata non fuerit; & sic etiam non tenet responsio Sancti Thomæ explicantis authoritatem Cypriani superius

rius adductam de prioritate temporis, non naturæ.

23. Alia etiam momenta pro hac parte militare videntur. Primo; Quia quemadmodum prius intelligitur gratia, quam gloria, ita prius intelligi debeat natura, quam gratia, & sicut pro eodem instanti non sunt gratia & gloria, ita pro eodem instanti non sunt gratia & natura; Secundo. Quia cum per gratiam fiat spirituale matrimonium inter Animam & Deum, debet esse consensus ex parte recipientis gratiam, sed sic debet precedere, ergo.

24. Pro secunda Sententia sunt etiam auctoritates Scripturæ, ac Sanctorum Patrum; Scripturæ inquam, nam Eccles. 7. legitur: *Deus fecit hominem rectum* restitudo autem sumitur pro iustitia juxta illud Cantic. 1. *Recti diligunt te*. Et psalm. 32. *Exultate iusti in Domino, rectos decet collaudatio*. Atque August. explicans primum textum 14. de Civit. cap. 11. inquit: *Creasse hominem rectum, idest bonæ voluntatis, bona autem voluntas non fit nisi per charitatem, quæ gratiam comitatur*. Sanctorum Patrum inquam, nam idem Augustinus 12. de Civit. cap. 9. dicit: *Deus erat simul cum eis condens naturam, & largiens gratiam*.

25. Ratio autem sic promoveri potest. Homo creatus fuit cum ea rectitudine, ut ratio subderetur Deo, & sensus rationi, sed huiusmodi restitudo, & subiectio sine gratia haberi non poterat, ergo creatus fuit in gratia, Prob. min. Huiusmodi restitudo, & subiectio non poterant esse à natura, alioquin remansissent etiam post peccatum, nam omnium Theologorum suffragio, ut dictum sæpe fuit, naturalia integra permanferunt; sed post peccatum non remansit, ut experimur, ergo.

26. Secunda ratio desumi potest ex parte Dei producentis. Deus enim creaturas condidit in statu perfecto pro ferendis actibus proprio fini consentaneis, quod si hoc valet de creaturis

etiam irrationalibus, multo magis de homine, ergo cum finis hominis esset supernaturalis, illum præmunivit gratia ad eundem finem necessaria. Tandem. Si Adam non peccasset, ejus filii in gratia fuissent geniti, ergo & ipse in gratia fuit productus, nec enim parens filiis deterior.

27. Placet modo utriusque sententiæ fundamenta dissolvere; ibi loquitur Cyprian. de sanctificatione per Baptismum, quæ precedere debet plenitudinem Spiritus Sancti per confirmationem; & exemplum non tenet in omnibus, nam prioritas creationis Adæ respectivè ad gratiam illi collatam non fuit nisi naturæ, cum gratia fuerit concreta; per quod patet quid respondendum sit rationi deductæ, quod magis ostenditur exemplo (veniam peto. ab iis qui sunt extra Scholam Peripateticam.) Si Deus crearet materiam, & immediatè ipsi formam uniret, materia reciperet formam, nec tamen materia existeret sine forma, quod factum esse in prima creatione docent Thomistæ. Magis urgere videtur testimonium Augustini; attamen ibi non loquitur Sanctus Doctor de gratia secundum esse, sed secundum modum, & indicat, solummodo in Paradiso Adam habuisse gratiam plenioram, quod etiam innuitur per illud verbum, *consummaretur*.

28. Primæ rationi respondeo, gloriam conferri ut mercedem, proinde nil mirum, si debeat gratia præsupponi, gratia autem confertur gratuito, & ideo non repugnat simul cum natura conferri; Unde aptè dicit S. Th. nos mereri gloriam per actus procedentes à gratia, non sic mereri gratiam per actus procedentes à natura. Ad secundum præsto est S. Th., quod cum actus voluntatis non sit continuus, nihil prohibet, etiam instanti suæ creationis primum hominem gratia consensisse; deinde dico, sufficere consensum post gratia receptionem.

29. Ita ad diluendum quod pro prima



ma sententia proponebatur; nunc ad refellendum quod pro secunda. Ad primam auctoritatem; vel sensus est tantummodo materialis, vel si formalis, sermo est de rectitudine in actu primo, non in actu secundo, in quo sensu sumuntur alia Scripturæ testimonia. Ex hoc explico secundam Sancti Augustini; nimirum fecisse hominem rectum, & bonæ voluntatis in actu primo, idest, secundum dispositionem & aptitudinem ad recipiendam gratiam, & ita erat condens naturam & largiens gratiam, idest disponens & aptans ad gratiam. Verum ille textus est singillatim pro Angelis, quibus si alicubi Sancti Patres comparant primum parentem, de isto jam in Paradiso existente loquuntur.

30. Per doctrinam expositam solvitur etiam ratio, dicendo, Adam creatum fuisse cum rectitudine, per quam pars inferior superiori subderetur, & superior Deo juxta aptitudinem proximè complendam per gratiam; vel talem rectitudinem habitam fuisse per donum integritatis, quod est distinctum à dono gratiæ sanctificantis, & gratum facientis; vel tandem naturalia physica integra permansisse, non sic naturalia in genere moris, in quo continebatur ea rectitudo. Ad secundum non est necesse, conferantur media pro primo instante, sed satis est, si conferantur; deinde dici potest, Adam creatum esse in natura elevabili ad finem supernaturalem, sed pro primo instante non fuisse in natura elevata.

#### ARTICULUS IV.

*An in primo parente fuerint passiones animæ, omneque Virtutes.*

31. **Q**uemadmodum reperitur bonum, quod prosequamur, & malum, à quo fugiamus, ita inveniuntur animæ passiones, quæ sunt circa bonum, & alia, quæ circa malum versantur. Primi sunt v.g. amor, de-

siderium, & gaudium, secundæ odium, timor, & dolor; Cum autem pro statu innocentie nullum malum adesset, vel immineret, jam planè compertum sit, neque doloris, neque timoris in Adamo fuisse passiones. Illas verò fuisse, quæ sunt circa bonum habitum, vel suo tempore habendum, ut desiderium & spem absque tamen aliqua animi afflictione, quia appetitus sensitivus perfectè subiectus erat rationi, nullam in oppositum efficacem rationem intueor. Non ita verò in ipso fuerunt, sicut in nobis, nam plerumque in nobis rationis usum praveniunt, in illo verò rationis usum sequebantur; Unde ait S. Aug. 14. de Civ. *Erat in eis amor imperturbatus in Deo, & quædam aliæ passiones.* Quibus verbis tota doctrina proposita confirmatur.

32. Atque ex dictis refellitur quidquid opponi posse videretur; Cum enim per animæ passiones caro concupiscat adversus spiritum, & spiritus adversus carnem, cum in primo parente non fuerit hæc concupiscentia, neque passiones fuisse concluditur, quod tamen verum est tantum de passionibus usum rationis pravenientibus. Pariter, sicut corpus Adæ erat impassibile, ita etiam animam sine passionibus fuisse, declaratur, quod tamen solummodo probat, quod, sicut corpus erat impassibile secundum ea, quæ removem dispositionem naturalem, ita animus erat sine passionibus rectam rationem impredientibus. Tandem; Si in Adamo erat perfecta virtus moralis, ad hanc non spectat passiones auferre, sed moderari ac dirigere; ut enim ait Philosoph. 3. Ethic. *Temperati non est non concupiscere, sed concupiscere sicut oportet, & quod oportet.*

33. Pro secunda tituli parte advertendum est, virtutes esse in duplici classe, alias, quæ nullæ sunt imperfectioni admixtæ neque ex parte materiæ, ut charitas & justitia, alias vero, quæ saltem ex parte materiæ aliquam explicant imperfectionem, ut poenitentia & miseri-

cor-



cordia; prima enim respicit malum, de quo doleat, secunda miseriam, quam sublevet; Istas non fuisse in Adamo ex felicissima illius status conditione tanquam certum existimo, tunc enim nulum erat malum vel peccatum, miseria nulla, quod tamen valet de virtutum actu, non de habitu, siquidem Adam erat dispositus ad poenitentiam, si peccatum fuisset, dispositus ad misericordiam, si fuisset miseria, in quo sensu loquitur Philos. 4. Ethic. *Verecundiam esse in homine studioso sub conditione, quatenus ad ipsam est dispositus, si aliquid turpe committeret.*

34. Illas vero fuisse in Adamo non solum quantum ad habitum, sed etiam ad actum, non video cur possit negari; homo enim fuit rectus cum perfecta subiectione appetitus inferioris, ad quam quidem subiectionem complendam virtutes institutas esse ex ipso nomine virtutis aperitur. Hinc Ecclesiast. 17. legitur: *Deus creavit hominem, & secundum se vestivit illum virtute.* Et August. apud S. Thom. hic. *Princeps vitiorum vicit Adam pudicitia armatum, temperantia compositum, charitate splendidum.* Hoc idem dicendum de fide, & spe, nam, ut dictum fuit, Adam non habuit claram Dei visionem, neque in fruitione ultimæ beatitudinis erat constitutus.

## ARTICULUS V.

*De dominio hominis in statu innocentie.*

35 **P**ura quærentur in titulo, sicut plura sunt, circa quæ dominium potest haberi; primo an Adam habuerit dominium supra animalia; secundo supra cæteras res creatas; tertio supra alios homines.

Quantum ad primum; Scriptura Sancta, in qua dicitur Gen. 1. *Præsit piscibus maris, & volatilibus Cæli, & bestiis, omnique reptili quod movetur in terra,* ambigendi locum non relinquit.

Hujus autem ratio desumitur ex eo; quod sicut homo subditur Deo, ita animalia subduntur homini, & ex quo homo factus est inobediens Deo, etiam animalia facta sunt inobedientia homini. Triplici autem titulo dominium hoc homini conveniebat. Primo ex ordine à natura statuto, ut imperfectiora perfectioribus subjiçiantur, quod etiam apparet in rerum generatione, siquidem materia est propter formam, & forma imperfectior propter perfectiorem; Quæ de re optimè agebat Philos. in 1. Polit. venationem animalium sylvestrium justam esse, hominique naturalem, quia per eam homo sibi vindicat quod suum naturaliter est. Secundo ex lege Divinæ Providentiæ, per quam à superioribus inferiora reguntur, unde cum homo factus ad imaginem & similitudinem Dei superior omnibus animalibus factus sit, hæc illius regimini dominioque subdantur, necesse est. Tertio tandem, quia si qua prudentia in aliquo actu in animalibus relucet, hæc est per participationem prudentiæ, quæ est in hominibus, sicut quod est in creaturis est per illius participationem quod est in Deo, & ipse Deus; Omne autem, quod est per participationem inservit illi, quod tale est per essentiam, ut creaturæ inserviunt creatori, ideo &c. Ex quibus probatur, etiam post lapsum tale dominium remansisse, diverso tamen modo, nunc enim est quædam reluctancia subiectionis in bestiis, tunc è contrario erat naturalis & spontanea servitus, seu, ut ajunt, ad nutum hominis subjiçiebantur.

36. Quantum ad secundum; ex eodem laudato textu facile colligi potest pars affirmativa, cum ibi subdatur, & *præsit omni creaturæ.* Ingeniosam hujus rationem insinuat S. Th. nam in ipso homine quatuor considerari possunt, nimirum, ratio, vires sensitivæ, vires naturales; & ipsum corpus. Per rationem convenit cum Angelis, & quia ad rationem dominari pertinet, non servire, homo

homo in illo statu Angelis non dominabatur. Per vires sensitivas convenit cum animalibus, & quia ad irascibilem & concupiscibilem spectat rationi subesse, homo in illo statu animalibus præerat; Per vires naturales convenit cum plantis, & per corpus cum rebus inanimatis, & quia viribus naturalibus sueque corpori homo dominabatur, ideo etiam plantæ, resque inanimæ ipsi subdebantur; non quidem per tale imperium, ut posset res illas immutare, sed præcisè ipsis absque aliquo uti impedimento.

37. Antequam tertium punctum resolvatur, advertendum est in re nostra, duplex distingui dominium, uno modo prout opponitur servituti, & sic qui subditur, dicitur servus; alio modo prout est in aliquo habente officium alios dirigendi & gubernandi. In primo sensu censetur aliquis dominari, quando in propriam transfert utilitatem rem illam, cui dominatur, & ita, in primo statu non habuisset homo dominium super alium hominem, quia sicut unusquisque in proprium bonum inclinatur, ita dolet, si proprium bonum alteri cedat, ideoque esse nequit sine subjectionum poena. In secundo autem sensu dominium hominis super hominem statui innocentia non erat inconveniens, nam sic aliquis alteri dominatur, illum vel in bonum proprium vel commune dirigendo; Hoc vero duplici titulo exigebatur, primo quia tunc homo fuisset, sicut nunc est, animal sociabile, socialis autem vita multorum esse non potest, nisi aliquis præsideat, qui ad bonum commune intendat, multi enim intendunt ad multa, unus ad unum, quare Philosoph. in princ. Polit. dicit: *Quando multa ordinantur ad unum semper invenitur unum ut principale & dirigens*. Secundo quia tunc fuisset aliquis gaudens supereminente scientia, & justitia actuali, inconveniens autem fuisset, nisi hac usus esset in aliorum utilitatem. Breviter; Dominium hominis super homi-

nem non fuisset ad imperandum, sed ad dirigendum juxta id quod ait Aug. 19. de Civit. *Iusti non dominandi cupiditate imperant, sed officio consulendi*. Per præfatam domini distinctionem habetur quid respondeamus alteri auctoritati Augustini ibidem dicentis: *Hominem rationalem ad imaginem suam factum non voluit nisi irrationabilibus dominari, non hominem homini, sed hominem pecudi*. Tum etiam reliquis, quæ opponi posse videntur.

## ARTICULUS VI.

### *De Præcepto imposito in Paradiso.*

38. **P**rimo inquirendum est de hujus præcepti materia, quæ, sicut in cæteris, distingui debet in remotam consistentem in arbore scientiæ boni & mali ejusque fructu, & in proximam consistentem in actione comedendi; De prima autem quarunt expositores, cujus speciei fuerit arbor illa; Qua in re dixerunt aliqui, fuisse malum propter verba Cantic. 8. *Sub arbore malo suscitavi te*, quod tamen levissimum fundamentum censendum est, & quia, nomen illud generatim accipi potest, & quia plures Doctores illud intelligunt metaphorice, videlicet de arbore crucis. Aliqui verò existimarunt, fuisse frumentum vel vitem, quod longè improbabilius est, frumentum enim non est fructus, qui sumptus ex segete statim comedi possit, nec ita delectabilis est, neque vitis propriè arbor appellari potest; Communior opinio apud veteres fuit cum Isidoro Pelus. lib. 1. ep. 51. Niceph. lib. 1. hist. cap. 27. quos sequitur Baron. tom. 1. ann. Dom. 34. fuisse ficulneam reprehensatam in illa, quam Dominus maledicendo exsiccat, præsertim quod ex ejus foliis primi parentis propriam nuditatem operuerunt; Verùm nec opinio ista prorsus aridet, primo quia arbor illa describitur aspectui pulcherrima, quod de ficulnea dici non

non posse videtur; secundo quia probabile est, ut notavit Abulen. in cap. 13. Gen. qu. 164., primos parentes ob tam grave damnum inde exortum ad illam accedere perhorruisse; tertio, quia mulier, postquam comedit, tulit ad virum ut comederet, ex quo colligitur, tunc Adamum distasse ab arbore, ex qua fructum Eva decerpit; Unde folia ficus ad se operiendum acceperunt, vel quia ea propter magnitudinem & firmitatem erant aptiora, vel, ut inquit Iren. lib. 3. cap. 37. erant asperiora, ducti affectu poenitentia.

39. Neque vero dijudicandum est, arborem illam dictam esse scientia boni & mali, quia noxiam aliquam haberet in se ipsa qualitatem, qui enim fecerat omnia valde bona, aliquid mali non constituerat; vel quia virtutem continebat hujusmodi scientiam impertiendi, sed tali nomine fuit appellata, vel quia fructus ille sub specie boni oblati mali experientiam induxit, vel quia serpens per illius esum scientiam fraudolenter promisit; vel quia eventus declaravit, Adamum experimento cognovisse bonum, quod amisit, & malum, in quod incidit, & hæc ratio frequentius à Sanctis Patribus adducitur.

40. Dixi, materiam proximam præcepti fuisse actionem comedendi, quæ per illa verba, *ne comedas* vetita fuit, quæ quidem verba ad litteram sunt accipienda.

41. Secundo inquirendum est, quibus personis impositum fuerit dictum præceptum, scilicet, an soli Adamo, aut etiam Evæ, sicut putarunt Cajet. Peter. & Ruper. cum Eva dixerit, *præcepit nobis Deus*. Attamen, si sermo fiat de immediato præcepto, magis probabile censeo cum S. August. 8. Gen. ad lit. cap. 17. S. Ambros. lib. de Parad. cap. 12. Soli Adamo fuisse demandatum, quod inde transiit ad Evam, omnesque posteros, si innocentia status perseverasset. Ratio primi est, quia Deus dixerat in singulari, *ne comedas* non in plurali, *ne*

*comedatis*. Unde si dixit Eva: *Præcepit nobis Deus*; hoc intelligendum est per promulgationem ipsi factam à Marito. Ratio secunda est, quia in eodem Textu dixit Deus: *Ex omni ligno Paradisi comedet, & de ligno scientia boni & mali ne comedas*, ergo sicuti facultas comedendi non solum erat Adamo concessa, sed omnibus posteris, ita, non soli Adamo, sed omnibus facta fuit comedendi prohibitio. Præterea, finis præcepti non tantum à primis parentibus servandus erat, sed ab omnibus; pertinebat enim ad obedientia virtutem & religionis erga Deum, ergo etiam præceptum datum omnibus fuit. Tandem; in poenam transgressionis omnibus indictum fuit, *in quacunque die comederis, morte morieris* cum non tantum Adam, sed omnes mortui sint, ergo etiam præceptum non tantum Adæ, sed omnibus fuit impositum.

42. Quoniam vero de transgressionis poena omnibus inflata dictum fuit; superfluum non arbitror, si inquiretur, utrum præceptum prohibens esum fructus pactum aliquod includeret inter Deum, & genus humanum; vel absolute, & ex natura rei omnes afficeret, prout omnes voluntates continebantur in voluntate primi parentis, non ut personæ particularis, sed omnium posterorum capitis; Omnibus enim impositam esse obligationem præcepti, nemo Catholicorum potest ambigere; Si enim ad Rom. 5. *Omnes in Adam peccaverunt*. Jam omnes præceptum adstrinxit, cum nemo contra præceptum, quod non obligat, peccet. De hac igitur obligatione dubium consurgit; quomodo ex tali præcepto ortum deduxerit, an scilicet ex vi & ejusdem natura, an vero ex peculiari Dei pacto & ordinatione.

43. Hanc quidem posteriorem partem probabilior existimo, ita ut ex peculiari Dei voluntate processerit, non ex solo præcepto secundum se inspecto, quia in re nullam litem esse arbitror inter authores, quamvis pro op-

posita

posita sententia asserantur Valquez & Soto. Ratio autem est, quia lex data primis parentibus ex virtute legis præcisè non potest filios obligare donec sint geniti, rationisque compotes, ut constat in omnibus aliis legibus, sive humanæ sint, sive Divinæ, ergo ut ista lex talem vim obtineret, peculiaris Dei ordinatio fuit necessaria; Hoc magis declaratur, si supponamus, Adamum non peccasse, neque de ligno vitæ comedisse, & postea comedisse Cain filium Adami, tunc certe non peccasset Enoch filius Cain per peccatum istius, ergo quia lex illa secundum se tantum inspecta posteris non obligabat; Hoc igitur actum est propter Divinam voluntatem & pactum illi legi assensum. Hinc Eccles. 17. legitur: *Testamentum æternum constituit cum illis.* Verum de hac re accuratius & fusius ubi de peccato originali.

## ARTICULUS VII.

*Utrum homines in statu innocentie fuissent nati perfecti in gratia, iustitia, & scientia.*

44. **E**tsi ad innocentie statum plura alia pertineant, quæ ad vires sensitivas, filiorumque corpoream procreationem revocantur, hæc tamen à nobis prætermittenda sunt, cum hic tantum de donis illis, quæ à gratia proficiuntur, atque ad illam specialiter spectant, sermonem nostrum instituiamus. Ut igitur propositam rem prosequamur; sic exordimur.

Omnis perfectio, qua maxime præfulget anima rationalis, à puriore fonte progredi non potest, quam à gratia, quæ donum supernaturale est à Deo specialissimè infusum, & radix omnium perfectionum quæ statum innocentie beatissimum constituiebant. Hac de re merito primo quaeritur, utrum filii fuissent geniti tanti beneficii fulgore præsigniti, quod quidem negare nisi sunt plures

Tom. II.

ex Sanctis Patribus, præsertim Ugo de S. Viçt. lib. 1. de Sacram. par. 6. cap. 23. ubi habet, quod primus homo genuisset quidem filios sine peccato, sed non iustitiæ paternæ hæredes, immo Scriptura in hunc sensum devenisse videtur, cum Apost. ad Rom. 5. dicat, gratiam à solo Deo infundi; Suffragatur & ratio, cum enim gratia in anima sit, debet subiecti sui sequi naturam, ita ut quemadmodum anima non traducitur à parentibus, ita nec gratia.

45. Veram tamen existimo sententiam acceptam apud Scholasticos doctorem, filios in eo statu procreandos esse cum gratia; ad quod suadendum non desunt plura testimonia Sanctorum Patrum, & Conciliorum, plures Scripturæ auctoritates, plura argumenta à ratione deprompta.

Atque ut à primis incipiam, adduco Iren. qui lib. 3. cap. 20. inquit: *Reparamus in Christo quod in Adam perdidimus atque recuperamus gratiam, ergo gratiam perdidimus, ergo si Adam non peccasset &c.* Leo ser. 1. de jejuniis 10. *Ergitur in Adamo secundo, quod cecidit in primo,* Ansel. lib. de Concep. Virg. cap. 10. *Quod simul cum rationalem haberent animam, iusti essent quos generaret homo si non peccasset;* ergo. Ex Conciliis asseram Arausic. 2. cap. 19. ubi dicit: *Nos perdidisse in Adamo, & per Adamum stolam animæ, quæ gratia est.* Et pro omnibus Trident. quod sess. 5. cap. 3. hæc habet: *Sicut revera homines nisi ex semine Adæ propagati nascerentur, non nascerentur iniusti, cum ex propagatione per ipsum, dum concipiuntur, propriam iniustitiam contrahant.* Ergo Adam per peccatum amisit gratiam & sibi, & nobis, consequenter in statu innocentie fuissent cum gratia filii procreati. Ex Scriptura vero sufficiat id quod habetur ex Paul. ad Rom. 5. dicente: *Per unum hominem peccatum intravit in Mundum.*

46. Rationem autem profert S. Th. 1. par. qu. 100. art. 1. in corp. nimirum, **D** quod



quod sicut homo naturaliter generat sibi similem in specie, ita naturaliter producuntur ea accidentia, quæ consequuntur naturam ejusdem speciei, ita ut in illis filii parentibus assimilentur, nisi contingat error in operatione naturæ, atqui in statu innocentie nullus poterat error contingere, & gratia, in qua homo conditus fuerat, erat accidens naturæ specificæ, tanquam aliquod donum toti naturæ divinitus datum, ergo.

47. Confirmatur hoc magis ex eo, quod si peccatum originale oppositum tali gratiæ dicitur peccatum naturæ, unde traducitur à parentibus in posteros, & in hoc filii parentibus assimilantur, ut dicam in tract. de vitiis, & peccatis, quare gratia sanctificans non fuisset accidens consequens naturam, ita ut à parentibus migraret in natos? Verum in hoc puncto nulla intima ratio asserri potest præter Divinam voluntatem, cui placuisset totam naturam humanam ad statum gratiæ ita perducere, ut simul cum natura omnes homines illam reciperent; nisi Adam constitutus caput ejusdem naturæ tantæ gratiæ impedimentum apposuisset; Atque hæc est diversitas inter gratiam Adæ, & Christi, quod illa collata fuisset posteris sine meritis Adæ, gratia vero, quæ nunc confertur, tota est ex meritis Christi, de plenitudine enim ejus omnes accepimus, & hunc proposuit Deus propitiatorem per fidem in Sanguine ipsius pro peccatis nostris, ut ex Apost. ad Rom. 3. loquitur Trident. sess. 6. cap. 2.

48. Omnia superius adducta probant, progignendos esse filios in naturæ integritate, hoc est, in illo dono, quo perfecte sensus subdebatur rationi, & ratio Deo; fecit enim Deus hominem rectum, quam rectitudinem non fuisse tantum donum Dei personæ affixum, sed toti speciei commune, affirmat Sanctus August. 14. de Civit. cap. 10. inquit: *Quam felices erant primi parentes, & nullis agitabantur perturbantibus animorum, nullis corporum turbaban-*

*tur incommodis, tam felix universa societas esset humana.*

49. Respondeo modo rationibus in oppositum; Auctoritas vera est quantum ad executionem actus, non quantum ad habitum; vel non fuissent paternæ justitiæ haredes ex meritis Adæ juxta dicta superius. Textus Apostoli probat, gratiam non traduci ex semine, non tamen non fuisse conferendam homini statim hac habuisset animam rationalem; Sicut cum corpus est apte dispositum, statim à Deo creatur anima rationalis; & per hoc solvitur ultima ratio, quæ si probaret, sequeretur, homines non nasci in peccato originali, quia etiam peccatum originale est in anima rationali, quæ à parentibus non producit.

50. Quod autem de gratia dictum est, videtur asserendum de scientia, nam qualis fuit Adam, tales etiam filios procreasset, ergo si Adam fuit in scientia perfectus, perfecti quoque filii fuissent. Præterea; Ignorantia profluit à peccato, sed tunc nullum fuisset peccatum, ergo nulla ignorantia. Tandem, Justitia esse non potest sine scientia, cum ad illam requiratur id, quod dirigat in agendis, hoc autem soli scientiæ tribuitur.

51. His tamen non obstantibus dicendum, pueros non fuisse nascituros in scientia perfectos, ut enim ait Aristotelicum illud, anima nostra per naturam est sicut tabula rasa, in qua nihil est scriptum, ubi autem auctoritas deest, sequi debemus naturæ conditionem, est autem naturale homini acquirere scientiam per sensus, quod non esset, si statim ab initio scientiam habuisset.


Unde ad argumenta in oppositum; dicendum, esse perfectum in scientia, fuisse accidens proprium Adæ, quia institutus erat ut Pater & instructor totius generis humani, & secundum hoc non genuisset filios sibi similes, sed solum secundum accidentia vel naturalia, vel gratuita, sicut de gratia dictum fuit, alio-

alioquin dici deberet, quod cum Adam haberit perfectam staturam & vim generandi, etiam pueri debuissent nasci perfecti in statura &c. Secundum non probat, nam ignorantia est privatio scientiæ, quæ haberi debet pro tempore suo, hæc autem in pueris non fuisse, habuissent enim scientiam, quæ ipsis conveniebat secundum ætatem, & carentia scientiæ non potuisset propriè di-

ci ignorantia, sed aliquorum nescientia, juxta dicta. Tertium non valet, etenim pueri habuissent sufficientem scientiam ad se dirigendos in operibus justitiæ juxta proprium statum; & si dicitur, corpus, quod corrumpitur, animam aggravare, hoc probat in nobis pro toto tempore vitæ, quod in eo statu non evenisset.

## QUÆSTIO III.

### De necessitate Gratiæ in Homine lapsò.

**I.**  Uscusque brevi, attamen ad rem nostram sufficiente calamo, innocentem hominem exposuimus. Operæ pretium fuisset etiam ejusdem lapsus proponere, ut inde melius gratiæ necessitatem in natura lapsa explicare possemus. Quia tamen hujusmodi punctum in tractatu de vitiis & peccatis proprium sibi postulat locum, ubi de peccato originali, & de eisdem traductione in Adæ posteris effusè disseritur; ideo hoc à nobis impræsentiarum supponendum est, nequaquam, probandum.

#### ARTICULUS I.

*An homo lapsus sit debilior homine in statu naturæ puræ, si fuisset.*

**2.** **C**ertum est, post peccatum humanam naturam libero non fuisse destitutam arbitrio contra Lutherum & Calvinum, definiente Conc. Trid. sess. 6. Can. 5. *Si quis liberum hominis arbitrium post Adæ peccatum amissum, & extinctum esse dixerit, anathema sit.* Et quidem non solum ad malum, sed etiam ad bonum, cum damnata fuerit à Pio V., & Greg. XIII. hæc propositio  
Tom. II.

Baii num. 18. *Librum arbitrium sine gratiæ adjutorio non nisi ad peccandum valet.* Quod si aliqui Sancti Patres, inter quos citantur Augustinus & Prosper, aliquando dixerint, perditum esse, nec reddi posse nili ab eo, à quo datum est, latet æquivocatio in hoc nomine, *liberum*. Aliquando enim usurpatur, prout opponitur servituti, & ita sine gratia liberum esse non potest, quia servus est peccati, in quo sensu ait Augustinus 14. de Civit. cap. 11. *Arbitrium voluntatis tunc est verè liberum, quando vitiis peccatisque non servit.* Tale datum est à Deo, quod amissum, nisi à quo potuit dari, non potest reddi. Et Prosper ad objection. 5. Vincent. dixit: *Librum arbitrium libertatem, quam libertate perdidit, nisi Christo liberante, non recipit.* Sumitur interdum, prout peccandi opponitur necessitati, non in singulis actibus, sed confusè ac indeterminatè; & ita homo sine gratiæ auxilio liber non est, cum fieri nequeat, quin aliquando sine gratia non peccet; atque hoc in sensu loquitur S. Augustinus 6. in Gen. ad lit. cap. 17. lib. contra Adim. cap. 5. præsertim vero in lib. proposit. ad Rom. cap. 17. ubi sic: *Librum arbitrium perfectè fuit in primo homine, in nobis autem ante gratiam non est liberum arbitrium, ut non peccemus, sed tantum, ut*  
D 2 *pec-*



*peccare nolimus.* Accipitur tandem prout opponitur determinationi ad unum in singulis determinatē actibus; & ita nunquam à Patribus fuit negatum, ut constat ex toto libro, quem de gratia & libero arbitrio idem S. August. inscripsit, cui adherens S. Bernar. in lib. de gr. & lib. arb. inquit: *Sive Dei finis, sive Diaboli, non tamen similiter definitus esse nostri, manet enim libertas arbitrii, per quam manet & causa meriti.* Verum de hac re non est, cur plura dicamus, cum difficultas proposita versari debeat inter Catholicos, nequaquam contra hæreticos, contra quos in alio nostro opere ex instituto de hac re pertractabimus; Quod si in homine lapsō liberum negaremus arbitrium, etiam in homine puro negari deberet, quia si per peccatum fuisset deperditum, jam non fuisset donum connaturale, proinde naturæ puræ minime debitum.

3. Secundo præmittendum est; per Concilium Arausicanum & Tridentinum hominem per originale peccatum, & secundum corpus, & secundum animam fuisse in deterius commutatum, atque ex pluribus Patribus haberi, non tantum fuisse privatum gratuitis, sed etiam ipsi vulnus inflictum esse in naturalibus. Sed hoc intelligendum esse per comparisonem ad statum justitiæ originalis, non autem solius naturæ puræ, tanquam certum existimo. Ratio hujus est, quia tenet illud Dionys. jam prænotatum, quod *in Angelis & hominibus naturalia integra remanserunt*; quod cum indefinite dictum sit, debet in tota amplitudine sumi, idest, tam pro ipsa natura, quam pro omnibus, quæ naturaliter ab ipsa fluunt, seu naturali vinculo sunt ipsi connexa, alioquin ambiguus esset sensus, & posset pro uniuscujusque placito detorqueri. Vulnus etiam in naturalibus factum non explicatur per hoc, quod donum amissum fuerit naturale, sed quia ablata fuit justitia originalis, quæ pacem ac unionem inter appetitus hominis efficiebat, & au-

ferebat naturalem defectum; læsus propterea & vulneratus fuit in naturalibus, quia soli naturæ dimissus, sanitatem pristinam perdiderat, atque unionem.

4. Hujusmodi explicatio vana ac commentitia censenda non est, sed colligitur ex eodem Concilio Tridentino: quod postquam sess. 5. in Decr. de peccato originali dixerit: *Primum hominem Adam, cum mandatum Domini in Paradiso fuisset transgressus, sanctitatem & justitiam, in qua constitutus fuerat, amisisse.* Statim addit, indignationem Dei, mortem, & servitutem sub Dæmonis potestate incurrisse; *& ita secundum corpus & animam fuisse in deterius commutatum*, ex quibus satis evincitur, totam commutationem esse in amissione sanctitatis, & justitiæ, quibus homo etiam in statu naturæ puræ procul dubio caruisset. Hinc Sancti Patres despoliationem donorum à vulnere minime distinxerunt. Accipe S. Ambros. lib. 6. in Luc. *Despoliant que accepimus indumenta gratiæ spiritualis, & sic vulnera inferre consueverunt.* Accipe & Bedam. *Plagæ peccata sunt, quibus naturæ humanæ integritatem violando seminarium quoddam augenda mortis indiderunt.* Hos duos Patres producere placuit, quia produci solent contra sententiam à nobis statuendam. Omnia vero ad rem nostram explicat S. Thom. 1. 2. qu. 85. art. 3. in corp. dicens: *Ipsa destitutio vulneratio dicitur nostra.* His præmissis.

5. Dicendum. Hominem in statu naturæ lapsæ non esse debiliorem homine in statu naturæ puræ, si fuisset. Hæc est sententia Scoti in 2. dis. 29. qu. unica in fine. Hanc docent communiter celebriores Theol. Cajet. Sot. Suarez. Cacheran. contra Alvarez de auxil. disp. 45. Sylv. Joan. à S. Th. Madern. Puteobonell. Exparzam aliosque recentiores, asserentes pro se Sanct. Thom. 1. 2. qu. 85. art. 5. sed quid de hoc Sancto Doctore sentiendum sit, infra dicam. Est etiam sententia nostra opposita Gregor. in 2. dis. 30. qu. 1. art. 2. & Gabriel. ibidem,

contententibus per peccatum originale produci quamdam qualitatem, quam morbidam appellarunt, per quam ad bonum inclinatio minuitur, quo tamen fundamento nullus ex aliis Doctoribus utitur, immo ait Suarez proleg. 4. de statibus naturæ humanæ cap. 8. num. 11. opinionem de qualitate morbida, ut impossibilem, incredibilem, & sine fundamento fictam, antiquatam, ac ab omnibus relictam esse.

6. Ne tamen prorsus omittatur; sic eam rejiciendam esse declaro. Hujusmodi qualitas à quo esset? An à natura? Minimè, quia nihil sibi contrarium, & si à natura esset, ubicumque cum natura esset; an ab ipso actu peccati? Neque, alioquin ex quolibet actu peccaminoso qualitas ista profluere; an à Deo? Absit, ipse enim nec auctor peccati esse potest, nec alicujus habitus vitiosi; an tandem à poma & à statu venenoso serpentis? Hoc in primis risu excipiendum esset; deinde, qualitas hæc, utpote afficiens animam, quodam spirituale esset, non potest autem spirituale à materiali produci, & si posset, non fieret nisi per elevationem, quæ proinde Deo foret tribuenda, ergo.

7. Prob. modo sententia nostra contra alios. Natura non potest reddi debilior, & minui ejusdem inclinatio ad bonum, nisi per subtractionem alicujus rei, vel per appositionem alicujus contrarii, ut manifestum est, sed in natura lapsa nihil fuit subtractum, vel appositum, quod in natura pura non fuisset, ergo. Prima pars min. probatur. Si aliquid subtractum fuit, vel erat ab anima, ejusdemque facultatibus, vel ex perfectionibus ipsi animæ & facultatibus concessis, sed primum dici non potest, quia substantia animæ, ejusdemque facultatum indivisibilis est, nec acquirere vel deperdere potest; neque secundum est verum; & sic prob. Intellectus, & idem dicendum de voluntate, est sicut tabula, ex Philosophorum sententia, in qua nihil, ergo

nihil ab anima & ejus facultatibus detrahi potuit; Corpus etiam in sua structura, sensuum & organorum dispositione ex vi solius peccati originalis immutatum non est, cum per semetipsum, & ex suis intrinsicis corruptibile sit, & mortale, ut probatum fuit, ergo.

8. At neque aliquid contrarium appositum fuit, quod in natura pura non fuisset; ac si prob. secundam partem. prima min. Hæc alicujus contrarii appositio vel esset alicujus intrinseci, vel extrinseci, sed neutrum, ergo. Prob. prima pars min. Si esset alicujus intrinseci, esset vel alicujus qualitatis à peccato originale progredientis, vel ipsum originale; non primum, ut patet ex dictis num. 6. non secundum, & sic prob. Si esset ipsum peccatum originale, aut esset ob privationem gratiæ, aut propter culpabilitatem, vel propter debitum subeundi Divinam indignationem, sed neutrum, ergo. Prob. min. Non propter privationem gratiæ, quia hæc fuisset etiam in statu puræ naturæ, cum hoc discrimine, quod in natura lapsa esset mera privatio, in natura pura fuisset negatio; ex quo potius inferretur, debiliorem esse naturam puram, cum plus sit habere negationem, quam privationem; non propter culpabilitatem, cum hæc sit tantum aliquid morale habens respectum ad peccatum commissum voluntate aliena, proinde non est aliquid activum impediens bonum, vel inclinans ad malum; non propter debitum subeundi indignationem Divinam, cum hæc non conferat ad vires intrinsecas, sed satis exerceatur in privatione finis, ad quem Deus hominem promoverat; & quia plura alia demeretur homo propter peccatum, quibus tamen privatus non est, Deus enim solem suum oriri facit super bonos & malos; Quare ex quo per originale peccatum pluribus homo factus indignus sit, quibus in natura pura non fuisset, non tenet argumentum, ergo non habet; neque in hoc aliquid statuere possumus, cum-

ne-

neque in Scripturis, neque in Patribus aliquod fundamentum inveniatur. Ergo.

9. Præterea, Peccatum originale, ut tradit S. Th. qu. 5. de malo art. 2. & alibi, consistit in sola aversione à Deo, non vero etiam in conversione ad creaturam, seu ad bonum commutabile, ergo neque minuit inclinationem ad bonum honestum, neque augeat ad contrarium; ideo docet idem S. Doctor loco citato ab adversariis, ipsum peccatum actuale non minuere bonum naturæ per solam privationem, sed addendo aliquam inclinationem virtuti contrariam, quando scilicet inducit habitum, & per semetipsum male afficit potentiam; Atque ex his collige, in quo sensu loquutus sit Angelicus, quando dixit, per peccatum minui bonum naturæ, nimirum per peccatum actuale; ait enim ibidem in corpore, *per actus enim humanos fit quedam inclinatio ad similes actus*, quod certe de peccato originali dici non potest, & art. 3. in corp. inquit: *Inclinatio ad bonum virtutis in unoquoque diminuitur per peccatum actuale, ut ex dictis patet.*

10. Sunt vero plures Theologi, qui admittentes hominem lapsum non esse debiliorem homine puro, si considerentur vires intrinsecæ, asserunt tamen oppositum, si causæ extrinsecæ considerentur; hujus ratio ex eo desumitur, quod sit in natura lapsa mutata moraliter Divina providentia ab ea, quæ fuisset in statu naturæ puræ, atque ita sit, ut homini lapsō indebitus sit ille modus, quo Deus se habuisset ad operationes hominis puri; quod quidem confirmari etiam potest Sanctorum Patrum testimoniis, præsertim vero Fulgentii de Incarn. & grat. cap. 13. ubi ait: *Peccans ille, qui sine peccandi necessitate creatus est, in eo, quod animæ sanitatem delinquendo perdidit, etiam cogitandi, quæ ad Deum pertinent, amisit protinus facultatem.* His existimo addi posse, quæ nos adduximus circa debitum contrarium ab homine lapsō subeundi Divi-

nam indignationem; sed hæc quanti habenda sint partim constat ex dictis, partim ex dicendis patebit, asserimus enim eandem fuisse Divinam providentiam & concursum in natura lapsa, qui fuisset in pura; & auctoritatem Fulgentii omniumque aliorum Patrum explicandas esse de homine lapsō comparato innocenti, non sic puro, ut jam superius præmonuimus. Juvat tamen argumenta in oppositum asserre, ex quorum solutione doctrina nostrā fiet certior.

11. Ob. 1. ex illa parab. Luc. 10. *Homo quidam incidit in latrones &c. & plagis impressis abierunt semivivus relicto.* Quibus verbis homo lapsus indicatur, sed homo vulneratus & semivivus debilior est homine non vulnerato & ex integro vivo, sicut esset homo purus, ergo.

Resp. juxta doctrinam expositam ante conclusionem; ad quod magis declarandum adverto, aliquem dici posse vulneratum vel formaliter tantum, vel simul etiam connotativè. Vulnus formaliter est in partium divisione, vulnus autem etiam connotativè est in partium divisione earum tamen præsupposita unione. Hoc dato, homo purus formaliter est vulneratus, quia ut probatum fuit, in statu naturæ puræ non fuisset integritas, sed pugna inter partem sensitivam & rationalem: Homo vero lapsus est vulneratus formaliter per partium divisionem præsupposita tamen earum unione, quia prius integritatis dono erat insignitus; Hac ratione homo purus trito satis exemplo comparatur homini nudo, lapsus vero homini nudato, esse enim nudum postulat nunquam habuisse vestes, quibus operiretur, nudatum vero illis aliquando fuisse indutum, at rogo, quid discriminis inter hominem nudum ac nudatum? Sit etiam aliqua Civitas prius validissimis mœnibus præmunita, & sit alia nullo circumdata muro, destruantur illius mœnia, erit ne ista infirmior, ut hostibus facilius aditus pateat? Pares

erunt

erunt omnino, ita in nostro casu. Pariter, quod homo dicatur semivivus relictus, indicat fuisse prius ex integro vivum, & ideo comparatus homini in iustitia originali constituto semivivus appellatur; è contrario homo purus semivivus relictus dici non posset, quia, nunquam habuit perfectam vitam, sed semper obnoxiam corruptioni, dici tamen posset semivivus creatus, quia ubi corruptio & mortalitas, ibi semivita, juxta illud Gregor. hom. 27. *Temporalis vita aeterna vita comparata mors est potius dicenda, quam vita*, & hoc propter quotidianum corruptionis defectum.

12. Ob. 2. Non tam ex adductis capitibus in probatione nostra, quam ex alio oritur major infirmitas hominis lapsi. Prob. Homo lapsus est averfus à Deo etiam ut fine naturali, homo purus non ita, sed homo averfus à Deo infirmior est homine non averfo, ergo, Prob. min. Homo averfus à Deo ut fine &c. est etiam averfus à mediis conducentibus ad finem, finis enim in practicis se habet, ut prima principia in speculativis, ergo sicut alienus à primis principiis est etiam alienus à conclusionibus, ita averfus à fine erit etiam averfus ab aliis operibus; & quidem homo lapsus est averfus culpabiliter; homo verò purus, etiamsi averfus esset, inculpabiliter esset, averfio autem culpabilis infert deteriore dispositionem ad finem, quam inculpabilis, ergo.

13. Si diceremus, lapsum non esse averfum à Deo ut fine naturali nisi connexivè & identicè satis aptè diceremus; immo etiam dici posset, nullo pacto esse averfum à Deo ut fine naturali, quamvis enim positiva conversio ad Deum ut finem supernaturalem non habeatur sine conversione ad ipsum etiam ut finem naturalem, attamen positiva averfio à Deo ut fine supernaturali haberi potest secundum se sine averfione à Deo ut fine naturali, & ratio discriminis est, quia conversio ad Deum ut finem supernaturalem est quid positivum & supe-

rius includens & perficiens id quod inferius est, & ideo conversus ad Deum ut finem supernaturalem est etiam conversus ad ipsum ut finem naturalem, è contrario averfio à Deo ut fine supernaturali est quid negativum, & superius quidem, sed non destruens naturale, quod ex dictis in sui integritate remansit, proinde averfio à Deo ut fine supernaturali non infert averfionem à Deo ut fine naturali. In hujusmodi doctrina sustinenda, esto peculiaris appareat, nihil difficultatis adinvenio, praesertim cum in sententia infra statuenda possit homo lapsus sine speciali gratia diligere Deum ut autorem naturalem super omnia. Nihilo tamen minus, ne ab aliorum tramite recedere videamur, dicimus, hominem lapsum esse averfum à Deo etiam ut fine naturali solum negativè, quatenus conversus non est, & in hoc sensu esse etiam averfum hominem purum, qui solum per proprios actus converti deberet, aequali itaque modo uterque se habet; nec quidquam facit ad rem averfio culpabilis vel inculpabilis, cum sit tantum culpa aliena voluntate commissæ, ex qua nihil positivi relinquitur. Hoc autem totum ostenditur per doctrinam superius traditam signanter num. 9. non enim excogitari potest averfio positiva ab uno, quin habeatur conversio ad aliud, sed peccatum originale ab aliis contractum non est conversio ad creaturam, sed sola averfio à Deo per privationem gratiæ, ergo non est averfio positiva, sed solum negativa.

14. Ulterius ad ostendendam propositi argumenti infirmitatem, cui tamen unicè opinionem suam commendat Puteobonellus, etiam admissa hujusmodi averfione positiva in homine lapsò, & negata in homine puro, adhuc nihil ex illa probatione concluderetur; falsum namque est, finem in practicis ita se habere ad media, sicut prima principia ad conclusiones. Primo quia licet in finis intentione contineatur inten-



tio mediōrum, attamen media non continentur in fine, sed sunt extra ipsum, è contrario in primis principiis continentur omnes conclusiones. Secundo, quia finis in practicis comparatur per media, prima autem principia nunquam demonstrantur per conclusiones; itaque eadem ratio in utrisque non est.

15. Admissa tamen illa distinctione averſionis positivæ, quam negamus in homine lapsō, & averſionis negativæ, quam tam in homine lapsō, quam in puro concedimus, occurrit instantia; ergo infantes decedentes sine baptismo non carebunt Deo ut fine naturali, immo neque supernaturali. Prob. Si infantes ante usum rationis decessissent in natura pura non caruissent Deo, ut fine naturali, ergo à pari. Consequentia tenet, nam ita est averſus homo lapsus, sicut homo purus.

16. Vides, dato hoc argumento adhuc assertum meum in sui robore, permanere; nam licet uterque sit negativè averſus, attamen purus esset inculpabiliter; lapsus culpabiliter cum debito subeundi indignationem Divinam, & ideo prior non careret Deo ut fine naturali, careret secundus, sed hoc nihil confert vel ad augendas, vel minuendas vires operativas sicut dictum fuit; præsertim cum debitum hoc fundetur in aliquo tantum morali, vires autem sunt in aliquo physico. Quid autem futurum esset in ea providentia, in qua fuisset conditus homo purus, nihil certi à nobis definiri potest. Aliqui dicunt, Deum non permissurum fuisse, aliquem decedere ante sufficiens rationis usum, & ideo quilibet per proprios actus potuisset se ad Deum ut authorem naturalem convertere; Aliqui docent, Deum collaturum fuisse beatitudinem naturalem, non ex conditione operis creaturæ, sed ex ordinatione Dei operantis, quasi supplendo id, ad quod, si homo adultus fieret, teneretur.

17. Instabis. Ex doctrina tradita, infertur, in natura lapsa esse aliquid mo-

rale, quod non esset in natura pura, ergo etiam aliquid physicum; Prob. consequentia. Omne morale suum fundamentum habet in physico, & morale, diversum in physico diverso, ergo. Sed contra. Verum est de physico præterito vel præſenti; proprio vel alieno, non autem semper præſenti, & semper proprio; fundamentum autem habet in ipso Adæ peccato transfuso in posteros, quod physicè fuit, & nunc moraliter perseverat.

18. Ob. 3. Homo lapsus facilius deberet peccare, quam homo purus, ergo. Prob. ant. Homo lapsus subdi debet majoribus Dæmonum tentationibus, dicente Tridentino, hominem per peccatum constitutum esse sub Dæmonis potestate; rursus in eo concupiscentia est magis indomita, & effrænâ, ergo; ut etiam ait S. Anselmus lib. de concep. Virgin. cap. 5.

19. Resp. Argumentum hoc nihil concludere, nam si duo sint, quorum unus plures habeat adversarios, alius paucos, ille succumbat, iste non, nequaquam inferri potest, ergo ille est debilior isto; ut manifestum est; ad probandam virium inæqualitatem oportet ipsis æquales vires opponi. Nihil tamen minus ne. ant. ad prob. quantum, attinet ad concupiscentiam dico, non esse majorem, quam fuisset in statu puræ naturæ; atque ita appellari à Sancto Anselmo aliisque Patribus facta comparatione cum iustitia originali, in qua nulla erat, & per integritatis donum, tanquam fera victa subdebatur; vel etiam factam esse magis indomitam & effrænem non præcisè per peccatum originale, sed per peccata personalia. Quod vero dicitur de Dæmonum tentationibus; certum est hominem lapsum, esse sub Dæmonis potestate, quia, si peccatum non expiaverit, æternas sub ipsius iugo debet pœnas exsolvere; sed hoc nihil refert ad rem nostram. Si vero intelligatur, subdi etiam Dæmoni tentatori; hoc in primis dici potest non-

con-

contingere in poenam peccati, siquidem tentavit hominem Dæmon etiam ante peccatum, & licet primi parentes in gratia permanissent, adhuc reliqui homines fuissent tentati, & plures peccassent; immo cum tunc habuissent homines majorem virtutem ad resistendum; vehementius Dæmones tentassent. Præterea; Dæmonem tentare, per accidens est ad naturam lapsam, hæc enim esse potuisset, quin vel fuisset aliquis Angelus, vel aliquis Angelus peccasset. Tandem; In illa providentia potuisset Deus creare Dæmones, qui propter peccatum naturali sine caruissent, tunc ab eodem homines contendissent avertere, sicut modo à supernaturali sine remove conantur. Verum quid fuisset in statu puræ naturæ circa Dæmonum tentationes aliquid certi neque à nobis, neque ab adversariis potest definiri, & ideo ex hoc capite nec ipsi firmum argumentum, nec nos firmam responsonem possumus asserre. Hoc tamen certum est, quod si homo lapsus majores patitur Dæmonum tentationes, validiori etiam Angelorum custodia roboratur.

## ARTICULUS II.

*Utrum homini lapso sit necessaria gratia ad cognoscendas omnes veritates naturales.*

20. **D**um gratiam dico, donum aliud quod distinctum à generali concursu, quem statuit ordo providentiæ præsentis intelligo: Dum de veritatibus naturalibus inquiri, de gratia naturali secundum substantiam, quæ altiorē vindicat locum, nequaquam difficultatem instituo. Hujusmodi autem veritates in duplici classe distribuuntur; Aliquæ sunt tantum speculative, quæ intellectum perficiunt, aliæ practicæ, quæ voluntatem movent, & si movent ad affectum opusque bonum, practicæ morales appellantur, universales quidem, si aliquod universale respiciant,

Tom. II.

v. g. *dandum esse unicuique suum*. Particulares vero, si aliquid particulare, v. g. *hic, & nunc est restituendum*. Rursus hujusmodi veritates perpendi possunt, vel secundum divisionem, vel secundum collectionem; Rem prius quantum ad speculativas resolvemus, non quidem à sensibus remotas, ut sunt cordis secreta, vel reconditas; ut numerus stellarum, sed sensuum ministerio reprehensibiles, & modo perceptas. De practicis vero postea stabiliatur.

21. Fuit aliquorum sententia præsertim Gregorii & Capreoli, quos sequi videntur Vasquez & Meracius, hominem lapsum nullam sine errore assequi posse veritatem, nisi specialis gratiæ fulciatur adjutorio; His adduntur alii, qui, distinguentes gratiam Christi & gratiam Dei, affirmant sine illa hominem posse non solum cognoscere omnes veritates naturales divisim sumptas, sed etiam collectivè; negant vero sine ista non solum omnes collectivè, sed etiam singulas seorsim. Communissima tamen Theologorum opinio cum S. Th. Scot. Suarez, Cachet. Alvarez &c. oppositum sustinet, & cum istis.

22. Dicendum primo. Ad cognoscendas veritates naturales speculativas divisim sumptas non est necessaria specialis gratia. Et certè ab hac necessitate excludendam esse gratiam Christi, illud sufficere potest quod docet Augustinus epist. 101. videlicet; illam gratiam nobis conferri propter Christum, pro qua obtinenda Christus mortuus est; mortuus autem est, ut essemus à peccato liberi & fideles, non autem ut evaderemus Philosophi, aut Astronomi, ergo. Excludendam autem esse etiam gratiam Dei.

Prob. Ad cognoscendas veritates naturales speculativas divisim sumptas non est necessaria specialis gratia, si sufficit solus generalis concursus, quem Deus præbet cæteris rebus, sed iste sufficit, ergo. Prob. mi. Si iste non sufficeret, intellectus humanus esset imperfectior quacumque alia forma, & facultate

E tate

tate naturali, sed hoc non est dicendum, cum sit facultas immaterialis, ergo. Prob. maj. Aliæ facultates, v.g. visiva & augmentativa per solum generalem concursum suos actus proferunt & effectus ergo si &c. Hæc est ratio, quam affert S. Thom. in 2. dis. 28. qu. 1. art. 5. & quam insinuat S. Prosper 22. contra colat. inquires. *Quis ambigat, hanc sapientiam humano generi ad temporalis vite utilitatem ex natura à Deo condita supersse reliquis?* Proponatur itaque intellectui objectum naturale, excitentur in ipso species, quod procul dubio naturaliter sit, quid deerit ne intelligat? Si neget; deerit ergo etiam proposito objecto suo aliquid oculo ne videat, & ita contra experientiam loqueris.

23. Dices disparem esse rationem, quia facultas visiva est determinata ad objectum suum, quod est color & lux, at intellectus non est determinatus ad verum, cum interdum feratur in falsum, quod judicat verum, ergo si absque errore objectum percipit, gratia Dei est censenda. Sed contra. Tam intellectus secundum naturam exigentiam est determinatus ad verum, quam oculus sit determinatus ad colorem & lucem, sed quia oculus, utpote sensitiva facultas, solum externa & sensibilia percipit, intellectus vero intima & abscondita, fit, oculus in colore, ut color est, nunquam in deceptionem incidere, intellectum vero aliquando errare, judicando quæ falsa sunt, tanquam vera; at hoc non contingit juxta intellectus ipsius exigentiam, sed præter, immo contra; Proinde quod feratur in objectum, ipsum veraciter cognoscendo, ex gratiæ specialis privilegio oriri non debet. Sed demus, intellectum, quia deficere potest, indifferentem esse ad verum & falsum, quid inde concludi poterit, ergo ex gratia speciali verum pertinet? Nequaquam; & sic argumentor ab opposito. Non fit injuria specialis intellectui, quod intellectus falso cognoscat, ergo neque fit gratia specialis, quod co-

gnoscat cum veritate; inferri tantummodo potest, Deum liberè cum ipso concurrere vel ad actum verum, vel ad actum falsum, sed sive sit actus verus, sive falsus, semper est concursus generalis debitus ejusdem naturæ, & magis quidem debitus ad verum, quia ad hoc propria natura tanquam ad sui perfectivum inclinatur, & ad falsum solummodo ex accidente desectitur, nimirum ex aliquibus impedimentis, quæ etiam sine speciali gratia removeri possunt, & de facto in pluribus removeri contingit.

24. Hac tamen in re adnotandum existimo; varia esse hominum ingenia. Aliqua ea fortia prædita sunt, ut vel industria propria, vel alieno magisterio facillimè rerum veritates percipiant; Aliqua Mediocri pollent Minerva, ut tamen labore studioque difficultates evadant; Aliqua tandem tam rudia, & impolita, ut nec labore proprio, nec alieno aliquid pertingere possint. Si de illis loquamur, non est ad gratiam specialem confugiendum, cum solis inspectis causis secundis, & providentia ordinaria suum finem assequi ipsis concedatur. Si vero de postremis, specialem gratiam non inficior, sed ad rem nostram non est, cum ea sint præter intentum naturæ, cui debitus est habere sub se individua, quæ ex vi providentiæ sibi data veritatem objectorum penetrent, ac speculentur. Quod si naturaliter cognosci potest per res visibiles existentia Dei, ut dicitur de Deo Uno, cur cognosci non poterunt aliæ veritates, quæ in primis principiis continentur, & ex ipsis inferuntur?

25. Oppositum tamen censendum est, si de veritatibus speculativis collectivè sumptis sermo instituat. Hoc autem multiplice ratione suadeo; Prima desumitur ex intrinseca naturæ nostræ conditione, quæ tot incommodis & periculis obnoxia est, ut mentem in plura distrahi necesse sit; Adde somni, victusque necessitatem, adde morbos, frequentesque vel capitis, vel stomachi alio-



aliorumque membrorum dolores, quibus impediri, ne res omnes penetrare possit, quis est, qui non videat? Dictum propterea Sap. 9. *Terrena inhabitatio aggravat animam, & deprimit sensum, multa cogitantem*. Secunda proponitur ex impedimentis extrinsecis contentis in illo Galeni aphoris. *Ars longa, vita brevis, experimentum difficile &c.* Ex omnibus istis oritur in homine moralis impossibilitas ad omnes collectivè veritates comparandas, unde factum est, ut nullus inter tot homines, quamvis, & ingenio vividus, & labore imperterritus, usque modo omnem hanc collectionem assequutus sit, quod est optimum argumentum ad inferendum, non esse in natura hanc vim, & facultatem, immo neque ad eam Deum gratiam, elargiri; Propter quod contra Pelagium asserbat S. Hieronym. dial. 1. requiri gratiam specialem ad vitanda omnia, peccata, quia nulli unquam sine gratia ea evitasse contigerit; de qua re alibi.

26. Ob. contra primam. Potest quis prudenter orare, ut pro aliqua veritate cognoscenda auxilium obtineat, & pro auxilio obtento gratias Deo rependere, sed ita veritatem cognoscere est gratiæ speciali tribuendum; ergo. Maj. experientia comprobatur; Minor vero traditur à S. Augustino ep. 95. *Oratio est clarissima gratiæ testificatio*. Et ep. 107. *gratiarum actio est certissimum signum, beneficii gratuiti*.

27. Resp. conc. maj. ne. mi. ad prob. dum pro obtinenda aliqua veritate preces effundimus, vel hoc contingit, non ut absolutè obtineamus, sed ut facilius, vel ut ipsam consequamur ad Dei gloriam, nostrumque meritum; Neque semper verum est, orationem referri ad gratiam strictè sumptam, cum experientia compertum sit, Patres orare pro filiis obtinentis, aliquando potius pro masculis, quàm pro fœminis; nos ipsos orare vel pro serenitate, vel pro pluvia, nec tamen aut filiorum procreatio, aut serenitas & pluvia pertinent ad.

Tom. II.

concursum gratiæ specialis, sed ad generalem providentiam, fallibiliter quidem attamen contingenter debitam, si non pro tali determinato tempore, saltem pro aliquo, quod sufficit ad excludendam gratiam specialem, quod enim etsi fallibiliter debitum est, gratia non est, cum hæc nullo modo sit debita. Oramus etiam agimusque gratias pro nostra conservatione, & pro pane quotidiano, & tamen conservationem & panem quotidianum ad generalem providentiam spectare, quis negat? Ita se habet in nostro casu; Tendit quidem, intellectus fallibiliter in objectum, ipsi tamen debitum est aliquando infallibiliter tendere, si non pro tali determinato individuo, saltem pro aliquo, proinde non est expectanda gratia specialis. Habetur ex his, quare quis non orat, nec gratias Deo agit, ut ignis v. g. comburat, non enim hoc evenit, quia ad combustionem factam, aut faciendam, sufficiat concursus Dei generalis, sed quia est infallibiliter determinatus ad combustionem, posito quod aptetur subiecto disposito.

28. Dices. Licet juxta præsentem providentiam debitum sit intellectui posse cognoscere objectum cum veritate, attamen actu non cognoscet nisi per gratiam specialem, ergo nulla doctrina. Prob. ant. Licet juxta providentiam, qua homo elevatus est ad finem supernaturalem debitum sit alicui auxilium efficax ad salutem, attamen quod uni tribuatur, alteri non, est gratia specialis, immo præstantissimum donum; ergo. Aliis etiam terminis. Ex providentia generali electionis inferitur homines posse salvari, quod tamen actu salventur specialis gratiæ donum est, ergo licet juxta præsentem providentiam debitum sit intellectui posse cognoscere cum veritate, attamen actu cognoscere est per gratiam specialem; Illud quidem in ordine supernaturali, hoc vero in ordine naturali.

29. Sed contra; negatur antecedens

dens paritatis; etenim ex elevatione hominis ad finem supernaturalem, ut contenta in illa voluntate generali salvandi omnes, tenetur Deus ad conferenda tantum auxilia sufficientia, non verò efficacia, cum hæc possit non conferre, & quando confert, tamquam dona gratuita conferat, dixi: *Ut contenta in illa voluntate generali*; Nam elevatio ad finem supernaturalem & voluntas salvandi omnes est tantum antecedens & inefficax; vel consequens & efficax; Si primum, valet quod dixi; Si secundum, nego auxilia efficacia esse distincta à dono elevationis, cum sine illis ista nequaquam haberi possit, & ideo sicut ista nemini debita est, ita nec illa alicui debita sunt. Ad secundum; argumentum nimis probat, cum idem heri posset loquendo etiam de facultate v. g. visiva, & de quacumque alia causa; ratio igitur defumitur ex dictis; quia in ordine supernaturali duplex est providentia & elevatio, in ordine autem naturali providentia generalis naturæ debita non solum est ad posse agere, sed etiam ad ipsam actionem, ut inductione patet, proinde &c.

30. Ob. 2. Posset aliquis homo servata providentia generali quacumque, veritatis cognitione semper carere, ergo quod aliquam veritatem cognoscat à providentia generali non provenit, sed à gratia distincta. Probat. ant. Posset Deus servata providentia generali causas secundas ita disponere, ut per suum cursum & ordinem naturalem, hominem semper in errorem inducerent, ergo.

Resp. ant. ad summum verum esse de aliquo determinate propter aliqua impedimenta præter exigentiam, & intentum naturæ, quod nostræ non opponitur conclusioni, vel in alia providentia in qua facultas intellectiva & sensitiva esset valde deterior, non autem in ista, in qua hominis lapsi facultates naturales eandem habent perfectionem, quam haberent facultates hominis puri,

proinde proportionem servant ad veritates naturales.

31. Ob. 3. Si homo lapsus sine speciali Dei gratia posset aliquam veritatem agnoscere, haberet aliquid quo posset gloriari, contra illud Pauli 1. ad Corint. 4. *Quid habes, quod non accepisti, si autem accepisti, quid gloriaris, quasi non acceperis?* Ergo. Atque hoc est, quod docuit Concil. Milevit. cap. 4. asserens illud pl. 93. *Qui docet hominem scientiam, & Arausic. cap. 22. inquit. Tam veritatem, quam iustitiam esse ab illo fonte, quem in eremo sitimus.*

Resp. ne. maj. quæ si vera esset, etiam ad videndum ambulandum, & quæcumque alia opera necessaria foret gratia specialis, alioquin aliquid haberet homo, quo posset gloriari; ratio est, quia ad veritatis agnitionem licet non requiratur specialis gratia, haberi tamen non potest sine Dei adiutorio, non quidem specialiter concurrente, sed agente ut auctore naturæ concursu ipsi debito, posito, quod illum velit in sui conditione conservare; Nihil igitur habet homo quod non acceperit, diverso tamen modo, quædam enim accipit per providentiam generalem & naturalem, quædam vero per particularem, & naturæ ordinem excedentem. Neque ita dicendo, Pelagii errori aliquo pacto assentimur, nam iste negabat quancumque gratiam supernam ad quencumque actum; immo, ut probat Abul. qu. 178, in 19. Mat. Bellarm. lib. 4. de gratia, Suarez &c. contra Janfenium, negabat etiam concursum generalem ad actus liberos, & pro hoc sufficere posset illud Hieron. in ep. ad Cresiphubi hisce verbis Pelagii doctrinam recenset. *Sic philosophatur & disputat &c. Frustra dedit arbitrii potestatem, quam implere non potero, nisi ipse me semper adjuverit. Destruitur enim voluntas, quæ aliter ope indiget.* Et ibidem loquendo de aliis actionibus. *Audite quæso, audite sacrilegum; si inquit voluero curvare digitum, movere manum, sedere, stare &c. sem-*

*Semper mihi auxilium Dei erit necessarium.* Ergo Pelagius negans hoc auxilium, etiam concursum generalem negavit. Conciliis adductis responsum dabitur in sequenti.

32. Contra secundam nihil producendum cenſeo, argumenta philosophica ſint, & in tractatus decurſu reſolvenda contingent.

### ARTICULUS III.

*Utrum neceſſaria ſit gratia ſpecialis ad veritates practicas.*

33. **V**eritates practicae aliae ſunt, quæ artibus inſerviunt, aliae, quæ ad mores diſponunt, quatenus accommodant objectum modo ſufficiente, ut voluntas poſſit honeſte operari. De primis nullum dubium eſt apud Doctores, conſtat enim ſine gratia ſpeciali homines poſſe vel plantare vineas, vel telas contexere &c. De ſecundis vero ita ſentiunt authores citati contra primum noſtrum aſſertum in antec. ſtabilitum, ſicut de veritatibus ſpeculativis, & potiori ratione, ut manifeſtum eſt, immo Puteobonellus nobis aſſentiens in eodem, ipſorum in hoc ſententiam defendit. Sunt verò alii, qui in intellectu practico duplicem actum diſtinguunt, unum pertinentem ad iudicium de re agenda, an ſit conveniens, nec ne, alium ad imperium, quo intellectus movet voluntatem ut velit, & agat. Illum aſſerunt ſine gratia haberi poſſe, iſtum nequaquam; Cui dicendi modo videntur aſcribendi illi, qui diſtinguentes cognitionem honeſtam in ſufficientem, per quam poteſt voluntas actum moraliter bonum habere, attamen non habet; atque in congruam, per quam non ſolum poteſt habere, ſed habet, ad illam aſſerunt gratiam non requiri, è contra ad iſtam. Sed utcumque ſe explicant.

34. Sentiendum cum S. Th. Scot. Duran. Richar. Suarez, Cacher. aliisque Theologis, hominem lapſum ſine gra-

tia ſpeciali poſſe cognoscere plures veritates naturales practicas.

Prob. primo authoritatibus pſ. 4. *Multi dicunt, quis oſtendit nobis bona?* Et reſpondet Propheta. *Signatum eſt ſuper nos lumen vultus tui Domine.* Qui textus licet pro materia diverſitate diverſis modis ab expoſitoribus explicetur, attamen de naturali lumine intelligendum eſſe docent Auguſt. & Cyril. lib. 1. in Joan. cap. 4. debere autem intelligi de agendis in particulari ex eo conſtat, quod bonum oſtendere actio eſt, actiones autem ſingularium ſunt, & parum prodeſſe cognitionem univerſalem demonſtrat experientia. Ad Rom. 1. *Cum Deum cognoviſſent, non ſicut Deum glorificaverunt.* Ubi oſtendit Apoſtolus, nihil excuſationis fuiſſe in Gentilibus, qui per noſtitiam à creaturis habitam cognoscentes Deum, ab idolorum cultu ſe non abſtinerunt. Ut nos ſentimus, ſenſerunt Patres; Paucos adducam, in hiſce etenim rebus plerumque labor ſolius calami eſt; *Simul cum formatione hominis implantata eſt ſcientia faciendorum & non faciendorum.* Ita Chryſoſt. hom. 54. in Gen. *Manu formatoris noſtri in ipſis cordibus hominum veritas ſcripſiſt, quod tibi non vis fieri, alteri ne feceris.* Ita Auguſt. in pſ. 57.

35. Reponere poſſes, hæc omnia vera eſſe de homine in ſtatu innocentiae, ſed iſto deperdito hæc ſimul periſſe, male reponis, ſi quæ in antecedenſibus dicta ſunt perpendes, pejus vero, ſi quæ infra dicamus, perſpicias. Interim illis admiſſis, ut admitti debent, quid facilius quam ita cogitare, nolo rapi quod meum eſt, ergo neque rapi debet, quod alienum eſt? Atque ex hoc colligitur ſatis validum fundamentum ad id probandum ratione, quod authoritate ſtatutum eſt; Sicut enim ex aliquo principio univerſali ſpeculativo cognoscitur naturali lumine propoſitio particularis in eo contenta, præſertim ſi principium univerſale proximum ſit. Ita ex aliquo principio univerſali practico

atico infertur naturalī lumine cognitio particularis practica ex eodem dimanans, & aliqua ad summum difficultas esse poterit in ejusdem exequutione, non tamen in cognitione. Plura tamen non addam ad assertum positum confirmandum, cum ex dicendis magis probatum videbitur. Hic tantummodo operæ pretium existimo plura opponere ac diluere, quæ directè contra cognitionem practicam militare videntur.

36. Ob. primo cognitio veritatis practica est per ordinem ad honestè operandum, sed hæc haberi non potest sine gratia speciali, ergo. Prob. mi. auctoritatibus Scripturæ 2. ad Corint. 3. *Non sumus sufficientes cogitare aliquid ex nobis tamquam ex nobis, sed sufficientia nostra ex Deo est.* 2. Paralip. 20. *Cum ignoremus quid agere debeamus, hoc solum habemus residui, ut oculos nostros dirigamus ad te.* Et profecto merito hoc dictum est, cum cogitationes humanæ sint addictæ vanitati, & ad malum ex sua natura propensæ juxta illud ps. 39. *Deus fecit cogitationes hominum, quoniam vanæ sunt,* & illud Gen. 6. *Videns autem Deus, quod cuncta cogitatio hominis intenta esset ad malum omni tempore.* Quæ quantum explicent gratiæ necessitatem, ne hujusmodi sint, nemo non videt.

37. Resp. ne. mi. ad textum Pauli; Hunc intelligendum esse de cogitatione practica & salutari honesta in linea superna, non in sola naturali, explicat S. August. in lib. 1. de prædest. Sanct. cap. 2. exponens Apostoli verba de cogitatione necessaria ad habendam fidem Theologicam; atque hoc satis aperte innuitur in contextu; nam prius dixerat. *Fiduciam autem talem habemus per Christum ad Deum.* Deinde addit; *non quod sufficientes simus &c.* Alius textus, qui continet preces Josaphat orantis Deum, ut se & suos ab hostibus, quibus resistere non valebant, liberaret, probat, in aliqua circumstantia cogitationes practicas haberi non posse sine

speciali Dei adjutorio, non tamen semper, si huiusmodi circumstantiæ removeantur. Verba David referuntur ad plurimas hominum cogitationes, non tamen ad omnes, ibi vero loquitur præsertim de illis, qui male de scientia & Providentia Dei sentiebant; eodem modo explicanda sunt postrema, & adde, ita dictum esse per ampliationem, sicut cum dictum fuit; *Omnis quippe caro corrumperet viam suam.*

38. Quo pacto autem explicavimus textum Pauli, explicamus & alios, qui possent afferri, vel ex Concil. Milevit. cap. 4. dicente: *Utrumque est donum, Dei & scire quid agere debeamus, & diligere ut faciamus.* Vel ex Arausic. cap. 9. asserente: *Non solum iustitiam, sed etiam scientiam, quæ illam generat, esse ex gratia.* Vel ex August. ep. 105. hæc habente. *Nemo rectè sapit, nisi qui donum intellectus & consilii acceperit.* Vel ex Fulgent. lib. de Incarnat. & gratia cap. 12. fatente. *Hominem peccando facultatem rectè cogitandi amisisse.*

39. Ob. 2. Cogitationes practicae sunt media ad beatitudinem, sed hæc, utpote indebita homini lapsō, quemadmodum ipsa beatitudo, nequeunt haberi sine gratia, ergo neque illæ. Secundo. Per cogitationes practicas acquiritur prudentia, sed hæc sine gratia acquiri nequit, juxta illud proverb. 8. *Mea est prudentia,* ergo.

Resp. esse media solum remota & negativa, hæc autem saltem aliqua esse debita naturæ rationali, cujus facultas, licet per peccatum infirma reddita sit, non tamen extincta; & quamvis etiam beatitudo naturalis indebita esset homini lapsō, non tamen indebita forent omnes honestæ cogitationes, quæ non sunt medium proximum nisi prout excludunt omnem errorem, sicut actus supernaturales non sunt huiusmodi ad beatitudinem supernaturalem, nisi prout excludunt quodcumque peccatum. Quod si velis esse indebitas, quia homo per peccatum ipsas demereatur, vanum esse



esse argumentum dictum fuit superius. Ad 2. parvi prudentiam æstimant, qui ita argumentantur. Prudentia non comparatur per aliquas honestas cogitationes, aut per aliquod exercitium virtutis, necessarius est affectus omnino constans moderatus & permanens, ut etiam in rebus difficilioribus serio & virtuosè quis operetur. Hoc autem sine gratia fieri non posse concedimus, sed non est ad rem nostram. Merito itaque dicit Deus: *Mea est prudentia*. Quamquam & hæc distingui posset in naturalem & supernaturalem, & de hac Spiritum Sanctum loquutum esse concludere.

#### ARTICULUS IV.

*Utrum ad quodlibet opus morale bonum sit necessaria gratia specialis.*

40. **E**X propositi quæsti resolutione pendet potissimum, quod in antecedentibus statutum est; Si enim probatur, posse hominem lapsum sine gratia aliquas operationes bonas & laudabiles in linea moris exercere, procul dubio habere etiam poterit cogitationes practicas & morales, cum nemo bene & laudabiliter agat, nisi prius bene & laudabiliter cogitet, ut manifestum est, & ostendit S. August. de prædestin. Sanct. lib. 1. cap. 2. Proposita tamen difficultas non adeo levis est, ut studium nostrum accuratius sibi non vindicet, cum præsertim catholicum dogma ab hæreticis omnino rejectum contineat. Voluerunt Calvin. Luth. Melanc. & Kemnit. hominem in natura lapsi quomodocumque operetur semper peccare, quamvis si firma fide teneat, à Deo non imputari, nihil nocere, nec tanquam prava opera esse recensenda. De hoc postremo nihil hic dicam, cum, ubi agam de justificatione, satis pertractandum occurreret. Primum igitur ad examen vocabitur. Voluit Joan. Hus, ut refert Concil. Constant. sess. 15. ad quodcumque opus bonum requiri gra-

tiam habitualement & sanctificantem, ita ut omnia opera peccatoris essent peccata; cui videtur adhæsisse Catherin. in cap. 3. Genes. super illa verba: *Adam ubi es?* Sed præsertim subscribit Michael Bajus dicens art. 35. *Omne, quod agit peccator aut servus peccati, peccatum est:* & proposit. 50. & 51. ubi asserit: *Omne motum concupiscentie etiam involuntarium esse peccatum.* Et prop. 40. hæc habere non trepidat. *Peccator in omnibus suis actibus servit dominanti cupiditati.* Et prop. 38. inquit: *Omne amorem creature rationalis, aut vitiosam esse cupiditatem, qua Mundus diligitur, aut laudabilem charitatem; qua per Spiritum Sanctum in corde diffusa Deus amatur.* Utrum hoc admitti debeat, erit secundum punctum. Voluerunt alii, ad opus bonum saltem necessariam esse gratiam fidei; ita ut ignorantes Deum, sive posita vincibiliter, sive invincibiliter hic non inquirimus, nullum actum bonum proferre possent; & de hoc jam pertractatum est in quæstionibus de fide Divina. Tandem controversia fit inter Catholicos, utrum nulla data necessitate vel gratia sanctificantis, vel fidei, requiratur saltem auxilium speciale Dei vel ordinis supernaturalis, vel saltem naturalis, & hoc erit tertium punctum. Ut autem hæc omnia, clarè distinetque stabiliantur, sequentes paragraphos exponemus.

#### §. I.

*Utrum omnia opera hominis lapsi sint peccata.*

41. **V**IX titulum audierunt Hæretici, nec linguam cohibere possunt, ne suam sententiam affirmativam in medium proferant, & sua fundamenta proponant. Quid enim, inquirunt, nobis deest, ne ita debeamus asserere? An Divina Scriptura? Quid ista dicat, audiant Catholici. Eccles. 7. *Non est homo iustus in terra, qui faciat bonum,*  
 & non

non peccet. Psal. 13. *Non est, qui faciat bonum, non est usque ad unum.* An Sancti Patres? Sed quid Gregor. 9. Moral. cap. 14. Quid Bernard. ser. 5. de verbis Isaia, quid pro omnibus August. lib. 9. Confess. cap. 13. & alibi? Fatentur hi omnes, in iudicio Dei nullam esse justitiam humanam honestam & laudabilem, nisi Deus quodammodo disimulet. Si vero rationes postulentur, plures non desunt. Homo per peccatum amisit eam facultatem operandi, quam in sui prima creatione accepit, semper igitur peccabit, cum vel dici debeat, adhuc teneri ad operandum cum ipsa rectitudine, vel peccando ab hac lege exemptum fuisse, quod postremum incongruum est existimandum. His adde, præceptum impositum in illis verbis, *non concupisces* nunquam posse adimpleri, cum non sit in hominis potestate effrænis concupiscentiæ motus, ad fomitem progredientes non sentire; nec aliud præceptum: *Diliges Dominum Deum tuum* posse servari propter eandem concupiscentiæ rationem, per quam vel deordinate agit, vel retardatur, ne modo consentaneo, & ut ad virtutem requiritur, operetur; Quemadmodum ergo gratia, quæ homini conceditur, nunquam fomitem adimit, ita nunquam sufficiet ad operandum sine peccato, igitur omnia opera erunt peccata.

42. Utinam hæc afferre desinerent Hæretici, ne ita loquentes nova peccata committerent. Cur nos ad Scripturas provocant, qui pro nostra sententia Catholica, & veluti Dogma Fidei tenenda Scripturarum auctoritatibus effluentes sumus? Multa egit, multa passus est Job, multa loquutus est, & tamen Scriptura dicit: *In omnibus his non peccavit Job.* Beatum dixit David psal. 1. *virum, qui non abiit in consilio impiorum, & in via peccatorum non stetit,* & psal. 118. *agnovit aliquos immaculatos in via, qui ambulant in lege Domini;* In epist. ad Hebr. 11. an non recenfer Paulus plures homines justos, rectèque operantes? An

non 2. Petri 1. habetur. *Satagite, ut per bona opera certam v. v. stram vocationem, & electionem faciatis.* Si dicant Hæretici, textus istos canonicos non esse, jam contra ipsos actum est, ubi de Scriptura à me traditum fuit; Sed necesse erit, negent etiam Evangelium, cum Mat. 5. legatur: *Sic luceat lux vestra coram hominibus, ut videant opera vestra bona.* Quæ autem opera bona videbunt, si omnia peccata sunt?

Patrum testimonia modo præterimus, cum aliis in locis passim afferentur; sufficiat pro omnibus legere S. Hieron. in dial. contra Pelagian. & S. August. præsertim in lib. de gr. & lib. arb.

43. Non ita vero à rationibus abstinere existimamus. Primo. Si omnia opera hominum sunt peccata, jam nullum est peccatum. Cur enim peccatum erit? Non alio titulo, nisi quia est contra legem æternam Dei, cui homo debet obtemperare, at si neque secundum vires proprias, neque secundum vires à gratia præstandas legem hanc servare posset, nec implere præcepta, procul dubio non peccaret, quo pacto enim obligabitur vel ad faciendum, vel ad vitandum, quod facere vel vitare non potest? Semper ergo peccabit homo, & nunquam peccabit. Secundo. Undenam ista bene operandi impossibilitas progredietur? Non aliunde, quam ab originali peccato, ex quo vim habuit fomes, & tentandi Dæmon majorem facultatem obtinuit, sed neque peccatum originale, nec fomes, nec Dæmon abstulit ab homine aut naturalem rationem, aut voluntatem, nec per hoc factus est homo incapax adjutorii Divini, quo & fomitem vincere, & Dæmonem superare ipsi daretur; immo si tanta vis Divinæ gratiæ & facultas est, ut possit lapsum justificare, ut contingit in pueris baptizatis, cur etiam non poterit hominem justificatum semper conservare, & efficere, ut non peccet? Tandem, sic ad hominem contra Hæreticos argumtor. Hæc fides, per quam iniquiunt ipsi, homi-

hominem iustum esse, vel est peccatum, vel non est; Si est peccatum, quomodo per ipsam iusti fient? Si non est peccatum, ergo homo in quolibet actu non peccat, & si non peccat in actu credendi, quare v. g. peccabit in actu orandi, vel eleemosynam largiendi? Prætereo Concilium Trident. sess. 6. can. 16. tum Beatissimæ Virginis perpetuam virginitatem & sanctitatem, ne novas Hæreticorum blasphemias audire contingat.

44. Jam vero ipsorum impietati stultitiæque potius, quam argumentis respondeo. Primus textus non dicit, *qui nunquam faciat bonum, & semper peccet*, sed qui faciat bonum & non peccet; idest omnis homo aliquando non facit bonum, & aliquando peccat, quod & nos fatemur, sed non rectè infertur, ergo omnia opera hominum sunt peccata. Peccat igitur quicumque homo, & dictum fuit proverb. 24. *Septies in die cadit iustus*. Et Joan. 1. cap. 1. *Si dixerimus, quoniam peccatum non habemus, ipsi nos seducimus*. Sed non semper peccator, qui aliquando peccator, resurgit multoties qui cadit, & in multis fit bonus, qui in multis factus est malus. Secundus textus licet explicetur à S. Augustino de Christo, idest: *Non est qui faciat bonum, non est usque ad unum nimirum præter unum Christum*, attamen non complectitur omnes actus personarum, sed omnes personas, ita ut nulla sit; quæ ex integro faciat bonum, & aliquando non peccet; quamvis & dici posset, id dictum esse per exaggerationem, & hyperbolem, sicut in anteced. asserbatur, nisi forte respondere placeat, ibi sermonem esse de hominibus stultis, impiis, & Atheis dicentibus in corde suo non est Deus, quorum in toto illo psalmo fit mentio. Quod attinet ad Sanctos Patres, dedignantur isti ab Hæreticis produci, & tantum abest ipsorum errorem docere, quod semper tradunt oppositum. Sanctus Augustinus adductus lib. 9. confes. cap. 13. orat pro Matre sua, quam appellat sanctam, de-

Tom. II.

votam, optimisque moribus instructam; veritus ne est, etiam orationem suam peccatum esse apud Deum, aut lacrymas Matris sue, pro ejusdem conversione profusas, fuisse peccatum? Si quid igitur ex Sanctis Patribus evinci potest, aliud profecto non est, nisi quod vel iustitia hominum non est quandoque per ordinem ad finem supernaturalem, vel comparatam Divinæ iustitiæ non esse; sed quid mirum? etiam creaturæ omnes in conspectu Dei nihil reputantur, & Deus in Angelis suis reperit pravitatem.

45. Nunc ad rationes. Quantum attinet ad primam; Sicut homines nunquam habuerunt integritatem & naturæ innocentiam, ita nunquam impositum illis fuit præceptum operandi juxta exigentiam, illiusque status perfectionem, eam propterea facultatem nunquam perdiderunt, quia nunquam habuerunt; immo nec Adam habuit præceptum eam recuperandi, quia fieri non poterat; amisit quidem Adam facultatem operandi sine sensus reluctantiæ, quam innocens habebat, non tamen perit facultatem operandi cum sensus resistentiæ, & gratiæ auxilio, ejusque arbitrium evaluit infirmum, non tamen periit extinctum. Quantum spectat ad secundam; Si ratio fomitis & concupiscentiæ omnes operationes vitiosas efficere, hoc certè contingeret præsertim in materia Conjugii; Sed si ita esset, cur Paulus dixit 1. ad Corint. 7. *Si acceperis Uxorem non peccasti, si nupsit Virgo non peccavit*? Attendendum est ergo; aliud esse, hominem concupiscentiæ motibus subdi, & aliud ipsis adhærere. Hoc peccatum est, nequaquam illud, neque præceptum datur ad illos evitandos, quia cum non sint actus liberi, præceptum circa illos versari non potest. Cum dictum fuit, *non concupisces*: Intellige juxta id quod habetur Eccles. 18. *Post concupiscentias tuas ne eas*, & quod scribit Apost. ad Rom. 6. *Non regnet peccatum in vestro mortali corpore ad obe-*

F

dien-



*diendum concupiscentiis vestris*. Sed demus, concupiscentiam & fomitem peccatum esse, nunquid concupiscentiae motus semper insurgunt? Experientia docet oppositum; Poterit igitur homo saltem pro hoc tempore aliquas operationes habere, quæ non sint peccata. Sed scias, immo ex concupiscentiae motibus maximum emolumentum proficisci. *Beatus enim vir, qui suffert tentationem*, inquit Jacob. ep. sua cap. 1. & dum conquereretur Paulus, datum sibi esse stimulum carnis, responsum accepit, *sufficit tibi gratia mea*, per quam postea dixit. *Bonum certamen certavi*, sed quomodo bonum certamen certasset, si semper agendo peccasset?

46. Ex his jam tenes, quo pacto non repugnat, Deum super omnia posse ab hominibus diligi; Dilixerunt cum tot Virgines, tot Martyres, qui omnia arbitrati sunt ut stercore, ut Christum lucrari facerent, & Apostolus tam constanter dicebat, neque per famem neque per angustias, neque per persecutiones, neque per gladium, neque per vitam, neque per mortem se à charitate separatum iri. Præcipimur præterea Deum diligere præcepto positivo, quod pro omni tempore non obligat, neque ad quodcumque opus bonum Dei dilectio requiritur, ut ostendatur. Gratia itaque Dei fomitem non adimit, fomitem tamen etiam insurgentem vincit; Concupiscit caro adversus Spiritum, sed etiam Spiritus adversus carnem; Si autem Spiritu facta carnis mortificaverimus, vivemus, inquit Paulus ad Rom. 8. frustra autem diceret, si mortificare non possemus. Intelligant hæc Hæretici, nec, ut liberior peccent, semper homines peccare contendant.

## §. II.

*Utrum ad omne bonum sit necessaria gratia sanctificans.*

47. **J**Am contra Joannem Hus, & Bajum instituitur disceptatio. Causa vero finita esset, si propositiones adductas num. 38. tanquam damnatas à Summis Pontificibus perspectas haberemus; Sed harum damnationem placet omittere, ut quam merito damnata sint, & quam à veritate discesserint, magis compertum appareat.

Dicendum propterea est; ad omne opus bonum non esse necessariam gratiam sanctificantem.

Prob. primo auctoritate Concilii Trident. quod sess. 6. can. 7. ait: *Si quis dixerit, opera omnia, quæ ante justificationem sunt, quacumque ratione facta sint, vera esse peccata, anathema sit*: Neque vim definitionis evitare possunt dicendo, aliud esse, illa opera non esse peccata, & aliud esse bona, quia esse possunt indifferentia. Primum esse definitum, non secundum; etenim, licet per me non repugnet actus indifferens in individuo, attamen mens Concilii erat, ita excludere ab illis operationibus peccatum, ut in ipsis moralis bonitas inveniat, siquidem loquitur de illis operationibus, ut non solum non sint peccata, sed etiam sint quædam dispositiones ad justificationem, sed operationes, quæ non solum non sunt peccata, sed quædam dispositiones ad justificationem, debent esse bonæ & non tantum indifferentes, ergo. Præterea, idem Concil. sess. 6. cap. 6. asserit, hominem disponi ad justificationem per actus provenientes ab excitatione & adiutorio Spiritus Sancti, sed isti actus boni sunt, & sunt in homine nondum justificato, proinde non habente gratiam sanctificantem, ergo. Hoc idem traditum prius fuit in Concil. Arausicano cap. 4. & 5. Quod si velint ad actus indifferentes confugere, ergo tandem tandem

dem concludendum erit, omnia opera peccatorum non esse peccata, quia esse poterunt indifferenter.

48. Hæc profecto fuit omnium Scripturarum doctrina, ubicumque peccatores invitantur ad aliquos actus, quibus possint aliquid boni à Deo impetrare vel se ad justificationem disponere, & ita generatim omnibus proponitur oratio Dominica, in qua præter alia dicimus, *dimitte nobis debita nostra*. Cur etiam Christus Luc. 11. & 18. hortatus esset peccatores ad orandum, si oratio ab ipsis facta aliquid boni non fuisset? Rursus; quare ad eleemosinam Luc. 11. *Date eleemosinam, & ecce omnia mundi sunt vobis*. Si hæc ad mundandas peccatorum conscientias non præpararet? Sed quid plura ex Scripturis proferemus? Afferatur exemplum Nabucchi, cui consilium datum fuit Daniel. 4. ut peccata sua eleemosynis redimeret, & iniquitates suas misericordias pauperum. Afferri posset etiam exemplum Cornelii act. 10. cui dictum fuit ab Angelo. *Orationes tue, & eleemosynæ tuæ ascendent in memoriam in conspectu Dei*. Cornelium autem nondum fuisse justificationem, tradiderunt Chrysost. Theophilactus, Augustinus; Quia tamen hoc certum non est, nec defunt alii Doctores oppositum sentientes, ideo ex hoc firmiter non probatur assertum nostrum, quod certissimum esse debet.

49. Prob. secundo ratione. Ex nullo capite est necessaria gratia sanctificans ad reddendum opus in se bonum, ergo frustra dicitur &c. prob. ant. Si ex aliquo capite est necessaria, vel in ratione causæ efficientis, vel causæ finalis, quatenus ut opus sit bonum, debeat referri in Deum summè dilectum, sed ex neutro capite, ergo. Prob. prima pars mi. primo quia dantur bona opera ordinis naturalis, quæ nequaquam per se dependent ab habitibus infusis, & huiusmodi opera fuissent etiam in statu puræ naturæ. nec tamen tunc fuisset habitus gratiæ sanctificantis. Secundo quia, sicuti qui ha-

beret habitum intemperantiæ, exercere posset aliquem actum temperantiæ, ut de facto constat, ita qui est in habituali peccato exercere potest aliquem actum virtutis. Tertio; quia etiam loquendo de actibus supernaturalibus, isti haberi possunt per auxilium actuale Dei ex metu gehennæ, ut definivit Tridentinum loquens de contritione imperfecta, ergo. Prob. secunda pars ejusdem minoris. Ut aliquod opus sit bonum, sufficit, si ex naturæ suæ referri possit in Deum, quamvis actu non referatur positivè ex intentione operantis, ut ostendi in tractatu de fide, ergo. Præterea. Opus referri in Deum super omnia dilectum nullum præceptum est, ut probat S. Th. qu. 100. art. 10. & neque ipsi justificati ad hoc semper tenentur, ergo.

50. Opponunt primo ex Divina Scriptura Isaia primo. *Ne afferatis ultra sacrificium frustra; incensum abominationis est*. Et rursus. *Cum multiplicaveritis orationem, non exaudiam, manus enim vestre sanguine plene sunt*. Ubi Deus opera hæc, quantumvis bona videantur, detestatur, quia à peccatoribus fiebant. Mat. 7. *Non potest arbor mala bonos fructus facere*. Atqui huiusmodi arbor sunt peccatores carentes gratia habituali & sanctificante, ergo.

51. Resp. in primo textu ita dictum esse comparando sacrificia veteris legis sacrificio, quod erat in nova instituendum, & ita certè illorum incensum abominationis est Deo, ut modo contingit in sacrificiis Hebræorum; vel ibi sermonem esse non de sacrificiis secundum se, sed propter sacrificantes, qui sacrificiis contenti cætera bona opera omittebant, & ita fiebat, aliquid boni ab ipsis exerceri, ipsos tamen pessimos esse. Ita ad secundum textum, præsertim quod si ad malum finem fiat oratio, jam non est bona, & de ipsa dicitur. *Oratio ejus fiat in peccatum*. Textus Mat. plures habet explicationes. Primo sumitur ibi arbor mala reduplicativè ut mala, quamvis vero in peccatoribus semper habituali-

ter mala sit, non est semper mala actualiter, idest in omni opere, ut dictum est de intemperante. Secundo excluditur bonitas fructuum per ordinem ad æternam salutem; non præcisè in linea naturali, immo neque in supernaturali disponente ad æternam salutem, nam arbor mala formaliter esse potest bona dispositivè, ut ex Trident. Tertio etsi id verum sit de arbore naturali ac materiali, non tamen de arbore libera, quæ interdum malè, interdum bene potest operari, bonitate relucente saltem in operatione, si non in operante. Quare autem opus dici possit bonum, quamvis alia opera sint mala, non ita dici possit operans bonus, qui semel vel pluries bene operatur, aliquando tamen male, ratio est, quia opus recipitur in operante, & denominatio mali ex quocumque defectu, opus autem unum non recipitur in alio opere. Tandem; sicut arbor bona, ut est justus, potest aliquem fructum malum facere, quia potest venialiter peccare; ita arbor mala, ut est peccator, potest aliquem fructum bonum facere.

52. Opponunt secundo ratione. Actio, quæ non est ad Deum ut ultimum finem, est mala, sed actio quæ non progreditur à gratia sanctificante, non est ad Deum ut ultimum finem, ergo. Prob. maj. Tum quia est illud Apostoli: *Sive manducatis sive bibitis omnia in gloriam Dei facite*. Tum quia aliter dignitas ultimi finis esset in creatura, proinde actio deordinata esset, ergo. Præterea. Quæcumque operatio hominis peccatoris caret perfectione sibi debita, ergo quæcumque est mala. Prob. ant. Quæcumque operatio hominis peccatoris caret ordine ad Deum summè dilectum, cum peccator Deum ita non diligat; & rursus caret iustitia, ad quam habendam tenetur, ergo; Quapropter, sicut homo nunc nascitur peccator, quia caret originali iustitia, quam debuisset habere; ita quando operatur, malè operatur propter eandem rationem. Tan-

dem. Omnis actus, qui non est secundum rationem, est malus, ergo etiam omnis actus, qui non est secundum charitatem, est malus, sed actus qui non est ex gratia sanctificante, non est secundum charitatem, ergo.

53. Hicse argumentis jam data responsio est in probatione nostra, juxta quam dist. maj. quæ non est ad Deum neque ex se, neque ex intentione operantis Conc. solum ex intentione operantis præcisivè ne. maj. è contra dist. mi. Illud porro Pauli consilium est, non præceptum, aut si præceptum, sumitur negativè in gloriam Dei, idest nunquam contra gloriam Dei; Verum minor etiam argumenti absolute falsa est, etenim actus fidei alique actus supernaturales sunt ad Deum ut ultimum finem, nec tamen sunt à gratia sanctificante, immo in sententia mea hoc idem dicendum est etiam de contritione. Ad secundum caret ea perfectione, sine qua esse nequit operatio salutaria, non sine qua nequeat esse actio moraliter, vel etiam supernaturaliter dispositivè bona, ut dictum fuit, & in hoc sensu caret etiam ea iustitia ad quam habendam tenetur, & pro qua habenda potest se disponere, vel remotè & negativè, si actus sint boni in ordine naturali, vel proximè & positivè, si in ordine supernaturali. Cœterum, sicuti permanere in statu peccati non est semper peccare, ita in ipso operari non est semper peccatum; & quantum ad operandum vel bene vel male, est libertas etiam in peccatore, non sic quantum ad nascendum in iustitia originali, cum voluntate aliena & ex pacto inito sine ipsa nascamur. Ad ultimum; per me antec. est falsum, cum sit possibilis actus indifferens, ipso tamen admisso discrimen est, quia in alia sententia operari juxta rationem obligat pro semper, & semper, non sic operari secundum charitatem; & operari secundum rationem latius patet, quam operari secundum charitatem; Hæc enim opera excellentis ordinis respicit, ratio vero

vero etiam ad opera naturalia se extendit, & satis servatur, si fiant ex honestate objecti & finis. Videat ergo Bajus quàm merito ipsius propositiones damnatae sint.

54. Maximum, quo gloriantur, ad Sancti Augustini mentem reducit, si pro ipsis praeclarissimus Doctor scripsisset. Cujus tamen dictis satis responderemus, dicendo probari per illa, opera sine charitate esse quidem mortua, non tamen mala, ut ex Ambrosii sententia notavimus. Attamen adversantes audiamus. Afferunt primo loco, quod legitur de gratia & lib. arb. cap. 18. *Præcepta charitatis tanta, & talia sunt, ut quidquid se putaverit homo facere bene, si fiat sine charitate, nullo modo fiat bene.* Secundo quod legitur lib. 1. de Gratia Christi cap. 26. *Ubi non est dilectio, nullum bonum imputatur, nec rectè bonum opus vocatur.* Tertio quod legitur lib. 1. retract. cap. 15. *Quantum est, quod valet voluntas sub dominante cupiditate, nisi forte si pia est.* Arbitratur ergo nihil valere, nisi per gratiam sanctificantem, per quam est pia; Rursus ibidem. *In tantum libera est, in quantum liberata est, & in tantum appellatur voluntas.* Quod autem ait liberatam, intellige justificatam, cum ibi loquatur de liberatione à peccato; unde subdit, *alioquin potius cupiditas, quàm voluntas appellanda est.* Alia hiæc similia congeruntur.

55. Hanc tamen non fuisse in Adversariorum sensu mentem Augustini, ut certissimum habendum est. Respondent autem aliqui, interdum charitatem sumi pro dilectione honestatis, ita ut ille ex charitate censeatur operari, qui operatur honeste, & secundum justitiam ejusdemque amore; Moventur ad hoc dicendum, quia Augustinus in iisdem locis ait: *Gratia nos effecit legis dilectores, lex sine gratia prævaricatores.* Ubi plane sentit, idem esse operari ex gratia seu charitate, quod ex dilectione legis & virtutis. Præterea; lib. 1. con-

tra duas epist. Pelagian. cap. 9. illud opus bonum esse affirmat, *quod fit ex amore justitiæ, seu voluntate benefaciendi*, quam voluntatem charitatem appellat; quo dato facilè explicatu est, quid in duabus primis sententiis indicaverit Doctor; utrum hujusmodi expositio recta sit, minime judico.

56. Si tamen velint, ibi sermonem esse de charitate strictè sumpta, de qua ait Apost. 1. ad Corinth. 3. *Quis separat à charitate &c.* hoc libentissime concedam, & videtur colligi ex Doctoris contextu; sed dicam, opus non procedens ex charitate nullo modo fieri bene in sensu Theologico & salutari saltem formaliter; non sic in sensu philosophico & morali, unde in secundo textu non dicit, nullum bonum fit, sed nullum bonum imputatur nec rectè bonum vocatur; & infra addit, *nihil omnino boni sine illa quod ad pietatem pertinet veramque justitiam fieri posse non dubitet.* In tertio textu non dicit, nihil est, sed quantum est, in quo innuit aliquid esse, parum tamen est, & ferme nihil cum ad salutem non conferat; & dum dicitur, *nisi forte si pia est* non debet intelligi tantum de gratia sanctificante, sed etiam de excitante, per quam ad pietatem movetur, seu fit pia dispositivè. In alio textu verum asseritur de libertate à servitute, non de libertate à necessitate; & dum subditur, *alioquin potius cupiditas, quàm voluntas est appellanda.* Non inferas necessario hominem trahi à concupiscentia, cum interdum possit contra operari, sed adeo parum, ut quantum ad denominationem nihil censeatur; Quando enim duo contraria reperiuntur in eodem subjecto, illud absolute denominat, quod prædominatur, ut patet.

## §. III.

*An ad bene moraliter operandum  
sit necessaria specialis gratia  
supernaturalis, vel saltem  
naturalis.*

57. **J**A M expendimus dubium, quod postremo loco proposuimus, de quo difficultas promovetur apud Doctores Catholicos nobiscum sentientes in iis, quæ in præcedentibus stabilita sunt. Non desunt vero in hac re plures Theologi sustinentes, necessariam esse gratiam specialem ad quodcumque opus morale bonum, vel supernaturalem, saltem quo ad modum, vel naturalem. Ita Gregor. in 2. dis. 2. qu. unica sub initio; Capreol. in 2. dis. 28. art. 1. pluresque alii, quos sequitur & citat Vafq. 1. 2. disp. 190. cap. 2. quamvis postea dividantur, ita ut aliqui exigant auxilium specialis gratiæ afficientis intellectum, aliqui afficientis voluntatem. Communior tamen sententia tradita à S. Th. Scoto, coëterisque, asserit hominem posse aliquod opus morale bonum exercere, quin aliqua specialis gratia suum præstet influxum illum excitando, vel adjuvando, & nihil plus requiratur, quam generalis providentia & concursus Dei, qui certè gratia est, non tamen specialis, quia non distincta à gratia creationis, & conservationis.

58. Hæc & nostra sententia est, & pro ipsa nihil loquar de gratia supernaturali, nam si probem, neque necessariam esse gratiam naturalis ordinis, potiori jure excludetur gratia supernaturalis etiam quo ad modum. Insinuat autem hoc nostrum assertum in primis per doctrinam Conc. Trident. quod cum sess. 5. can. 1. definiat, hominem suis operibus, quæ per naturæ vires sunt, justificari non posse, supponit, aliquas operationes bonas per naturam suam posse exercere; tum etiam per propositionem Baii 36. damnatam, quæ dicens: *Cum Pelagius sentit, qui boni aliquid na-*

*turalis, hoc est, quod ex naturæ solis viribus ortum ducat, agnoscit fundamentum validum inferendi præbet; ergo ex solis naturæ viribus potest boni aliquid naturalis agnoscere.*

59. Probatur attamen directè sic. Si ad quodlibet opus morale bonum requiritur specialis gratia, vel requiritur propter cognitionem progredientem ab intellectu, vel propter prosecutionem progredientem à voluntate, sed ex neutro capite, ergo. Prima pars minquamvis probata sit art. 3. hujus questionis, adhuc sic magis probatur. Non requiritur gratia specialis propter cognitionem progredientem ab intellectu, si hujusmodi cognitio, licet non sit debita singulis determinatè individuis speciei humanæ, sit tamen debita aliquibus & pluribus indeterminatè, aliter deberemus etiam asserere, sanitatem, pulchritudinem, & divitias esse per gratiam Dei specialem, atqui hujusmodi cognitio est debita saltem alicui, & pluribus indeterminatè individuis speciei humanæ, ergo. Prob. mi. Quando sunt plura principia indifferentia ad hanc vel illam operationem, ad hanc, vel illam cognitionem, est debita ipsis indeterminatè diversitas in operando & cognoscendo sic vel aliter, bene vel male, sed individua naturæ humanæ sunt principia indifferentia ad hanc vel illam operationem, ad hanc vel illam cognitionem, ut compertum est, ergo. Hæc ratio tanti valet, ut si aliter diceremus, dicendum foret, hominem sine gratia vel semper cogitare malum, vel ad summum indifferenter, & contra utrumque jam dictum est. Prob. modo secunda, pars primæ minoris primo positivè, per quod etiam magis declarabitur altera pars jam probata. Per Adæ peccatum non est amissum aut extinctum liberum hominis arbitrium ut dictum fuit art. 1. hujus quæst. ergo aliquid boni poterit ex viribus propriis; alioquin tantum valeret ad malum juxta aliam propositionem damnatam ibidem adductam.



60. Dixi prob. primo positivè, nam aliter negativè eandem partem demonstrò. Si requiritur gratia specialis propter prosecutionem boni progredientem à voluntate, non alia ratione requiritur, nisi propter divisionem & pugnam inter rationem & sensum, ita ut propter peccatum sensus sit prædominans & ratio infirma, sed ex hoc nihil evincitur, ergo. Prob. ni. Sensus in omni actu non est contrarius rationi, quamvis actus sit secundum rationem proinde honestus, ut se habet parentibus obsequi, filiis providere, pauperi subvenire, ergo ex divisione inter sensum & rationem atque ex illius prædominio rectè non inferitur necessitas gratiæ ad quodcumque &c. Adde, aliquando esse posse opus honestum consonum rationi & sensui, ut sunt actus eutropeliæ, amicum redamare, debitum reddere Marito, & hujusmodi. Præterea; non est tantum prædominium sensus, ut ratio vires suas prorsus perdiderit, aliquid ergo secundum se poterit, at quid posset, si nullum opus honestum in linea naturali posset? Horum autem omnium ratio reducitur ad illam, quam assertit S. Th. quæst. 24. de verit. art. 14. inquiens: *Bonum autem, quod est humanæ naturæ proportionatum potest homo per liberum arbitrium explere*. Et profert exemplum actus, quo quis eleemosynam pauperi elargitur.

61. Plures ad probandam illam minorem paritatem adstruunt, & existimant subtiliter. Quamvis in statu innocentia ratio esset prædominans, attamen sensus remansit superior, ergo quamvis in natura lapsa sensus sit prædominans, attamen ratio potest remanere superior; Attamen ratio non advertit, nequaquam sensum in illo statu hujusmodi futurum fuisse, nisi fuisset tentatio; ex quo sic argumentor. Quando ratio erat prædominans sensui, sensus non vicisset, nisi fuisset tentatio, ergo quando, in modo est, sensus est prædominans rationi, ratio non vinceret, nisi esset gratia.

62. Pauca sunt, quæ opponi possunt,

& sunt illis simillima, quæ jam rejecta fuerunt art. 2. & 3. hujus quæstionis. Hic tantum subijciam Concilium Arausicanum cap. 22. ubi ait: *Nemo habet de suo nisi peccatum & mendacium*, & can. 2. ubi: *Nulla bona facit homo, quæ non præstet Deus ut faciat homo*. Denique Augustinum serm. 13. de verbis Apost. cap. 11. dicentem: *Agis quidem illo non adjuvante, sed male*. Quæ omnia veræ non essent, si absque speciali gratia posset homo bene moraliter operari. Verum propositiones istæ dictæ sunt contra errorem Pelagii, proinde probant, hominem per ordinem ad salutem & actus supernaturales nihil habere boni, sed tantum peccare, nisi auxilio Dei roboretur; constat enim ex propositione damnata adducta ante probationem, assertum nostrum omnino alienum esse à Pelagio.

## ARTICULUS V.

*Utrum ad diligendum Deum super omnia necessaria sit gratia specialis.*

63. **S**I sermo fieret de amore supernaturali, quo diligitur Deus, ut summum supernaturale bonum, à quo omnia supernaturalia dona proficiuntur, nulla quæstio esse posset inter Doctores Catholicos, & tantum contra Pelagianos esset disceptatio. Certum enim est, hujusmodi amorem non nisi ex speciali gratia haberi posse, cum & ex Divinarum Scripturarum testimoniis, & Sanctorum Patrum auctoritatibus, & Conciliorum definitionibus id colligamus. Plura fortasse expectatis? Mea non interest pluribus, quæ idem significant, volumen augere. Pro Scripturis sufficiat id, quod habetur 1. Joan. 4. *Charitas ex Deo est*. Et ad Rom. 5. *Charitas Dei diffusa est in cordibus nostris per Spiritum Sanctum, qui datus est nobis*. Pro Sanctis Patribus sufficiat S. Augustinus dicens lib. 4. contra Julian. cap. 3. *Amor Dei, quo pervenitur ad Deum,*

non

*non est nisi à Deo*, & ep. 107. habet evulgatam sententiam illam; *Liberum arbitrium ad diligendum Deum primi peccati granditate perdidimus*. Quod certè viribus naturalibus intelligendum est, aliter non esset sententia Catholica. Pro Conciliis aferam Arausic. can. 15. inquiring: *Prorsus donum Dei est diligere Deum*. Et præ cæteris sit Trident. sess. 6. can. 3. statuens, anathema esse qui dixerit, posse hominem sine prævenientis Spiritus Sancti inspiratione Deum diligere, sicut oportet, ut justificationis gratia conferatur, proinde ut authorem supernaturalem.

64. Difficultas est igitur de dilectione erga Deum ut authorem naturalem, quæ proinde dilectio naturalis nuncupatur, atque istam dari posse, evincitur ex propositione Baii damnata, art. 4. primæ quæstionis num. 24. neque vero fit quæstio de dilectione utcumque, idest, vel simplicis complacentiæ, vel conditionata, vel inefficaci, sed benevolentiæ, absoluta, & efficaci, cum si de primæ sermo contingat, solius liberi arbitrii viribus haberi posse communis sit Theologorum doctrina, qua de re, nullam pro hac parte censeo asserendam esse rationem.

65. Amorem benevolentiæ illum dico, quo diligitur Deus propter Deum, idest amore amicitiae, de quo actum est in mea Morali Philosophia. Absolutum illum appello, quo non tantum quis vellet diligere, sed reverè diligit. Efficacem tantum illum agnosco, quo voluntas prompta est ad quidquid agendum, vel patiendum propter Deum, ita ut nihil Deo, Deus omnibus præferatur. Duplex porro efficacia esse potest, una, quæ affectiva dicitur, alia, quæ effectiva nuncupatur. Hæc secunda exigit actualement observantiam totius legis, exactamque omnium tentationum victoriam, & hanc, tanquam certum existimandum, est, per solam specialem gratiam haberi posse, ut ex dicendis declarabitur. Prima verò consistit in actu voluntatis, quo

hic & nunc rebus omnibus præhabeatur Deus, quamvis, dum vel gravis tentatio urget, vel aliquod præceptum obligat, nec vincatur tentatio, nec præceptum servetur. Non est autem necesse, quando hujusmodi actus exercetur, examinet diligens Deum impedimenta, incommoda, tentationes; & rursus fieri potest, nullam tentationem insurgere, aut motivum retrahens, dum quis in talem actum dilectionis prorumpit.

66. Communis Theologorum sententia, quam tradere dicitur S. Th. p. 2. qu. 109. art. 3. quem sequuntur Joan. à S. Th. Gonet. Suarez, Alvarez, Belarmin. Elparz. Cacher. Puteobon. &c. docet, dilectionem erga Deum ut authorem naturalem solummodo per gratiæ specialis vires haberi posse. Pro opposita referuntur ex Thomis. Cajet. to. 1. opusc. tract. 4. qu. 1. Sot. lib. 2. de natura & gr. cap. 14. & Can. de poenit. p. 5. §. *Tertio etiam*. Hanc docuerunt Durand. in 3. dist. 29. qu. 2. Hanc Molina & Ariaga, immo Scot. in 1. dist. 17. qu. 2. & 3. aliique in locis, quamvis hanc non fuisse mentem expressam Subtilissimi, Vega contendat. Propter hoc primam sententiam amplecti cogitaveram, & libentissimè eam propugnasset, nisi Doctorum argumenta perpendens, ea magni ponderis non esse comperissem; nec ea displicerent, quæ ferme hæreditario jure evulgantur, auditoribusque traduntur. Quapropter.

67. Sentio, ad dilectionem Dei super omnia in sensu explicato non esse necessariam gratiam specialem.

Prob. Si impossibilitas diligendi Deum super omnia non oriatur ex defectu physico, vel morali impedimento, ex naturæ viribus possibilis est hujusmodi dilectio, atqui impossibilitas diligendi Deum super omnia neque oritur ex defectu physico, neque ex aliquo morali impedimento, ergo. Prob. mi. Actus iste dilectionis in se spectatus est actus naturalis, homo non semper tentatur ne in hunc actum prorumpat, immo confide-



siderans Divinam bonitatem etiam naturalem ad hujusmodi amorem excitatur, ergo impossibilitas diligendi Deum super omnia neque oritur ex defectu physico, neque &c. Quod si possumus naturaliter diligere hominem, ne quidquam contra ipsum faciamus, & pro ipsa omnia patiamur, cur ita non possumus diligere Deum, quem naturaliter cognoscimus esse diligendum, & naturali præcepto ad ipsum diligendum tenemur? En profecto aliud argumentum. Quod Deus diligatur est naturale præceptum, ergo naturaliter possumus Deum diligere, alioquin præceptum esset ultra vires naturæ; & quemadmodum, quia tenemur ad diligendum Deum, ut authorem supernaturalem, Deus dat omnia auxilia sufficientia gratiæ, ita quia tenemur ad diligendum Deum, ut authorem naturalem, dedit Deus omnibus vires sufficientes naturæ.

68. Dices. Rationem hanc non probare, etenim tenemur etiam ad servandam totam legem naturalem, nec tamen hanc servare possumus nisi ex viribus gratiæ, ut infra ostendetur, & omnes concedunt; Sed contra; ideo ad servandam totam legem naturalem, & quidem pro diuturno tempore, necessaria est gratia, quia moraliter fieri non potest, hominem aliquando graviter non tentari, & quia in humana voluntate est inconstantia & vertibilitas, non vero quia ex se observantia totius legis naturalis naturæ vires excedat, & hoc fatentur ipsi Doctores adversantes, præsertim Suarez, ut dicam in proprio loco. Ergo cum in nostro casu unius actus dilectionis nulla supponatur tentatio, nec locum habeat inconstantia & vertibilitas voluntatis, instantia facta non urget.

69. Dices secundo; habito lumine fidei cognoscimus Deum esse diligendum ut authorem supernaturalem, & tenemur ad ipsum sic diligendum, ergo non requireretur ulterior gratia, sed hoc est contra Patres & Concilia, ergo licet

Tom. II.

naturaliter cognoscamus, Deum, ut authorem naturalem, esse diligendum super omnia, & teneamur ad eum sic diligendum, attamen requireretur gratia specialis.

Sed contra. Conc. totum antec. & ne. conf. argumentum ipsum sibi respondet; nam sicuti non possumus cognoscere Deum ut authorem supernaturalem, nisi per gratiam, ita non possumus à fortiori amare Deum ut authorem supernaturalem; nisi per gratiam, magis enim, ut sæpe docet Angelicus, corrupta est natura quantum ad appetitum boni, quam ad appetitum veri; ergo sicuti possumus cognoscere Deum, sine gratia ut authorem naturalem, ita & possumus, sine gratia eum diligere, nisi aliunde probatur oppositum, non potest autem probari nisi ex capitibus à nobis adductis in probatione, ergo. Hac autem major corruptio naturæ ad appetitum boni satis servatur, quando adveniunt tentationes, & occurrunt præcepta hinc & nunc servanda, quæ omnia non est necesse perpendat, qui actum dilectionis habet etiam efficacem, immo aliquando prudenter consulunt Confessarii, ne quis, vel in amando Deum, vel in peccatorum detestatione proponat sibi difficultates & pericula, quæ occurrunt. Neque obstat, in illo actu dilectionis contineri virtute & implicite propositum efficacis vincendi omnes tentationes, totamque legem servandi; etenim hoc est verum ex parte actus, non tamen ex parte agentis reflexè, proinde ipsi nihil additur difficultatis. Non concludit hoc argumentum; propono vitare omnia peccata lethalia, ergo eadem gratia requiritur ad proponendum, quæ ad vitandum, experientia enim comperitum est, plures proponere & quidem efficaciter; paucos tamen evitare; quare hoc? Quia plura se offerunt vincenda, dum vitari debent, quam dum vitatio proponitur; ita non tenet hoc aliud, dum diligo Deum super omnia, statuo mihi servandam totam legem, ergo sicut

G

non

non possum servare totam legem sine gratia, ita non possum diligere Deum, super omnia sine gratia; concludet quidem, si dum diligo Deum, aliqua tentatio obicitur, sed hoc non est ad rem, nec probat absolute; præsertim cum propositum hoc non sit expressum, nec necessario in positiva intentione agentis. Minus vero contra nos probat, amorem hunc efficacem, quandiu perseverat, esse connexum cum totius legis observantia, omniumque tentationum victoria. Nam ad efficaciam alicujus actus non est necessaria actus continuatio, & hoc probaret ad perseverantiam amoris gratiam necessariam esse, non ad productionem, illud autem non nego; nam etiam ad perseverandum diu in gratia plus gratia requiritur, quam ad habendam gratiam; Tandem; posset etiam pro aliquo tempore amor hic perseverare sine gratia; quia posset pro aliquo tempore nullum peccatum vitandum occurrere; posset nulla tentatio ad peccandum impellere.

70. Rationi nostræ propositæ n. 67. accedit argumentum petitum ex doctrina S. Th. 1. p. qu. 60. art. 5. nimirum, ultra præceptum diligendi Deum, inveniri etiam inclinationem in humana voluntate, qua naturaliter trahatur ad amandum Deum super omnia; inquit enim S. Doctor quælibet rem naturaliter inclinari ad amandum etiam super bonum proprium bonum commune, & capitis, atque bonum, quod est Deus, est bonum commune, & capitis, ergo. Hinc Sancti Patres, & præsertim Bernardus, inexcusabilem dicunt etiam infidelem, si ex toto corde non diligit Deum, quare? An quia ipsi parata sit gratia ut diligit? Minime; sed quia naturalis ratio hoc suadet. En illius verba in lib. de diligendo Deo. *Clamat innata, & nota rationi iustitia, quia ex toto se illum diligere debet, cui se totum debere non ignorat.* Tantum propterea abest, hominem natura sua Deum diligere non posse, quod potius, si non di-

ligit, contra naturalem inclinationem & exigentiam agit.

71. Confir. conclusio. Potest quis solis naturæ viribus efficaciter velle servare hoc præceptum naturale; *Quod tibi non vis fieri, alteri ne feceris.* Proinde diligere proximum sicut semetipsum, quando nullum motivum contrarium opponitur, nec ulla tentatio, ergo etiam potest quis solis naturæ viribus servare hoc aliud, *diliges Dominum Deum tuum.* Proinde etiam diligere Deum supra se ipsum, quando nullum motivum contrarium &c. ut fieri potest; Consequentia tenet, nam certè plus amabilitatis & honestatis reperitur in Deo, quàm in quocumque alio objecto. Rursus. Potest quis naturaliter solum detestari unum, peccatum super omnia detestabilia, ergo etiam potest quis naturaliter solum, amare Deum super omnia amabilia. Consequentia valet, nam plus est bonitatis in Deo, quàm malitiæ in peccato. Tandem. Reprehenduntur Philosophi, quia cum cognovissent naturaliter Deum, non sicut Deum glorificaverunt, ergo quia potuerunt naturaliter glorificare, & per consequens naturaliter diligere.

72. Opp. primo ex Scripturis & Patribus, in quibus sæpissime legimus, dilectionem Dei esse donum Dei, per ipsam totam legem impleri, & ab omnibus damnantur dicentes, hanc esse posse ex nobis, & non à Deo, ergo. Antecedens ostenditur ex Sancto Augustino de grat. & lib. arbit. cap. 18. lib. 12. de Civit. cap. 9.

Resp. argumentum hoc satis infirmum esse. Scripturæ enim & Patres loquuti sunt in eo sensu, in quo definitum fuit à Conciliis Arausic. & Trident. nimirum, dilectionem Dei sicut oportet, ut justificationis gratia conferatur, esse donum Dei, per ipsam impleri totam legem, non solum prout se extendit ad præcepta naturalia, sed etiam supernaturalia, non solum quantum ad substantiam, sed etiam ad modum, atque ita

non

non posse esse ex nobis, sed ex Deo; Dilectio autem Dei præcisè ut authoris naturalis, quantumvis efficax, non est sicut oportet, neque sufficit ad justificationem vel inchoandam, vel conferendam, ergo de hac nihil stabiliunt; immo ex ipsis videtur esse oppositum inferendum; nam dicendo, impossibile esse sine gratiæ adjutorio dilectionem, sicut oportet, innuunt, possibile esse aliam dilectionem, quæ non est sicut oportet, sed hæc est dilectio naturalis etiam efficax, ergo hanc supponunt possibilem, aliter superflua esset illa particula. Hinc falso nobis opponitur, sententiam nostram Pelagiano errori adhaerere, etenim Pelagius quamcumque dilectionem, etiam sicut oportet ad salutem æternam, & diffusam in cordibus nostris per Spiritum Sanctum naturæ viribus haberi contendebat, & ideo damnatus fuit. Nos autem ab hoc prorsus alieni sumus.

73. Opp.2. Homo lapsus, ut Deum diligat super omnia, averti debet à bono commutabili, & ad Deum super omnia converti, sed non potest averti à bono commutabili sine gratia nec ad Deum sine gratia converti, ergo. Prob. mi. Si posset sine gratia averti à bono commutabili &c. jam sine gratia posset sanari, sed hoc non, ergo. Quamobrem vel maneret simul averfus & conversus, vel per illum actum auferretur averfus & culpa, utrumque autem falsum est. Præterea. Per hujusmodi dilectionem disponderet se ad gratiam vel proximè vel saltem remotè, immo aliquo modo, saltem ex titulo gratitudinis, obligaretur Deus ad illi gratiam conferendam, sed neutrum dicendum est, ergo.

74. Resp. rationem hanc esse nimium limitatam; etenim de homine lapsò justificato nihil probat, & falsa est major, & ideo saltem iste posset naturæ viribus Deum super omnia diligere; deinde nimis probat, nam sequeretur, peccatorem etiam per auxilium gratiæ actualis non posse diligere Deum ut authorem.

Tom. II.

naturalem propter rationem ibi adductam, quia, vel maneret simul averfus, quia peccator, & simul conversus, quia diligens Deum, vel per illum actum deberet statim remitti peccatum, quod affirmari non potest. Directè respondendo dis. maj. debet averti à bono commutabili &c. sistendo in linea naturali conc. per ordinem ad finem supernaturalem. ne. & sic ad prob. quia sanaretur sanitate secundum quid, idest naturali, non vero simpliciter, idest supernaturali, & hac ratione remaneret averfus absolute, nec auferretur culpa, quia hæc est contra Deum ut finem supernaturalem. Verum, quomodo homo lapsus sit averfus à Deo, patet ex dictis art. 1. hujus quæstionis, ubi etiam dictum fuit, hujusmodi maculam & averfionem non minuere vires ad operandum nisi in linea supernaturali. Ad reliqua negatur major; non enim disponderet proximè ad gratiam habitualement, quia non convertit ad Deum, sicut oportet; non remotè, quia non disponit proximè ad aliquam gratiam actualement, cum sit semper ordinis inferioris, unde ad summum dispondere posset remotè negativè, in quo sensu minor est falsa. Quod dicitur de titulo gratitudinis, nullam vim facit; hæc enim in Deo locum non habet; & ad summum Deus conferret huic actui aliquod naturale præmium, quod non negamus.

75. Dices contra primum. Fieri nequit, hominem lapsum esse conversum ad Deum ut finem naturalem, & esse aversum à Deo ut sine supernaturali, ergo si per dilectionem naturalem esset conversus primo modo, esset etiam secundo, vel si non isto, neque illo; & sicut averfus à fine naturali, est etiam averfus à fine supernaturali, ita è contrario conversus ad Deum ut finem naturalem, est etiam conversus ad Deum, ut finem supernaturalem.

Sed contra. Instantia ista valet, sive dicamus, requiri gratiam, sive negemus; etenim etiam admittentes, ne-

cessariam esse gratiam, per hujusmodi dilectionem converti hominem ad Deum ut finem supernaturalem, sustinere non possunt; idcirco est immediatè juxta doctrinam Bani excludentis duplicem amorem, de qua jam dictum est supra; remanet propterea dicendum ut supra, hujusmodi hominem absolūtè esse aversum à Deo, & secundum quid conversum; in praesenti autem rerum ordine, in quo homo est elevatus ad finem supernaturalem, nisi detur supernaturalis conversio, naturalis nihil prodest; Vel dici posset, antecedens esse verum connexivè, non formaliter, per accidens titulo elevationis, non secundum se. Paritas postrema inanis est; nam qui se reddit indignum sine inferiori, magis se reddit indignum sine superiori, non è contra; ideo aversum à Deo ut sine naturali, est etiam aversum ab ipso ut sine supernaturali, non vero conversus ad Deum ut finem naturalem, est etiam conversus ad ipsum ut finem supernaturalem.

76. Opp. 3. ex doctrina S. Th. loco citato. Si natura lapsa posset ex virtute sua diligere Deum super omnia, posset habere actum in naturali ordine perfectissimum, nam sicut charitas supernaturalis est inter supernaturales actus maximus actus, ita charitas naturalis est inter actus naturales actus excellentissimus, sed hoc non est dicendum, ergo. Prob. mi. natura lapsa, utpote natura infirma & corrupta, nequit tanto praedita esse vigore, ut possit quod est in natura maximum, aliter ubi esset hæc infirmitas, & corruptio? ergo. Potest quidem infirmus aliquem naturalem motum exercere, non tamen excellentiorem. Hinc debet prius sanari, aut saltem aliunde robur accipere, quod contingere non potest, nisi per auxilium gratiae. Addidi ego illas particulas, *aut saltem aliunde robur accipere*. Alioquin si ad solam sanitatem, ut contendit S. Th., argumentum reducatur, nullum est, quia probaret, quod quemadmo-

dum per solam gratiam habitualementur, ita ad diligendum Deum necessaria sit gratia habitualis, quod nullus ex Doctoribus Catholicis asserit; Ratio autem Sancti Doctoris ad hoc punctum revocatur, quod natura corrupta tendit in bonum proprium, proinde non potest ex se ferri in Deum propter Deum.

77. Resp. conc. maj. ne. mi. ad prob. ne. ant. in sensu nostræ conclusionis, quando videlicet nulla urgeat tentatio, nec sit impedimentum morale. Ubi autem sit hæc infirmitas & corruptio, jam dictum fuit; debet ergo sanari, aut aliunde robur accipere in ea linea, in qua est infirma & corrupta, est autem in linea supernaturali, & per respectum ad naturam in origine sanctam, non tamen in linea naturali, & per respectum ad naturam ut naturam; in ea linea, in qua appetitus sensitivus in rationem exurgit, at hoc non semper contingit; & patet ex dictis. Per quod & solvitur summa rationis S. Thomæ. Et constat ulterius, quia quis potest sine speciali gratia restituere quod alienum est, quamvis sit contra proprium privatumque bonum, de quo nemo dubitat.

Opponerem ultimo argumentum validius, quo utuntur prorsus omnes adversantes cum Suarez, nimirum in actu dilectionis Dei super omnia includi observantiam omnium mandatorum &c. sed satis contra hoc jam à nobis dictum est. Hinc arbitror, sustinentes nobiscum hominem lapsum non esse debiliorem homine puro, & post peccatum omnia naturalia integra remansisse, nullo pacto defendere posse, necessariam esse specialem gratiam ad dilectionem Dei, ut auctoris naturalis. Atque ex responsionibus nostris validissima possunt argumenta desumi.



## ARTICULUS VI.

*Utrum ad vincendas tentationes  
sit necessaria gratia  
specialis.*

78. **Q**uemadmodum tres anima patitur hostes, Dæmonem, Mundum, Carnem, ita in triplici genere tentatio potest contingere, scilicet à concupiscentia propria, ab hominibus, à Dæmonibus. Prima intra hominem est, aliæ extra hominem sunt. A' Deo autem vel ab Angelis Sanctis nulla tentatio ad malum inducens esse potest, ut dicit Jacob. cap. 1. sed dumtaxat est tentatio probationis, sive tribulationis, ut homines digniores efficiat, juxta illud, *Deus tentavit illos, & invenit eos dignos se*. Porro quælibet ex hisce tentationibus esse potest vel levis, vel gravis, non quia versetur in levi vel gravi materia, quatenus inclinet ad peccandum leviter vel graviter, sed propter modum, quo quis tentatur. Levis igitur appellabitur illa, quæ ex parte intellectus modicam vim habet ad suadendum, ex parte voluntatis tenuem impulsum, aut quamvis admodum valeat ad suadendum & impellendum, attamen brevissimo tempore, & ut dicam momentaneo, sentitur; gravis autem dicitur illa, quæ & pertinaciter intellectum suadet, & vehementer voluntatem inclinat, & pro diuturno tempore suadere & inclinare persistit. In hac tamen re non adeo facile statui potest, quænam sit levis vel gravis tentatio, cum inspicenda sint plura, vel ex complexione, vel ex ingenio, vel ex moribus subjecti, quod enim uni leve videbitur, erit alteri grave.

79. Triplici modo tentatio vinci potest, quia ex triplici motivo. Primo ex motivo supernaturali non solum resistendo, seu non peccando, sed etiam actum oppositum habendo, quo æternæ vitæ præmium comparetur, & hæc est perfecta victoria, de qua dicit Augu-

stin. 21. de Civit. cap. 16. *Tunc vitia vitia deputanda sunt, cum Dei amore vincuntur* cui subscribunt S. Th. in 2. dis. 28. qu. 1. art. 2. Bonavent. & Richard. Secundo ex motivo turpi & peccaminoso; ita ut aliquis unum peccatum vitando in aliud incidat, quemadmodum se habet v. g. qui vel avaritia, vel inani gloria ducti luxuriæ non indulgent; & in hoc nulla est resistentia vel victoria, *cupiditas enim carnalis, quæ peccatum augetur, cupiditate alia non sanatur*, ait August. lib. 3. contra duas epist. Pelag. c. 4. & quamvis hoc Sanctus Doctor non dixisset, satis ex ipsis terminis compertum habetur. Tercio tandem ex motivo naturali honesto, ita ut aliquis vel suspendat actum, ad quem tentatio inducit, si tamen hoc fieri potest, vel ex naturali honestate opposito modo operetur. In primo sensu nulla est controversia, cum contra Pelagium cum Scripturis & Patribus oppositum sentiat Ecclesia; sed neque in secundo; quia gratia ad peccandum requiri non potest, neque Deus adiutorium præbere; Vitium autem autem propter vitium vitare peccatum est; Itaque ad tertium tota quæstio revocatur.

80. Fuerunt Doctores aliqui, quibus tribuitur sententia defendens etiam ad levium tentationum victoriam, seu saltem resistentiam (hoc nomine victoriam pro hac quæstione appellabimus) requiri gratiam specialem; citantur pro hac Gregorius, omnesque illi, qui negant sine speciali gratia haberi posse opus morale bonum, quibus adduntur Petrus Soto in instit. Sacerd. sect. 16. de poenit. Abul. in cap. 19. Mat. inno & Bellarmin. lib. 5. de lib. arbitr. cap. 7. quamvis isti revera ita non senserint, nisi ex quadam incidentia, seu aliquo verbo, quod parvi faciendum est; Quod si alia fuisset eorum mens.

81. Conclusio prima. Ad vincendam tentationem levem non est necessaria specialis gratia. Hanc docent Sot. lib. 1. de nat. & gr. cap. 21. Henric. quodl. 5. qu. 20.

qu. 20. Vega opusc. de justific. qu. 12. præsertim vero S. Bonavent. in 2. dis. 28. art. 2. qu. 2. & communissimè Theologi eum Suarez, Cacher. Puteobon. Alvarez, Medina &c.

Prob. primo auctoritatibus 1. ad Corint. 10. *Fidelis Deus, qui non patitur vos tentari supra id quod potestis*, idest ubi natura deficiet, vires porriget gratia, ly autem *supra id quod potestis* supponit naturam aliquid posse, nihil autem posset, si nec leves tentationes vincere posset. Ibidem; *Tentatio vos non apprehendat nisi humana* hoc est, ex Chrysol. *brevis, parva, moderata*, hanc ergo vinci posse naturæ viribus existimat Paulus; subdit autem laudatus Doctor hom. 24. quærens ad quas tentationes vincendas sit necessaria gratia, respondet; *ad omnes ut ita dicam*, ex qua limitatione satis colligi potest, aliquas esse tentationes, quæ per liberum arbitrium vinci possunt, & prosequitur loquens de levibus. *Neque humanas licet facile ferre absque Divino auxilio*, ergo Divinum auxilium datur ad facile hujusmodi tentationes, non vero ad absolutè vincendas. Agnovit hoc & Concilium Trident quod sess. 6. cap. 11. inquit: *Deus impossibilia non jubet, sed jubendo monet, & facere quod possis, & petere quod non possis, & adjuvat, ut possis*, quibus verbis fatetur, hominem aliquid posse, & aliquid non posse nisi per gratiam, nihil autem posset, nisi tentationem levem vincere posset. Sed quidquid sit de hisce testimoniis, quæ parum probantia affirmo, affero potestremo loco propositionem trigessimam. Bani damnatam à sæpius memoratis Pontificibus, quæ est ista: *Fures sint & latrones &c. qui dicunt tentationi ulli sine gratia ipsius adiutorio resistere hominem posse, ut in eam non incidat, vel ab ea non superetur*. Ergo ab opposito dicendum est, alicui tentationi resistere posse, ergo saltem levi.

82. Prob. secundo ratione, non quidem desumpta ex quo sicut homo per liberum arbitrium sine speciali gratia po-

test aliquo modo bene moraliter operari, ita etiam possit aliquo modo tentationem vincere, quo fundamento omnes Doctores utuntur, sed inefficax existimo, quia respondere possent, posse hominem bene moraliter operari, si nulla tentatio sit, & sic semper probandum remaneret, posse vincere etiam tentationem levem. Minus etiam placet argumentatio Suarez lib. 1. de neces. gratiæ cap. 23. num. 22. qua contendit, hominem ex viribus naturæ habere sufficientem potestatem ad resistendum, alioquin non resistendo non peccaret, quia non tenetur ad impossibile, nam idem dici posset, quando urget tentatio gravis, cum etiam tunc habeat sufficientem potestatem ad resistendum, alioquin etiam tunc non resistendo non peccaret. Aliter igitur sic & brevissimè. Potest esse major honestas in objecto, quæ ad operandum moveat, quam vis in tentatione quæ deterreat, ergo potest plus voluntas naturaliter moveri ab honestate, quam deterreri à tentatione, cur ergo istam non vincet? Ex alia parte tentatio levis mentem non perturbat, ne objecti honestatem consideret, & ab ipsa non alliciatur, aliter non esset levis tentatio, ergo.

83. Dices ex Bellarmino. Hoc ipsum, quod levis tentatio sit, est gratia specialis Dei, per quam hostes nostri impediuntur, ne vehementius in nos pugnent, eo pacto quo si essent duo, qui mutuo decerarent, & aliquis impediret, ne unus ex illis aut armis aut omnibus viribus uteretur, si alius vinceret,tribuendum esset gratiæ impediæntis.

Sed contra. Tentationem levem esse, gratiæ speciali tribui non potest, ergo nulla laudati authoris doctrina. Probant. quod potissimum est de tentatione Dæmonis, ut fatentur adversantes Doctores; Si tentationem esse levem tribuendum esset gratiæ speciali, tentationem pro aliquo tempore esse nullam, esset gratia specialior, ut rationis paritas locum habeat, sed tentationem pro aliquo



quo tempore esse nullam esset gratia specialior, ut rationis paritas locum habeat, sed tentationem pro aliquo tempore esse nullam non est ex gratia specialiori, immo neque speciali, ergo. Prob. mi. primo quia nullum opus morale bonum sine viribus gratiæ exerceri posset; quod est contra Bellarm. Secundo quia nullam esse tentationem ex naturalium causarum concursu contingere potest, & ex quo reprehensetur objectum tantum honestum, quod sensui repugnans non sit. Tertio quia spectat ad generalem Dei providentiam impedire, ne Dæmon tentet, quantum potest, aliter totum ordinem universi perverteret, aliquando vero provenire potest ex Dæmonis malitia & astutia, ut vel homo aliquando vincens de sui victoria gloriatur, vel ut ipsum securiorem reddat, & ita facilius in gravioribus rebus illum decipiat; ergo. Non inficiamur tamen, hominem leviter tentari esse aliquando, & semper esse gratiam singularem Dei, & ideo à Deo petendum esse, negamus tantum tentationem esse levem semper ex Dei singulari gratia derivare, quod ad nostram rem satis est.

84. Contra hoc tamen videtur opponi posse directè, quod ait S. August. contra Quin. hom. 23. citatus à nobis art. 1. quæstionis primæ, in qua deesse suasorem, tempus, & locum ad committendum adulterium gratiæ Divinæ tribuitur, proinde deesse tentationem ejusdem gratiæ beneficium est. Rursus lib. 10. confes. cap. 31. inquit: *Ebriosus nunquam fuit, sed ebriosos à te sobrios fuitos ego novi, ergo à te hoc factum est, ut hoc non essent, qui nunquam fuerunt, à quo factum est, ut hoc non semper essent, qui fuerunt.* Atque in hanc rem facit illud loco supracit. *Nullum est peccatum, quod facit homo, quod non possit facere alter homo, si desit rector à quo factus est homo.* Ex quibus concluditur, & esse gratiam vitio non assentiri, & esse gratiam ad vitium non tentari, ergo pari ratione erit gratia leviter tantum tentari. Hisce

similia habent S. Ambrosius, Prosper, Gregor. Magnus, alique Patres.

85. Verum advertendum est, Augustinum Sanctosque Patres ad hoc præcipue operam suam impendisse ut error Pelagii confunderetur, & cum iste tam gratiam, quam etiam generalem concursum negaret, ut dictum fuit art. 2. hujus quæst. illi etiam generalem concursum gratiam appellarunt; vel se ex diametro opposcentes, sicut ille nihil gratiæ tribuebat, ita isti nihil sine gratia fieri posse affirmabant, quamvis ita revera in omnibus non sentirent; vel loquutos esse de tentationum victoria salutari & per ordinem ad finem supernaturalem, in quo sensu certum est, neque levem tentationem sine gratia vinci posse, nec aliquod opus haberi; vel de tentationibus gravibus, ut in sequenti conclusione stabiliemus; Vel tandem, etiam non tentationem, vel tentationem levem tribui posse gratiæ Dei, non tamen semper & necessario. Ex secunda explicatione habetur, quomodo intelligenda sint Concilia, si quæ afferantur, ut est Arausica. can. 14. dicens: *Nullus miser de quacumque miseria liberatur, nisi qui Dei misericordia prævenitur.*

Prætereo alia argumenta, cum ferme sint eadem quæ producta sunt contra punctum statutum art. 2. & 3. hujus quæstion. Nunc devenio ad tentationes graves, de quibus.

86. Conclusio secunda. Sine speciali Dei gratia nullam tentationem gravem vinci posse laudabiliter. Assertum hoc facilius tenent Doctores adducti contra assertum primum, sed est adeo receptum apud Theologos, quamvis ex antiquis non fuerit, qui illud accuratè examinaverit, ut communis sententia existimetur. Traditur à Soto, Gabriele à S. Vincent. Bellarm. Vega, Suarez, Cacher. Puteob. Alvarez. Non desuerunt tamen plures contrarium arbitantes præsertim Duran. in 2. dif. 19. qu. 2. Molina in concord. qu. 14. art. 13. Egid. in 2. dif. 28. qu. 1. art. 4. Sed quod mi-

rum est, pro hac parte afferuntur S. Th. p. 2. qu. 109. art. 4. & 8. qu. 77. art. 7. & Scot. in 2. dif. 28. q. unica, sed ineptè bona venia Patris Suarez uterque citatur, ut in illis locis videre licet. Sententiam hanc totis viribus Pelagiani defendebant, sed diversis omnino principiis; Siquidem isti victoriam etiam perfectam & salutarem viribus naturæ concedebant, è contra Doctores Catholici solum negativam asserunt, quatenus liberum arbitrium possit ita tentationi resistere, ut non peccet, non tamen ut mereatur sine gratia, proinde errorem omnem evitant.

87. Prob. primo ex Scripturis, in quibus tentationum victoria Deo protegenti tribuitur; juxta illud psal. 27. *In te cripiar à tentatione*, psal. 127. *Impulsus everfus sum ut caderem, & Dominus suscepit me*. Mat. 26. *Orate, ne intretis in tentationem*. 1. ad Corint. 10. *Tentatio vos non apprehendat, nisi humana, fidelis autem Deus, qui non patietur vos tentari supra id quod potestis*. Ex quibus evincitur dari aliquam tentationem non humanam vires naturales excedentem. Ista sane fuit omnium Sanctorum Patrum sententia, diuturna series contexti posset, sed, ut frequenter soleo, sufficiat mihi Augustinus. Ecce illius verba ser. 13. de verbis Apost. cap. 9. *Hæc est militia nostra, in hoc agone cum confingimus, Deus habemus spectatorem, in hoc agone dum laboramus, Deum postimus adiutorem, senim non ipse nos adiuvet, non dico vincere, sed neque pugnare poterimus*. Et epist. 93. nunc Innoc. I. 26. ad Concil. Milevit. *Nisi magnis precibus gratia in nos implorata descendat, nequaquam terrena labis & mundani corporis vincere conemur errores, cum pares nos ad resistendum non liberum arbitrium, sed Dei solum facere possit auxilium*.

88. Respondent, istas, aliasque innumeras auctoritates intelligendas esse contra Pelagium, ita ut necessaria sit gratia ad vincendas tentationes modo

salutari, & opere digno æterna remuneratione. Fateor, explicationem omnino improbari non posse, & satis servare, ne sententia nobis opposita sit error infide, sicut fuit sententia Pelagii. Attamen si attendamus, Patres omnes in hac re adeo strictè loqui, ut asserant, liberum hominis arbitrium in tentationibus vincendis aut nihil, aut parum posse, ita ut in ipsis non peccet, profecto fatebimur, eos ad hoc scopum habere, ut in ipsis vincendis etiam negativè; idest, ut non peccemus, Dei gratia, necessario requiratur. Plura non dicam, sed plura dixerunt S. Th. in 2. dif. 28. qu. 1. art. 2. ad 6. Bonavent. in 2. dif. 28. qu. 2. satis mihi est perpendere verba, laudata S. August. *Non dico vincere, sed neque pugnare*. Aliud, *ad resistendum*. Et quantum explicatio allata deficiat, ipse cogita.

89. Propter hoc dixerunt alii, præsertim Guliel. de Rubion. in 2. dif. 28. §. *Quantum ad tertium* posse hominem tentationi resistere, ut non peccet, per hoc præcisè quod non agat, idest per omissionem liberam, singillatim, quando agitur de præceptis negativis; atqui ad non agendum & liberum omittendum actum, non est necessaria gratia, specialis, erpo.

Sed neque effugium hoc admitti posse contendo; nam in primis, utrum non repugnet pura omisso libera, penes Theologos est disputatio, & licet absolute dari posset, non tamen in omni casu, & præcipue dum gravis urget tentatio, quia, si voluntas tunc vinci nolit, tenetur ad aliquid faciendum, vel se opponendo tentationi per affectum oppositum, vel petendo à Deo auxilium, vel applicando intellectum sanctis piisque cogitationibus, aliter, nihil agendo, ac ferme dormitando, peccaret, quia morali peccandi periculo sponte se exponeret. Verum transmittam, etiam in hoc casu dari posse hujusmodi omissionem, argumento respondeo distinguendum minorem; atqui ad non agendum &c.

non est necessaria gratia specialis ex parte ipsius non actionis conc. antecedenter ad non actionem ne. mi. & conf. debet enim dari aliquid, per quod voluntas consensum cohibeat, & positivè velit non operari, & hoc erit auxilium Dei speciale, vel afficiens intellectum per aliquam immixtam considerationem, vel voluntatem per aliquem immixtum timorem, aut alio modo.

90. Si rationem pro sententia nostra quis exposceret, multiplicem autores asserre contendunt, ut statim expono.

Probant aliqui, quia si homo per solam arbitrii libertatem aliquam tentationem gravem vincere posset, posset successivè prout occurrunt, vincere, quamcumque tentationem, nam post victam primam non est ablata libertas ad vincendam secundam, & tertiam &c. immo est acquisita major virtus, cum per primum actum bonum comparetur inclinatio ad alios actus, sed hoc non est faciendum, alioquin sine gratia posset servare totam legem etiam pro toto tempore vitæ, quod juxta sanam doctrinam concedi non potest, ergo.

Videtur hæc argumentatio vim aliquam præferre, sed si rectè perpendatur, omnino corrui; idem enim dici posset de tentationibus levibus, & de peccatis venialibus, quæ quidem, si seorsim accipiantur vitari possunt & vinci, non tamen si collectivè, ut suo loco ostendetur. Datur itaque in ipsa tentationum collectione aliqua difficultas, & moralis impossibilitas, quæ non reperitur in una, vel altera.

91. Probant alii, quia cum una tentatio gravis æquivalet pluribus tentationibus levibus simul, & collectivè acceptis, sicut ad vincendas plures tentationes leves simul & collectivè acceptas requiritur gratia specialis, ita ad vincendam unam tentationem gravem, assumptum autem ostendunt, quia tentatio gravis vel talis dicitur, quia diu durat, vel quia vehemens est; si primum, æquivalet tot tentationibus levibus,

quot sunt instantia, quibus durat; si secundum, æquivalet pluribus tentationibus levibus, etiam si omnes simul unentur. Ergo.

Verum neque ex hoc quidpiam probatur, & est argumentum, ut araneorum tela, subtile forsitan sed inane; nam si velint ita simul accipere tentationes leves, ut efficiant tentationem gravem, remanet adhuc irresoluta questio, & revera si tentatio levis diu dureret, jam amplius levis non est, ideo semper petitur principium; Quod si tentationes leves sumuntur pro temporis diversitate, omnes vinci poterunt secundum se, si vero omnes simul velis conjungere, ad tentationem levem non spectabunt.

92. Probant alii, necessariam esse gratiam, quia homo per peccatum est aversus à fine honesto, & voluntarie conversus ad bonum delectabile, propter quod est etiam debilior homine puro, ut igitur in bonum honestum feratur per victoriam tentationum, seu per resistantiam, requiritur auxilium, per quod hujusmodi deordinatio & infirmitas auferatur, quod plane erit distinctum à generali concursu, qui naturali cujuscumque rei exigentiæ se accommodat.

Sed neque ex hac ratione aliquid concludi posse videtur; nam in primis valeret tantum in eorum sententia, qui asserunt, hominem lapsum debiliorem esse homine puro, magis autem apud Theologos certum est, requiri gratiam specialem ad gravem tentationem vincendam, quam certum sit, lapsum esse puro debiliorem, proinde certius probatur per incertius. Secundo ex ipsa non potest generatim concludi; nam supponamus, hominem esse tantummodo lapsum per peccatum originale sine aliquo peccato actuali, certe tunc esset quidem negativè aversus à fine honesto, non tamen conversus ad bonum proprium & privatum, ergo in prima gravi tentatione non esset juxta adductum fundamentum ipsi gratia necessaria.

93. Aliter igitur sic probatur conclusio nostra. Urgente tentatione gravi impossibile moraliter est, voluntatem ipsi non assentiri, dico moraliter, quia libertas & potestas physica adhuc perseverat, ergo ne assentiatur, necessaria est gratia specialis. Prob. ant. Licet arbitrium voluntatis per peccatum non sit extinctum, attamen propositum objecto delectabili & honesto inclinatur ad delectabile, non ad honestum ex natura sua, & delectabile, utpote sensibile, praesens, immediate propositum maiorem vim habet ad movendum, quam habeat honestum, mediatè tantum perceptum, & fere semper futurum; addatur ergo huic naturali inclinationi tentatio, per quam intensè ac vividè reprehensetur delectabile, remissè verò & vix reprehensetur honestum, quo pacto voluntas tentationi non assentiatur? Si connaturale est operari juxta pravalementem inclinationem, praternaturale erit operari contra, ergo hominem determinari ad operandum oppositum, progreditur ab aliquo, quod naturale non sit, ergo ex gratia speciali. Neque valet, voluntatem ex vi sua libertatis posse prosequi bonum minus relicto majori bono proposito; nam hoc est verum loquendo absolute, non autem urgente tentatione ad unum, ab alio verò summo opere retrahente; verum est relicta facultate tam physica quam morali, non sic morali sublata; verum est de honesto & honesto, de delectabili & delectabili, non vero de honesto ex una parte, delectabili ex alia.

94. Oppones primo. Per nullam tentationem, vel ut loquitur S. Th. 1. 2. qu. 10. art. 3. per nullam passionem adimi potest arbitrii libertas, quod clarissime innuit S. Hieronym. lib. 2. in Jovinian. dicens: *Liberi arbitrii nos condidit Deus, nec ad virtutem nec ad vicia necessitate trahimur, alioquin ubi necessitas, neque damnatio, neque corona est.* Ergo homo per vires suas potest quamcumque vincere tentationem; & ratio

est, quia si non posset, non resistendo non peccaret, & deberemus dicere, Deum jubere impossibile.

95. Respondent aliqui huic argumento, in hypothesi gravis tentationis remanere tum libertatem physicam, tum moralem, & necessariam esse gratiam non titulo libertatis, sed propter inconstantiam & infirmitatem operantis. Mihi tamen magis arridet doctrina S. Th. per quam magis infirmatur hoc, quod Pelagianorum erat. Perpendendum est, quod ut homo dicatur absolute liber ad vincendas tentationes, non est necesse, eas per vires proprias vincere possit, sed sufficit, si possit ex viribus gratiae, quam Deus ipsi asserit, aut saltem asserret, si ab ipso peteret; quod enim cum Divino auxilio possumus, absolute possumus juxta illud Aristot. 3. Ethic. *Quae per amicos possumus, simpliciter possumus.* Qui Catholicus est hoc negare non potest; aut dicit, hominem non esse liberum ad observanda praecepta supernaturalia, & resistendum tentationibus contra ipsa, cum nec illa observare possit; nec istis resistere sine speciali Dei gratia, quod ab Ecclesiae veritate omnino est alienum. Adde, impossibilitatem moralem esse consequentem, non antecedentem, libertas autem per istam tollitur, non per illam. Juxta hanc doctrinam tradit Trident. quo pacto Deus impossibilia non jubeat, dicens scilicet 6. cap. 11. *Deus impossibilia non jubet, sed jubenda monet & facere quod possit, & petere quod non possit, & adjuvat ut possit*, quam auctoritatem etsi alibi retulerimus, attamen hic referri non dedigneris.

96. Aliter respondet Suarez lib. 1. de neces. gr. cap. 24. docens, etiam sine gratia habere hominem impossibilitatem moralem ad vincendas graves tentationes; & adhuc libertatem servari, supponendo tamen tentationem durare per plura instantia, dicit enim pro omnibus indeterminatè instantibus posse per vires proprias resistere, determina-



tè autem pro nullo. Remaneat respon-  
sio tanti Doctoris in suo robore; attamen  
quid responderet, si tantum pro unico  
vel duplici instanti duraret, & vehe-  
mentissima esset? An non pro unico in-  
stanti esse potest consensus? Videtur re-  
sponso nequaquam universalis, sed so-  
lum ex illa suppositione. Hac utitur Ca-  
cheran. qui tamen concedit, non omnes  
tentationes graves per plura instantia  
durare.

97. Opp. 2. Quæcumque tentatio  
sit, oritur ex concupiscentia carnis, dicit  
enim Jacob. in epist. sua cap. 1. *Unusquis-  
que tentatur à concupiscentia sua abstra-  
ctus & illeclus.* Atqui naturaliter ratio  
potest vincere quod est ex concupiscentia,  
aliter falsum esset illud Genes. 4. *Sub  
te erit appetitus tuus, & tu dominaberis  
illis.* Ergo.

Resp. jam data est art. 4. q. 1. sisten-  
do tamen in superiori doctrina ne. min.  
& textus adductus intelligi debet de do-  
minio, quod homini per gratiam con-  
ceditur, quia Deus per gratiam suam non  
patietur ipsum tentari supra id, quod  
potest, & hoc magis declarabitur, ubi de  
auxiliis sufficientibus habebitur sermo.

98. Opp. 3. Per tentationem gra-  
vem non potest plus homo ad malum in-  
duci, quam sit hominis inclinatio ad  
conservandam vitam, sed potest quis ex  
motivo honesto vincere inclinationem  
ad conservandam vitam, ergo etiam  
poterit ex eodem motivo vincere tenta-  
tionem gravem. Prob. mi. exemplo tot  
hominum, quos referunt & laudant hi-  
storiarum, qui tormenta & mortem pro Ci-  
vibus ac pro Republica pertulerunt, im-  
mo etiam se ipsos necarunt. Magis ro-  
boratur argumentum in Hæretico, qui  
pro defendendo suo errore, vel aliqua  
veritate Catholica, quam retinet, mor-  
tem non timet; certe ad hoc gratia non  
conceditur, cur igitur idem non poterit  
evenire in Catholico pro eadem verita-  
te Catholica sustinenda?

99. Resp. melius diceretur in mi-  
nore ex motivo humano, quam ex mo-

tivo honesto, ideo negatur illa propo-  
sicio, & omnes in historiis relati, qui sine  
gratia vitam dederunt, non laudabiliter  
sed insane id fecere, politicè forsitan  
laudabiles, minimè moraliter, ut de  
Eleazaro dicit Augustinus. Si autem pe-  
tis, quare possit quis ita mortem eligere  
ex motivo humano, non honesto, jam  
tibi satisfacio. Primo dicendo, tenta-  
tionem vinci ex motivo humano non  
esse vinci ut prænotavi. Secundo. Mo-  
tivum humanum, quia pertinens ad de-  
lectabile, est magis sensui accommoda-  
tum, quam sit motivum honestum ratio-  
ni, quando præsertim tentatio impedit,  
ne tota honestas objecti percipiatur,  
ideo &c. Neque dicas, fieri posse, obje-  
ctum esse simul delectabile & honestum,  
proinde simul ex utroque vinci posse;  
nam si fieri potest hæc conjunctio, dico,  
quod movet esse delectabilitatem, quæ  
in objecto tentationis minorem oppo-  
sitionem adinvenit, honestatem vero de  
materiali, ut inquirunt, se habere. Bre-  
vius tamen & facilius respondendo, in ca-  
sibus adductis esse tentationem inter  
duo delectabilia, nimirum inter ser-  
vandam vitam, & v.g. magnam sui no-  
minis famam posteris relinquendam per  
mortem; potest autem unum delectabi-  
le vincere aliud, non potest vinci ab ho-  
nesto, si pro delectabili pugnet tentatio.  
His autem addendum censeo, aliud esse  
tentationi resistere propter non peccan-  
dum, & aliud propter aliquod bonum  
temporale, & evitandum grave malum,  
ut contingit in puella, quæ tentata resi-  
stet, ut virgine Clausum servet pro  
sponso, & ne dedecori sit obnoxia.

100. Ad secundum, quo argumen-  
tum instauratur; dico nimis probari,  
quia sequeretur, quod sicut in Hæretico  
non daretur gratia supernaturalis pro  
hujusmodi morte sustinenda, ita neque  
in Catholico, & sic frustra Martyres co-  
leremus. Illud igitur in Hæretico con-  
tingit, quia vel moritur ex humano mo-  
tivo, vel ex propria pertinacia, quam  
præfert mortis incommodo; quod si mo-

riatur pro aliqua veritate Catholica, puta ne Christum neget; confessio ista nulla est, bona quidem ex parte materix, mala ex parte modi quo creditur Christus, ideo nunquam morietur ex motivo honesto. Mitius tamen me gerere possem, & dicere cum S. August. lib. de pat. cap. 27. id ab ipso non fieri sine speciali gratia, quæ & Hæretico concedi potest. Doctoris sensus est iste. Si Hæreticus credat, negantem Christum esse æternis suppliciis puniendum, & pro ista fide moriatur, bene agit, ac proinde negandum non est, esse donum Dei; intelligi ordinis naturalis, quamvis ex peculiari providentia.

## ARTICULUS VII.

*Utrum sine gratia vitari possint omnia peccata collectivè.*

101. **S**icuti peccata alia sunt lethalia, & alia venialia dicta, ita de utrisque resolvendum est; & idem queritur ab aliis sub hisce terminis; an sine gratia possit homo diuturno tempore servare omnia mandata Dei naturalia, ad quæ in substantia reducuntur supernaturalia, & differunt tantum ratione finis.

Suppono primo tanquam certum, posse hominem servare per vires naturales quodcumque præceptum, si divisim sumatur secundum se, nam si per nos potest per ipsas Deum diligere super omnia, poterit etiam quodcumque aliud mandatum adimplere; & ratio clara est, quia jam habet facultatem physicam ad observandum, alioquin non teneretur, & fieri potest nullam esse tentationem per quam auferatur facultas moralis, proinde nihil est, quo specialis gratia necessaria sit.

102. Suppono secundo, hanc non facultatem moralem non explicari per ordinem ad aliquid, quod solummodo difficulter contingat, sed per hoc quod nunquam evenit, neque eventurum.

sit. Aptissimum hujusce rei affert exemplum Arist. 2. de Cælo cap. 11. ubi ait. Talos mille coenæ projecere, ita ut omnes reddant vel venerem, vel canem, aut unum talum millies projici, ut semper eundem numerum reddat, impossibile est. Oritur autem hæc impossibilitas ex collectione, in qua impeditur operandi uniformitas ab aliqua re, quæ ipsam collectionem constituit, & quanto magis crescit collectio, tanto magis crescunt causæ impeditivæ uniformitatis. Quare sit, dari facultatem ad aliquid seorsum acceptum, adimi vero ad idem simul sumptum, non ex quo in se ipso diversum sit, seu ex intrinseca rei natura, sed ex titulo diversæ combinationis, & ejusdem collectionis.

103. Inter eos, qui gratia necessitatem ad vitanda omnia lethalia collectivè rejiciunt, citantur Scot. in 2. dif. 26. qu. unica, & Durandus in 2. dif. eadem qu. 3. & 4., sed miror, cum in dictis locis inquirant tantum Doctores isti de gratia operante & cooperante ejusdemque subjecto, immo Durandus nec habeat qu. 4. Quod si alibi gratiam excluderet Doctor Subtilis, ibi sermo esset de gratia habituali, non actuali; atque hoc fit etiam à S. Th. in 2. dif. 28. qu. 1. art. 3. E' contra Alvarez lib. 6. de auxiliis disp. 54. concl. 4. nullum esse inter Catholicos, qui gratiam necessariam esse neget, affirmat; sed quidquid de aliis sit.

Conclusio prima. Ad vitanda omnia peccata lethalia collectivè, per consequens ad servanda omnia præcepta naturalia, necessaria est gratia specialis.

104. Prob. iisdem auctoritatibus & rationibus, quibus in antecedenti demonstratum est, non posse hominem per proprias naturæ vires vincere tentationem gravem, etenim fieri non potest, diuturnum tempus pertransire, quin aliquod præceptum observandum sit, sive affirmativum, quod non semper, sive negativum, quod semper obligat, & hominem, qui tot hostes patitur,

non



non tentari vel in una, vel in alia materia, quod si non tentari contingeret, hoc speciali Dei gratia tribuendum esset, in quo sensu procedit auctoritas Sancti Augustini in antec. producta num. 84. Verum etiam admissio, nullam unquam gravem tentationem contingere, adhuc ex omnium actuum collectione foret moralis impossibilitas aliquando non peccandi, orta ex ipsa conditione naturæ, quæ utpote vertibilis & inconstans vindicat sibi non semper uniformiter agere, sed ex quo naturaliter uniformiter non agat, infertur debere ex se aliquando peccare, ergo, quod vitet omnia peccata lethalia collectivè, non à natura, sed à sola gratia speciali progreditur; Quod & magis confirmatur, si recolantur quæ dicta sunt de cognitione omnium veritatum collectivè art. 2. hujus quæst. num. 23.

105. Propter primam rationem, juxta quam impossibilitas vitandi omnia peccata dicitur provenire à tentationibus, quæ semper pro diuturno tempore contingunt, concedit Suarez lib. 1. de necessitate gratiæ cap. 27. num. 11. quod, si fieri posset, hominem non tentari, fieri etiam posset, totam legem posse servare, ex cujus doctrina colligo, quomodo magis stabiliatur sententia nostra, in qua art. 5. hujus quæst. dictum fuit, haberi posse sine gratiæ specialis auxilio actum dilectionis Dei super omnia, dummodo nulla intersit tentatio, ut potest naturaliter contingere; quamvis enim homo tentationibus subiectus sit, non tamen omni tempore, ut patet experientia.

106. Quid vero dicendum erit de vitazione omnium peccatorum etiam venialium? Jam pro hac necessario requiritur gratiam specialem ex dictis colligitur, sed hæc erit ne sufficiens?

Conclusio secunda. Ad vitanda collectivè omnia venialia necessaria est gratia specialior.

Prob. Ubi facilius est lapsus, requiritur specialior virtus ad sustinen-

dum, ne quis labatur, sed loquendo de peccatis venialibus facilius est lapsus, quam in lethalibus, ergo ne quis in ea labatur requiritur &c. Prob. mi. Plures fuerunt, & sunt viri justi, qui Dei auxilio suffulti omnia lethalia evitarunt, quin tamen evitarerint omnia venialia, ut experientia notum est, & ex sacris paginis comprobatur, *septies enim in die cadit justus*. Proverb. 24. *Nec enim est homo, qui non peccet*. Paralyp. 6. *In multis offendimus omnes*. Jacobi 3. *Si dixerimus, quia peccatum non habemus &c.* 1. Joan. 1. qui certe Textus non possunt intelligi de peccatis lethalibus, alioquin sibi contradicerent, ergo de venialibus, ideo &c.

Neque tenet Pelagianorum responsio ita dictum esse, quia justis tanta pollent humilitate, ut licet nullius peccati sibi conscii sint, tamen debent se peccatores fateri, & judicare; nam hoc satis rejectum fuit à Concilio Milevit. can. 6. ubi habentur hæc verba: *Quod ait S. Joannes Apostolus, si dixerimus &c. quisquis sic accipiendum putaverit, ut dicat, propter humilitatem debere nos dicere habere peccatum, non quia verè ita est, anathema sit*.

107. Confir. conclusio. Quando aliquod opus infert majorem charitatis excessum, major gratia est ad illud requisita, nam si ad charitatem simpliciter necessaria est gratia simpliciter, pari ratione ad charitatem majorem necessaria est gratia major; atqui per vitiationem omnium venialium infertur major charitatis excessus; quam per vitiationem omnium lethalium, ergo. Mi. declaratur, quia si quis lethaliter non peccat, fervorem tamen charitatis non habet, si venialiter peccat, licet retineat charitatem, & si quis nec venialiter peccaret, non solum charitatem, sed etiam charitatis fervorem assequeretur. Hinc ex utraque ratione fit, gratiam ad vitanda lethalia non includere gratiam ad vitanda venialia, è contra in gratia ad vitanda venialia includi etiam gratiam, ad

ad vitanda lethalia, sed gratia includens major est inclusa, ergo. Posset tamen major & specialior dici etiam ex alio capite, nimirum, quod cum frequentiores sint occasiones peccandi venialiter, tum dentur minora motiva ad retrahendum &c. necesse est, gratiam nobis frequentius assistere, & id supplere, quod ex objecto, vel ex poena peccato infligenda haberi non potest.

108. Veritas hæc à nobis probata non potest in dubium revocari, si perpendatur, quod Trident. sess. 6. can. 23. definivit. En illius verba: *Si quis hominem semel justificatum dixerit posse in tota vita peccata omnia etiam venialia vitare, nisi ex speciali Dei privilegio, quemadmodum de Beatissima Virgine tenet Ecclesia, anathema sit* nota particulas illas, *ex speciali Dei privilegio*, quæ ex terminis indicant quid amplius, quam auxilia ad vitanda lethalia, nota limitationem factam ad Beatissimam Virginem, quod innuit quid amplius, quam concessum aliis viris sanctis, qui tamen lethaliter nunquam peccarunt, & nega, si potes, quod à nobis asseritur. Hac de re conclusio statuta circa gratiam necessariam ad vitanda omnia peccata lethalia, quidquid dicant plures Moderni cum Medina, non est de fide, quia Scripturæ & Concilia quæ asseruntur, habent aliquam non improbabilem explicationem quam indicavi art. præced. num. 88. nec pro hac parte habetur aliqua expressa Ecclesiæ definitio, sed solum est conclusio Theologica, ut contraria sit temeraria & errori proxima, alia tamen stabilita de necessitate gratiæ ad vitanda omnia venialia, de fide censenda est. Quia tamen sunt aliqua argumenta, quæ oppositi possunt, ideo propono & refello, præsertim cum etiam ad antecedentem difficultatem revocari possint.

109. Ob. 1. Datur præceptum vitandi omnia peccata collectivè; ita ut nullum committatur, ergo debet esse in homine non solum facultas physica sed

etiam moralis ad ipsa vitanda. Prob. conf. Præcepta à Deo imposita dicuntur levia, sicut onus ab ipso impositum appellatur suave, jugumque leve, sed si esset in homine tantum facultas physica non moralis, præcepta non essent huiusmodi, ergo si &c. Min. patet, nam si quis mihi præciperet, ut allato exemplo utamur, talos mille projicere, qui essent coensæ, rigidè præciperet, ne dicam stultissime.

110. Resp. ut in præced. dictum fuit num. 95. Ut enim Deus justissimè præcipiat, satis est dari facultatem physicam, & haberi moralem ex viribus gratiæ, quæ omnibus datur; & juxta hoc solvitur exemplum adductum, Divinaque præcepta dicuntur onus leve & jugum suave, quam suavitatem nobis dedit Christus dum dixit: *Venite ad me omnes qui laboratis & onerati estis*. Huc tamen referri potest responsio illa Suarez & Cacherani num. 96. nimirum, servari plenissimam libertatem creaturæ, perfectamque facultatem etiam moralem, si homo ad præcepta divinis servanda illam habeat; etenim hoc pacto illi non deest potestas moralis ad peccata vitanda prout occurrunt, & ad nullum determinatè impotens est, sed solum ad aliquod in vago, & indeterminatè, quod non sufficit ad auferendum libertatem. Non deest inquam potestas moralis ad illa vitanda, prout occurrunt, nam constat non nisi divisim occurrere; si ad nullum determinatè impotens est, sed solum indeterminatè, servatur inquam libertas; & offendo. Dixit Christus Mat. 18. *Necesse est ut veniant scandala*. Et Luc. 17. *Impossibile est, ut non veniant scandala*. Et tamen certum est, illum, à quo scandalum venit, peccare, & ideo liberum esse, præceptumque non dandi scandala Divinum esse, proinde leve. Quare hoc? quia necessitas scandali, & impossibilitas illud evitandi non est determinatè in aliquo homine, sed indeterminatè in aliquo intra hominum collectionem; ergo à pari ex quo serve-

tur facultas physica & moralis ad vitanda omnia divisivè, & non detur moralis impossibilitas nisi ad omnia collectivè, hoc est ad aliquod indeterminatum in omnium collectione, adhuc servatur libertas in homine, & adhuc præceptum Dei suave est ac leve. Merito propterea dixit Hieronym. super illum Textum: *Cum necesse sit, in isto mundo fieri scandala, unusquisque vitiis suis scandalis patet.*

111. Dices primo. Valet argumentum à divisivo ad collectivum, ergo si datur moralis facultas ad omnia peccata divisivè, datur etiam ad omnia collectivè. Contra. Pudet huic argumento respondere, si adversarios non pudet proponere. Qui ergo divisivè potest abstinere ab omni cibo, abstineat omni. Jam notum est, hoc esse verum in prædicatis essentialibus, non ubi fit ex quantitate collectio.

112. Dices secundo. Supponamus totam collectionem peccatorum esse, decem, vel omnia peccata vitanda esse per decem dies; tunc sic. Potest homo ex data doctrina vitare novem peccata, vel per novem dies à peccatis abstinere, ergo etiam poterit vitare decimum, & per diem decimum abstinere. Prob. consequentia ex vitacione novem peccatorum non oritur major difficultas in vitacione decimi, & sicut, si aliquod ex novem, non vitasset, posset vitare decimum, ita etiam postea; immo à fortiori, quia illa vitatio novem reddit hominem validiorem ad vitandum decimum, quia acquiritur habitus ad similes actus inclinans.

113. Sed contra. Si responderem, fieri non posse huiusmodi hypothesim, etenim peccata vitanda collectivè sunt non tot, quin plura, ut inquit Scho-lastici, jam argumentum destrueretur; Nihilominus transmitto suppositionem factam, & sicut totum argumentum conficitur ab adversariis, confici potest in eo, quod supra dixi de Christo dicente, necesse est, ut veniant scandala;

Videamus. Supponamus, totam hominum collectionem esse centum; tunc sic. Possunt nonaginta novem homines scandalum non committere; ergo etiam poterit centesimus. Prob. conf. Ex quo nonaginta novem scandalum non commiserint, non oritur major difficultas in centesimo, & sicut si aliquis ex illis commisisset, posset centesimus non committere, ita etiam postea, nam commisisset vel non commisisset nihil addit, vel minuit; & tamen posito, quod nonaginta novem non commiserint scandalum, necesse erit scandalum committi à centesimo, alioquin Christi propositio esset falsa. Quod ergo adversarii huic argumento responderent, nos ipsis respondebimus. Respondemus tamen in forma. Conc. ant. ne. conf. ad prob. dis. ant. non oritur &c. absolute & antecederet conc. hypotheticè & consequenter ne. ant. & conf. Ita enim se habet homo ad vitandum decimum vitatis novem præcedentibus, sicut se habet ad primum, si fiat suppositio, quod vitentur novem subsequencia, sed ad primum in hac hypothesi est facultas absoluta & antecedens, ergo etiam ad decimum; nihil ergo præstat vitatio vel non vitatio novem præcedentium ad vitacionem decimi, nec non peccasse in præcedentibus est causa peccandi in ultimo; sed tota difficultas est in collectione, in qua determinatè omnia vitari possunt, indeterminatè tamen vitari non possunt; & ita fit, oriri necessitatem consequentiæ, seu dialecticæ, quæ inferitur ex istis præmissis. Inevitabilia sunt collectivè decem, vitabuntur omnia præcedentia, ergo non vitabitur decimum; eo pacto quo fit iste sillogismus. Paulus vel Petrus student, Paulus non studet, ergo Petrus studet, nec tamen major propositio inferat majorem necessitatem studii Pauli vel Petri, nec Paulum non studere causa est, ut Petrus studeat. Ad ultimum. Per vitacionem omnium peccatorum acquiritur major facilitas ad vitanda alia secundum se, & in eadem

materia, non tamen absolute sine interruptione, & in diversa materia, quod satis est ad rem nostram.

114. Ob. 2. Propositum efficax vitandi omnia lethalia, immo & venialia, datur, & est laudabile, sed non potest esse propositum efficax & laudabile de re moraliter impossibile, ergo vitatio omnium lethaliū, & venialium non est impossibilis moraliter. Rursus; Fieri potest votum etiam vitandi omnia venialia, cum esse possit votum melioris rei semper agenda, ut legimus de pluribus Sanctis, atqui votum non est rei moraliter impossibile, ergo. Ratio autem utriusque est, quia, ut aliquid laudabile sit, debet à prudentia mensuram, & regulam accipere, prudentia autem est semper circa practica, consequenter moraliter possibilia.

115. Resp. argumentum nimis probare, probat enim, sine gratia posse etiam servari totam legem per ordinem ad finem supernaturalem, quia dari potest propositum efficax ita servandi, & est multum laudabile, immo necessarium. Itaque ad hujusmodi propositum, sicut & ad votum, satis est, si hac moralis impossibilitas auferri possit per gratiam, & revera qui ita proponunt & vovent, semper dependentes à gratia proponunt, & vovent. Quod si contingit oppositum, id evenit, quia non perpendunt hujusmodi impossibilitatem, & efficacia est ex parte actus, non objecti, in recta intentione, non in executione. In hoc autem semper est laudabilitas, quia, sicuti delectari de re turpi quamvis moraliter impossibile, vitio adscribi debet, ita delectari de re honesta, licet moraliter impossibile, tribuendum est virtuti; atque in hoc servatur regala prudentiae, quae dicat homini vitare, quantum potest, omne objectum malum, & ex alia parte propositum hoc, sicut & votum, suo fine non caret, quia multum valet ad plurima peccata tam lethalia, quam venialia vitanda juxta capacitatem proponen-

tis & voventis. Atque ex hoc habes, quomodo intelligendi sint Patres, & Scripturae nos adhortantes, ut simus perfecti, & immaculati, juxta illud secundae Petri. *Satagite immaculati inveniri.* Et aliud Evangelicum. *Esote perfecti sicut & Pater vester Coelestis perfectus est.*

116. Respondent alii, ad hac omnia esse possibilitatem moralem sufficientem, quae satis est, non vero efficacem & consequentem, quaestionem verò de ista procedere. Sed bona venia nimis late loquuntur, & fiet quaestio indubitata, nam sic fateri debebunt, non posse vitare divisivè singula peccata lethalia, & venialia, quia etiam ad singula, licet detur gratia sufficiens, non tamen semper datur efficax, & consequens.

Omittendo alia levioris momenti, quaeri potest; an gratia vitandi omnia venialia recte dicatur etiam specialissima, quia fuerit concessa dumtaxat Beatissimae Virgini, ut constat ex Trident. & per consequens, an cuiquam alteri fuerit concessa.

117. Jam de Beatissima Virgine hoc certum, cum definitum habeamus, cujus quidem rei rationes plurimas affert S. Th. 3. par. qu. 27. art. 4. in corp. à fortiori Scotus eam ab omni labe etiam originali immunem defendens, & Sanctus Augustinus lib. de nat. & gr. cap. 26. inquit: *De Sancta Virgine Maria propter honorem Christi, nullam prorsus, cum de peccatis agitur, habere volo quaestionem.* Quod si in illud Lucæ 2. *Tuam ipsius animam pertransibit gladius,* dicit in quaest. veteris & novi Testamenti qu. 73. *Virginem Mariam de morte Domini dubitasse,* non est intelligendum ejusdem dictum de dubitatione, quae reduci possit ad infidelitatem, sed ad admirationem ac discussionem; *Animo,* inquit Basilii in eplst. ad Optimum, *Beata Virgo assistens cruci post testimonium Gabrielis post ineffabilem Divinae Conceptionis notitiam, post ingentem miracu-*



*ratulorum ofensionem fluctuabat, ex una parte videns tam abjecta pati, & ex alia parte considerans ejus mirifica. Neque movere non debet, quod habet Chrysost. super ista verba Joan. 2. Vinum non habent. Idest voluisset sibi hominum gratiam conciliare, & se ipsam clariorem facere per filium, cum nondum, quam oportebat, de eo opinionem haberet, quod videtur ex inani gloria id egisse, & ideo à Christo asperum potius recepisse responsum; etenim, ut ait Angelicus loco cit., vel Chrysostom. in illis verbis excessit, & Mariam sola, charitas & misratio commovit, vel etiam Filii excellentiam demonstrari exoptavit, quod videtur congruum dictu, cum revera responderit Christus ad se ipsum referens petitionem illam, dicens: *Mulier nondum venit hora mea.* Vel tandem, Christum non cohibuisse inanis gloriæ motum quantum ad ipsam, sed secundum id, quod poterat ab aliis judicari.*

118. De aliis vero, quicumque fuerint, non nisi dubia proferri possunt. Censuerunt Abulens., Catherin. alique pauci, privilegium hoc concessum fuisse Sanctis Joanni Baptiste, Josepho post Conjugium, & Apostolis post receptum Spiritum Sanctum, & confirmationem in gratia. Verum in hoc distinguenda sunt peccata venialia, alia enim sunt, quæ deliberatè committuntur, & alia, quæ indeliberatè, & ut ajunt, ex surreptione, quatenus plenam rationis deliberationem præveniunt; Rursus; peccata venialia esse possunt in aliqua determinata materia, vel in omni. Hoc posito.

119. Probabilius arbitror, plures immunes fuisse ab omni veniali peccato etiam indeliberato in aliqua determinata materia, non tamen in omni. Ratio hujus postremi est, quia in Trident. sola excipitur Virgo, exceptio autem firmat legem in contrarium, & ex alia parte nulla est necessitas hoc aliis concedendi. Quod enim dicatur de Joan-

ne Baptista; *Inter natos Mulierum non surrexit major.* Hoc refertur ad munus Præcursoris Christi, in quo nullus certe excellentior fuit; Quod dicatur Josephus vir fidelis & castus, hoc indicat maximam Virginis custodiam, & Virginei candoris amorem; & iustitia ejusdem, de quo dictum fuit: *Joseph autem cum, esset iustus,* per aliquod veniale non aufertur. Insuper, ita dicendo magis servantur Scripturæ Textus adducti n. 106. Ratio primi est, quia primo hoc contingere potest ex indole cujuscumque, & ex parentum educatione, fieri enim potest, ut quis etiam ex natura furta & mendacia levia quàm maximè abhorreat. Secundo quia, ita magis servantur quædam dicta, & facta Sanctorum, sicut est illud, quod dicitur de Joanne; *Nesciens labem nivei pudoris,* & aliud; *Ne levi posses maculare vitam crimine lingue.* Itaque &c.

## ARTICULUS VIII.

*Utrum ad salutares actus sit necessaria gratia specialis.*

120. **S**alutares actus illos appello, per quos ad justificationem, proximè positivè disponimur, ideo omnes sunt actus supernaturales. Est igitur præcipua difficultas circa actus virtutum Theologicarum, & de poenitentia, ut requiritur ad justificationis gratiam consequendam. Hac de re ne pro singulis hisce actibus plures difficultates instituamus, ad unam omnia reducimus, examinando id, quod in titulo propositum est. Jam quid in hac re senserint Pelagiani & Semipelagiani dictum fuit art. 2. p. quæst. neque hic eadem memoramus, ne quibus semel dixisse sufficit bis repetita displiceant. De gratia igitur interna distincta à lege, doctrina & revelatione est sermo noster.

Dicendum; necessariam esse gratiam actualem specialem ad quoscunque actus salutares. Conclusio est dog-

ma fidei definitum in Concil. Milevit. cap. 4. & 5. Afric. can. 17. & 18. Arausic. cap. 5. & 6. Trident. sess. 5. can. 1. 2. 3. traditum ab omnibus Sanctis Patribus, & satis esset legere S. August. in toto lib. de prædest. Sanct. præter Fulgentium lib. de Incarn. & gr. cap. 17. Prosper lib. 1. de vocat. gent. cap. 8. Isidor. lib. 3. sentent. cap. 10. præter Summos Pontifices Celestin. in epis. 1. ad Episc. Gall. cap. 10. Leonem ep. 84. Innoc. 1. in epis. ad Episc. Afr.

121. Prob. primo generatim loquendo. Quando reperitur aliquis effectus excedens naturales vires liberi arbitrii, debet reperiri aliqua causa, quæ ultra liberum arbitrium illum producat, alioquin esset aliquid in effectu improductum, quin ulla esset causa producens, atqui in actibus salutaribus reperitur aliquis effectus excedens naturales vires liberi arbitrii, ergo. Prob. mi. in actibus salutaribus reperitur supernaturalitas, & quidem substantialis, ut dixi de actu fidei in proprio tractatu; sed huiusmodi supernaturalitas est aliquid productum excedens vires naturales liberi arbitrii, ut patet ex ipso nomine, ergo. Merito propterea Trident. sess. 6. can. 3. ita definivit. *Si quis dixerit, sine præveniente Spiritus Sancti inspiratione hominem posse credere, sperare, diligere, & penitere, ut oportet, anathema sit.* Et cap. 5. dixit, inspirationem istam recipi, ad excludendam gratiam externam. Pelagii, quæ foris perstrept, sed intus secundum se nihil proficit, propter quod dixit Isidor. loco citat. *Doctrina sine adjuvante gratia, quamvis infundatur auribus, ad cor nunquam descendit, foris quidem perstrept, sed intus nihil proficit. Tunc autem Dei sermo infusus auribus ad cordis ultimam pervenit, quando Dei gratia mentem interius, ut intelligat, tangit.* Neque dicatur contra rationem à nobis adductam posse haberi supernaturalitatem actuum salutarium per gratiam habitualem, quæ supernaturalis est, nam, præ-

ter quam quod hæc responsio generatim non valet, quia saltem necessaria esset gratia actualis in peccatoribus, infra refelletur.

122. Prob. secundo. Recensendo præcipuos actus salutare, nimirum fidei, spei, & charitatis. De actu fidei sic. Omnis Scriptura, quilibet ex Patribus contendit probare actum fidei sine speciali Dei adiutorio haberi non posse. *Nemo potest venire ad me, nisi Pater meus traxerit eum*, inquit Christus Joan. 6. Quid sit autem ad Christum venire statim declarat dicens: *Sunt quidam ex vobis qui non credunt.* Et infra. *Hoc est opus Dei, ut credatis in ipsum*, quod non potest intelligi de generali concursu, quia hoc pacto omne, quod est, opus Dei est. *Salvati estis per fidem, & hoc non ex vobis, donum enim Dei est ne quis gloriatur*, ait Paulus ad Ephes. 2. & 1. ad Corint. 7. *Misericordiam consequutus sum, ut sim fidelis*, notetur hoc verbum non dicit, *quia sum*, sed *ut sim*. Ex Sanctis Patribus, quos ante conclusionem protuli, sufficit unus Augustinus, qui in lib. de prædest. Sanct. totus est in hac re.

123. De actu spei sic, supponendo prius, spem esse unam ex virtutibus Theologicis juxta Pauli doctrinam 1. ad Corint. 13. & totius Ecclesiæ consensum. Ubi cumque Scriptura Sacra de hac virtute sermonem habet, illam tanquam donum Dei prædicat, & attollit, præsertim vero in Apostolo Paulo id facillimè invenitur. *Per quem, id est Christum*, ait ad Rom. 5. *habemus accessum per fidem in gratiam istam, & gloriamur in spe gloriæ Filiorum Dei.* Cap. 15. *Ut per patientiam, & consolationem Scripturarum spem habeamus.* Et statim subdit, *Deus autem patientiæ & solatit dicit vobis id ipsum sapere in id ipsum.* Paulo additur Petrus episc. 1. cap. 1. *Secundum misericordiam suam generavit nos in spem vivam.* Et infra; *perfectè sperate in eam, quæ offertur vobis, gratiam.* Et tandem. *Dedit ei gloriam, ut fides vestra & spes esset in Deo.* Ex quibus omnibus, aliis-

que



que prætermisiss fundamentum habuit Augustin. serm. 29. de verbis Dom. dicendi: *Hæc tria*, idest Fides, Spes, Charitas, *aliquantum sunt diuersa, sed omnia sunt Dei dona*. Quod & omnes Sancti Patres affirmant. Quod opponi posset, illud tantum esset, quod objectum huius virtutis sit Deus ut bonus speranti, & ideo spectans ad amorem, concupiscentiæ, qui videtur esse naturalis, cum quisque ad amandum se naturaliter feratur, & quod est sibi bonum. Sed jam huic argumento data est responsio in proprio loco; & effusè tractant Doctores, præsertim Suarez lib. 2. de necess. grat. cap. 13.

124. De actu charitatis sic. *Charitas Dei diffusa est in cordibus nostris per Spiritum Sanctum*, & *Fructus autem spiritus est charitas* scribit Apost. ad Roman. 5. insuper 1. ad Corint. 13. *Horum autem maior est charitas*. Quare si duæ aliæ virtutes habentur per speciale Dei adiutorium, magis hoc de charitate dicendum, quod amplius declarari posset illas laudes recensendo, quas idem Paulus ubique tribuit charitati, sine qua cœtera quæcumque dona salutis prodesse non possunt; ex quibus etiam rationem colligimus.

125. Nunc resolvo, quod ultimo loco in probatione nostra opponi posse videbatur, scilicet, ad hos salutare actus sufficere gratiam justificationis, seu habitualem & sanctificantem. Quare in re.

Dicendum secundo. Etiam in iustificatis requiri ulterius actualem gratiam ad huiusmodi actus.

Fundamentum primum desumitur ex Concil. Africano 2. cap. ultimo; ubi habet: *Constituamur Baptizatos, quæ ad salutem pertinent posse & debere implere Christo tamen auxiliante & cooperante*. Quod si hoc intelligatur de auxilio habituali, in primis explicatio falsa omnino est, quia de facto Adam habebat huiusmodi auxilium, quia habebat gratiam habitualem, nec tamen ipsi

Tom. II.

fatis fuit, ut eam serualet, quam acceperat gratiam, ex quo argumentum colligitur pro sententia nostra; deinde ita. Concilium interpretari est omnino oppositum Tridentino, quod sess. 6. cap. 16. habet hæc verba: *Cum enim Christus Jesus tanquam caput in membra, & tanquam vitis in palmites, in ipsos iustificatos jugiter virtutem insuat, quæ virtus bona eorumdem opera semper antecedit, comitatur, & subsequitur, & sine qua nullo pacto Deo grata, & meritoria esse possent*. Ex quibus nihil clarius afferri potest ad probandum quod interest nostra. Dicant itaque iusti cum David psal. 15. *Adjutor meus esto, ne derelinquas me*, deinde dicam ego cum August. lib. de correptione & grat. cap. 1. *Nec ita, ut cum quisque fuerit à peccati dominatione liberatus, jam non indigeat sui liberatoris auxilio*. Subsūmam vero, sed qui est à peccati dominatione liberatus, est iustus, ergo iustus indiget liberatoris, idest Dei auxilio.

126. Fundamentum secundum desumitur etiam à ratione, omittendo ea, quæ dicam de finali perseverantia. Ad operationes naturales requiritur semper actualis concursus naturalis, ergo ad operationes supernaturales requiritur semper actualis concursus supernaturalis, sed iste est specialis gratia, ergo. Præterea. Habitus supernaturales non sunt sicut acquisiti, qui inclinant in similes actus, ex quibus geniti sunt, sed, cum sint infusi, & ex nullo actu producti, ad nullum actum sibi vindicant vel inclinationem, vel facilitatem, ergo ut homo iustus in actus supernaturales prorumpat, necessaria est gratia actualis. Hinc ab aliis authoribus appellantur qualitates mortuæ. Hoc ultimum argumentum ita à me propositum magis placet, nequaquam primum, nisi prima facie & parum speculanti. Sed prius aliquid aliud subdere permittatur. Gratia sanctificans esto supernaturalis sit, non adimit tamen inconstantiam voluntatis, nec partium

sensitivæ rationalisque rebellionem, alioquin redderet hominem impeccabilem, ergo requiritur aliquid aliud, per quod voluntas in bono fiat constans, & sensus rebellionem non cedat. Illa sanat à culpa, integrum tamen hominem non reddit. Tunc dicere poterit homo clementissimo Deo; *Qui sanat omnes infirmitates*, ut dicebat David psal. 102. quando in futuro indeficiente sæculo poterit cum eodem dicere: *Qui redimit de interitu vitam meam, qui coronat te in misericordia & miserationibus.*

127. Dicam modo, quare argumentum primum non placeat, quod tamen adeo plausu dignum, & ferme evidens habitum est. Primo quod est in consequentia tanquam de fide censendum est, antecedens vero nondum de fide est definitum, cum adhuc sit questio utrum concursus simultaneus necessarius sit admittendus, quo dato jam per illud nihil probatur. Secundo etiam, admissa concursus simultanei necessitate sic argumentor. Ad operationes naturales requiritur semper concursus actualis naturalis, qui tamen attentæ naturalis providentiæ debitus est, ergo ad operationes super naturales semper requiritur concursus actualis supernaturalis, qui tamen attentæ supernaturali providentiæ debitus est; & sicuti ubi est naturalis forma est debitus ille, ita ubi erit supernaturalis forma erit debitus iste, atqui gratia sanctificans est forma supernaturalis, ergo ubi hæc erit, erit debitus actualis concursus supernaturalis, consequens non admittitur, ergo nec illa argumentatio tenet.

Si dicant disparitatem esse, quia naturalis forma est activa, non sic supernaturalis qualitas. Contra. Quia supernaturalis qualitas non est activa, requiritur actualis gratia, seu concursus supernaturalis, ergo quia naturalis forma est activa non requiritur actualis concursus naturalis, etiam hoc consequens non admittitur, ergo responsio, seu

disparitas vana est: Relinquant ergo quod suum est, & teneant quod meum est, saltem in asserenda fundamentali ratione.

128. Examinemus quid in oppositum afferri potest; & prætereo, a Deo nobis præcipi actus salutares, ergo nos illos efficere posse; Supposita cognitione Dei veracis, & viso miraculo ad confirmandam revelationem à Deo factam non posse aliquem negare fidem; Catholicum & Hæreticum eodem motivo credere; nam primum jam superius solutum est, dicendo præcipi quidem nobis salutares actus, & nos illos efficere posse, sed viribus gratiæ, quæ semper vel collata, vel parata est, saltem quantum sufficit, Cætera vero rejecta sunt in tractatu de Fide. Est igitur contra primum assertum, non requiri adjutorium speciale ad amandum Deum ut authorem supernaturalem. Primo. Per nos non est necessaria gratia specialis naturalis ad amandum Deum ut authorem naturalem, ergo neque erit necessaria, gratia specialis supernaturalis ad amandum Deum ut authorem supernaturalem, ita enim secundus amor est in linea gratiæ, sicut primus est in linea naturæ, quare sicut habita naturali facultate, & naturali cognitione per solum concursum simultaneum habetur iste, ita habita supernaturali potentia, idest potentia prædita habitu supernaturali, & supernaturali cognitione habita per fidem habebitur ille. Immo videtur argumentum magis de hoc probare; etenim, si naturaliter amari potest objectum propositum tanquam minus bonum, à fortiori poterit amari objectum idem propositum tanquam majus bonum, cum ita majorem vim habeat ad movendam trahendamque voluntatem. Secundo, Amor naturalis erga Deum non differt substantia ab amore supernaturali erga ipsum, sed solum accidentario modo, ideo præceptum hoc supernaturale dicitur ab omnibus Doctoribus naturale quo ad substantiam; non est ergo,

go, cur requiratur necessario auxilium actuale supernaturale.

129. Resp. conc. ant. ne. conf. ad prob. dis. ant. in linea gratiæ, & à gratia actuali supernaturali indebita effective procedit conc. in linea tantum gratiæ habitualis ne. ant. & conf. Est primus amor in linea naturæ, est secundus amor in linea gratiæ; natura habito generali concursu est completa ad suas operationes, natura autem habita solum gratia habituali non est completa propter rationes à me expositas num. 126. rursus natura juxta præsentem providentiam sibi vindicat debitum illum generalem concursum, anima autem etiam gratia habituali exornata sibi non exigit concursum actuale supernaturalem, ut patet in Adamio, & aliis justis. Ad majus argumenti robur consequentia non tenet, nisi quando majus bonum non excedit vires facultatis, ipsique est proportionatum; in nostro autem casu contingit oppositum. Ad secundum; in primis dato anteced. quod revera plures Doctores admittunt & defendunt, adhuc non probaretur non requiri saltem auxilium actuale supernaturale quoad ad modum. Sed revera sentio, amorem supernaturalem esse hujusmodi in substantia, si non materialiter, saltem formaliter & ex parte motivi quod est Divina bonitas supernaturalis, quæ certè talis est substantialiter, atque ita etiam præceptum hoc dicitur naturale quoad substantiam materialiter, seu fundamentaliter, quatenus omnia præcepta supernaturalia fundamentum habent in naturalibus; formaliter tamen supernaturale est, ut dixi etiam de actu fidei in proprio tractatu.

130. Ob. 2. Ex Milevit. cap. 3: hæc leguntur: *Placuit, ut quicumque dixerit, gratiam Dei in qua iustificamur, ad solam remissionem peccatorum valere, quæ jam commissa sunt, non etiam ad adjutorium, ut non committantur, anathemasis*, ergo gratia habitualis valet ad supernaturales actus habendos. An-

teced. autem declaratur etiam ratione; nam sicut beati per habitum luminis gloriæ quocumque alio auxilio secluso habent quidquid requiritur ad videndum Deum, ita iustificati per habitum charitatis habent secluso quocumque alio auxilio quidquid requiritur ad Deum diligendum, proinde &c.

131. Resp. Idem Concil. cap. 4. per illud verbum, *gratiam Dei* complecti etiam gratiam actualem, quam Pelagiani negabant necessariam ad servandam legem, siquidem dicit, admittendam esse revelationem doctrinæ, non tamen illam sufficere, sed ulterius eam gratiam requiri, per quam cognoscamus quid faciendum sit, & eadem faciendam diligamus, sed hæc gratia est illa actualis interna, quam nos admittimus, ergo. Præterea; alia etiam via Concilii mentem explano, & concedo, gratiam iustificantem valere etiam ad adjutorium, ut peccata non committantur, sed in quo sensu? non ita ut ipsa sola sufficiat, sed quia reddit subjectum, in quo est, magis idoneum ad recipiendum hujusmodi adjutorium, & gratiam actualem; Ordinariè enim peccator in aliud peccatum pertrahitur, juxta illud Gregorii hom. 13. in Ezechiel. *Peccatum, quod per penitentiam non deletur, mox suo pondere in aliud trahit*. Et congruum non videtur, quod Deus inimicis suis auxilia specialia velit conferre, quamvis pro suæ clementiæ magnitudine sæpe conferat. En igitur, quomodo gratia, per quam iustificamur, non solum ad remissionem peccatorum valeat, sed etiam ad adjutorium, ut non committantur. Ad rationem conc. ant. ne. conf. habitus enim evidentes, ut est lumen gloriæ, habent semper vim movendi, immo & imponendi necessitatem, præsertim si semper in actu sint; non ita habitus inevidentes, & relinquentes in facultate libertatem proximam. Quod si teneret argumentum, dici posset, quod sicut per lumen gloriæ secluso quocumque alio auxilio anima sit proxime in-

impeccabilis, ita fieret per habitum gratiæ.

132. Superesset inquirendum de amore Dei imperfecto, seu attritionis, sed cum pertineat ad tractatum de poenitentia, ideo nihil hic dicendum existimo.

## ARTICULUS IX.

*Utrum homo sine gratia speciali possit se ad gratiam disponere.*

133. **E**TSI ex antecedentibus pars negativa fati colligi possit; nihilo tamen minus ad uberiorem doctrinam, & ad ostendendam naturalium operationum improprietatem ad gratiam, istam difficultatem instituo, ex qua magis Massiliens. & Pelagiani convincuntur. Fuit tamen inter Catholicos etiam Durandus, qui in 2. dist. 28. q. 15. dicit, hoc auxilium speciale vel esse providentiam peculiarem, quam Deus habet de illis, qui hereditatem capiunt salutis, vel esse specialem motionem voluntatis provenientem à Deo. Si sumatur primo modo, fatetur, hominem sine speciali gratia non posse ad gratiam se disponere, quia quemadmodum quidquid conducit ad finem rerum naturalium subest generali Dei providentiæ, ita quidquid conducit ad finem supernaturalem subesse debet speciali providentiæ Dei; si autem sumatur secundo modo, negat, necessariam esse specialem gratiam, ut homo possit se ad gratiam disponere.

134. Dicendum tamen, esse dogma fidei, hominem sine gratia speciali se ad gratiam non posse disponere; & resolutio est non de dispositione remota & negativa, sed de proxima & positiva, ita ut disponatur ad gratiam infallibiliter habendam.

Clarum est pro hoc asserto testimonium toties adductum Concilii Trident. ubi dicuntur disponi homines ad justificationem excitati Divina gratia, & adju-

ti. Clarum testimonium Arausic. can. 4. in quo habetur: *Siquis, ut à peccato purgemur, voluntatem nostram Deum expectare contendit, non autem ut purgari velimus per Spiritus Sancti inspirationem in nobis fieri confitetur, resistit Spiritui Sancto dicenti per Salomonem, preparatur voluntas à Domino.* Et can. 3. inquit: *Si quis invocatione humana gratiam Dei dicit posse conferri, non autem gratiam facere, ut invocetur, contradicit Isaac dicenti, inventus sum à non querentibus me.* Et can. 5. loquens de Fide ait. *Si quis sicut augmentum, ita & initium fidei, ipseque credulitatis affectum naturaliter nobis inesse dicit, Apostolicis Dogmatibus adversarius probatur.* Ex quibus omnibus ita conficitur argumentum. Hæc dispositio naturalis vel esset invocatio, vel conversionis desiderium, vel fides initialis, vel pia affectio & voluntas credendi, sed ex adductis textibus nihil horum naturale est, ergo.

135. Præterea etiam, admittendo hanc naturalem dispositionem falsum esset quod sæpe repetit Apostolus: *Quis te discernit?* eo quia per liberum arbitrium unus haberet, alius non haberet hanc dispositionem; Falsum quod idem innuit, *gratiam non ex operibus, alioquin gratia non esset gratia.* Quia gratia ex præcedenti naturali dispositione conferenda esset, de qua inquit Augustin. de prædestin. Sanct. cap. 3. *Non est gratia, si eam ulla merita præcedant.* Ex quibus etiam meritum congruum excluditur.

136. Ratio tandem ad hoc demonstrandum ex illo colligitur, quod nullum naturale opus habere potest infallibilem connexionem cum eo, quod est supernaturale, quia excedit quascunque naturæ vires, proinde exigit necessarium esse ab agente superiore; Cum igitur gratia sit donum omnino supernaturale, inferitur, per nihil, quod naturale sit, posse ad ipsam hominem disponi. Adde; Sic dici posse, etiam per naturæ vi-



res posse hominem se disponere ad infallibilitatem habendam visionem beatam, quod tamen est contra omnes Theologos, ut dicitur in tract. de Deo Uno.

137. Ob. 1. Bonum, quod ordinem servat ad gratiam, ad ipsam disponit, sed bonum naturale ordinem servat ad gratiam, ergo ad ipsam disponit, sed homo per proprias vires potest bonum naturale, immo per nos potest maximum bonum, sicut est dilectio Dei super omnia, ergo. Atque posito hoc principio, sic possumus argumentari. Supremum infimum attingit infimum supremi, ergo actus dilectionis Dei, qui est supremus inter actus naturales, attinget infimum inter actus supernaturales. Secundo; Potest homo per naturalem virtutem disponere subiectum ad formam, quæ est à solo Deo, idest ad animam rationalem, ergo etiam potest se disponere ad formam, quæ est à solo Deo, idest ad gratiam habituales; consequentia tenet; si enim dispositio naturalis connecti potest cum forma spiritali, quare dispositio naturalis connecti non poterit cum forma supernaturali? Immo hoc facilius admitti debet, nam inter naturale & supernaturale datur tantum diversitas ordinis, inter vero materiale & spirituale datur diversitas speciei. Totum hoc consonum est Scripturæ dicenti Proverb. 12. *Homini est animam præparare.* Et Zachar. 1. *Convertimini ad me; & ego convertar ad vos,* in quo textu prius est hominem converti ad Deum, quam Deum ad hominem. Hæc sunt argumenta Durandi, efficacius tamen à me proposita.

138. Resp. immo hæc omnia contraria esse Scripturæ ut dictum est n. 134. Argumentum primum nullum est, negatur enim, opus morale bonum habere hanc connexionem, ordinemque cum gratia, & ad summum remotè & negativè ad ipsam disponit, quatenus subiectum est minus indispotum, nec in ipso reperiuntur tot impedimenta, quot invenirentur in illo, qui nullum opus mo-

rale bonum proferret. Secundum videtur habere majorem vim, & subtilitatem, nec arbitratu meo satis solvitur ab aliis; dicunt enim disparem rationem esse, quæ licet anima spiritalis sit, attamen est in ordine naturali, è contrario gratia est in ordine supernaturali, proinde supra exigentiam cujuscumque naturalis dispositionis; sed quis non videt, adhuc rationem oppositam in suo robore permanere? Si enim supernaturale est supra ordinem cujuscumque dispositionis naturalis, cur etiam spirituale non erit supra ordinem cujuscumque dispositionis materialis? cum, ut dicebatur, naturale & supernaturale differant tantum in ordine, materiale & spirituale differant in specie, & naturale potest quidem elevari ad producendum supernaturale, materiale autem nequeat elevari ad producendum aliquid spirituale, ut fatentur illi, qui nostram sententiam sustinent. Fortasse melius responderent Thomistæ dicentes, animam esse quidem spirituales; ut quod; esse tamen materiale & corpoream; ut quo; & in hoc sensu posse ab agente materiali poni dispositionem ad ipsam, sed hoc generatim verum non est, immo satis incertum, à me rejectum in tract. de anima; non debet autem per incertum afferri disparitas ad sustinendum certum.

139. Aliter ergo respondendum censéo, dicendo, dispositionem materiale productam ab homine ad animam rationalem non esse ex intrinseca natura rei, sed à Divina ordinatione & providentia, quæ vult producere hominem, animamque creare, quando corpus est talibus organis distributum; & in hoc sensu concederem, posse haberi per liberum arbitrium dispositionem naturalem ad gratiam supernaturalem, si data hujusmodi naturali dispositione statuisset Deus conferre, quamvis repugnantia esset ex alio capite, ut dicam in sequenti; Sed unde colligitur, esse talem Dei ordinationem? In Scripturis, in Patribus, in Conciliis non invenies, ergo

ergo nullibi. Mea responsio tanto magis placet, quo magis melius sustineo, Bñam Virginem fuisse Matrem Dei, quin tamen produxerit aliquam dispositionem connexam cum unione hypostatica, ut tuerentur omnes Theol. Contra primum textum adductum jam attuli alium. Contra secundum est quod toties legimus in Scripturis, nimirum, *converte nos*. In istis ergo & similibus commendatur liberum arbitrium, sed non excluditur gratia, sicut quando commendatur in aliis gratia, non excluditur liberum arbitrium; nec frustra dicitur hominibus, *convertimini*. Nec frustra dicitur Deo, *converte nos*; & quo pacto prius sit, Deum converti ad homines, dicitur. Superest illi argumento respondeamus, quod supremum infimi attingit infimum supremi, & ideo dilectionem Dei super omnia, quæ est supremus actus inter naturales, attingere infimum actum inter supernaturales. Sed advertendum est, axioma illud valere, quando supremum infimi, & infimum supremi non habent excessum in ordine omnino diverso, ut contingit in casu, aliter supremus Angelus attingeret aliquid Dei, & supremum animal irrationale attingeret aliquid rationalitatis; sed quidquid sit, in hac re potius adherere debemus definitionibus, quam rationibus.

140. Ob. 2. Mat. 25. Deus dedit talenta secundum propriam uniuscujusque virtutem, sed talenta significant gratiam, propria uniuscujusque virtus significat opus proprium, per consequens naturæ donum, ergo quia datur gratia juxta opera naturæ: Secundo. Desiderium salutis efficax proxime disponit ad gratiam, sed hoc desiderium habetur per vires naturæ, ergo. Prob. mi. ex Apostolo pluries dicente, *Velle adjacet mihi* super quæ verba inquit Hieronym. lib. 3, contra Pelagian. *Nostrium est velle, Dei autem ut impleamus, quod volumus*. Rursus. Deus non est acceptator personarum, ergo respicit nostra merita, qui-

bus movetur ad uni potius gratiam conferendam, quàm alteri, ergo. Tandem. S. Joan. Chrysost. hom. 21. in Gen. ait: *Nisi Abraham primum, quod suum erat, fecisset, non tantum à Domino gratiam, obtinisset*. Ergo per hoc quod fecerit, quod suum erat, idest, quod viribus naturæ suæ, gratiam obtinuit, proinde &c.

141. Resp. ad primum conc. maj. ne. mi. si proprium sumatur tanquam ex solis propriis. Virtus itaque illa propria est, quia etiam liberum arbitrium agit, attamen non est ex propriis, quia est virtus alieno auxilio roborata. Responsio hæc est S. Th. de virtut. in communi qu. 2. de charit. art. 7. ad 9. ubi explicans adductum locum Mat. ait: *Quod autem dicitur, dedit unicuique secundum propriam virtutem, non est referendum ad virtutem tantum naturæ, sed intelligenda est virtus, quæ est etiam per gratiam*. Idem tradit 1. ad Corint. 12. lect. 2. Idem 2. 2. qu. 24. art. 3. ad 1. ubi ait: *Virtus illa, secundum quam dat Deus unicuique dona sua, est dispositio præcedens, sed hanc etiam dispositionem prævenit Spiritus Sanctus*. Ad secundum conc. maj. ne. mi. ad prob. ut supra; *Velle adjacet*, sed non tantum secundum me, præcipue secundum gratiam, quæ tamen semper aut confertur, aut parata est; Unde idem Doctor maximus in epist. ad Crescon. *Velle & currere meum est, sed ipsum meum sine Dei auxilio non erit meum*. Ad tertium. Non est Deus acceptator personarum, quia omnibus confert, aut ad conferendum paratus est gratiam suam; sed licet non conferret, nec ad conferendum paratus esset, adhuc vitium hoc Deo imputari non posset, quia Deus nulli aliquid debet; ibi autem est personarum acceptatio, ubi est obligatio justitiæ. Ad ultimum. Dictum Chrysost. intelligendum est in illis verbis, *quod suum erat* ex viribus gratiæ excitantis, cui Abraham respondit, ait enim hom. 27. in Genes. *Dominus prius benefacit, & nostram naturam ad se allicit, & postea imperat*.



142. Ob. 3. De facto Cornelius per illas operationes, quas habuit ex vi liberi arbitrii, nimirum orationes & eleemosynas gratiam vocationis ad Christi fidem obtinuit; ut legitur act. 10. ergo. Secundo. Congruum videtur, illis Deum gratiæ suæ auxilium conferre, qui bene utentes libero arbitrio, bonis moralibus vacant, non vero illis, qui libero arbitrio abutentes omnia pervertunt, ergo. Denique. Angeli consecuti sunt gratiam juxta sua naturalia, ut docet S. Th. 1. p. qu. 62. art. 2. ergo quia per naturalem dispositionem se ad gratiam præpararunt.

143. Resp. ad primum ut supra, de Abrahamo; & nego opera illa fuisse Cornelii sine viribus gratiæ; etenim, vel dicimus Cornelium justificationem habuisse ante fidem explicitam Christi, cum dicatur eodem capite. *Erat vir religiosus & timens Deum cum omni domo sua, faciens eleemosynas plebi, & deprecans Deum semper* vel dicimus non fuisse justificatum, sed operibus illis se ad justificationis gratiam disposuisse. Si primum; sine gratia esse non poterat, alioquin non solum dispositio, sed ipsa formalis justificatio esset ex libero arbitrio, quod apertissimè Pelagianum est; Si secundum ipsa eleemosyna & orationes erant ex gratia, licet enim aliquod opus morale bonum fieri possit sine gratia, non tamen sine gratia habetur religio, timor Dei, eleemosyna, oratio semper, ut innuitur in textu. Ad secundum; non esset, cur argumento responderemus, quia in eo sermo est de congruentia, non de infallibilitate; attamen dico, congruum id esse ex parte liberalitatis Divinæ, non ex merito operis, alioquin gratia non esset gratia, & sicuti Deus hanc elargitur habentibus positivum demeritum, ut constat in Paulo, & in Matthæo, ita negare potest habentibus actuale meritum; Idem dicendum de congruitate, quam asserit S. Th. 3. p. qu. 4. art. 1. fuisse ex parte humanæ naturæ, ut assumeretur à Ver-

bo; hæc enim non attenditur per aliquam dispositionem, quæ prius esset in natura humana, sed solum secundum aptitudinem, & eam, quam potentiam obedientialem appellant; Siquidem congruum dicitur propter duo, scilicet propter dignitatem naturæ rationalis, quæ potest per gratiam Deum cognoscere, & diligere, & propter necessitatem, quæ reparari indigebat, ut ibidem docet Angelic. atque etiam in hoc sensu intelligitur illud Augustini lib. 18. de prædest. cap. 3. *Posse habere fidem naturæ est hominum*. Ad ultimum; Verum est illud antec. de Angelorum naturalibus, sed per auxilium Divinum semper gratuito collatum.

## ARTICULUS X.

*Quomodo intelligendum sit commune illud.*

Facienti quod in se est Deus non denegat gratiam.

144. **Q**uanvis ex articulo antecedente satis esset resoluta difficultas proposita, videlicet, intelligendum esse de faciente quod in se est non ex viribus naturæ, sed gratiæ, nihilominus, quia plurima argumenta in oppositum afferuntur, & in diverso sensu fuit à Pelagianis acceptum, distinctè examinandum esse, non inconsulto existimavi, ex cujus etiam resolutione magis roborabitur veritas stabilita. Diversimode autem movetur contentio. Aliqui enim volunt, facientibus quod in se est ex viribus naturæ Deum gratiam non denegare ex pacto quodam statuto à Patre cum filio. ob merita ejusdem passionis. Aliqui ita defendunt, ut velint, Deum, ordinariè loquendo, non conferre auxilia prævenientis & adjuvantis gratiæ, nisi prius homo bene sit usus libero arbitrio, faciendo quod in se est ex facultate naturæ. Sed sive hoc, sive illo modo se explicent.

145. Sentiendum. Commune illud: *Facienti quod in se est Deus non denegat*

*negat gratiam* non esse intelligendum ex viribus naturæ, sed gratiæ.

Prob. primo excludendo pactum illud inter Patrem & Filium. Si datur huiusmodi pactum, debet fundamentum desumi vel ex Sacris Scripturis, vel ex Conciliis, vel ex Patribus, de eadem enim re agimus, quæ dependet à libera Dei voluntate, quæ aliter nobis manifestari non potest, sed ex nullo capite fundamentum hoc potest desumi, immo habetur omnino contrarium, ergo. Prob. mi. Scriptura dicit per Paulum; *Non ex operibus, sed ex vocante dictum est, quia maior serviet minori.* Et ad Rom. 15. *Dico enim Christum Jesum fuisse Ministrum circumcissionis propter veritatem Dei ad confirmandas promissiones Patrum, gentes autem super misericordiam honorare Deum.* In quo textu indicat, propter Hebræos venisse Christum secundum promissionem, propter gentes vero ex pura misericordia; quod tamen non est ita intelligendum, ut etiam pro illis ex misericordia non venerit, sed solum in hoc sensu, quod pro Hebræis venerit ex misericordia præcedente promissionem, pro gentibus vero ex misericordia sine aliqua promissione saltem peculiari. Concilium Arausic. præter dicta in antec. num. 134. can. 6. damnat illos, qui dixerint: *Sine gratia Dei credentibus, volentibus, desiderantibus, & pulsantibus nobis misericordiam conferri.* Augustinus, quem eligo inter omnes Sanctos Patres, qu. 2. ad Simplic. in fine ait: *Quare tamen & huic ita, & huic non ita? Homo tu quis es? Debitum si non reddit, habes quod gratuleris, si reddis, non habes quod queraris.* Ubi Sanctus Doctor declarat, ex duobus petentibus, pulsantibus &c. ex sola facultate naturæ unum vocari, alium non vocari, quia ita Deo placet, sentit ergo nullam esse huiusmodi legem.

146. Prob. Secundo ratione deprompta ex sacris literis, si daretur huiusmodi lex gratiam conferendi, etiam concessio, quod facere quantum in se est ex

viribus naturæ esset pura conditio, non vero aut dispositio, aut meritum congruum, gratia non esset gratia, sed hoc non est dicendum, ergo. Prob. sequela mai: Promissio sub conditione alicujus operis, adimpleta conditione, obligat promittentem, saltem ex quadam imperfecta iustitia, & stricta ex suppositione, adtribuendum quod promissum est, & operanti confert jus ad illud petendum, ut constat, ex illa parabola. Mat. 20. in qua operarii convenerunt cum Domino, & Dominus dixit uni; *Nonne ex denario convenisti mecum? Tolle quod tuum est, & vade.* Ergo si &c. Hoc magis declaratur exemplo. Supponamus, regem promittere, se daturum filiam suam in uxorem uni ex militibus, qui prior mænia Civitatis conscenderet, aut illum hostem superaret, ut fecit Saul cum David; Miles qui prior ascenderet, aut hostem superaret, faceret sibi debitam ex iustitia, dimanante ex illa lege, filiam Regis, ergo à pari in re nostra.

147. Neque dicas, hoc non repugnare, quia gratia non daretur illius operationis intuitu, sed solum propter merita Christi, propter quæ lex illa statuta est; & sicut gratia habitualis datur ex debito contracto per legem promittentem gratiam convertenti se ad Deum, & illis, pro quibus Christus efficaciter obtulit suam passionem, & tamen gratis datur, ita in casu. Nam contra primum est; gratiam illam fundari quidem in meritis Christi tanquam in causa, sed simul etiam in operibus naturalibus creaturæ, tanquam in conditione, sine qua lex nullam haberet vim, proinde debitum dandi gratiam oriretur completè ex huiusmodi operationibus, ut dicebatur de milite in exemplo adducto; unde sequeretur, quod quemadmodum posita lege à nobis dicta, opus illud militis fieret aptum, & haberet proportionem cum nuptiis filiarum, ita ex lege statuta cum Christo opus naturale fieret aptum, & haberet proportionem cum gratia. Contra secundum est, pa-

ritatem non valere, etenim adhuc debitum illud progreditur à gratia, quia progreditur à conversione peccatoris ad Deum, quæ sine gratia non fit, nec Christus efficaciter obtulit passionem suam pro illis, qui ex sola facultate naturæ operarentur, alioquin meruisset suam gratiam non esse gratiam. Verum, quodcumque dicant adversarii, dari huiusmodi legem superest semper ipsis probandum. Addo tandem hanc paritatem; Quia Deus statuit humanam speciem in individuís conservare posita naturali corporis dispositione, gratiam non elargitur creando animam, ergo à pari si statuisset gratiam conferre posita, quantum in homine est, naturali operatione, gratiam non largiretur gratiam largiendo; Creatio animæ ex vi illius decreti debita est, ergo largitio gratiæ ex vi alterius decreti debita esset, & ita recurrit quod supra proponebatur.

148. Magis roboratur assertum nostrum, si perpendamus, contrarium esse illud idem, quod Cassian. Collat. 13. dicebat, & in quo reprehensus fuit à S. Prospero lib. contra Collat. cap. 39. dicebat autem sic. *Ita semper gratia Dei nostro in bonam partem cooperatur arbitrio, atque illud in omnibus adjuvat, protegit, & defendit, ut nonnunquam etiam ab eo quosdam conatus bonæ voluntatis vel exigat, vel expellet, ne penitus dormienti, aut inertí otio dissoluto sua videatur dona conferre.* Quid autem Prosper? *Quæsi ita utrumque recipiendum sit, ut in aliis hominibus voluntas gratiam, in aliis gratia præveniat voluntatem, & non ita ut in omnibus voluntas gratiam sequatur.* Non est igitur dicendum gratiam à Deo conferri, quia voluntas bene agit, sed voluntatem bene agere, quia datur gratia, & profecto recte contra Cassianum argumentum Prosperi procedebat; nam si per illum gratia præveniens auferebat arbitrii libertatem, etiam voluntas præveniens gratiam auferebat gratiæ dignitatem.

Tom. II.

149. Neque verum est, posse hanc regulam firmari, quod Deus auxiliis gratiæ suæ eos præveniat, qui suo bene utuntur arbitrio, sed omnes æqualiter respicit, & ipse *cujus vult miseretur; et quem vult indurat*, ut ad Rom. 8. Unum vocat, alium non vocat, primum quidem misericorditer, secundum vero iustissime, ignota quidem nobis causa, Deo autem notissima, ut sæpe repetit Augustinus; bene utentes libero arbitrio ex viribus arbitrii in perditionis massa ut vasa ignominie potest relinquere, male utentes in vasa honoris per gratiam suam potest attollere, atque hoc factum esse frequenter in Scripturis habemus, ubi dicitur, *inventus sum à non querentibus me, palam apparui his qui me non interrogabant*; & rursus. *Tota die expandi manus meas ad populum, non credentem mihi, sed contradicentem.* Quapropter ex data doctrina, sic breviter, sed arbitrato meo validissime arguimur. Vel bene utentibus libero arbitrio ex viribus naturæ gratia conferri debet, vel non; si debet, ergo non cuius vult miseretur, neque quem vult vocat & prævenit, sed miseretur, quia ipse vocatus, quia (sic loqui liceat) quia prævenitur, nec erit verum, quod ait Propheta, *Misericordia ejus præveniet me*, sed è contra ego operibus meis naturalibus præveniam misericordiam ejus; si non, ergo commune illud non potest intelligi de operibus naturæ, nec fingi potest aliqua lex, vel pactum hoc sibi postulans.

150. Quid igitur proderunt operationes bonæ in linea morali naturali? Cur igitur hortabimur etiam ethnicos ad ita bene operandum? Proderunt adhuc, respondeo, non quia sint vel dispositiones, vel conditiones, ex quibus inferatur gratiæ consequitio, sed primo insensu negativo, quia per operationes etiam naturaliter bonas impedimentum non apponitur, & sic homo negativè fit dignus ad recipiendam gratiam, in quo sensu explicandi sunt Sancti Patres, & qui

K 2

qui dixerint, per operationes naturales bonas disponi ad gratiam. Pro hac re est clarissimum testimonium Marci Eremitæ de Paradiso lege & spiritu cap. 23. dicentis: *Omne opus bonum, quod per nostram naturam operamur, tantum equidem efficit, ut è contrario malo aut vitio abstinemus; Cæterum extra gratiam, sanctificationis affecti, accessionem nobis facere non potest.* Proderunt secundo in sensu positivo, vel quia per illas acquiri potest habitus alicujus moralis virtutis, aut quia præmium aliquod in hac vita concedetur, aut quia reprobi minus in Inferno cruciabuntur, ut loquitur Augustinus.

151. Ob. 1. trito illo exemplo allato à S. Th. & Scoto, quod si puer enutritus in Sylvis sequeretur ductum rationis in appetitu boni, & fuga mali, certissime Deus illi, vel per inspirationem internam, vel per aliquem prædicantem ostenderet ea, quæ ad salutem necessaria sunt. Idem pluribus in aliis locis docet Angelicus, & qu. 14. de verit. art. 11. ad 2. ait: *Quamvis non sit in potestate nostra cognoscere ea, quæ sunt fidei ex nobis ipsis, tamen si nos fecerimus quod in nobis est, ut scilicet ductum naturalis rationis sequamur Deus non deficiet nobis in eo, quod ad salutem est necessarium.* Et in 2. sent. quæst. 1. art. 4. dist. 28. inquit: *Etiam ad fidem habendam aliquis se preparare potest per id, quod in naturali ratione est.* Ergo.

152. Resp. primo, Totum hoc sequitur ex mera Dei misericordia, non infallibiliter ex aliqua lege, & verbum illud certissime non esse accipiendum pro infallibiliter, sed pro ordinarie & regulariter, ut aiunt; Sicut cum dictum fuit Exodi 34. *Non ingredimini ad eas* (ideest mulieres Moabitidas, & Amonitidas) certissime enim advertent corda vestra. Explicatur à S. Th. 1. 2. qu. 105. art. 4. ad 6. de morali periculo seductionis, non autem pro infallibili. Ita Bannes 2. 2. qu. 10. art. 1. pluresque Thomistæ Theologi. Sed responsio non placet, nec est ad mentem

Doctoris; nam supponamus, Deum huic puero gratiam non conferre, jam non peccabit se non convertendo ad Deum post usum rationis, quia sine gratia non potest se convertere, & ad impossibile nemo tenetur, & sic prius poterit peccare venialiter, quàm mortaliter, quod est contra ipsorum Scholam; dicere vero, quod in illa hypothefi Deus non permitteret ipsum peccare venialiter, fictitium est; deinde semper argumentum redit.

153. Tutius igitur respondemus dicendo, quod in illa hypothefi Puer ille movebitur per auxilium Divinum ad se convertendum ad Deum tanquam existentem & remuneratorem in linea supernaturali, quodve auxilium non dependebat ab aliqua lege affixa bonis operibus naturalibus, sed solummodo à Divina voluntate, quæ volens, omnes homines salvos fieri, & hujusmodi conversionem præcipiens, debet conferre illa auxilia, sine quibus conversio haberi non potest, ne dicamus, Deum jubere impossibilia; Inde puer ille, si bene utatur eo priore auxilio, lumen accipiet etiam in reliquis, quæ ad salutem requiruntur & hoc quidem fiet modo à S. Thoma assignato; Unde ex præexistente solum operatione bona naturali gratiam ipsi conferri nunquam continget; atque hoc factum fuit cum Cornelio, cujus elemosynæ & orationes Deo placuerunt, proinde habebat fidem Dei existentis & remuneratoris, cum sine fide impossibile sit placere Deo. Totum hoc est ad mentem Angelici super cap. 10. ad Roman. lect. 3. 2. 2. qu. 10. art. 4. ad 3. & manifestè nostram sententiam tradit 1. 2. qu. 109. art. 6. ad 2. qu. 112. art. 3. Quare Driedo, Duardus, & Cajet. respondent brevius argumento ex ejusdem authoritatibus petito dicentes, in hisce ultimis locis ad meliorem formam ea reduxisti, quæ in aliis ab adversariis citatis prius docuerat.

154. Ob. 2. Sanctus August. lib. 19. de Civit. cap. 13. dicit. *Deus dedit homini-*



*minibus quedam bona hujus vite congrua eo pacto acquifsono, ut quicumque mortalibus talibus bonis rectè usus fuerit, accipiat ampliora atque meliora, ipsam scilicet immortalitatis pacem &c.* Ergo sentit, bonum usum naturalium bonorum habere pactum affixum consequendi etiam supernaturalia bona. Est etiam Chrysof. super illa verba. *Videns eos illum sequentes*, hæc habens. *Admonemur, Deum in suis beneficiis nostras non prævenire voluntates, sed à nobis incipendum.*

155. Resp. Si præclarissimus Doctor intelligatur juxta literam strictè, per istam nimis probari, cum addat; *Qui autem perperam bonis temporalibus usus fuerit, nec illa accipiat, & hæc amittat;* Unde nemo male naturaliter vivens prævenientis gratiæ donum acciperet, quod falsum esse demonstravimus. Docuit profecto Augustinus semper oppositum, semper Dei gratiam à sola Divina voluntate cognoscens, ut dictum fuit; & in epis. 107. ad Vitalem arguens contra Pelagianos asserit, unum illuminari à Deo, quia Deus vult, alium non illuminari, quia non vult; loquitur igitur in laudato loco de bono usu temporalium bonorum non præcisè habito ex viribus naturæ, sed gratiæ. Chrysofomi autoritas si ita intelligatur, est aperte contra Concilia adducta in antecedente, immo contra ipsum Chrysofomum citatum num. 141. in fine, intelligendus est ergo de aliis beneficiis, quæ post sufficientem gratiam conferuntur.

156. Ob. 3. autoritatibus Sacre Scripturæ. Joan. 1. *Deus illuminat omnem hominem venientem in Mundum.* Et 2. ad Timot. 2. *Deus vult omnem hominem salvum fieri, & ad agnitionem veritatis venire.* Sed hoc non esset verum, si facienti quod in se est gratiam non conferret, ergo.

Resp. ut supra, probari ex hisce textibus, Deum dare omnibus auxilia sufficientia ad salutem quantum est ex

parte sui, non vero hujusmodi auxilia dependere ab aliquo opere naturali, quo homo se disponat ad ipsorum consequutionem, quomodo vero sit illa voluntas in Deo infra tradetur.

157. Ob. ultimo rationibus. Primo. Vocatio interna & excitatio pendet potissimum à voluntate illius, qui vocatur & excitatur, ergo. Prob. ant. pendet potissimum ab audienda Evangelii, mysteriorumque fidei prædicatione, sed audire hanc prædicationem, vel animo proficiendi, vel animo irridendi pendet à voluntate illius qui &c. ergo. Secundo. Interior gratia consistit in illuminatione intellectus, & excitatione voluntatis, sed illuminatio intellectus, & excitatio voluntatis, cum sint actiones vitales, pendet ab intellectu & voluntate, ergo. Tertio. Per hoc, quod collatio gratiæ dependeret à propria hominis voluntate, nihil gratiæ derogaretur, prob. per hoc quod collatio gratiæ dependeat à voluntate Ministri, media qua multoties Deus homines vocat, nihil gratiæ derogatur, ergo à pari.

158. Resp. ad primum ne. ant. effectus enim vocationis & excitationis pendet à voluntate, sed jam vocata, & excitata, non tamen ipsa vocatio & excitatio; ad prob. dis. mi. audire animo proficiendi, vel irridendi pendet &c. sed primum habetur per gratiam, secundum per propriam voluntatem nec mi. & conf. Quod quis audiens prædicationem irrideat, audientis est culpa; quod vero animo intendat, donum est Dei. Dictum enim fuit de Lydia purpuraria act. 7. *Dominus aperuit cor ejus, ut intenderet iis, quæ dicebantur à Paulo.* Audit, inquit August. lib. 1. de peccat. meritis & remis. cap. 25., quippe homo dicentem vel Angelum vel hominem, sed ut sentiat & cognoscat verum esse, quod dicitur, illo lumine intus mens ejus aspergitur, quod æternum manet. Ratio autem distinctionis nostræ est illa, quam assert



assert S. T. 1. 2. qu. 112. art. 3. ad 2. nimirum. *Defectus gratiae prima causa est ex nobis, sed collationis gratiae prima causa est à Deo secundum illud Osee 3. Perditio tua ex te Israel, tantummodo in me auxilium tuum.* Ad 2. ne. mi. loquendo formaliter, & solum est verum effectivè, quatenus intellectus & voluntas post receptionem illuminationis & excitationis agunt cum ipsis. Illas operatur Deus in nobis sine nobis, ut dicam in sequenti quaest. Ad 3. dico, operationem Ministri esse gratiam externam Dei collatam illi, ad quem Minister mittitur, unde nil mirum, si gratia interna potest ab ipsa dependere tanquam à conditione, cum ita gratia gratiam sequatur, hoc non valet in casu.

## ARTICULUS ULTIMUS.

*Utrum ad finalem perseverantiam sit necessaria gratia specialis.*

159. **D**E diuturna perseverantia in bono jam actum est, ubi quaerebatur, an diu homo sine gratia vitare posset omnia peccata lethalia. Nunc perseverantiam in sensu magis stricto consideramus; atque illa est, qua homo ultimum instans vitae cum gratia & justificatione connectit. Perseveret homo per omnes annos in fide, in charitate, si pro ultimo instanti vitae sine fide & charitate decidat, perseverantiam, de qua modo loquimur, nunquam habuit. Plus habuit perseverantiae, qui per unicum instans fuit cum Christo, & statim in Christo mortuus est, quam qui semper fuit cum Christo, & sine Christo vitam explevit. Hac sunt verba mea, sed sensus est Augustini cap. 1. de bono perseverant. De hac ergo inquiritur, utrum sit tale donum, ut supra donum justificationis jam habitae existimandum sit, nec inquiritur de perseverantia secundum posse, idest in actu primo sed secundum effectum & actum secundum.

160. Sentiendum, ad finalem perseverantiam necessariam esse gratiam, specialem distinctam ab illa, per quam habetur justificatio, & gratia habitualis. Hac est omnium Theologorum sententia, & à pluribus censetur ad fidei dogma pertinere, quod utrum dici possit nec ne, ex probationibus nostris evinci poterit.

Primum fundamentum hujus asserti desumitur ex Doctrina S. Augustini, qui de hac perseverantia librum inscripsit continentem capita 24. in quibus omnibus perseverantia finalis extollitur tanquam præcipuum munus misericordiae Dei, ejus tamen testimonia omitto, quia cum rationibus à nobis infra exponendis conveniunt.

Secundum & clarissimum fundamentum desumitur ex Doctrina Concilii Trident. quod sess. 6. can. 22. damnat asserentes justificationem sine speciali Dei auxilio posse perseverare. Et can. 16. loquens de perseverantia, illam appellat magnum donum, quæ non valerent, si non esset gratia specialis ab illa distincta, per quam habetur justificatio. Hinc merito orabat David ps. 120. *Dominus custodiat introitum tuum, & exitum tuum.* Et ps. 67. *Domini Domini est exitus mortis.* Moveri autem potuit adductum Concilium ad ita definiendum, quod multo ante jam factum fuerat à Concilio Arausicano, sequentibus rationibus, quibus ita assertum suadeo & confirmo.

161. Donum, quod conceditur solis prædestinatis est specialius & distinctum ab eo, quod conceditur etiam reprobis, sed donum perseverantiae conceditur solis prædestinatis; Qui enim perseveraverit usque in finem hic salvus erit, & justificationis gratia conceditur etiam reprobis, alioquin reprobi semper essent in peccato, ergo. Præterea; & hoc est argumentum S. Th. 3. contra gen. cap. 155. Quod cum aliquo dono variabile est, ita ut amitti possit, & saepe amittatur status in quo reperitur, si fiat invariabile, nec amplius amitti possit.

possit fieri debet per aliquid specialius, atqui homo per gratiam justificationis variabilis est, ita ut hæc amitti possit, & sæpe amittatur, per donum vero finalis perseverantiæ sit invariabilis, ita ut amitti non possit; *perseverantiam*, enim inquit Augustinus lib. 6. de bono perseveran. *multi possunt habere, nullus amittere*, ergo ita sit per donum specialius & distinctum.

162. Ob. 1. Si habenti gratiam habitualement debita est gloria, perseverantia finalis non est donum specialius & distinctum à gratia habituali, sed habenti gratiam habitualement debita est gloria, ergo. Prob. mi. habens gratiam habitualement habet jus ad gloriam, sed habenti jus ad gloriam debita est gloria, ut patet in cœteris juribus ad aliquid, ergo. Neque dicas juxta probationem, esse debitum juxta amissibile & variabile, non sic inamissibile, quod per donum perseverantiæ obtinetur. Contra enim. Per gratiam habitualement habetur jus inamissibile ad gloriam, primo quia ipsa est qualitas permanens exigens ex sui natura perpetuitatem; secundo quia per ipsam habetur amicitia Dei & quidem sincera, quæ ex Arist. sine stabilitate non datur, ergo.

163. Resp. acceptando responsionem, jus enim, quod gratia confert ad gloriam, naturam sequitur ejusdem gratiæ, sicut ergo gratia habitualis amitti potest, cum sit in subiecto variabili & defectibili capaci ad suscipiendam formam contrariam, nempe peccatum, ita amitti potest hoc jus ad gloriam. Ad impugnationem, jam habes quid respondeas, scilicet, gratiam habitualement ex natura sua esse qualitatem permanentem & perpetuam, si spectetur secundum se, non autem si consideretur in subiecto in quo est, quod est vertibile & capax formæ contrariæ. Habetur etiam per gratiam amicitia Dei sincera, sed ad hanc requiritur posse perseverare, non actu perseverare, & ad amicum pertinet non recedere ab amico sine causa, quod

præstat Deus, qui neminem deserit, nisi prius deseratur, non autem eum in amicitia ita firmare, ut ipsi recedere non permittat, licet possit; cujus ratio est, quia amicitia est satis sincera, si se accommodet extremis inter quæ datur, homo autem, quantumvis justus, est talis naturæ, ut vertibilis sit, nec postulat, ut ejus vertibilitas removeatur, ergo; non est ex alia parte necesse amicum conferre alteri amico omne, quod potest, præsertim cum agamus de gratia propria status viæ. Quod si Deus id faceret, per gratiam confirmationis faceret, quæ quidem major est etiam ipsa, gratia perseverantiæ, nam hæc haberi potest sine illa, illa nequaquam sine ista.

164. Ob. 2. Non plus requiritur ad finalem perseverantiam, quam ad gratiam habitualement, ergo. Prob. ant. finalis perseverantia non est nisi continuatio gratiæ habitualis, sed ad continuationem gratiæ habitualis non plus requiritur, quam ad gratiam habitualement, ergo. Prob. mi. non plus requiritur ad conservationem formæ; quam ad ejusdem productionem, ergo. Confirm. Primo gratia habitualis est auxilium sine quo nemo potest perseverare, perseverantia actualis est auxilium quo quis perseverat, sed auxilium quo quis perseverat non distinguitur ab auxilio sine quo quis perseverare non potest, ergo. Confirm. secundo. Habens gratiam habitualement habet habitum perseverantiæ, sed habens habitum perseverantiæ habet sibi debitam perseverantiam, ergo. Prob. mi. Cuilibet habitui operativo debitus est concursus ad actum sibi correspondentem, ut patet, ergo.

165. Resp. ne. ant. ad prob. trans. maj. non enim est continuatio utcumque, sed usque ad mortem, ita ut nullum instans vitæ remaneat; ne. mi. ad prob. dis. ant. si forma nullum habeat contrarium conc. si habeat contrarium, & sit in subiecto variabili ne. mi. & conf. tunc

tunc enim requiritur, ut etiam à contrario defendatur, & subiectum reddatur invariabile & fixum. Dixi trans. nam falsum est, etenim agens naturale habet virtutem ad productionem viventis, nec tamen eam habet ad viventes conservationem, ut patet experientia. Ad 1. confirm. responsio communis est non distingui in ratione rei & specifica, distingui tamen in ratione doni magis indebiti; immo inquirunt contingere posse in re maiorem gratiam habuisse non perseverantem finaliter, quam perseverantem, ut probat exemplum relatum ab Augustino penes Gonet. cuiusdam, qui usque ad annum 80. perseveravit in gratia iuste pièque vivendo, & deinde turpiter reliquum vitae tempus transiit, & è contra bonus latro tantum pro brevi tempore gratiam habuit, quod & contingit in parvulis decedentibus post baptismum, attamen in ratione doni magis indebiti perseverantia finalis gratiam habitualement non mediocriter excedit, cum non solum indebita sit natura, sed etiam ipsi gratiae habituali, uti probatum fuit; ostendi hoc potest exemplo. Ensis donatus amico vel in circumstantia, in qua se liberet ab inimico, vel in alia, idem est in re, & tamen in primo casu est majus beneficium, praesertim si donetur cum intentione efficaci, per quam infallibiliter ab inimico liberetur. Ita in casu. Huiusmodi responsionem approbo. Attamen brevius negatur minor argumenti, & hoc juxta doctrinam Augustini de correp. & grat. cap. 2. ubi distinguit auxilium sine quo, ut sunt alimenta, sine quibus non vivimus, ab auxilio quo, quod certe non sunt alimenta, quibus etiam non deficientibus non vivimus; quapropter auxilium quo aliquid addit super auxilium sine quo. Hoc igitur includit illud, non è contrario. Ad tertium negatur absolute, perseverantiam finalem esse habitum, & infundi cum gratia habituali quando infunduntur aliae virtutes vel morales, vel supernaturales. Hoc manifestè constat,

nam pluribus gratia habitualis infunditur; nec tamen perseverantia finalis dono insigniuntur, sed expresse traditur à S. Th. hic qu. 109. art. 10. & ratio clarissima est ex dictis. Quod si videtur idem S. Th. qu. 173. art. 1. recensere perseverantiam inter virtutes gratiam habitualement subsequentes, ibi non est sermo de perseverantia finali & in effectu, sed tantum de proposito perseverandi, vel etiam de perseverantia diuturna, à qua tamen decidere potest, & inultoties decedit.

166. Ob. 3. Donum perseverantiae non distinguitur ab auxilio efficaci, per quod homo consequitur aeternam salutem, sed hoc auxilium efficax est debitum aliquibus saltem indeterminatè, ergo donum perseverantiae est debitum &c. sed ita non est gratia specialis distincta à gratia habituali, ergo. Ut minor ostendatur, perpendendum est, hanc Christum nobis promeruisse, aliquibus autem saltem promeruit, rursus perpendendum est, quod si aliquibus indeterminatè est debita, jam non est speciale donum, sicut quia aliquibus debitum est cognoscere veritatem, & aliquod opus bonum peragere, hoc à nobis speciali gratiae non fuit tributum.

167. Resp. conc. maj. dis. mi. est debitum ad ostensionem Divinae misericordiae, & ex suppositione Divinae voluntatis praedestinantis conc. propter existentiam gratiae habitualis ne. mi. & conf. Hinc sicut Divina voluntas, per quam quis praedestinator est donum distinctum à gratia habituali, ita & perseverantia finalis, sine qua ipsa praedestinatio haberi non potest; Idem dico de meritis Christi; Haec enim applicata esse aliquibus non nisi ex maxima misericordia. Dei ortum deduxit, qui voluit conferre gratiam in circumstantiis praevisis humanae voluntatis consentientis & cooperantis.

168. Ob. 4. Saltem finalis perseverantia, quae non sit diuturna v. g. in parvulis, dici nequit speciale donum, ergo gene-

generatim loquendo conclusio nostra non est vera . Prob. ant. primo quia difficilior est, conservare gratiam per diuturnum tempus, quam per horam, aut pauca instantia, præsertim quia possunt non contingere tentationes, impedimenta virtutis, & occasiones peccandi, qua propter si ad vincendas tentationes leves non est necessaria gratia specialis ex dictis, neque &c. Secundo. In parvulis hoc donum ad quid daretur? Baptizetur infans, statim moriatur, quare salvabitur? propter gratiam habitua-lem; itaque non est quid aliud præter ipsam.

169. Respondet huic argumento Sanctus Augustinus, & clarissimis verbis etiam in parvulis, immo maxime in parvulis donum maximum perseverantiam constitetur, ut sub initio dixi; quapropter ne. ant. ad prob. dis. ant. loquendo secundum se conc. ex circumstantia mortis conjungendæ cum gratia ne. ant. & conf. Donum perseverantiæ finalis non est excellentius, quia diuturnum, quia resistens tentationibus gravissimis, quia magis intensum, sed tantum, quia gratiam à morte non dividit, & ita datur, ut inamissibiliter detur. Habeatur istud, cœtera non nocent; Desit istud, cœtera non profunt. O' maximum donum? Sive ergo occurrant tentationes leves, sive graves, victor ero; Hoc ipsum, quod pro illo instanti leves sint tentationes gratia specialis est, descendit enim Diabolus habens iram magnam, sciens, quia modicum tempus habet. Ad 2. salvabitur infans propter gratiam habitua-lem receptam

per baptisma, quod tamen moriatur statim, vel priusquam perveniat ad usum rationis, gratia est, & ad hoc datur illi gratia perseverantiæ.

170. Dices. Ergo donum perseverantiæ nihil addit, nisi mortem advenire eo instanti; sed hoc esse potest naturale, & ex alia parte acceleratio mortis dicenda foret specialis gratia, ergo. Sed contra; mortem advenire eo instanti esse naturale, advenire tamen ex intentione Divina conjungendi illam cum gratia, esse supernaturale quo ad finem & ex Divina voluntate. Hinc miratur Augustinus, & cap. 17. inquit: Videte, quàm à veritate alienum sit, negare, donum Dei esse perseverantiam usque in finem, cum vitæ, quando voluerit, ipse det finem. Nemo igitur mortem optat, optaret tamen, si illam gratiæ certissimè conjungeret.

171. Ex his collige, donum hoc perseverantiæ non omnibus æquale esse, nec posse æqualiter explicari; aliquibus enim datur per auxilia interna, per quæ quis proferat actus bonos, ut per illos affirmativa adimpleat præcepta, vel evitet ea, quæ sunt contra præcepta negativa; aliquibus vero per auxilia extrinseca spectantia ad providentiam Divinam, per quam vult, hominem hunc salvum fieri, permittendo, vel potius volendo mortem potius hoc tempore, quam in alio; ideo dicitur Sap. 4. *Raptus est, ne malitia mutaret intellectum ejus.* Et rursus. *Placita enim erat Deo anima illius, propter hoc properavit educere illum de medio iniquitatis.*




## QUÆSTIO IV.

*De modo, quo confertur Hominibus  
actualis Gratia.*

## ARTICULUS I.

*An sit admittenda divisio gratiæ  
sufficientis & efficaciæ.*

1.  Ntequam aliquid de hac re proponeremus opere pretium esset, Lutheri, Calvini, Baji, & Jansenii historiam contexere, utpote eorum, qui magis in illa errare videntur, & quorum propositiones à Summis Pontificibus damnatæ fuerunt; sed quia hoc tantummodo ad historiam pertinet, atque disertissime scripserunt inter ceteros Eminentissimus Noris, & Honoratus Tournely, Opusculum hoc nostrum legentes, auctores istos, si velint, adire consulimus.

De hac divisione jam dictum fuit in prima quæst. nunc videndum est, an merito sit admittenda. Qua in re, ne aliqua contingat æquivocatio in verbis, adnotandum est, efficaciam dupliciter posse considerari; aliquando enim principium, seu causâ dicitur efficax in actu primo tantum, quia non deest ipsi virtus ad præstandum effectum, quantum ad ipsam spectat; aliquando vero iste terminus *efficax* non solum actum primum explicat, sed etiam secundum, ita ut illa causâ tali nomine nuncupetur, quæ non tantum vim habet ad effectum, sed etiam ipsum revera consequitur. Priori modo non esset acceptanda illa divisio, quia quolibet gratia Dei efficax dici debet, & hoc modo Paulus ad Hebr. 4. dicit: *Vivus est sermo Dei, & efficax*. Et ita explicantur Sancti Patres, qui de gratia Dei sermonem habentes illam,

semper efficacem appellant. Itaque in proposito nostro, illam gratiam efficacem dicimus, quæ semper est effectui conjuncta, in qua contineri gratiam sufficientem patet ex terminis, sicut actus secundus semper actum primum includit, sed hoc ab ipsâ distinctione non adimit, nam licet inveniri non possit gratia efficax sine sufficiente, potest tamen reperiri sufficiens sine efficaci, sicut, licet nequeat esse actus secundus sine primo, potest tamen esse actus primus sine secundo & hoc satis esse ad distinctionem, negabit nemo, qui intelligat. Brevius omnia explicabimus utendo more loquendi Augustini. Gratia sufficiens illa est, quæ afficit voluntatem præbens ipsi virtutem efficiendi actum, si velit, nec tamen vult, efficax vero illa est, quæ afficit voluntatem, & ulterius facit, ut velit, & de facto vult, & ideo non solum refertur ad voluntatem, sed etiam ad actum voluntatis. His ita explicatis.

2. Est dogma fidei admittendam esse gratiam sufficientem & efficacem, tanquam donum distinctum, contra Pelagianos, Semipelagianos, Lutherum, & Calvinum, qui lib. 2. instit. cap. 3. §. 10. habet hæc verba. *Voluntatem movet gratia, non qualiter multis sæculis traditum est, & creditum, ut nostræ postulationis sit, motioni aut obtemperare, aut refragari, sed illam efficaciter afficiendo quibus, aliisque innumeris nullam præter efficacem, gratiam agnoscit.*

Prob. primo de gratia sufficiente. Si datur gratia, cui fiat culpabilis resistentia, datur gratia sufficiens, ut manifestum est, sed datur gratia, cui fit culpabilis resistentia, ergo datur gratia suffi-



sufficiens. Prob. mi. Act. 7. *Vos semper Spiritui Sancto resistitis*. Mat. 23. *Quæres volui congregare filios tuos, quemadmodum gallina congregat pullos suos & noluisse*. Joan. 15. *Si non venissem, & loquutus eis fuisset, peccatum non haberent, nunc autem excusationem non habent de peccato suo*. Prætereo quod habetur 2. ad Corint. 8. *Videte, ne in vacuum gratiam Dei recipiatis*. 1. ad Corint. 10. *Fidelis Deus, qui non patietur vos tentari supra id, quod potestis*. Ex quibus compertum est, quod cum plures in vacuum gratiam Dei recipiant, pluresque tentationibus vincantur, datur gratia, cui fit culpabilis resistentia.

Sacra Scripturæ adduntur Sancti Patres, & pro omnibus sufficiat S. Augustinus à me citatus quæst. 1. ubi de gratiæ actualis divisione actum est; quod tamen amplius in sequenti difficultate demonstrabitur, ideo Sanctos Patres libenter omitto.

3. Prob. secundo de gratia efficaci. Si datur gratia infallibiliter connexa cum effectu, datur gratia efficax, sed datur gratia infallibiliter connexa cum effectu, ergo. Prob. mi. Ezech. 21. *Cor novum, & spiritum novum tribuam in visceribus eorum, ut in præceptis meis ambulent, faciantque ea*. Hoc idem cap. 31. Joan. 6. *Omnis, qui audit à Patre & didicit, venit ad me*. Joan. 15. *Non vos me elegistis, sed ego elegi vos, ut eatis fructum asseratis, & fructus vestri maneat*. Quæ omnia, & alia ferme innumera prætermissa, non probant, si non daretur gratia infallibiliter connexa cum effectu. Ita est in omnibus Conciliis definitum præsertim Arausicano, ubique distinguente auxilium quo homo possit credere & diligere, & quo credat & diligat. Tridentinum non memoro, cum centies in ipso tradatur hæc veritas. Si vero Patrum dicta placeret asserre, in promptu esset Cyril. de adoratione in spiritu exponens illa verba Gen. 19. de Loth: *Apprehenderunt Angeli manum ejus, inquit, efficaci subsidio*.  
Tom. II.

adjuvat, secundum quod scriptum est, *apprehendisti manum dexteram meam, & in consilio tuo deduxisti me*. Sed sufficiat integer liber, præter plures alios, scriptus pro hac re à S. Augustino de corrept., & grat. præsertim cap. 11. & 12. ubi concludit. *Subventum est infirmitati voluntatis humane, ut Divina gratia indeclinabiliter, & insuperabiliter ageretur, & ideo, quamvis infirma non tamen deficeret, neque adversitate aliqua vinceretur*. His omnibus adde quid quid dicitur de prædestinatione, nam negata gratia efficaci deberet per consequens negari prædestinatio. Hæc enim quid est? dicat Augustinus, *esse præparationem b. neficiorum Dei, quibus certissime liberantur, quicumque liberantur*. Sed per gratiam solam sufficientem hoc non habetur, ergo debet ulterius admitti gratia efficax.

4. Ob. 1. contra primam de qua est difficultas. Gratia, quam nos sufficientem appellamus, non est gratia, ergo male assertur divisio gratiæ in sufficientem & efficacem. Prob. ant. 1. Gratia, cui est annexum objectum desperationis, non est gratia, sed gratiæ, quam nos sufficientem appellamus, est annexum objectum desperationis, ergo. Prob. mi. Objectum desperationis est beatitudo infallibiliter non futura, sed gratiæ, quam sufficientem appellamus, est annexa beatitudo infallibiliter non futura, cum beatitudo infallibiliter futura sequatur gratiam efficacem, ergo. Hinc, si alicui fieret revelatio, ipsi dandam esse gratiam tantum sufficientem, posset desperare. Probatur secundo. primum antec. Illa non est gratia, quæ non facit nisi hominem peccatorem, sed ita se habet gratia sufficiens, ergo. Prob. mi. data gratia sufficiente homo infallibiliter peccat, ea non data non peccaret, quia non teneretur ad observanda præcepta, ergo. Hanc gratiam propterea nos fingimus, & somniamur, cum nullibi in Scripturis, Conciliis & Patribus nomen hoc inveniat, & potius

malum quam bonum dicenda foret, sicut si quis daret enslem alicui, quem infallibiliter sciret, se illo occisurum, non beneficium illi impertiretur, sed, uti liceat hoc nomine, maleficium.

5. Resp. gratiæ sufficienti annexum esse objectum desperationis non defectum gratiæ sufficientis, sed defectum liberi arbitrii, & ad illatum jam responsio data est in questione de Spe. Homo etiam infallibiliter peccat, sed ex suo libero arbitrio nolens uti gratia, non ex defectu gratiæ, hæc enim datur tantum ex affectu, ut homo possit non peccare, immo possit salutariter operari, oritur ergo peccatum ex defectu liberi arbitrii, & ex non usu gratiæ, quam respuit homo, qui posset non respuere, respuit autem, quia habens posse, non habet velle, quod ad gratiam efficacem pertineret. Ex hoc patet ad ultimum, quia, ens indifferens est ad occisionem etiam sui, gratia autem sufficiens non est indifferens etiam ad malum, sed tantum præstat vires ad bonum; Licet autem, terminati isti gratiæ sufficientis & efficaci non reperirentur explicitè in Scripturis, Conciliis, & Patribus, reperiuntur tamen æquivalenter; sed falsum est non reperiri. Audiant S. Augustinum 3. de libero arbitrio cap. 16. dicentem: *Ex eo quod non facit, quod debet, est reus, debet autem si accepit & gratiam sufficientem, & liberum arbitrium.*

6. Ob. secundo. Gratia dicta sufficiens est verè insufficiens & frustranea. Prob. Illud est insufficiens & frustraneum, quo dato requiritur ulterius auxilium ad operandum, sicut ad trahendum currum male diceretur sufficiens unus homo, si alio opus esset, sed data, gratia sufficiente requiritur ulterius auxilium ad operandum, ergo. Præterea. Cur non dicetur frustranea illa virtus, quæ nunquam suum pertingit effectum? huiusmodi autem est gratia sufficiens.

Resp. ne. ant. ad prob. dis. maj. quo dato &c. si neque tribuit posse operari conc. si tribuit ne. maj. in nostro au-

tem casu requiritur ulterius auxilium; quo habeatur actu operari, non posse, ideo &c. atque ex hoc habetur disparitas pro adducto exemplo, nam ad trahendum currum necessarius est alius homo non solum uti trahatur, sed etiam ut trahi possit. Ad ultimum; Frustranea, est illa virtus, quæ non habet effectum, defectu sui, non sic vitio alieno, ut in re nostra.

7. Dices. Ergo ex hisce omnibus sequitur, gratiam non esse efficacem, propter malum usum liberi arbitrii, ergo ex bono usu fiet efficax; Hoc autem non est dicendum, alioquin efficacia, gratiæ non erit à Deo, sed à libero arbitrio.

8. Non dici deberet in subsumpto *propter malum usum liberi arbitrii, sed propter non usum gratiæ*, & abusum libertatis, neque enim gratia male uti possumus. Quo dato instantia corrui; Si enim quis gratia non utatur, profecto illi non confert inefficaciam, sed solum ejus efficacia non utitur.

Nullus ex Doctoribus usque modo ita respondit; sed instantiam istam satis difficilem, quomodocumque gratia explicetur, esse profluentem, quamvis ferme omnes vel eam effugiant, vel dissimulent. Nos vero ut rem totam exploremus.

## ARTICULUS II.

*A quo proveniat gratiam sufficientem esse inefficacem.*

8. CUM ex dictis constet gratiam sufficientem ab efficaci esse distinctam, proinde inefficacem quantum ad operationem censendam esse, videndum occurrit à quo inefficacia ista progrediatur. Certum autem est, à nullo alio capite proficisci posse, quam vel ex natura ejusdem gratiæ efficaciæ, vel à Deo ipsam largiente, vel à creatura cui datur.

9. Ex natura ejusdem gratiæ sufficientem

cientis oriri videtur, quia sumpta secundum se, nisi aliud superaddatur, ita est limitata, ut absolute sit inefficax, ex quo inde sequitur, saltem indirectè & negativè hujusmodi inefficaciam Deo tribuendam esse, qui voluit concedere auxilium tantum sufficiens. Hujus autem ratio desumitur ex quo sicuti auxilium efficax est ex natura sua efficax, ita auxilium sufficiens est ad actum ex natura sua inefficax, & ex quo auxilium sufficiens præcisè nunquam assequitur effectum suum, quod ex se inefficax esse declarat.

10. Oritur à Deo illam largiente, quia Deum gratiam suam ad operandum largitur cui vult, cum sit Dominus suorum auxiliorum, & ita servatur illud: *Non est volentis, neque currentis, sed Dei misereentis*. Atque hoc dicendum videtur, non tantum si admittatur auxilium de se efficax & prævium, sed etiam si admittatur solummodo congruum, nam etiam hoc sua sola voluntate donat, ergo à solo Deo oriri potest auxilii sufficientis ad actum secundum inefficaciam. Ad hoc amplius ostendendum plurima Sancti Augustini testimonia non desunt, præsertim de prædestinat. Sanctorum cap. 8. ubi inquit de gratia efficaci, *occulit humanis cordibus. Divina largitate tribuitur, & à nullo corde respuitur, ideo enim tribuitur, ut cordis duritia penitus auferatur*. Et ita, addit, doceri filios promissionis, ita vero non doceri alios in massa perditionis relictos, quoniam *ejus vult miseretur, & quem vult inducat*. Ergo ex Augustino à sola Dei voluntate gratiæ inefficaciæ proficitur.

11. Neutrum tamen ex his dicendum esse existimamus, sed asserimus, solam voluntatem humanam istius inefficiæ esse causam.

Et primo declarandum est, hujusmodi inefficaciam à Deo oriri non posse, quia ita velit, ex nullo autem capite melius hoc declarari potest, quæ ex plurimum Scripturarum testimoniis, quæ à nobis adducta sunt, ubi gratiam suffi-

cientem dari probatum est num. 2. Id etiam verum non esset quod legitur. Osee 13. *Perditio tua ex te Israel, tantummodo in me auxilium tuum*. Sed perditionis causa esset Deus, & non auxilium, sed potius auxilii defectus esset à Deo. Quo pacto etiam servaretur, Deum velle salutem omnium hominum, & nolle mortem peccatoris, sed conversionem & vitam? fingeret unum velle, & aliud nollet, si ipse auxiliorum sufficientium causaret.

12. His suffragatur & ratio. Si à Deo oriretur in sufficientia & inefficiæ gratiæ, hominis peccatum esset Deo tribuendum, sed hoc non, ergo. Prob. maj. Hominis peccatum per hoc fit, quod in rebus præceptis, & ad salutem necessariis fiat vacua gratia Dei, ideo mone-mur, ne in vacuum gratiam Dei recipiamus, sed si à Deo oriretur inefficiæ gratiæ, gratia Dei fieret vacua à Deo, non ab homine, ergo. Immerito propterea fieret comminatio illa proverb. 1. *Quia vocavi & renuisti &c. ego autem in interitu vestro ridebo*. Nec verum esset quod dixit Christus Joan. 15. Hebræis. *Si non venissem &c. nunc autem excusationem non habent de peccatis suis excusare se enim potuissent dicendo, peccavimus in te, quia adventum tuum nobis inefficacem esse voluisti*.

13. Hæc est Doctrina à Sanctis Patribus tradita, pro quibus omnibus unus loquitur Augustinus: *Cur*, inquit lib. 1. ad Simplic. qu. 2. *noluit Esau & non cucurrit &c.* respondet, *quia si voluisset, & cucurrisset Dei adjutorio pervenisset, qui ei etiam velle & currere tribuisset, nisi vocatione contempta reprobus fieret*. Ergo ex sola Esau voluntate descendit, vocationem illam fuisse inefficacem. Quid de Pharaone in lib. 83. quæst. quæst. 68. sentit? Fuit iste vocatus, sed *quia vocationi obtemperare noluit obdurationis poena multatus est*. Quid de illis, qui ad cœnam vocati non venerunt? *Neque illi*, subdit, *qui noluerunt venire, debent alteri tribuere, sed tan-*

tum sibi, quoniam, ut venirent vocati, erat in eorum libera voluntate. Sicut de illis, qui vocati venerunt, ait; *Neque illi sibi debent tribuere, qui venerunt, quia vocati venerunt*. Clarissimè tamen pro re nostra querit lib. 2. de peccat. meritis cap. 17. quare, cum voluntate humana gratia adjuvante homines sine peccato esse possint, & non sint; & respondet. *Facillimè possem respondere, & veracissimè, quia nolunt*. Sed cur nolunt? subdit Doctor; *Ut non adjuventur in ipsi itidem causa est, non in Deo*. Ex quibus expressissimè constat, sufficientis gratiæ ad actum inefficaciam nequaquam Divinæ voluntati esse tribuendam.

14. Sed ex iisdem constat etiam, solam hominum infirmam ac liberam voluntatem hujus causam esse inefficaciæ, ipsamque gratiam sufficientem ex natura sua inefficacem non esse; quia, ut dicebatur, cum hujus gratiæ natura à Deo sit, saltem indirectè hoc esset à Deo; attamen pro hac parte sic ultra progredior. Inefficaciæ gratiæ per ordinem ad actum secundum ideo esset, quia ipsam recipiens non operatur, sed hoc non oritur ex ipsius natura, ergo. Prob. mi. gratia sufficiens, ut sit proximè sufficiens, debet ita concedi subjecto, ut hoc habeat omnia requisita ad agendum, quamvis postea non agat, sed quod non agat, non oritur ex natura gratiæ ipsi concessæ, sed quia subjectum, utpote liberum, nolit operari, vel quia Deus nolit concurrere; ergo. Non potest autem tribui Deo nolenti concurrere, primo quia non haberetur sufficiens requisitum; secundo quia actus soli Deo tribueretur, sicuti virtuti ignis in fornace babilonica non fuit tributa, non combustio, sed Deo, qui concursus suum igni negavit, ergo.

15. Ex his omnibus rectè servantur ea omnia, quæ penes Concilia & Patres inveniuntur qualia sunt, *Deum neminem deferere, nisi prius deferatur*. Deum enim à nobis deferri, est, nos ipsius gratiæ nostræ libertate resistere; Deum au-

tem nos deferere, est, ipsum ex nostra culpa illo nos auxilio proximo privare, vel gratia habituali propter peccata destituere. Omnes, licet absolute perseverantia suæ certi esse non possint, attamen debere in Divino auxilio firmissimam spem collocare, quia Deus, nisi ipsi illius gratia defuerint, sicut cepit opus bonum, ita perficiet. Quæ, & alia similia vera esse non possint, nisi gratia sufficiens daret omne, quod requiritur ad proxime operandum.

16. Resp. nunc argumento allato priori parte ne. ant. ut infra ostendetur, ubi de gratiæ efficacia pertractabitur; respondeant propterea, qui antecedens illud propugnant. Ad secundum in primis falsum est quod in antecedente dicitur, nam, ut infra dicam, potest idem auxilium sufficiens in uno habere effectum, non in alio; deinde, quod effectum non habeat, est ex eiusdem auxilii natura, sed propter subjectum in quo est, & quod ipsi resistit, & hoc clarè videt Deus in sua præsentia, in qua videt tum virtutem auxiliorum, tum liberas determinationes voluntatis humanæ.

17. Pro alia parte, quæ ad Deum pertinet, argumentum satis urget prædeterminantes; non est tamen eadem ratio de auxilio congruo, quia hoc datur quidem liberè à Deo, attamen usum libertatis non antecedit, sed subsequitur, quod enim non sit congruum provenit ex non usu libertatis, quia congruum fieret, si vellent, ut possunt, homines auxilio cooperari. Quia in re advertendum est, esse duo valde diversa, esse in hominis potestate facere, ut Deus ipsi præbeat auxilium, quod Deus prævidet congruum, & esse in hominis potestate facere, ut auxilium sufficiens, quod illi datur sit congruum; Hoc secundum asserimus, & exigitur à natura ipsius auxilii sufficientis; Primum vero est in sola Dei libertate & dispositione. Directè igitur respondendo argumento conc. ant. ne. cons. ita enim donat auxilia congrua, & in-



& incongrua, ut omnia liberè donet, sed prævideat, horum incongruitatem futuram esse in nostra libertate, cuius non usum ipse permittit, sed non causat; liberè itaque Deus sua auxilia distribuit, sed quod hæc incongrua sint, non est à Deo. Ad verba Augustini nunc venio, sed jam veni, si rectè doctrina superius adducta perpendatur. Siquidem illa omnia vera sunt juxta præscientiam suam, & juxta prævisum consensum futurum, non autem absolute & ex intrinseca natura dati auxilii, ideo dum dicit, hoc datum esse, ut cordis duritia auferatur, hoc non est intelligendum de cordis duritia in præscientia Dei, sed præcisè in se, & in hoc sensu explicandus est in omnibus aliis, quæ hæcè simillima tradit, sicut dum dicit, relictos esse, qui credere potuissent, explicandus est de potestate reducenda in actum, si Deus illos vocasset, in quo apparet magis, Deum auxilia dare pro sui liberalitate, dare prævidendo illa esse congrua, dare prævidendo non futura congrua, non dare etiam prævidendo futura congrua, si daret, & in hoc servatur tum maxima ejus misericordia, si dat, tum maxima ejus iustitia, si non dat, quod est maximum mysterium, quod incunctanter Augustinus asseruat, se autem non intelligere, fateri non erubescit, sed admirari & venerari testatur.

18. Remanet tamen, inquires, semper in suo robore difficultas proposita, nimirum, ergo efficacia gratiæ habetur ex libero arbitrio, non à Deo, per hoc quod arbitrium cooperetur. Sed an non satis responsum est, à Deo libere dari hæc gratiam? dependeat tamen ejusdem efficacia à libero arbitrio, hoc non erit secundum se, sed ut prævisum consensurum non per vires proprias, sed per vires illius gratiæ, cui assentietur, & propter quam assentietur, sicut in actu fidei credit Divinæ revelationi, & credit propter Divinam revelationem.

19. Ergo inquires, prævisio consensus liberi est causa istius gratiæ con-

gruæ, sicut prævisio non consensus est causa gratiæ incongruæ. Male deducta est hæc consequentia; nam non ideo consensus liber erit, quia prævidetur, sed ideo prævidetur, quia erit, & ex consensu libero habetur quidem efficacia gratiæ, non tamen ex ejus prævisione, tanquam ex causa formali, sed tanquam ex modo necessario spectante ad Deum omnia futura infallibiliter cognoscente; Quod si ex hujusmodi prævisione totum hoc derivaret, jam Deus prævidendo alicujus consensum, teneretur ad dandam gratiam, cui homo prævisus consensurus assentiretur, hoc autem falsum est, pluribus enim occulta nobis causa denegat gratiam, cui, si daretur, obtemperarent. Clarissimum est exemplum, illud tam celebre de Tyro & Sydone, qui in cinere & cilicio poenitentiam egissent, si virtutes illas vidissent, quæ Corozaim & Betsaida factæ fuerunt.

20. Ita nos respondimus argumento difficillimo, & conati sumus mysterium maximum declarare; Utrum vero possint hoc pacto se expedire, qui physicam prædeterminationem tam acriter sustinent, arduum mihi videtur. Hoc certum est; potius negandum esse, gratiam esse ab intrinseco efficacem, quam gratiæ inefficaciam Deo esse tribuendam.

### ARTICULUS III.

*Utrum gratia efficax inferat voluntati necessitatem.*

21. Dogma Catholicum nunc pertingo, ut inde quætionem inter Catholicos liberam relinquam, atque expeditam. De Pelagio dictum est satis, ideo gratiam Divinam denegasse, quia creatæ libertati damnum inferre existimabat, atque ut defenderet contra Manichæos arbitrii libertatem, gratiam penitus destruebat. Lutherus vero cum suis, ut Pelagium evitaret, factus est omnino Manichæus, & ut contra ipsum gratiam extolleret, adeo depressit



preffit arbitrium, ut nullum remanſiſſe voce ſcriptoque doceret. *Librum arbitrium poſt peccatum eſt res de ſolo titulo* ait in art. 36. inter eos, quos Leo X. damnavit; & in aſſertione eorundem articuloꝝ: *Librum arbitrium eſt ſigmentum in rebus, ſed titulus ſue re.* Idem aſſerit Calvinus in antidoto ad can. 5. ſeſs. 6. Concilii Tridentini; lib. 1. de libero arbitrio hæc habet: *Nego gratiam ſic nobis offerri, ut noſtra poſtea ſit optioꝝ vel obtemperare, vel reſragari.* Contra iſtos, utpote recentes hoſtes & omnia deſtantes præſens difficultas inſtituitur, brevius quantum potero, non ita vero, ut aliquid pro ipſo, vel contra ipſum omittatur. Non eſt autem cur modo probemus, dari huiusmodi gratiam efficaciẽ, cum nec ab ipſis negetur, & jam de hæc re actum ſit art. 1. huius quæſtionis. Superẽſt igitur demonſtremus, huius gratiæ efficaciam, minimò libertatem creatam deſtruire.

22. Atque unde melius demonſtrari poterit, quàm à Scriptura Sacra exordium ſumendo? Nova non proferam, ſemper tamen vera. Eccleſiaſt. 15. legitur: *Deus reliquit hominem in manu conſilii ſui, adiecit mandata & præcepta, ſi volueris mandata ſervare, conſervabunt te; Appoſui tibi ignem & aquam, ad quod volueris porrigere manum tuam, ante hominem vita & mors, quod placuerit ei, dabitur illi.* Hoc teſtimonio clarius nullum aſſerri poteſt. Quid eſt hominem eſſe in manu conſilii ſui, niſi hoc vel illud eligendi poteſtatem habere? Non eſt profeſſo beatus in manu conſilii ſui, ut Deum videat, quare? quia proximè neceſſario videt; Dari etiam mandata circa neceſſaria quis dicet? Tandem conditio illa *ſi volueris* ſupponit poſſe nolle, & multoties velle, ergo.

23. Sentiant & Hæretici cum Calvino hæc auctoritate nimium ſe premi; Quod ergo effugium ſibi quærunt? Dicunt, hoc dictum eſſe de primo homine innocente, poſt ejuſdem vero lapſum poteſtatem hanc amiſſam eſſe; vel etiam

conceſſo, hominem lapſum ſecundum ſe ſpectatum eam retinere, attamen per Divinam motionem ad unam partem neceſſitari.

Sed neutrum ex his poteſt ipſis, ſi velint rectè pendere, ſuffragari; Non primum, etenim libertas hæc erat indita homini tanquam naturalis voluntatis proprietas, per peccatum autem, nihil, quod naturale erat, deperditum eſt, ut toties diximus, & ſapiens in alato textu loquitur ſicut in alio cap. 13. *Beatus dives, qui inventus eſt ſine macula, & quis poſt aurum non abiit; nec ſperavit in pecunia theſauris &c. qui potuit transgredi, & non eſt transgreſſus facere mala & non ſecit,* ſed hic loquutus eſt de homine etiam poſt lapſum, ergo & ibi. Quod ſi nolint, ſaltem ex hoc ultimo convincentur, ſicut ex alijs nu. 3. *In arbitrio viri erit, ſive ſciat, ſive non faciat:* Non valet ſecundum, primo quia illo admiſſo etiam in ſtatu innocentiae præfata libertas non fuiſſet, cum etiam pro eo homo regeretur generali providentia Dei, iſtiusque motione indigeret; Secundo quia Dei providentia, & motio data eſt ad naturam adjuvandam perficiendamque, non vero deſtruendam, nec probari poteſt tanquam verofiſmile, Deum arbitrio ſuo talem providentiam ſtatuiſſe, quæ creaturam rationalem ſua libertate privaret; nam ſicut ait S. Auguſt. lib. 7. de Civit. cap. 30. *Deus ſic adminiſtrat omnia, quæ creavit, ut rebus omnibus ſuos motus proprios agere ſinat.* Potiori ratione id in voluntate continget.

24. Sed cur in novatoribus impugnandis, eorumque frivolis evaſionibus reſpondendo diutius immorabor? An laet, veritatem noſtram apertiſſimis verbis ferme ubique à Concilio Tridentino fuiſſe explicatam & deſinitam? Sed Concilium hoc audire nolunt. Audiant ergo Arauſicam can. 18. 15. & 25. ſtatuens; Hominis arbitrium per peccatum infirmum à Divina gratia corroborari, ut per iſtam poſſit, quod ſine ipſa non poſſet, & quidem libere, cum ſubdat

dat de hominibus, *volentes agunt, quod agunt*. Audiant Toletan. 4. cap. 65. in-  
quiens; *Sicut homo propria arbitrii vo-*  
*luntate Serpenti obediens periit, sic, vo-*  
*cante se gratia, propria mentis conver-*  
*sione quisque salvatur* audiant tandem  
Senonen. in decreto fidei cap. 15. affir-  
mans, *gratiam efficacem non esse tale,*  
*trahentis auxilium, cui resisti non possit*.  
Deinde inferant necesse est, ergo gratia  
efficax libertatem non admittit.

25. Contendit tamen Lutherus ali-  
qua ex Scripturis pro suo errore profer-  
re. Illud autem summopere promovet,  
quod legitur Jerem. 18. *Sicut lutum in*  
*manu figuli, sic vos in manu mea* cui simi-  
le est aliud Isaia. 45. *Nunquid dicit lu-*  
*tum figulo suo, quid facis? & aliud ad*  
*Rom. 9. An non habet potestatem figulus*  
*luti ex eadem massa facere aliquid qui-*  
*dem vos in honorem, & aliud in contu-*  
*meliam?* Sicut igitur luto nulla facultas  
conceditur per quam agat circa formam,  
que ipsi imprimitur, ita voluntas humana  
nullam facultatem habet, per quam agat  
in operibus gratiæ, quam ipsa recipit.

26. Sed si Scripturas adductas in sen-  
su Hæreticorum admittimus, destruan-  
tur oportet omnes alię Scripturę, in qui-  
bus dicitur hominibus *convertimini ad*  
*me*, & exhortantur ad certam suam voca-  
tionem, & electionem per bona opera  
faciendam. In illis igitur textibus non  
est attendenda omnis prorsus simili-  
tudo, sed dumtaxat maximum domi-  
nium Dei, qui posset, si vellet, ita de  
hominum voluntate disponere, sicut fi-  
gulus de luto, immo tanto magis quan-  
to quodcumque dominium humanum  
exceditur à Divino; Magnum tamen in  
reliquis est discrimen, quod satis ex  
supradictis colligitur, ut perpendenti  
compertum erit. Novit hoc ipse Calvi-  
nus, qui despicientes illos existimavit,  
qui dicerent; motionem hominis à mo-  
tu lapidis non differre, & asseruit in na-  
turali hominis facultate esse approbare,  
respuere, velle, nolle &c.

27. Si autem Calvinii rationes exa-  
Tom. II.

minamus ad sequentes revocari possunt.  
Prima; Gratia efficax datur hominibus  
per voluntatem Dei efficacem, per quam;  
vult hominem infallibiliter effectum  
consequi, & actu operari, atqui volun-  
tas Dei efficax non solum infallibiliter,  
sed etiam necessario infert effectum, nam  
voluntati ejus quis resistet, aut resistere  
potest? ergo. Secunda. Voluntas in ope-  
ribus gratiæ positis omnibus requisitis,  
ad agendum non est indifferens ad actio-  
nem vel non actionem, ergo non est li-  
bera. Prob. ant. Ut voluntas in operi-  
bus gratiæ habeat omnia prærequisita,  
ad agendum, debet habere gratiam ef-  
ficacem præcedentem quencumque  
actum voluntatis, nam si hanc non ha-  
beat, nunquam voluntas aget; sed sub  
gratia efficaci præcedente quencumque  
actum voluntatis; voluntas non est in-  
differens ad actionem vel non actionem,  
quia per illam determinatur, & cum  
determinatione non est indifferentia,  
præsertim quando est antecedens, ut in  
casu, ergo.

28. In hisce aliisque rationibus di-  
luendis nos non immorabimur, utrum  
proben nec ne, cogitent illi qui gratiam  
ab intrinseco efficacem affirmant. Hic  
tantum pro re nostra aliqua Augustini  
testimonia subijciam, cum soleat in con-  
trarium afferri. Lib. 3. de libero arbitr.  
cap. 1. ait præclarissimus Doctor. *Nulla*  
*culpa ostendi potest, ubi necessitas domina-*  
*tur*. Lib. 1. contra Faustum, & cap. 5. de  
Civit. cap. 10. inquit: *Multa facimus;*  
*quæ si nolemus, non utique faceremus.*  
*Quo primitus pertinet ipsum velle, nam*  
*si volumus, est, si nolumus, non est.* Tan-  
dem, ut plurima præteream, lib. de  
grat. & lib. arbit. cap. 3. hæc habet. *Cui*  
*dicitur, noli vinci à malo, arbitrium sine*  
*dubio voluntatis ejus convincitur, velle*  
*enim & nolle propriè est.* Quapropter  
illam tantum necessitatem asseruit Au-  
gustinus, de qua à nobis dictum fuit  
qu. 3. art. 1. sub initio. Qualis autem de-  
beat esse hæc libertas dicam in quæstio-  
ne de merito.

## ARTICULUS IV.

*Utrum efficacia gratia consistat in aliqua physica qualitate, quæ intrinsece efficax sit.*

29. **A**rduissimum, quod est in hoc tractatu, opus aggredimur, tot jurgiorum originem, tot Scholasticorum dissidium, nunquam vero pro aliqua parte resolutum, nec, ut opinor, resolvendum, immo, ut asserit Puteobonellus, Summorum Pontificum auctoritate in acri disputatione prohibi-

tum; Laudatum Doctorem, fateor, in hac re libenter sequeretur, atque cum ipso vel calamus infringere, vel suspenderem. Quia tamen Theologum virum omnia, quæ apud Scholasticos pertractantur, scire decet, ac explicare, ideo me ipsum cohibere non possum; & quia difficultas hæc ex æquo resolvi non potest, nisi præmissa quæstione de Divina cognitione futurorum, ideo prius hanc liceat producere, sicut se gerit Pater Suarez, & à se fieri non potuisse conqueritur Tournelij.

## DISPUTATIO UNICA.

## De Divina scientia circa futura.

## ARTICULUS I.

*An Deus cognoscat futura.*

1. **R**emittendum est, multifariam aliquid esse futurum. Primo necessario, non quidem necessitate simpliciter dicta, ita ut nec de potentia Dei absoluta ipsi repugnet non esse, siquidem huiusmodi existendi modus soli Deo convenire potest, sed quia pendet à causâ necessaria, quæ naturaliter impediri non potest in sua operatione attenda ipsius natura & concursu Dei ut authoris naturalis. Secundo contingenter, & est illud, quod ita erit, ut tamen possit non esse; & hoc bifariam, vel secundum quid & ab extrinseco, idest, quamvis pendeat à causâ necessaria nec indifferenti ad operandum vel non operandum, nihilominus potest ejus operatio impediri ex concursu aliarum causarum, ut sunt influxus alicujus astri, vel fructus alicujus plantæ; vel simpliciter & ab intrinseco, idest, dependens ab aliqua causâ libera habente facultatem

ad aliquid efficiendum, vel non efficiendum, ut sunt actus voluntatis creatæ, & in hoc sensu appellari possunt contingentes etiam actus Divinæ voluntatis ad extra, ut docent Scot. in 1. dis. 38. Gabriel, Palacios, & Capreol. dico in hoc sensu, nam si contingentia rei præter indifferentiam aliquam imperfectionem, & mutabilitatem significat, plane actibus Divinæ voluntatis hæc foret deneganda. Tertio hoc futurum contingens dividitur in absolutum & conditionatum. Primum illud est, quod pro aliqua temporis differentia revera erit, nec ejus existentia ab aliqua conditione suspenditur v.g. *Petrus sedebit*. Secundum vero è contra, v.g. *si Petrus audiet conversionem, convertetur*.

2. Præmittendum secundo; in quacumque propositione affirmante rem aliquam sub conditione futuram, tria adinveniri. Primo conditio, sub qua res affirmatur. Secundo res ipsa, quæ affirmatur. Tertio respectus conditionis ad rem affirmatam. Ver. gr. *Si Petrus legeret confessiones Sancti Augustini, converteretur*. *Si Petrus legeret* est conditio, verbum illud *converteretur* est res sub

sub conditione affirmata; ordo autem, seu connexio, quæ reperitur inter lectionem & conversionem, est respectus conditionis. Porro hujusmodi respectus multiplex esse potest; aliquando enim conditio esse potest metaphysicè, ut ajunt, connexa cum conditionato, ita ut ea posita hoc sequatur. V. g. *si Sol esset, dies esset. Si homo esset, risus esset.* Aliquando potest metaphysicè repugnare conditionato, ita ut ea posita sequatur impossibile. Ver. gr. *Si Petrus curreret, non moveretur.* Aliquando potest esse contingenter connexa cum conditionato, & tunc est, quando conjungi potest tam cum re affirmata, quam cum opposito; & hoc etiam bisariam. Primo ita ut quamvis cum utroque extremo conjungi possit, attamen magis ad unum, quam ad aliud inclinet. Secundo ita, ut disparatè omnino ad utrumque se habeat; exemplum primi est. *Si Petrus legeret &c. converteretur.* Jam vides cum lectione conjungi posse conversionem & non conversionem, attamen lectio magis propendet ad conversionem; exemplum secundi. *Si Petrus Romæ curreret, Paulus Venetiis sederet.* Jam vides, Petri cursum cum Pauli seditione omnino disparatè se habere. Quod à Theologis inquiritur, revocatur tantum ad futurum conditionatum contingens, quando conditio conjungi potest cum uno, & potest conjungi cum altero; & locum præcipuum habet in actibus dependentibus ab humana voluntate, quæ secundum se in actu dicto primo proximo ad utramque partem contradictionis indifferens est. Hæc primo statuta sunt, ut sequentibus difficultatibus viasteratur, quas per distinctos paragraphos, quantum humana imbecillitas permittet, implorato prius Dei auxilio, non contentionis animo, sed indagandæ veritatis, quantum fieri potest, studio resolvemus.

## §. I.

*Utrum Deus certissimè cognoscat omnia futura absoluta.*

3. **D**EUM certissimè cognoscere, omnia futura negarunt plures, in primis Cicero lib. 2. divinat. qui, cum ignoraret, quo pacto scientia Divina, cum humana libertate componi posset, maluit servare hominum libertatem, quam Dei scientiam, quem redarguit S. August. 5. de Civit. cap. 9. dicens, *ut homines faceret liberos fecit sacrilegos.* Joan. Hus omnino oppositum docuit, atque ut Dei scientiam defenderet, hominis libertatem negavit, ut habetur in Concilio Constantiensi sess. 25. Marcion. teste Tertulliano lib. 2. adversus ipsum, sensit, aut Deum non omnia scire, aut bonum non esse, nam sciens, hominem primum in peccatum labi, passus fuisset; Sociniani tandem cognitionem quidem futurorum Deo concesserunt, sed solum ex quibusdam conjecturis & verosimilibus rationibus deductam, non vero firmam & certam. Contra quos.

Dicendum. Deum certissimè cognoscere omnia futura contingentia absoluta etiam libera.

4. Ad ostendendam hanc veritatem innumera afferri possent Sacræ Scripturæ testimonia, quæ apud omnes Doctores Theologos inveniuntur. Jerem. 1. *Priusquam te formarem in utero novi te.* Psal. 138. *Intellexisti cogitationes meas de longe, & omnes vias meas previdisti.* Sap. 8. *Signa & monstra scit; antequam fiant.* Joan. 6. *Sciebat ab initio Jesus, qui esset non credentes, & quis traditurus eum esset.* Hæc profectò futurorum scientia est propria Divinitatis nota, & certissimum argumentum, quare, Isaia 41. *Annuntiate quæ ventura sunt in futurum & sciemus, quia Dii estis vos.* Et merito Tertul. lib. 1. contra Marcionem. *Hujus præscientiæ tot Deus habet testes, quot Prophetas.* Qua in re plures



alios Sanctos Patres in sequentibus asseremus.

5. Quamvis vero plures Doctores Catholici citati ab Ariaga dis. 20. sec. 1. arbitrati sint, hanc scientiam in Deo non posse evidenti aliqua naturali ratione demonstrari, sed solummodo juxta revelata credi, nihilominus contrarium liquet, si entis perfectissimi, quod procul dubio Deus est, naturam & notionem inconsideratam non relinquamus. Ad hanc enim pertinet ad ea omnia se extendere, quæ veritate objectiva non carent, & sicuti Divinæ substantiæ nihil addi potest, ita nihil Divinæ scientiæ, quæ est ipsa Dei substantia; futura autem suam habent veritatem objectivam, ut inde ostendemus, ergo. Quamobrem Augustinus 15. de Trinit. cap. 7. inquit: *Ita omnia cognovit, ut nec ea, quæ dicuntur præscripta, ibi prætercant, nec ea, quæ dicuntur futura, quasi desint expectantur, ut veniant, sed & præterita & futura cum præsentibus sint cuncta præsentia*. Ex quibus constat, quanta fuerit Socini dementia Deo scientiam solummodo conjecturalem concedere.

Neque satis est, ipsum aliquorum futurorum notitiam non denegare, non autem omnium, quo dicendi modo expositas Scripturas se explicare arbitrat; probat autem assumptum suum, ex quo pluries in Scripturis Sanctis adhibetur particula *forfitan* quæ dubitantis est animi. De hac re infra, cum hujusmodi responsio militet contra cognitionem certam futurorum sub conditione.

6. Præstat modo aliqua proponere ac refellere, quæ, admissa hujusmodi scientia in Deo, tanquam inconvenientia sequi videntur. Primo nihil liberè ponendum esse, sed quodlibet necessario esse futurum. Prob. Quidquid est objectum Divinæ scientiæ, necessario debet esse sicut à Divina scientia cognoscitur, ergo si Deus omnia futura certissime scit, nihil erit liberè & contingenter futurum; hujus ratio est, quia scientia Divina falli non potest, neque

mutari; sicut autem si res diversimode eveniret, quàm à Deo cognoscitur, revera scientia Dei falleretur & mutaretur, ita si posset diversimode evenire posset falli ac mutari juxta commune illud, *quod facit actus actu facit potentia possibiliter*. Secundo; superfluum esse omnem nostram curam & sollicitudinem circa res futuras, quia non aliter erunt, quam sint à Deo cognitæ; atque ad hoc punctum revocatur celebre argumentum illud; Vel Deus scit, me esse dammandum; vel æternam beatitudinem assequuturum; si primum, quidquid boni faciam damabor, si secundum, quidquid mali faciam, salvus ero.

7. Nullo tamen pacto id asserendum, & jam primum argumentum à me rejectum fuit, dum in quæstionibus Philosophicis de futuris contingentibus inquirebam, quam Doctrinam ibi traditam hic innovare non placet. Interim vero magis ostendo juxta præsens systema, quod instituo. Scias, non ideo aliquid esse futurum, quia de eo est Divina præscientia, sed ideo esse Divinam præscientiam, quia aliquid est futurum, quod suo loco ex professo probabo, quo dato jam vides, adhuc futura contingenter, & liberè evenire, quamvis à Deo certissime cognoscantur, sic enim indefectibilis hujus necessitas nullam ipsis infert necessitatem, neque ex quo ipsa sint ita futura ut possint non esse, quod sibi postulat eventus alicujus libertas, evincitur, scientiam Divinam mutari posse, quia in priori ad Divinam scientiam ita erant futura, ut possent non esse, & ita à Deo cognoscebantur. Coeternum; etsi ingenii nostri imbecillitas, modum Divinam præscientiam cum humana libertate conciliandi ignoraret, adhuc negandum non esset, vel Deum certo futura cognoscere, vel hominem in suis operationibus liberum esse, cum utrumque ex Divinis Scripturis, Patribus, & Conciliis habeatur. Jam pro Divina scientia dictum est, de humana vero libertate & dictum & dicendum.



Ex superiore Doctrina colligitur, vanam non esse curam, nostramque sollicitudinem in rebus ad nostram salutem, vel ad temporaneam vitam pertinentibus, siquidem, quicquid futurum est præcivit Deus, sed præcivit esse futurum dependenter à nostra cura & sollicitudine, quæ futura vel non futura erat, antequam à Deo prænosceretur, & si hæc cura & sollicitudo negligeretur, nec æterna salus obtineretur, nec obtinendam Deus præcivisset. Sed de hoc argumento iterum erit sermo, ubi de Divina prædestinatione tractabitur. Cur ergo Deus, si omnia futura novit, damna permittit, cum tamen, ut omnipotens illa posset impedire? Hoc cum Marcione non diceret, si menti occurreret quod inquit Augustinus in Enchir. tom. 3. cap. 25. *Melius judicavit de malis bene facere, quam mala nulla esse permittere.* Quod si malus vivit, vel ideo vivit, ut corrigatur, vel ut per illum bonus exerceatur ait idem in psal. 54. Utrumque autem res se habeat, omnia etiam mala in gloriæ justitiæque suæ manifestationem convertit, si male agens non resipiscat, in misericordiæ vero argumentum, si resipiscat.

§. II.

*Utrum Deus certissime cognoscat omnia futura conditionata.*

8. **I**N hac re fuerunt veteres aliqui Thomistæ physice prædeterminationis assertores, qui timentes, semel concessâ scientia conditionata in Deo, se concedere scientiam mediam, eam denegarunt, in quo etiam erravit Pater Madernus qu. 4. de scientia Dei art. 14. hæc habens. *Ut hac quæstio breviter decidatur, si probabitur à nobis, dari hæc scientiam conditionatorum in Deo, dico, debere etiam vocari scientiam mediam, seu scientiam conditionatam.* Quod, quàm salum sit, constat ex omnibus illis Doctoribus Thomistis, qui acerrimè scien-

tiam mediam rejicientes, scientiam tamen conditionatam in Deo affirmant, & quidem merito. Nam scientia media est quidem conditionata, sed ipsi nulum præsupponitur decretum, scientia, autem conditionata juxta prædeterminantes habetur dependenter à Decreto, non quidem absoluto, sed conditionato, modo quo à nobis suo loco declarabitur. Nunc interim præcindendo à medio, quo Deus hæc futura conditionata cognoscit.

Dicendum. Esse in Deo scientiam conditionatam.

9. Ad hoc probandum primo duo sunt in Scriptura Sancta satis nota, sed clarissima testimonia. Primum desumitur ex 1. Regum cap. 17. ubi David, postquam in Ceilam se receperit, ut Saulis effugeret persecutionem, & Saul decerneret illius Urbis obsidionem, Dominum consulvit dicens: *Si descendet Saul sicut audit servus tuus? Domine Deus Israel indica servo tuo,* & ait Dominus, *descendet. Dixitque David, si tradent me viri Ceilæ, & viros qui sunt mecum in manu Saul? & dixit Dominus, tradent.* Hoc audito, fugam arripuit David, & ita factum est, ut nec Saul Ceilam obsideret, nec Cives illi David traderint. Fuit ergo responsio Dei conditionalis duas continens propositiones. Una erat; *Si David permanebit Ceilæ, Saul descendet, ut Civitatem obsideat.* Alia. *Si Saul descendet, & obsidebit, Cives tradent David.* Aliter, cum nec Saul descenderit, nec Cives David traderint, Deus respondens mentitus esset.

10. Clarum profecto est, quod dictum fuit. Neque audiendi sunt, qui dicunt, ibi non alicujus rei futura sed tantum præsentis fuisse revelationem, idest voluntatis, & deliberationis tum Saulis, qui volebat descendere, tum Civium, qui volebant tradere; atque hoc David consulenti Dominum satis erat, ut fugam ab illa Civitate decerneret; sensus ergo est, *descendet idest*  
cog-

*cogitat, & vult descendere. Tradent, idest cogitant, & volunt tradere.* Quod quidem consonum est tum paraphrasi Caldaicæ, tum Glossæ interlineari.

11. Hæc enim explicatio omnino privata est, atque arbitrio conficta, & dum agitur de narratione Historica, hæc esse debet omnino simplex & propria, secus omnia, quæ in Scriptura tanquam facta narrantur, explicari poterunt de voluntate faciendi. Non est itaque in hac re Caldaica paraphrasis attendenda, vel quæcumque Glossa cum quolibet alio Authore, & potius, si placeat, explicandi sunt isti, quam scriptura, idest, ibi fuisse revelatam voluntatem præsentem Saulis illorumque Civium, & simul voluntatis perseverantiam usque ad effectum. Neque certe David interrogaverat Deum de præsentis Saulis, & Civium voluntate, sed de re sibi eventura; non enim prodest voluntas bona, neque nocet mala, si eam res non subsequatur, Superiori tamen explanationi satis est, si opponamus Hieronymum lib. quæst. in 1. Regum, ubi verbum *descendet* ita explicat, *ac si diceret, sibi steteris, descendet, & verbum tradent.* Iste est sensus, *Si descenderit Saul, & hic te invenient, tradent.*

12. Multo minus probabilis est aliorum responsio dicentium, ita dictum fuisse à Deo, non quia id certo eventurum erat, si David non fugisset, sed quia huiusmodi erat dispositio, & voluntatum inclinatio; quod quidem novum non est, nam etiam Ezechiae dictum fuit Isaia 38. *Morieris*, & Jonæ 1. *Ninive subvertetur*; Sicut contingit in omnibus aliis prophetis comminatoriis; est inquam multo minus probabilis hæc responsio, quæ quantum ad aliquid eadem est cum superius rejecta; etenim sine aliquo fundamento dicitur, talem tunc fuisse voluntatum inclinationem, poterant enim Ceilæ cives nec quidquam de tradendo David cogitare, & tamen postea ex voluntate sua id cogitare, & facere. Hoc igitur supponamus, ut suppo-

ni potest, & fingamus, tunc Cives illos animum non habuisse propensum ad tradendum David, & istum fugam non arripuisse, tunc fieri potuisset, ut veniente Saule illi pro arbitrio & voluntate sua mutarent propositum, & David traderent, hoc enim non erat contra illam revelationem; at nonne tunc jure merito David de Domino conqueri potuisset, tanquam si ab ipso fuisset deceptus? Quod vero spectat ad prophetias comminatorias, tacita conditio semper subintelligitur, & ex aliis revelationibus earum veritas fieri potest comperta. In prædictione igitur mortis Ezechiae fuit conditio, *nisi aliud à Deo impetraveris*. Quæ conditio includitur in promissione Dei, quod exaudiet orantes quando, & quomodo fuerit conveniens, in illa vero Niniviticæ subversionis fuit conditio, *nisi penitentiam egerint* innixa promissione facta à Deo poenitentibus, juxta illud Jeremiæ cap. 18. *Si penitentiam egerit gens illa à malo suo, agam & ego penitentiam super malo, quod cogitaveram, ut facerem ei.* Et revera hoc Ninivite intellexerunt, qui idcirco dixere; *Quis scit, si convertatur, & ignoscat Deus.* Sed quidquid dicamus, nunquam cognitio certa eventuum sub conditione futurorum poterit Deo negari, nam quæcumque sit illa conditio, semper eveniet, sicut cognoscit Deus.

13. Secundum Argumentum desumitur ex illo Matt. 11. *Ve tibi Corozain, & tibi Bethsaida, quia si in Tyro, & Sydone factæ essent virtutes, quæ factæ sunt in vobis, olim in cilicio, & cinere penitentiam egissent*, ex quibus verbis manifestum sit, contineri in ea propositione quemdam futurum effectum sub conditione, qui effectus non fuit, quia non fuit adimpleta conditio; Id autem dictum fuit cum veritate, alioquin Christo falsitas fuisset tribuenda, ergo id etiam fuit certo cognitum à Christo, ergo & à Deo.

14. Non me latet, etiam huic Scripturæ textui non deesse responsum; Hæc

Hæc autem reduci potest ad duo, Primum est, ibi Christum non fuisse loquutum prophetice, & ex certa scientia, idest, non assertive, sed figuratè ad arguendam Judæorum perfidiam & infidelitatem, qui modus satis communis est etiam apud nos, cum loquimur unum alteri comparando, ut cum dicere solemus ad fidelium delicta increpanda; Hæc non agerent infideles & barbari. Videtur autem hoc in re nostra contigisse, cum in textu habeatur, Christum ita fuisse loquutum ad exprobrandos Judæos. Secundum est, ibi Christum, etsi assertive loquutum, non tamen id dixisse ex certa scientia, & infallibiliter, sed solum per quasdam conjecturas habitas ex talium hominum dispositione, atque ibi tantum declaratum fuit, Tyrios, & Sydonios esse minus indispotos ad credendum, quàm essent Judæi, idcirco à Christo fuerunt increpati, & Tyrii, & Sydonii minus puniendi sunt, non quia credituri essent, meritum enim sub conditione nullum sibi vindicat præmium, sed quia non erant ita male in Christum affecti, sicut Judæi.

15. Subtiles profecto expositiones, sed rei nostræ parum accommodata, cum neque necessariae sint, neque Patrum interpretationi traditionique consentaneæ. Ubicumque enim Patres allatum textum examinant, docent, non solum à Christo fuisse Judæos exprobratos, sed Christum assertive & ex certa scientia, non solum dispositionis Tyriorum ad credendum, & poenitentiam agendam, sed ipsius fidei & poenitentia. Hoc præsertim invenio apud S. Augustinum. Primo quidem de bono perseveran. cap. 9. contra Senipelagianos dicentes homines judicari secundum opera tantum sub conditione prævisa, & nunquam futura, hæc habet. *Nec damnarentur Tyrus & Sydon, quamvis remissius quam illæ Civitates, in quibus non credentibus à Domino Christo mirabilia sunt facta, quoniam si apud illas facta essent, in cinere & cilicio poenitentiam egissent, sicut*

*se habent eloquia veritatis, in quibus verbis Dominus Jesus altius nobis Mysteriorum prædestinationis ostendit. Ex his quis non inferet, non fuisse illam loquutionem solum figuratam & ad exaggerandum, nam appellatur eloquium veritatis? Non fuisse solum ex conjecturis, sed ex certa scientia, cum in ea prædestinationis mysterium ostendatur? Prædestinatio certe ex solis conjecturis haberi non potest. Secundo Idem Sanctus Doctor in exchyrid. cap. 95. ait. Tunc, idest in die judicii, non latebit, cur apud quosdam non facta sint virtutes, quæ si facta fuissent, egissent illi homines poenitentiam, & facta sunt apud alios, qui non fuerant credituri, apertissime namque Dominus dicit, va tibi &c.*

16. Hanc conditionatorum scientiam ubicumque professus est præclarissimus Doctor, cujus plurima testimonia congeri possent. Unum tantummodo eligam, est autem illud, quod habet de correptione & gratia cap. 8. ubi inquit de pluribus, qui bene viventes non moriuntur, antequam peccent, alii vero moriuntur, ne vivendo peccent; & respondet. *Respondeant si possunt, cur illos Deus, cum fideliter & pie viverent, non tunc de vita hujus periculis rapuit ne malitia mutaret intellectum eorum, & ne scilicet deciperet animas eorum; Utrum hoc in potestate non habuit? An eorum mala futura nescivit? Nempe nihil horum, nisi perversissime & insanissime dicitur.* Constat autem hic de futuris conditionatis sermonem haberi, quia loquitur Augustinus de illa scientia, qua supposita posset Deus, si vellet, rapere hominem antequam mala committeret, sicut fecit cum illo, de quo Sapientia 4. legitur: *Raptus est, ne malitia mutaret intellectum ejus.* Ex alia parte si supponeretur scientia absoluta futurorum, locum non haberet mors præcedens talia peccata, quia supponitur prævisa, vita usque ad illud tempus.

17. Hoc idem docuerunt alii Sancti Patres. Querit S. Joan. Chrysof. lib. 1. ad

ad Stagirium, quare Deus statim post peccatum Paradiso expulerit, & responderet. *Primum hominem à principio à Paradiso expulit, quia ex honore sibi præstato deterior effectus esset, si post pretium violatumque mandatum immotus ille stabilisque durasset.* Gregorius vero Nissenus orat. de infantibus morte immatura sublatis hæc habet. *Verisimile est eum, qui id quod futurum est eque atque præteritum agnovit, progressum vitæ infantis ad perfectionem prohibere, ne quod vi præscia malum animadvertsum est in eo, qui ita victurus fuisset, perficiatur.* Quibus textibus nihil certè clarius afferri potest ad probandum id quod intendimus. Hoc unum addam, plura à Sanctis Patribus inquiri, quæ frustra inquirentur, nisi certam conditionatorum scientiam in Deo præsupponerent. Huiusmodi sunt. Quare creaverit hominem, quem sciebat peccaturum, quare Saulen in Regem elegerit, quem noverat suam gratiam contempturum, quare, magis ascendo, condiderit Angelos, quorum plures noverat defecturos, nunquam tamen respondent, negando Dei scientiam, sed confugiunt vel ad liberum creaturarum arbitrium, vel ad imperferutabilem Dei providentiam profundumque consilium, neque vero in hisce rebus respondere poterant, ut respondent adversantes Theologi, nimirum, hoc novisse in hominis primi, Angelorumque dispositione & inclinatione, nam tunc nulla in homine, nulla in Angelo erat dispositio & inclinatio mala.

18. Si ratio naturalis in hac re quaeritur, hæc exhiberi potest, vel ex quo maxime deceat intellectus Divini perfectionem res sub conditione affirmatas certissimè cognoscere; Si enim etiam homines & Angeli plura conditionata pertingunt juxta conjecturas & causarum dispositiones, quanto magis Deus juxta plenariam certitudinem? Vel ex quo in nobis ipsis experiamur, quod si de re aliqua sub conditione interrogemur, v. g. Si N. petet hanc gratiam à Francisco

Xaverio, obtinebit ne? respondemus: *Deus scit*, quod non fieret, si hominum communis existimatio non esset, omnia etiam sub conditione futura à Deo certissimè cognosci.

## §. III.

*Refelluntur Argumenta contra præcedens assertum.*

19. **O**ppones primo. Scripturas illas, in quibus, dum agitur de futuris sub conditione, reperitur particula *forfan*, quæ indicat in cognoscente dubitationem. Sic Jerem. habetur. *Noli subtrahere verbum, si forte audias, & convertatur.* Et Joan. 4. Samaritanæ dixit Christus: *Si scires donum Dei, & quis est, qui dicit tibi, da mihi bibere, tu forsan petisses ab eo, & dedisset tibi aquam vivam.* Sunt igitur saltem aliqua futura conditionata, quæ certo non cognoscuntur à Deo.

Respondet huic argumento Sanctus Augustinus tract. 37. in Joan. super illa verba: *Si me sciretis, forsan & Patrem meum sciretis*, ubi inquit. *Ille, qui omnia scit, cum dicit forsan, non dubitat, sed increpat, dubitationis verbum est, cum ab homine dicitur ideo dubitante quia nesciente, quando vero dicitur à Deo, cum Deum nihil lateat, illa dubitatione arguitur infidelitas, non opinatur Divinitas.* Coeterum particula *forfan* idem significare potest quod particula *utique*. Unde alio in loco dicitur: *Si cognovissetis me, utique & Patrem meum cognovissetis*. Multiplici autem ratione, servata semper perfecta scientia in Deo, tali particula utitur Scriptura; Primo, ut significet, rei eventum nobis semper incertum esse, non Deo; ita S. Augustinus super illa verba ps. 2. *Nequando irascatur Dominus*, inquit. *Cum dubitatione positum est, non secundum visionem prophetiæ cui certum est, sed secundum eos ipsos, qui monentur.* Secundo ut indicet, certitudinem Divinæ scientiæ



tia de futuris, nostram non adimere libertatem. Ita S. Hieron. in cap. 26. Jerem. dicens. *Verbum ambiguum forst-  
tan majestati Domini non potest convenire, sed nostro loquitur affectu, ut liberum homini servetur arbitrium, ne ex præscientia ejus quasi ex necessitate vel facere quid, vel non facere cogatur.*

20. Oppones secundo Sanctos Patres. Occurrit primo S. Augustinus, qui lib. 1. de anima & ejus origine cap. 12. inquit: *Ipsa exinanitur omnino præscientia, si quod præscitur non erit, quomodo enim recte dicitur præsciri futurum, quod futurum non est?* In lib. de prædestin. Sancti. cap. 14. exponens illud Sapient. 4. *Raptus est ne malitia &c. ait: Dictum est secundum pericula vite hujus, non secundum præscientiam Dei, qui hoc novit quod erat futurum, non quod futurum non erat, id est, quod ei mortem immaturam fuerat largiturus, ut tentationum subtraheretur incertitudo, non quod peccaturus esset qui mansurus in tentatione non esset.* Similia sensit S. Prosper in epist. ad Augustinum, in qua referens Semipelagianorum errorem hæc habet. *Sed in tantum commentitiis meritis electionem Dei subjiunt, ut quia præterita non extant, futura, quæ non sunt futura, consignant, novoque apud illos absurditatis genere & non agenda præscita sint, & præscita non acta sint.* Idem docent Fulgent. lib. 1. de verit. prædestinat. cap. 7. & Damascen. contra Manich. cap. ultimo.

21. Resp. Sanctum Augustinum nunquam docuisse contraria, quod plane contingeret, si res ita esset, sicut opponitur. Negavit igitur præscientiam absolutam illorum futurorum, non negavit præscientiam conditionatam, & secundum istam etiam hujus vite pericula, quæ mutassent intellectum illius, qui raptus est, si raptus non fuisset, agnovit, alioquin non esset, cur præmatura mors singularis gratia & beneficium diceretur. Hoc ostendo. Quodcumque hujus vite periculum sit, homo indifferens est,

Tom. II.

ut mutetur, vel ut perseveret, ut peccet, vel ut sanctior fiat, ergo si mortis illius immaturitas esset solum sub præscientia periculi, incertum esset, an gratia dicenda foret, vel non gratia. In hoc sensu intellige omnes alios Sanctos Patres.

22. Verum hic adnotandum est, Sanctos Augustinum & Prosperum rem pertractasse contra Pelagianos, ac Semipelagianos, qui scientia Dei conditionata abutebantur. Inter enim alios eorum errores unus erat, quod dicerent, bonum vel malum usum gratiæ à Deo prævisum causam esse, propter quam gratiam concederet Deus, vel negaret, quod absurdissimum esse ostendit Augustinus exemplo Tyriorum, qui etsi credituri essent, si vidissent signa, & virtutes, attamen nec viderunt neque crediderunt; alius erat, gratiam Baptismatis aliquibus parvulis conferri propter merita ipsorum prævisa, si vixissent, & propter hæc æternam consequi beatitudinem, aliquibus vero non concedi propter mala ipsorum opera pariter prævisa, & propter hæc perpetuo damnari. Hos igitur errores refellunt Augustinus & Prosper, atque hæc merita vel demerita esse commentitia & omnino conficta decernunt. De hac re habetur clarissimum testimonium S. Augustini ep. 194. ad Sixtum, ubi leguntur hæc verba. *In eis, quos hinc aufert, prævidet quemadmodum victurus esset quisque, si viveret, & ideo quem novit nequiter fuisse victurum, sine Baptismo facit emori, sic in eo puniens opera mala, non quæ fecit, sed quæ facturus erat.* Hoc ipse negat, & ideo negat in Deo præscientiam illam, quæ conferret ad meritum vel demeritum, & quæ est præscientia absoluta habens respectum ad opera procul dubio facienda proinde meritoria vel demeritoria, non vero præscientiam secundum quid & conditionatam, atque ideo negat abusum præscientiæ Dei conditionatæ, non ipsam præscientiam. Prudentis autem viri non est, negare aliquid, quod

N

aliun-



aliunde est verum, ut inde negetur aliquid, quod ex illo male intellecto sequitur, & est falsum; alioquin sequeretur, negandam esse gratiam efficacem, quia Calvinistæ dicunt, per illam adimi hominis libertatem, negari unitatem personæ in Christo, quia ex illa inferebant Eutichiani unitatem naturæ, & sic de reliquis.

23. Opp. 3. Non potest ex Scripturis & Patribus colligi scientia conditionata in Deo, quamvis in Scripturis & Patribus Deum hanc cognitionem habere invenitur; ergo. Prob. antec. Quamvis in Scripturis & Patribus habeatur, Deum aliquando uti discursu & vocali annuntiatione, non tamen est in Deo discursus aut mentalis compositio correspondens enuntiationi vocali, ergo similiter quamvis ex Scripturis &c. ratio videtur utrobique eadem, nam sicut discursus & mentalis compositio sine imperfectione nec concipi nec esse possunt, ita nequit concipi vel esse absque imperfectione scientia conditionata. Hoc ultimum declaratur, quia scientia illa sine imperfectione esse non potest, quæ dependet à conditione ponenda à creatura, sed huiusmodi est scientia conditionata, etenim Deus non posset discernere se daturum suum concursum, nec quidquam eligere nisi dependenter à concursu causæ secundæ, immo remanente suspensa conditione ex parte creaturæ remaneret suspensa ipsa Divina cognitio.

24. Resp. negando paritatem, & jam discrimen allatum est in argumentis; ad impugnationem ne. ant. ad prob. ne. mi. dependet quidem objectum à tali conditione, non dependet tamen cognitio, ideo suspensum remaneret objectum cognitionis, non ista. Ad prob. aliud est dicere dependenter à cognitione concursus causæ secundæ & aliud est dicere, dependenter à causâ secundâ. Hoc secundum est falsum, nam etiam si prævideatur consensus & concursus causæ secundæ non per hoc determinatur

Deus ad dandum concursum suum, neque hic movet Deum ad concurrendum & se determinandum, sed semper agit prout ipsi placet. Primum est verum, dummodo tamen *ly dependenter* se teneat ex parte cognitionis Divinæ ad quam spectat res omnes scire tam absolute & præcisâ quacumque circumstantia, quam conditionatè & in qualibet circumstantia & occasione. Videmus hoc evenire etiam in qualibet humana Republica, quæ prudenter se non gereret, nisi etiam quid decernendum sciret, si aliqua circumstantia & conditio contingeret. Hoc igitur magis dicendum de Deo, qui omnia prudentissimè decernit & scit, ideo etiam conditionata scit.

#### §. IV.

*In quo medio Deus futura cognoscat.*

25. **A**mplissimam illam æquè ac acerrimam quæstionem resolvendam suscipimus, quæ tot dissidiis locum aperuit inter Patres prædeterminantes & familiæ Dominicanæ professores, necnon inter Mediastas & Patres Societatis. Quæ usque modo dicta sunt, ferme ab omnibus Theologis præsertim recentioribus conceduntur, Deumque omnia cognoscere etiam sub conditione proposita non refragantur, sed quo in medio Deus illa cognoscat tota lis exorta est. Utinam omnes conticuissent, atque in hac re non investigandi ingenium, sed ignorandi versassent obsequium, nihil utraque Schola gloriæ sibi debitæ perdidisset, nec parum sibi tribui existimare deberet, quod olim de se ipso falsus est ille ingeniorum maximus Augustinus, Verba illius excipite in ps. 49. *Non audeamus dicere quomodo novit Deus; Ne forte hoc à me fratres expelletis, ut explicem vobis quomodo cognoscat Deus. Hoc solum dico, non sic cognoscit ut homo, non sic cognoscit ut Angelus, at quomodo cognoscit dicere non audeo, quoniam &* *scire*

*scire non possum.* Verum plus sapere, quam oportet sapere, quidam voluerunt, atque ad hoc suas cogitationes & consilia perduxerunt, ut in quo medio Deus futura cognoscat indagare sint ausi. Illis parcat Deus, si peccaverint, nos vero iniquitatem eorum portamus, atque, quid ex iis, quæ ipsi protulerint, magis eligendum sit in præsentiarum est statuendum.

26. Contendunt Patres prædeterminantes, posito quod Deus cognoscat omnia futura conditionata, præsertim libera, de quibus sermo noster instituitur, non cognoscere in se ipsis ante, omne decretum præcedens usum libertatis nostræ, sed in aliquo Divino decreto, quod statuunt absolutum subjective & ex parte actus Divini, conditionatum vero ex parte objecti; Quod ut clarius explicem, do exemplum. Si v. g. Deus ita dicat; Statuo, quod si virtutes & signa fiant in Tyro, Tyrii convertantur, jam decretum est absolutum subjective, & actu est in Deo, est tamen conditionatum ex parte objecti, quia nunquam suum effectum obtinebit, nisi virtutes & signa fiant in Tyro, & quia non fuerunt facta, Tyrii non sunt conversi, quamvis conversi fuissent, si fuissent facta; Sunt vero decreta conditionata tum ex parte actus & subjective, tum ex parte objecti v. g. si Deus dicat. Si in Tyro fierent signa, & virtutes, & ego decernerem ipsorum conversionem, Tyrii converterentur, in quo casu decreta, non sunt actu in Deo, sed includuntur in ipso objecto tanquam pars ejusdem. Hoc secundum asserunt Patres Societatis & reliqui scientiæ mediæ propugnatores, de qua scientia infra. Hujusce difficultatis resolutio plura postulat examinanda, quod ut clarius fiat, singillatim omnia puncta sunt declaranda. Primum in systemate prædeterminantium est, hujusmodi decreta esse antecedentia prævisionem usus voluntatis creatæ. Secundum est, esse absoluta ex parte actus, conditionata ex parte objecti.

Tom. II.

Tertium est, non ideo futura cognosci à Deo, quia sunt futura, sed ideo esse futura, quia cognoscuntur à Deo, & ideo scientiam visionis esse causam rerum, ex quibus omnibus sequitur, esse excludendam scientiam mediam. Quare de re.

§. V.

*Utrum Deus videat futura libera in decretis antecedentibus.*

27. Quod audis decretum antecedens, intelligas in sensu Thomistarum illud esse, quod nullam præsupponit prævisionem consensus vel disensus voluntatis creatæ, sed quod ipsam præmoveret ac determinat ad consensum habendum, si de actionibus bonis sermo contingat; Si vero de actionibus malis loquamur, inquit, hoc decretum esse quidem antecedens, sed mere permissivum; siquidem in actione mala duo distinguuntur, & id quod ad actionem pertinet, & id, quod ad malitiam; ad actionem Deus positive se habet, atque ideo habet decretum, antecedens ad ipsam præmovens ac determinans, ad malitiam verò tantum permissive, atque ideo habet decretum antecedens, sed merè permissivum. Hæc est communis Thomistarum Doctrina, quamvis etiam inter ipsos maxima lis versetur, ut testatur Pater Ledesma quæ. unica de auxiliis art. 18. & revera Gonzalez de Albeda Ordinis Prædicatorum disp. 59. in 1. par. S. Th. sect. 2. rejicit Didacum Alvarez ejusdem Ordinis docentem lib. 3. de auxiliis disp. 24. Deum prædefinire quod est actionis in peccato, & contendit, hoc nunquam fuisse juxta mentem S. Th. Contra Thomistas nostrorum temporum.

28. Dicendum. Deum non cognoscere futura libera in decretis antecedentibus.

Prob. Circa futura libera nullum datur decretum antecedens, ergo in hoc

Deus non cognoscit talia futura. Probant. debet servari libertas creata, sed si darentur decreta antecedentia, adeoque praevoventia, circa futura libera non servaretur libertas creata, ergo, Prob. mi. Quando aliquid consequens necessario sequitur ex aliquo antecedente, quod non est in operantis potestate, etiam consequens non est in potestate illius, proinde non servatur operantis libertas, sed si darentur decreta antecedentia circa futura libera, hæc sequerentur necessario ex aliquo antecedente, quod non est in potestate hominis operantis, ergo, Mi. ostenditur, nec enim hæc decreta possunt fieri vel non fieri a creata libertate, cum hanc omnino præcedant, nec ab ipsa libertate possunt impediri ne fiant, aut ne impleantur postquam facta sunt; ergo. Major propositio primo explicatur exemplo, nam si supponamus, aliquem se libere non applicare igni sed ab alio, neque ipsi liberum erit se calefacere, sed necessario calefiet; Quare hoc? quia calefactio est aliquid consequens necessario calefactionem, & ideo, quia libera non fuit approximatior, etiam libera non est calefactio, ergo à pari si creatura ab hoc decreto antecedenti præmoveatur, & applicetur ad agendum, liberè profecto non aget. Secundo desumitur ex doctrina S. Anselmi, & Augustini. Primus enim in lib. de concord. cap. 1., & in lib. *Cur Deus homo* cap. 18. duplicem distinguit necessitatem, unam, quæ est causa rei, & est antecedens, aliam, cuius est causa res, & est consequens, illam negat componi posse cum libertate, hanc vero concedit, & experientia compertum est, cum enim sedeo, necessario sedeo, & tamen liberè sedeo, quia, antequam sederem, non sedendi potestas erat. Secundus vero 5. de Civit. cap. 10. duplicem etiam distinguens necessitatem, unam, quæ est in nostra voluntate, alteram, quæ antecedit voluntatem, priorem, inquit, libertatem non adimere, posteriorem verò nequaquam,

sed hoc esset admissis decretis antecedentibus, ergo,

29. Tanti ponderis hæc ratio à nobis adducta existimanda est, ut Lessius de grat. cap. 3. num. 11. dixerit, si hæc non convincit, ingenue se fateri, libertatis nostræ negotium omnibus aliis mysteriis obscurius esse, & libertatem nostram aut explicari non posse, aut consistere in solo nomine libertatis, Eam etiam multi faciunt adversantes Thomistæ, atque ut respondeant varia excogitarunt; Piget quidem singula exponere, expedit tamen, ne aliquid irresolutum omittatur, & quacumque ex parte rem nostram defendamus.

30. Primo dicunt. Necessitatem, ex suppositione antecedente adimere libertatem, quando provenit ab aliqua causa Secunda, non quando à causa prima, & Sanctos Doctores de illa loqui non de ista, Deus enim plus continet voluntates hominum, quam ipsi suas, ut frequenter tradit Augustinus, ergo sicut si humana voluntas se ipsam determinat, illa remanet libertas, ita si determinatur à Deo; & ratio est, quia decretum Dei antecedens aptatur rerum naturis, ita ut necessarias necessario applicet ad agendum, liberas libere.

31. Hoc primum adversariorum effugium, quod assertit Alvarez disput. 22. & 25. de auxiliis, quemque plures alii sequuntur, plura involuit, ideo singula reiicienda. Verum esse argumentum de causa secunda non de causa prima, in consulto dicitur, cum rectè non solvatur argumentum à Calvinisticis viribus totis expositum, idest, liberum arbitrium vel esse rem de solo titulo, vel titulum sine re, non enim alia ratione necessarios asserunt actus nostros, nisi quia proveniunt ex decreto & præscientia Divina, actus nostros antecedente. Vide Calvinum lib. 3. instit. cap. 23. Si autem vera est responsio dicta, respondemus per id, quod est in questione inter nos & hæreticos, & est manifesta petitio principii; Illud vero dictum S. Augustini ita,

est intelligendum, ut Deus contineat voluntates hominum, ut eas possit quando voluerit & ubi voluerit de malis in bonas convertere, sed modo à nobis dicendo, ubi de gratiæ efficacia; Caterum; Cum principium liberum intrinsece agat, debet etiam ab intrinseco determinari, quod non fieret, si à Deo physice & antecedenter determinaretur. Ratio vero postrema in pluribus deficit; Primo quia destruit unam ex doctrinis Thomisticis, de qua statim. Secundo quia in hoc est punctum difficultatis, quomodo Decretum Dei antecedens possit præmovere & applicare causas liberas ad liberè agendum. Tertio quia videtur manifesta repugnantia in terminis; posito enim decreto antecedenti v. g. castitiæ meæ lectionis, duo sunt attendenda. Unum, Deum velle efficaciter meam lectionem, qua data efficacia non potest non esse mea lectio, sicut ego voluntati Dei efficaci resistere non possum. Alterum est, Deum simul velle meam lectionem liberè futuram, idest à me habente potestatem proximam & indifferentem ad oppositum illi, quod Deus efficaciter decrevit, quod manifestissimè repugnat, sicut repugnat, me habere potestatem proximam ad legendum, & non legendum, ergo decretum illud antecedens repugnat in terminis, si velimus creatam libertatem, ut debemus servare. Quare ne mihi dicant; Deum fortiter suaviterque omnia disponere, ut legitur Sap. 8. Hoc etenim verum est, sed propter hoc est falsum, disponere per decreta antecedentia, quæ non sunt libertati suavia, sed libertatis destructiva.

32. Secundo dicunt, ex nostra ratione probari, actus nostræ voluntatis esse solummodo necessarios ex suppositione, necessitate consequentiæ & infallibilitatis, quæ libertatem non destruit, non vero necessarios absolute; quod aliis terminis explicant alii, esse necessarias in sensu composito cum tali prædeterminatione facta per decretum antecedens, non vero in sensu diviso.

33. Responsum hanc in postremo sensu expositam nunquam intellexi, adeo rudis Minervæ fui; nec unquam Thomistæ explicarunt nisi explanatione re explicata obscuriore; Sed si hoc velint; ergo existente hujusmodi prædeterminatione & decreto antecedente, voluntas non erit libera, Divisio illius distinctionis in sensu composito & diviso ortum habuit ex suppositione, quæ esset in nostra potestate, & sic dum sedeo necessario sedeo, quia omne quod est, quando est, necesse est esse, & tamen libere sedeo, quia suppositio, qua sedeo, erat in potestate mea sedendi vel non sedendi, quare in nostro casu locum non habet, quia decretum, quod supponitur non est in mea potestate. Præterea, etiam admissa tali distinctione voluntas creata neque in sensu diviso à decreto antecedente potest oppositum, etenim per adversarios hoc decretum est unum ex prærequisitis ad complendam causam in actu primo proximo, ergo facta præcissione à decreto voluntas non potest suum actum proferre, ergo non est libera nec in sensu composito, nec in sensu diviso. Tertio. Responsio hæc opponitur Doctrinæ juxta sensum Thomistarum superius expositæ, nam si decretum antecedens aptatur rerum naturis, ut causis liberis non tantum tribuat operari, sed etiam modum liberè operandi, etiam sensus compositus cum tali decreto libertatem non auferet. Responsum vero expositam in priori sensu approbare non possum, nec valet nisi ad conscientias magis magisque vexandas. Anselmus & Augustinus à nobis citati aliam non noverunt suppositionem libertatem nostram non destruentem, nisi illam, quæ nostræ libertatis usum consequitur, quod quidem negari non potest; hujusmodi autem non est suppositio orta ex decreto antecedente, ergo.

34. Tertio respondent alii, decretum antecedens nostram libertatem adimere, si hoc sit naturaliter determinans, & à causa inferiore, non ita si des-



terminatio & suppositio sit libera, ut contingit in re nostra, etenim pro eodem instante, quo Deus decrevit alteram partem futuri contingentis, potuit oppositum decernere; & quemadmodum determinatio habita à causâ necessaria necessitatem imponit, ita habita à causâ libera libertatem infert, præsertim quod licet suppositio antecedens non sit in potestate nostræ voluntatis, est tamen effectus inde sequuturus, quod manifestè est in beatis, qui licet non habeant in potestate sua suppositionem antecedentem visionis beatæ, nihilominus non amittunt libertatem juxta Scotistarum principia.

35. Hæc etiam responsio argumento nostro non satisfacit; per hoc enim, servatur quidem libertas in causâ primâ determinante, quæ potuit decernere, vel non decernere, ita vel non ita, non tamen servatur in causâ secundâ determinatâ, in qua est formalis libertas & contingentia. Parum vero interest, causam determinantem esse causam primam & superiorem, nisi causam secundam & inferiorem ita regat, & administret, ut illam motus suos agere sinat modo sibi consentaneo, ex quo solum infertur, eas libere administrare, non vero quia illas quomodocumque determinat, vel prædeterminat adinstar causæ primæ & superioris. Et profecto, sicut maximum est discrimen inter causam liberam & necessariam, inter operationem liberam & necessariam, ita etiam ex parte causæ primæ diversus est modus concurrendi cum causâ libera, & causâ necessaria, & si diversus est modus concurrendi, diversus etiam est modus decernendi concursum, quod tamen juxta responsionem adductam servari non potest, nam etiam effectus necessarii ita à Deo decernuntur futuri, ut tamen illos potuisset non decernere, alioquin quantum ad istos fuisset etiam necessitas in Divina voluntate. Neque sufficit, causam necessariam determinari à Deo antecedenter & intrinsecè, libe-

ram vero antecedenter quidem, sed extrinsecè; hoc enim transmittit; sed satis est ad auferendam proximam libertatem & istius usum, quamvis non auferat remotam, ut vera fatetur Scotus in 4. dis. 49. qu. 6. At in voluntate creata non solum admitti debet saltem in pluribus propriis actibus remota, sed etiam proxima, ergo. Per hoc patet ad ultimum. Mediis tamen negat antecedens, quod etiam per Thomistam est falsum, unde contra ipsum fieri potest argumentum.

36. Quarto tandem respondent, cum hisce decretis antecedentibus remanere indifferentiam judicii, & intellectum reprehendere voluntati objectum eligibile indifferenter & libere. Sed hoc plane libertati servandæ non sufficit, nam libertas formalis non est judicii indifferentia sed ipsius facultatis volitivæ, quæ positis omnibus prærequisitis ad agendum possit agere, vel non agere, ita vel non ita; & si oppositum diceretur, nulla esset libertas intrinseca in voluntate, sed solum capacitas recipiendæ libertatis ipsi ab intellectu proponente derivatæ; sed de hac re satis dixi in Philosophicis meis Quæstionibus, ubi de creaturæ libertate pertractavi. Hoc unum addo, quod si verum esset, per indifferentiam judicii servari libertatem, jam inter Catholicos & Hæreticos nulla esset in hac re disputatio, nam etiam Hæretici cum Divinæ gratiæ & providentiæ efficacia judicii indifferentiam non negant, sed libertatem negant, quia, inquirunt, Divinæ gratiæ & providentiæ voluntatem creatam non posse resistere; Contra quos Concilium Trident. definit, adhuc liberos esse actus voluntatis, quia propter indifferentiam propriam potest voluntas Divinæ gratiæ resistere ac dissentiri, ergo.

37. Ex his rejecta sunt, quæ contra nos opponi posse videbantur. Addi fortasse possent sequentia. Primo. Christi passionem fuisse efficacem & antecedenter à Deo decretam, & tamen liberam fuisse Christo, *oblatus enim est, quia ipse*.



*voluit*. Secundo. Divinam providentiam esse rerum omnium causam, per consequens omnia antecedere, & tamen cum ipsa componitur humana libertas; Ita se habet etiam Divina prædestinatio, ex qua oritur necessitas ex suppositione antecedente. Ergo. Verum negatur primum assumptum, & dicimus, necessitatem passionis Christi fuisse tantum consequentem, alioquin non fuisset libera propter rationes à nobis adductas; Quod si legitur Luc. 24. *Oportebat Christum pati ut implerentur Scriptura*, quæ de ipso antecedenter erant. Hoc probat prioritatem temporis, non causalitatis, de qua tamen est quæstio nostra. Ad secundum; aliquando Divina providentia res omnes antecedit, aliquando sequitur; Si ipsa sit sola causa immediata alicujus effectus, tunc antecedit, si vero sit causa alicujus una simul cum causa secunda, tunc sequitur; ex quo habes, Deo prævolente homines esse liberos; quia libertas hominum est à solo Deo, qui hominem condidit liberum, Deo autem prævolente homines libere non operarentur, quia operatio hominis non est à solo Deo, sed etiam ab homine. Quantum vero ad Divinam prædestinationem; in ipsa plura sunt distinguenda. Primo præparatio gratiæ ab æterno, & collatio ejusdem in tempore. Secundo liber consensus creaturæ ipsam recipiendi, & actiones meritorias. Licet pro nunc permittamus facere suppositionem antecedentem quantum ad primum, negamus tamen quantum ad secundum.

## §. VI.

*In quo medio videat Deus futura libera conditionata.*

38. **P**remitto, conditionem, sub qua res futura prænotificatur, aliquando pendere à causis naturalibus & necessariis juxta ordinem naturæ, qualis fuit prædictio mortis Ezechiae: *Dispone domui tuæ, quia morieris tu*. Aliquando

pendere à causis liberis, qualis est conversio Tyriorum, quæ tum à libera Dei voluntate patrandi miracula & gratiam largiendi, tum ab ipsorum consensu dependebat. De his tantum inquiritur, & quidem de conditione nunquam ponenda, nam si poneretur, futurum conditionatum transiret in absolutum, & tunc quæstio esset quæ fuit de futuris absolutis jam resoluta.

39. Hac in re contendunt omnes prædeterminantes, duobus modis considerari posse decretum conditionatum; primo subjektivè & ex parte actus; secundo objectivè & ex parte objecti. Tunc est conditionatum subjektivè, quando habetur velleitas quædam tam circa objectum, quam circa voluntatem efficacem de objecto, si conditio poneretur. V.g. si quis diceret, *vellem nubere, si Sacerdoti liceret*, hoc enim pacto non significatur actualis voluntas nubendi, sed illam habendam fore, si hoc fieret licitum. Tunc est conditionatum ex parte objecti, cum ex parte volentis est voluntas efficax & positiva, attamen non habetur effectus, nisi ponatur conditio. V.g. si quis diceret: *Volo eleemosynam largiri illi pauperi, si cras domum meam veniet*.

40. Afferunt Thomistæ circa futura libera conditionata esse decretum Divinum absolutum subjektivè & ex parte actus, conditionatum vero ex parte objecti, arbitantes velleitatem illam Deum prorsus deducere, nec sine imperfectione concipi posse, quod quidem verum esset, si decretum conditionatum deberet ita explicari; sed Doctores contrarii decretum illud sic exponunt, ut sit pars illius conditionis, sub qua res futura esset, si fieret vera conditio. V.g. Tyrii salvi facti fuissent, si Deus voluisset illis Evangelium prædicari, & suam gratiam largiri, decretum hoc conditionatum, *si voluisset* est pars conditionis, sub qua Tyrii fuissent conversi. His ita explicatis.

41. Dico. Deum non cognoscere futu-

futura libera conditionata in decretis subjective absolutis, & conditionatis ex parte objecti.

Pro quo adverte, me non negare, dari posse hujusmodi decreta ex una parte absoluta, ex alia conditionata, & revera pluries in Scripturis Sanctis inveniuntur, ut quando dicitur Reg. 9. *Si ambulaveris coram me, sicut ambulavit Pater in simplicitate &c.* Ponam regnum tuum super Iſrael in ſempiternum, & Mat. 26. *An putas, quia non poſſum rogare Patrem meum, & exhibebit mihi modo pluſquam duodecim legiones Angelorum.* Rurſus nulla eſt repugnantia in hiſce decretis, nam ſicuti fieri poſſunt decreta omnino gratioſa ex parte actus, ut in aliorum Sententia eſt decretum prædeſtinationis in intentione, non vero gratioſa in executione & ex parte gloriæ & objecti ita &c. & ſi Deus per actum ſimplicem poteſt cognoscere, & revera cognoscit, objecta compoſita, poteſt etiam quod conditionatum eſt actu abſoluto decernere; Sed quaſtio noſtra verſatur tantum circa actus liberos procedentes à voluntate creata libere operante; & circa iſtos hujusmodi decreta negamus.

42. Pluribus autem rationibus id ſuadere contendimus, atque in primis occurret illud quod de Tyro dictum fuit, ubi redarguuntur Corozaitæ, quia viſis tot ſignis & virtutibus converſi non ſint, cum tamen fuiſſent converſæ aliæ duæ Civitates, etenim ſi in hiſce rebus daretur decretum abſolutum ex parte actus, conditionatum ex parte objecti, injuſta fuiſſet hæc redargutio, ut dicam ſuo loco. Sed omiſſis omnibus aliis.

Prob. Primo. Ex pluribus inconvenientibus, quæ ſequerentur, admiſſis hujusmodi decretis abſolutis ex parte Dei, & actus. Primum eſt; Hæc decreta eſſe omnino otioſa & illuſoria, eſſent enim de aliquo futuro ſub conditione, quæ tota dependet à voluntate Divina, & quam Deus ſtatuifſet non ponere; v. g. in exemplo adducto de Tyro,

prædicatione Evangelii cum ſignis & virtutibus tota debendebat à Dei beneplacito, qui tamen decreverat non mittere Prædicatores, nec operari ſigna & virtutes. At quis non videt hoc eſſe nugari & irridere? Nonne quiſ illudere & nugari cenſendus eſſet, ſi diceret; Si Petrus craftina me ſalutabit in via, dabo ei decem nummos, & poſtea decerneret efficaciter, ſe domi manere? Secundum eſt; Hæc decreta eſſe contradictoria, atque inter ſe pugnancia v. g. Si veniſſet Saul, traditus fuiſſet David in manu ejus, & poſtea ſtatuifſet, ne Saul veniret; Hæc enim duo, volo, ut David tradatur, ſi veniat Saul, nolo tamen ut veniat Saul, plane inter ſe opponi videntur. Tertio hujusmodi decreta vel ſunt efficacia, vel inefficacia, non primum, quia nullum habent effectum; Si ſecundum, in illis effectum futurum Deus videre non poteſt, cum decretum inefficax nullam connexionem habeat cum illo effectu, qui nunquam futurus erit.

43. Neque dicas, eſſe efficax ex parte ſui, ex parte autem objecti ſub conditione affirmati eſſe inefficax, cum Deus velit talem effectum, ſi adimpleatur conditio; etenim, ut ſupra dictum fuit, in hoc eſt repugnantia & illuſio. Ridiculum enim eſt, aliquid efficaciter nolle, ut impleatur conditio. Quod ſi urgeas, hujusmodi conditionem eſſe adimplendam à creatura, cum qua paratus eſt Deus ad concurrendum; in primis hujusmodi reſponſio non valet de omnibus conditionibus, cum aliquæ adimpleri poſſint ſolummodo à Deo, ut dictum fuit; deinde non cohæret adverſariorum principiis, nam, ut adimpleatur conditio à creatura, non eſt ſufficiens concursus Dei paratus, ſed requiritur præmotio ſeu prædeterminatio ad illam adimplendam, & cum ex alia parte nolit Deus eam conditionem adimpleri, quia revera non adimpletur, haberet Deus duas voluntates contrarias, ſi haberet decretum efficax & abſolutum ex parte ſui, ut ſuperius dixi.

44. Neque dicas secundo; esse in Deo sinceram voluntatem salvandi omnes, quæ est absoluta ex parte Dei conditione se tenente ex parte objecti, quamvis omnes salvi non fiant, ergo esse potest decretum absolutum ex parte Dei, conditionatum ex parte objecti, quamvis conditio non adimpleatur; nam contra est, quod ultimo dicebatur, esse nimirum sinceram voluntatem antecedentem & quantum ad sufficientiam, non vero consequentem & efficacem; & ita etiam esse in Deo decretum conditionatum & inefficax, quod tamen futuris conditionis non præsupponatur, sed sit pars ipsius conditionis, ut dictum fuit ante conclusionem. Hoc autem decretum non est juxta Thomistarum doctrinam, nec per ipsos sufficiens medium in quo Deus futura conditionata cognoscat; Sed rursus dico, argumentum hoc non probare de omnibus conditionatis, quando conditio dependet à solo Deo, nam conditio posita in argumento sub voluntate salvandi omnes, si omnes salvari velint, potissimum pendet à voluntate creata, cujus est respicere, vel non respicere gratiam sibi collatam.

45. Assertum nostrum alia etiam ratione suadeo, nam utcumque decretum Divinum admittere teneamur, ut asseramus discrimen inter pure possibilia & futura, illud procul dubio sufficiet, quod correspondet conditioni, & naturæ rei, quæ futura dicitur, quare sicuti pro re futura absolute admittitur decretum absolutum, non tamen antecedens, ita pro re sub conditione futura sufficiet decretum conditionatum etiam ex parte Dei, quod sit veluti pars conditionis, sub qua res futura affirmatur, ergo non erit necesse admittamus decreta absoluta ex parte Dei; & ideo, castigatius loquendo, scientia conditionatorum non includit decretum conditionatum, sed decretum conditionatè, nam ipsum decretum est pars illius conditionis. Explico hoc. Quando Deus futuram

Tom. II.

Tyriorum sub conditione conversionem præcognovit, non dixit. *Volo, ut si fiant miracula & virtutes, Tyrii convertantur.* Nam, si noluit fieri, ad quid dicere: *Volo, ut si fiat &c.*? neque dixit, *vellem, ut si fierent miracula, converterentur.* Etenim hoc pacto esset admittere velleitatem, & suspensionem actus, quod agentis imperfecti est; sed dixit, *si vellem fieri miracula, & ipsis ea auxilia concedere, quæ concessi Corozaitis, converterentur,* ubi perspectum habes, decretum esse partem ipsius conditionis, sub qua Tyriorum conversio præcognita fuit. Ex qua ratione corruunt omnia Thomistarum argumenta, qui totis viribus contendunt, nihil esse futurum, nisi dependenter à decreto.

46. Quod tamen magis me movet ad hujusmodi decreta absoluta neganda tanquam necessarium medium ad cognoscenda futura conditionata, est, Deum cognoscere etiam peccata sub conditione futura, nec tamen erga hæc præcedere posse aliquod Divinum absolutum decretum, juxta id quod ait S. Augustinus de prædest. Sanct. 10. *Prædestinatio sine præscientia esse non potest, potest autem esse sine prædestinatione præscientia, prædestinatione quippe Deus præscivit, quæ fuerat ipse factururus, unde dictum est, fecit, quæ futura sunt, præscire autem potens est etiam, quæ ipse non facit, sicut quæcumque peccata.*

47. Trita jam est Thomistarum responsio; in peccato duo considerari. Unum esse res, seu materiale peccati, aliud vero malitia seu difformitas actionis; primum videri in decreto absoluto & prædestinante; secundum vero in decreto permissivo pariter antecedente, sed non prædestinante. Hæc tamen responsio corrui, satis esset nobis, dicere etiam ad rem, seu materiale peccati non esse decretum antecedens & prædestinans propter læsionem libertatis, sicut dictum fuit in antecedente. Sed liceat rem hanc ulterius magisque perpendere, cum in ea situm sit maximum adversantis

O

tis

tis sententiæ fundamentum. Atque hic omnia recolo, quæ dicunt prædeterminantes. Primum est, Deum nec velle nec intendere malitiam actionis, immo summopere ab ipsa abhorreere, proinde author peccati nequaquam est. Secundum, malitiam actionis non sequi ex ipsa actione physice & intrinsecè, sed solum logicè & illativè, idest non sequi ex actione, prout est ens, sed quia est à voluntate creata, cui tantum defectus actionis tribui debet, sicut contingit in motu claudicationis, qui licet sit ab anima movente tibiam, tamen quidquid motus est tribuitur animæ, quidquid vero claudicationis tribuitur tibie, Tertio. Concurrit Deus simultanee ad materiale peccati, nec tamen concurrit ad formale juxta communem Theologorum, nostramque sententiam, ergo etiam præmovere potest ad primum, quin tamen præmoveat ad secundum, & sicuti concurrendo ad materiale tantum permissive concurrit ad formale, ita præmovendo ad illud, tantum permittit istud, cum non niinus sit author peccati qui ad peccatum concurrit, quam qui ad peccandum præmovet.

48. Hæc omnia à nobis tamquam magni momenti refellenda sunt. Quod primo loco dicebatur, verum est, sed ex sententia opposita foret necessario admittendum, Deum velle & intendere malitiam actionis. Semelhac enim vult & intendit aliquam actionem, vult etiam & intendit quod necessario ipsi actioni connexum, immo identicum est, atqui malitia actionis necessario est connexa, immo identica ipsi actioni, ergo. Neque satis est, dicant, malitiam hanc sequi indirectè; Siquidem hoc dato quot homines à peccati malitia excusari possent? Ipsi Hæretici, Calvinus nempe & Lutherus, quos tanquam facientes Deum authorem peccati damnavit Ecclesia, non senserunt, Deum velle malitiam, sed solum actum positivum. Quid inquit Calvin. lib. 1. instit. cap. 18. ? Ecce illius verba; *Videmus, ut Deus perfidiam vo-*

*lendo, defectionem tamen alio sine jussu velit.* Ibi autem loquitur de defectione tanquam de actu positivo, quo populus à familia David recessit; & tamen Ecclesiæ consensu Calvinus Deum facit authorem peccati, ergo ad hoc asserendum satis est, si Deus velit, & intendat actionem, cui necessario est annexa malitia, dicamus ergo neque ad materiale ipsum præmovere, alioquin etiam præmovebit ad formale, neque enim hic agimus de præcisione aliqua objectiva, quæ si Deum excusaret à peccato, excusaret etiam creaturam, quæ ita præscindere potest; Ex hoc concedit quod secundo loco dicebatur, & si non vis sequi ex illa actione physice & intrinsecè malitiam, saltem sequetur moraliter, quod satis est in rebus moralibus, ut sunt peccata, quorum malitia tribui debet, cui tribuitur actio, quæ esset à voluntate creata, quidem, sed à Deo mota, & applicata sicut ad se, ita ad malitiam sine qua nec esse, nec à Deo præsciri potest. Exemplum autem illud, & si quæ similia sunt, rei præsentis aptari non potest, etenim, illud est in materia physica, in qua actio & defectus causæ instrumentalis non tribuitur causæ principali, quæ per illud instrumentum agit, ut patet in pictore & pennicillo; ideo in casu claudicationis tribuitur tibie, non animæ moventi tibiam, at nos sumus in materia morali, in qua defectus tribuitur causæ moventi, immo juxta à nobis probata impellenti; Et licet si Deus suaderet, vel imperaret hunc actum, suaderet etiam ac imperaret malitiam actus, ita, immo à fortiori, si ad illud actum præmoveret, plus enim est ad actum præmovere prædeterminare, quam suadere, & imperare, ut patet in actibus bonis. Neque obstat, Deum præmovere tantum ut causam physicam, non moralem, ergo solum ipsi tribuendum esse quod physicum est in actu, non quod morale; etenim præmoveret quidem ut causa physica, nec esset causa moralis illius actus, hunc tamen causaret volens, suum concurr-



cursum determinans & prædeterminantem præbens, quod satis est, ut ipsi malitia imputaretur. Ad 3. diversimode loquendum est de Deo concurrente cum creatura, & de Deo creaturam prædeterminante, nam in primo casu posito pacto cum creatura cum ipsa concurrendi, quotiescumque ipsa agere voluerit, Deus ad concurrendum determinatur à creatura, unde conqueritur Isaia 43. *Servire me fecistis in peccatis vestris.* At in secundo Deus prædeterminaret creaturam, intentivè, & non solum permisivè vellet illum actum, ideo dum sermo est de concursu, malitia non tribuitur Deo præbenti concursum indifferentem, deberet tamen tribui, dum sermo est de physica præmotione. Quo pacto autem determinetur concursus Dei à creatura, dixi in libris physicorum, ubi & adduxi pro hac re doctrinam S. Th. qui qu. 1. de potent. art. 3. ad 3. inquit: *Influentiam causæ primæ per proximas causas determinari.* 3. contra gen. cap. 66. *Agentia secunda esse quasi particularizantia & determinantia primum agens.* Et de malo quæst. de causâ peccati art. 2. in corp. *Attendendum est, quod motus primi moventis non recipitur uniformiter in omnibus mobilibus, sed in unoquoque secundum proprium motum.* Hinc est, plura signa rationis posse in eternitate distinguui. In primo decernit Deus, se datum concursum suum, quem creatura voluerit; in 2. prævidet creaturam se potius determinaturam ad actum amoris, inde fit ante prævisionem determinationis concursum esse indifferentem, post prævisionem vero esse determinatum, determinatione creaturæ se habente ut conditione, sub qua prævisâ Deus se determinat ad ita cum creatura concurrendum.

49. Ex hac doctrina facile eliduntur argumenta illa, quibus adeo fidunt Thomistæ, nimirum causam primam determinari à causa secunda. Causam primam non habere perfectum dominium. Etenim in primis iste Dei concursus est

Tom. II.

tantum necessarius ex suppositione, qua Deus velit creaturam operari, quæ suppositio est omnino libera Deo. Secundo per determinationem creaturæ non determinatur Deus propriè, alioquin Deus deberet semper concurrere, quotiescumque Deus prævidet determinationem futuram creaturæ, si Deus daret concursum suum, quod tamen non evenit, ut constat in exemplo Tyrionum, sed solum prævisio determinationis creaturæ in priori ad dandum concursum est modus necessarius ex parte Dei omnia cognoscentis, & necessarius ex motivo servandi libertatem in creatura, cujus Deus Dominus est, & quam posset destruere, sed ex suppositione, qua velit illam conservare, debet ita concurrere, sicut ex suppositione, qua velit cum creatura agere, debet immediate agere, & tamen libere agit, & tanquam verus Dominus agit, de qua re iterum dicendum occurret.

50. Quod vero dicitur de illo decreto permisivivo, ad quod prædeterminantes confugiant, etiam à nobis satis superius dictum fuerit, prorsus fictitium esse videtur. Etenim, vel hoc decretum permisivum supponit saltem Decretum prædeterminans quo ad materiale peccati, vel non supponit; Si affirmatur, ut revera affirmari in opposita sententia debet, non video, quo pacto Deus non sit causa peccati, ut supra demonstratum fuit; Et rursus ad quid confert huiusmodi Decretum, cum posito priore Decreto prædeterminante, Deus certo cognoscat peccatum futurum tanquam necessario connexum cum materiale peccati? Impediat Deus, si potest, malitiam peccati ex illo non sequi. Si vero negetur, jam physica prædeterminationis fundamentum nullum est.

51. Sed inquires. Si Decretum hoc non est absolutum. & in priori ad prævisam determinationem creaturæ, erit ergo pro illo priori indifferens, sicut est ipse concursus, non poterit ergo in illo cognoscere futura conditionata, quia

O 2

quod



quod indifferens est non magis respicit futuritionem, quam non futuritionem. Verum respondeo; Decretum hoc & concursus quid indifferens esse in semetipsis, attamen, ut subsunt cognitioni Divinæ & ipsi Deo, qui in essentia sua omnia repræsentat futura tanquam præsentia, quive eminenter continet omnem perfectionem suorum Decretorum, & omnem determinationem creaturæ voluntatis, quam super comprehendit, esse quid determinatum, quia etsi pro illo signo indifferentia sint, tamen pro signo quo erit tum Decretum tum voluntatis determinatio, sunt determinata, & sic etiam cognoscere in Decreto, in concursu, in creatæ voluntate, in se ipsis futura. Qua in re statuenda ipsi Mediiistæ satis divisi sunt, etenim Molina & Becanus volunt, Deum ea cognoscere in causis secundis & in super comprehensiva humani arbitrii libertatis cognitione. Suarez & Fonseca in Decreto ut futuro pro sequenti signo. Alii tandem in veritate objectiva rerum, quam defendunt habere ante omne decretum, & independentem ab illo. Mihi vero satis est, si non cognoscat in decreto absoluto ex parte actus conditionato ex parte objecti, præsertim antecedente, sicut probavi. Admitto itaque cum Suarez in 1. p. de gratia prolegom. 2. cap. 4. si loquamur de operibus malis, nullum decretum antecedens positivum admitti posse, neque decretum, quod sit pars ejusdem conditionis, nisi permissivum offerens generalem concursus, in quo solo non potest cognosci malum futurum, nisi cognoscatur determinatio voluntatis ut præsens objectivè vel absolute, vel sub conditione; Si vero loquamur de operibus bonis, quamvis non possit antecedere decretum præmovens, ne libertas auferatur, attamen præsupposita scientia conditionata potest decretum absolutum præsupponi absolute præscientiæ futurorum; cum hoc, utpote de objecto hono Divinæ sanctitati non repugnet, & cum præsupponat usum li-

bertatis prævisum, libertati non opponatur. Ex his omnibus solvuntur, arbitrato meo, omnia, quæ per plures dies apud auctores objecta vidi, quæve hic non propono, quia si id fieret, prolixior sine fructu essem.

## ARTICULUS VII.

*Utrum ideo cognoscatur futurum, quia est futurum, vel ideo sit futurum, quia cognoscatur.*

52. **I**N hoc puncto præcipuum est prædeterminantium fundamentum; nam cum per ipsos quælibet res sit futura propter decretum antecedens & præmovens, & quælibet in hoc decreto contineatur, inquirunt, non ideo rem aliquam cognosci à Deo, quia futura est, sed ideo futuram esse, quia à Deo cognoscitur, & videtur, atque ideo scientiam Dei esse causam futurorum. Antequam res resolvatur, tradenda est divisio scientiæ Dei, non in hoc sensu, ut sit in Deo multiplex scientia, hæc enim in ipso simplicissima est, sicut ipsius natura, sed propter diversa objecta, quæ ab ipsa respiciuntur, tanquam multiplex à Theologis consideratur.

53. Est igitur in Deo alia scientia necessaria, alia libera, illa antecedit quodcumque decretum in quocumque sensu, & dicitur etiam scientia naturalis, per quam Deus cognoscit se ipsum & creaturas mere possibiles, libera vero versatur circa res contingentes, idest creaturas vel existentes, vel aliquando futuras, & supponit liberum voluntatis Decretum.

Alia est scientia practica, alia speculativa; Hæc in sola objecti cognitione persistit nihil producendo, & ita videt Deus se ipsum & possibilia, altera vero res ipsas efficiendo cognoscit.

Alia est scientia approbationis, alia improbationis; Versatur illa circa eas res, quæ Deo placent, & ab ipso præcipiuntur; Hæc vero è contra, ut circa peccata.

Tandem alia est Scientia dicta simplicis intelligentiæ, & alia appellata, visionis. Illa habet pro objecto res mere possibiles præscindendo ab omni futuritione & existentia, atque antecedit quodcumque Decretum; Posterior vero habet pro objecto res existentes vel aliquando futuras, & supponit Decretum Dei absolutum, cum nihil vel existat, vel absolutè futurum sit, nisi dependenter à Dei voluntate.

Inter hanc utramque Scientiam, aliam reperiri mediam, infra declarabimus. Interim ad resolvendum dubium in titulo expositum deveniamus.

54. Pro quo tanquam certum in omnium sententia tenendum est, scientiam Dei esse causam rerum omnium directivam, quod satis manifestè ex Scripturis Sanctis evincitur proverb. enim 3. legitur. *Dominus sapientia fundavit terram, & stabilivit Cælos prudentia & ps. 103. Omnia in sapientia fecisti. Tum ps. 135. Qui fecit Cælos in intellectu.* Si inde hanc scientiæ addatur actus & Decretum Divinæ voluntatis, non solum scientia Dei est causa directiva, verum etiam effectiva; *operatur enim inquit Apostolus ad Ephes. 1. omnia secundum consilium voluntatis suæ.* Sed difficultas est, an huiusmodi scientia sit simplicis intelligentiæ, aut visionis. Primam esse contendit Mediistæ omnes. Secundam vero asserunt prædeterminantes si sermo sit de actu secundo. Ulro enim fatentur, scientiam simplicis intelligentiæ esse rerum omnium causam in actu primo, & rursus loquuntur de scientia visionis una simul cum Decreto absoluto, non præcisè si intuitiva est, sed ut est scientia approbationis, quod addunt, ne fateri cogantur, scientiam visionis in Deo esse causam peccatorum. Sed quidquid dicant.

55. Sentiendum. scientiam visionis non esse causam futurorum; Atque ideo futura non esse futura, quia videntur à Deo, sed ideo videri à Deo, quia antecedenter sunt futura.

Punctum hoc placet primo Sanctorum Patrum auctoritatibus suadere, ex quibus quam plurimis aliquos eligam, qui magis expresse in re nostra loquuti sunt. S. Hieronym. in illa verba Isaïæ. *Hoc verbum, quod loquutus est Dominus ad Moab. Inquit. Non quod præscientia Dei causam vastitatis attulerit, sed quod vastitas futura Dei majestati prænota sit.* Et in cap. 26. Jeremiæ. *Non ex eo, quod Deus scit futurum aliquid, idcirco futurum est, sed quia futurum est, Deus novit, quasi præscius futurorum.* Justin. qu. 58. ad Orthodox. ait. *Non est præscientia causa ejus, quod futurum est, sed id, quod futurum est, causa præscientiæ, siquidem non præscientiam sequitur futurum, sed futurum præscientia, & haud quaquam præscius causa est futuri.* Origen. in cap. 8. epist. ad Rom. hæc habet. *Non propterea erit aliquid, quia id scit Deus futurum, sed quia futurum est, scitur à Deo antequam fiat.* Euseb. lib. 6. de præparat. Evangelii cap. 11. *Ut liberè quod res est eloquamur, non Dei modo prænotio rerum causa non est, sed quod à communi sensu remotius quidem, sed verum tamen est, idipsam, quod futurum est, ejusmodi prænotionis est causa; Neque enim idcirco fit quod futurum esse cognoscatur, sed quod futurum sit idcirco futurum esse cognoscitur.* Clarissimè tandem S. Damascenus dialog. contra Manich. prope finem. *Deus ea, quæ à nobis voluntariè futura sunt, hoc est ea, quæ in nostra potestate sita sunt, nimirum virtutem & vitium præsciens &c. Sed ut ea, quæ facturi sumus, præsciat, hoc à nobis proficiscitur, nam si facturi non essemus; ne ipse quidem, quod futurum non esset, prænosceret, & quidem Dei præscientia vera, & inviolabilis est, verum haud quaquam ipsa causa est, cur omnino id fiat quod futurum est, quia potius quia hoc vel illud facturi sumus, idcirco prænoscit Deus.*

56. Mirabitur fortasse quipiam, inter tot Sanctos Patres Augustinum prætermisum esse; Non ideo hoc factum esse

esse arbitretur, quod præclarissimus Doctor huic nostræ non suffragetur sententiæ, sed quia tot habet testimonia, quibus, quod nostrum est, doceat, ut quæ elegerim ignorarem. Eum tamen producam; prob. tract. 53. in Joan. ubi de Judæorum infidelitate sermonem habens, inquit. *Deus præsciens futurorum per prophetam prædixit infidelitatem Judæorum, prædixit tamen, non fecit. Fecerunt ergo peccatum Judæi, quod eos non compulit facere cui peccatum non placet, sed facturos esse prædixit quem nihil latet; Et ideo, si non malum sed bonum facere voluissent, non prohiberentur, & hoc facturi præviderentur ab eo qui novit quid sit quisque facturus.* Idem habet lib. 3. de Civit. cap. 10. Idem lib. 3. de lib. arbit. cap. 2. usque ad 4. ubi disputat contra Evodium, qui cum Tullio capere non poterat, quo pacto Deus omnia futura cognosceret, & homines necessario non peccarent. Textum autem hunc præ cæteris afferre placet, cum magis clarum & accommodum sit. *Sicut, inquit, tu memoria tua non cogis facta esse, quæ præterierunt. Sic Deus præscientia sua non cogit faciendâ, quæ faciendæ sunt. Et sicut tu quedam, quæ fecisti, meministi, nec tamen quæ meministi, omnia fecisti, ita Deus omnia, quorum ipse est author, fecit, nec tamen omnium, quæ præfuit est author.* In hac auctoritate ostendo similitudinem, quæ bona non esset, si præscientia Dei esset causa rerum, & futurorum. Augustinus enim quantum ad hoc comparat præscientiam Dei scientiæ hominum in illis rebus, quas vident homines, & infert. Ex quo homo res aliquas sciat & videat, non est causa illarum rerum, ergo neque ex quo Deus sciat & videat futura, est causa futurorum; & hoc argumentum Augustini nullum esset, nisi intelligeretur juxta sententiam nostram, nam facillimè potuisset Evodius respondere; In hoc esse discrimen inter præscientiam Dei, & scientiam hominum, quod illa est causa rerum, ista non, ideo mirum non esse,

si illa auferat libertatem, non ista; Ut igitur ratio, & exemplum Augustini valeat, dici debet ex mente ejusdem fuisse, Divinam præscientiam non esse causam rerum, & futurorum. Accipe tandem verba Augustini lib. 4. Gen. ad lit. cap. 32. quæ sunt ista. *Neque enim cognitio fieri potest, nisi cognoscenda præcedant, quæ generatim dicta sunt sive de actibus bonis, sive de malis.*

57. Hoc ultimum addidi, quia adversantes Thomistæ respondent, Sanctos Patres loquutos esse de præscientia peccatorum, quæ certè non fiunt à Deo, sed ipsius scientiæ præsupponuntur, non ita de actibus bonis, quos nobiscum facit Deus juxta decretum & propositum suæ voluntatis. Verum, in primis, si attendantur adductæ auctoritates, saltem aliquas indiscriminatim loqui tam de actionibus bonis quam de malis, negari non potest, utuntur autem frequentius illo peccatorum exemplo, ut facilius intelligamus, Deum, qui non est author peccati, res futuras sua scientia non facere, sed supponere. Ratio autem est, quia, ut Sanctorum Patrum mens nobis explorata fiat, debemus inspicere, quodnam eorum fuerit institutum, & qui scopus, dum aliquid asseruerunt; contendebant profectò humanam libertatem cum Divina præscientia servare, quod non obtinuissent, si tantum de actionibus malis sermonem habuissent, nam statim respondissent illi, contra quos res agebatur, per præscientiam Dei saltem respectu bonorum operum auferri libertatem.

58. Præterea; Ut Sanctorum Patrum explicent dicta, inquit, scientiam visionis, ut præcisè visionis est, causam futurorum non esse, hujusmodi tamen esse, si sit una simul visionis & approbationis, prout habet adjunctum decretum Divinæ voluntatis, immo & imperium, quod admittendum esse, patet ex illo Gen. 1. *Dixitque Deus fiat lux; & inde additur. Viditque Deus lucem, quod esset bona.*

59. Neque hoc adversariorum sententia subsidium aliquod præstat, quia male confunditur scientia visionis cum scientia approbationis. Videt siquidem Deus etiam peccata futura, nec tamen illa approbat; Hæc igitur non spectat ad scientiam visionis, sed hæc fertur ex essentia sua in res vel existentes, vel futuras, præscindendo à voluntate Divina approbante, approbare autem vel improbare non ad scientiam & intellectum Dei, sed ad ejus voluntatem pertinet, cujus etiam est imperare; admittimus propterea ad futura requiri voluntatis imperium, sed hoc, dicimus ratione, præcedere scientiam visionis, quod quidem confirmari potest verbis ex Gen. adductis. *Dixitque Deus fiat lux.* Hoc ponitur tanquam præcedens, & *vidit Deus lucem, quod esset bona.* Hoc ponitur tanquam consequens, ergo scientia visionis præsupponit jam rem esse futuram.

60. Ex dictis autem pluribus modis argumentari pro re nostra non prohibemur. Primo scientiam simplicis intelligentiæ actui Divinæ voluntatis conjunctam esse causam rerum, quod sic ostendo etiam juxta mentem S. Thom. 1. par. quest. 14. art. 8. in corp. hæc habet. *Sic scientia Dei se habet ad omnes res creatas, sicut scientia artificis se habet ad artificiatas.* Sicut ergo scientia artificis est principium, quo artifex operatur, sic scientia Dei est principium, quo Deus omnes res ad extra producit; Hic autem manifeste loquitur Sanctus Doctor de scientia simplicis intelligentiæ, quod colligitur ex iis, quæ ibi subduntur. Inquit enim; *Formam naturalem, in quantum est forma manens in eo, cui dat esse, non nominare principium actionis, sed secundum quod habet inclinationem ad effectum & similiter formam intelligibilibus non nominare principium actionis secundum quod est in intelligente, nisi ei adjungatur inclinatio ad effectum, quæ est per voluntatem.* Et post alia sic concludit. *Unde necesse est, quod sua scientia*

*fit causa rerum secundum quod habet voluntatem conjunctam.* Dans etiam rationem, *quia scientia illa est indifferens ad opposita, & ideo debet per voluntatem determinari.* Porro scientia hæc, quæ ita indifferens est, non est scientia visionis, quæ est determinata ad futura, & quæ non potest antecedere libera decreta Dei, per consequens actum Divinæ voluntatis, ut etiam ipsi Thomistæ fatentur & docent, ergo.

61. Hinc quod ipsi tam secure confugiant ad scientiam approbationis, dico, hanc ratione scientiam visionis præcedere, approbare enim spectat ad voluntatem Divinam, quæ scientia visionis posterior est in eo sensu, in quo dicitur causa rerum. Hoc dico, quia approbare conjungi potest tum scientiæ simplicis intelligentiæ, tum scientiæ visionis; Habet siquidem Deus scientiam approbationis de se ipso, quia complacet sibi videndo se, & tamen de se ipso non habet scientiam visionis eo modo qui hic sumitur, habet insuper scientiam approbationis de rebus à se factis, quia in illis pariter sibi complacet, sed non effectivè & operativè, sed solum affectivè & ad instar gaudii. At voluntas Divina, dum conjungitur scientiæ simplicis intelligentiæ volendo & decernendo quid factura sit ex iis, quæ ista prænovit, tunc approbat id, quod vult per decretum efficere, & hoc pacto est causa rerum; Quamobrem nos non negamus, scientiam approbationis esse causam rerum, sed negamus, hanc scientiam approbationis ad scientiam visionis pertinere.

62. Argumentor secundo. Illa scientia est causa rerum in actu secundo, quæ est earundem principium in actu primo, atqui scientia simplicis intelligentiæ etiam per Thomistas est causa rerum in actu primo, ergo hæc eadem est causa rerum in actu secundo. Prob. maj. quælibet res operatur per illam formam, per quam constituitur in actu primo ad operandum, ut patet inductione, nec aliquid ultra requiritur, ut in actu secundo



do operetur, nisi ut applicetur per voluntatem & facultatem exequutivam, ergo. Colligitur hoc etiam ex Sancti Thomæ doctrina qui 1. p. qu. 14. art. 16. ad 1. inquit: *Scientiam Dei esse causam rerum, quorumdam quidem actu, aliorum autem virtute, scilicet eorum, quæ potest quidem facere, nec tamen unquam faciet*. Ergo eadem scientia quæ in actu primo, seu virtute est potens producere possibilia, in actu secundo est causa futurorum, & quarumcumque rerum, nec aliud discrimen est, nisi, quod circa, possibilia non est per voluntatis actum, determinata, è contra circa futura, sed scientia, quæ est circa possibilia est scientia simplicis intelligentiæ, ergo. Scientia itaque visionis fertur quidem in res futuras & existentes, illas tamen non facit, sed præsupponit.

63. Plura sunt, quæ opponi possunt contra prædicta; & primo ex Sanctorum Patrum momentis. Celebres sunt in hac re Sancti Augustini, & Sancti Gregorii sententiæ. Primus siquidem 6. de Trinit. cap. 10. hæc expressè scribit: *Creaturas, non quia sunt, novit Deus, sed ideo sunt, quia novit*. Et 5. de Civit. cap. 9. loquens de creaturis, inquit: *Quidquid valent, & quidquid facturæ sunt, certissimè valent & facturæ sunt, quia valituras atque facturas ille presciuit, cujus prescientia falli non potest*. Præterea lib. 13. confels. cap. ultimo asserens discrimen inter scientiam hominum & Dei, ait: *Nos ista, quæ fecisti, videmus quia sunt; Tu autem quia vides, ea sunt, & nos foris videmus, quia sunt, & intus, quia bona sunt; Tu autem ibi vidisti facta, ubi vidisti facienda*. Secundus vero lib. 20. Moral. cap. 23. apud alios cap. 32. *Quæcumque sunt, non ab æternitate ideo videntur, quia sunt, sed ideo sunt, quia videntur*, & lib. 32. cap. 5. *Non existentia videndo creat, existentia videndo continet, quidquid ergo Creator non videt, essentia subsistendi caret*.

64. Resp. textus istos etiam ab adversariis explicandos esse, cum oppo-

nantur textibus à nobis adductis, & in ipsis sermo sit de scientia visionis, ut visionis est, quæ tamen neque per ipsos est causa futurorum. Sed revera laudati Doctores nostræ sententiæ contrarium non docent; etenim primo explicari possunt & debent non de scientia visionis, ut visionis est, sed de scientia simplicis intelligentiæ & naturali, quæ necessario supponitur, ut Deus creet, & velit, nec enim aut velle aut creare potest, quin prius sciat quid velit & creet, & hanc dicit Augustinus esse causam rerum, utique directivam, & in actu primo, esse postea in actu secundo adjuncto actu voluntatis, ibi autem loqui Doctorem de hac naturali scientia colligitur ex eo, quod ibi loquatur de Verbo Divino, per quod facta sunt omnia. Secundo, cum dicunt Patres, res ideo esse, quia videntur à Deo, non asserunt hoc in sensu causali, sed illativo, id est, videntur à Deo, ergo sunt, quod est verum, cum scientia Divina falli non possit. Tandem hoc verum esse de præsentia & existentia objectiva, non de physica & reali.

65. Ob. 2. Illa scientia est causa rerum, quæ non est speculativa, sed practica, atqui scientia simplicis intelligentiæ est speculativa, scientia visionis est practica, ergo non illa, sed ista est causa rerum. Præterea. Nulla scientia, antecedens liberam Divinæ voluntatis determinationem est causa rerum, sed scientia simplicis intelligentiæ antecedit liberam Divinæ voluntatis determinationem, ergo. Maj. declaratur, alioquin aliqua res esset, antequam à Deo determinaretur, ut esset, min. constat, quia scientia simplicis intelligentiæ in Deo est necessaria, & ideo debet intelligi ante id, quod liberum est Deo, ex quo novum argumentum conficitur, etenim sicut res productæ potuerunt non esse, ita causa rerum potuit non esse, sed scientia simplicis intelligentiæ non potuit non esse in Deo, potuit tamen non esse scientia visionis, quæ idcirco libera



appellatur, ergo. Rursus. Si futurum non esset à scientia visionis, tanquam à sui causâ, scientia visionis causaretur à futuro, sed hoc dici non potest, alioquin scientia Divina causaretur à rebus, & aliquid temporaneum ac creatum esset causâ aterni & increati, ergo. Tandem. Scientia simplicis intelligentiæ reprehensentat tantum res possibiles, non autem futuras, vel existentes, tum scientia, quæ est causâ rerum, debet reprehensentare rei existentiam & futuritionem, alioquin Deus ageret modo cæco, & ut nesciens id, quod produceret, ergo.

66. Resp. conc. maj. dis. mi. Scientia simplicis intelligentiæ est speculativa in actu primo conc. in actu secundo subdis. Si ipsi non addatur actus voluntatis per quam applicetur ad operandum, conc. adjuncto actu voluntatis ne. mi. & cons. Eodem modo ad secundum dicam, nullam scientiam antecedentem liberam Divinæ voluntatis determinationem esse causam rerum in actu secundo, sed talem fieri per ipsam, & ita scientiam simplicis intelligentiæ, ut potentem dirigere & operari, esse ante dictam determinationem & necessario in Deo, ut vero actu dirigentem & operantem sublequi & libere esse in Deo; Sicut libera est determinatio. Ad aliud; dico, futurum esse causam visionis in esse objectivo, non physico, hoc repugnat, non illud; etenim etiam scientia simplicis intelligentiæ possibilia cognoscit, quia sunt possibilia, non è contra. Ad ultimum, scientia simplicis intelligentiæ reprehensentat res possibiles, & etiam futuras atque existentes in actu primo & in virtute suæ causæ, cognoscit enim Deus, se posse tribuere actualem existentiam rei, & ideo cæco modo non agit, dum eam tribuit.

§. VIII.

*Quid sit, & an admittenda scientia media.*

67. **P**UNCTUM illud attingimus tandem, de quo adeo mentes animique exarserunt, ut per plures annos Romæ habitæ sint Congregationes. Primo. Sub Clemente VIII. ab anno 1598. usque ad an. 1605., deinde sub Paulo V. à die 20. Septembris anni 1605. usque ad diem 28. Augusti anni 1607. agentibus præcipue Patribus Vastida pro una parte, Lemos pro alia, quod negotium ita finem accepit, ut partibus dimissis & inter modestiæ religiosæ fines contineri jussis, nihil in hac re fuerit à Sancta Sede judicio definitivo stabilitum.

68. Est autem scientia media illa, quæ versatur circa conditionate futura, independens ab omni decreto antecedente & efficaci absoluto, ipsumque, præcedens, vocatur autem media, cum nec sit scientia simplicis intelligentiæ, nec sit scientia visionis, sed medium inter utramque sibi postulet locum, objectum enim illius nec est merè possibile, circa quam versatur scientia simplicis intelligentiæ, neque est absolute futurum, circa quod versatur scientia visionis, sed esset futurum, si poneretur conditio, sub qua affirmatur, ut patet in exemplo toties adducto Tyrriorum, qui conversi fuissent, si voluisset Deus facere signa, & virtutes, quæ factæ fuerunt apud Corozaitas. Sic autem mediat scientia ista, ut secundum quid cum scientia simplicis intelligentiæ conveniat & secundum quid cum scientia visionis; Cum illa, quia non dependet ab aliquo decreto libero absoluto actu existente, & idcirco non est scientia libera, sed naturalis, sicut est scientia visionis, cum alia, quia versatur circa res contingentes, quæ possunt esse, vel non esse, sicut versatur scientia visionis.

69. Huic scientiæ mediæ adeo inferos se exhibuerunt Patres Thomistæ, ut

ferme tanquam hæresim proscribendam esse, nec à Semipelagianor. errore distare existimaverint; Inde postea actum est, ut Thomistæ, Semipelagianos ac Jansenistas appellarent alios. Isti vero Thomistas dixerint Calvinianos, ac Lutheranos. Res male ex utraque parte acta est, cum nec primos Semipelagianos dicendos esse, statuerit Ecclesia, nec secundos Calvinianos; Ac proinde salvis fidei juribus utramque partem propugnari posse, nemo, qui pacato animo rem velit examinare, ibit inficias.

70. Si tamen Thomistæ plusquam par sit, velint in hac re vel mentem acueri, vel vocem calammumque attollere, tot celeberrimis viris notam inurent, quos universus Theologorum Cœtus dignos existimat veneratione, quosve Catholica Religio maximos experta est defensores, ita ut si numero pietate, ingenio velimus contendere, quo possint ipsi gloriari non videam, viderem potius, quod valde laudare deberent; Omnes Doctores Societatis, cum pro re sua potissimum agatur, præteribo; Aliquos tantummodo ex Scholis aliis recensere. Occurrunt Nominalium Principes. Marsil. in 1. qu. 4. Ocham. dis. 38. qu. 1. Gabr. qu. 1. art. 2. Gregor. qu. 2. art. 2. Occurrunt Driedo in concor. 1. p. cap. 4. ad 3. Ruard. art. 7. Waldens. in doctrin. fid. cap. 23. Sot. lib. 3. Summul. cap. 8. sect. 3. Ægid. in 1. dis. 40. qu. 2. art. 2. Occurrunt Alexand. Pefant. 1. p. qu. 14. art. 13. Lorca 1. 2. tom. 1. disp. 4. de art. human. Curiel. in lib. controvers. super illa verba Sap. 4. *raptus estne malitia &c.* Illi quidem primarii Theologiæ in Compluten. iste vero in Salmanticensi. Universitate. Occurrunt tandem Stapleton. in antid. Evangel. in 11. caput Matth. Alphons. Mendoz. quodlibet 7. Corduba lib. 1. suarum quæst. qu. 55. dub. 10. Lessius, Ledesma &c. Non est igitur tam floci facienda sententia illa, quæ scientiam mediam defendit quam tot patronis fulcitam esse non ignoramus; Immo si mentem doctrinamque

Sancti Thomæ maturius perpendere vellemus, neque ipsum contrarium docuisse non difficili negotio ostenderemus; quod quidem à Patre Suarez jam factum esse, & novimus, & legimus. Hanc tandem admiserunt in statu naturæ innocentis Doctores illi, qui Augustiniani appellari volunt, quamvis pro statu naturæ lapsæ ipsam reiciant.

71. Est autem in scientiæ mediæ sistematè hic ordo statuendus. Primo. Deus per scientiam simplicis intelligentiæ omnes rerum status, quos potuisset velle, cognoscit. Secundo. Inter omnes status illos, eum elegit, in quo homines & Angelos ad finem supernaturalem evexit. Tertio. Lapsum hominum & Angelorum prævidit & permisit. Quarto. Homines, non Angelos reparare decrevit, ideo Christum Redemptorem voluit & omnibus hominibus contulit quædam gratiæ sufficientis auxilia, quibus æternam salutem consequi possent, si vellent. Quinto. Per scientiam conditionatam videt omnia, quæ facturus est, vel esset homo, si in talibus circumstantiis collocaretur, & talia auxilia præberentur. Tertio. Inter multa gratiæ auxilia, quibus homo consensurus, vel disensurus prævidetur, ea absoluto suo decreto misericorditer conferre, quibus re ipsa homo est consensurus, vel iustissimo quidem, sed occultissimo iudicio suo negare decrevit, quodve decretum non antecedit, sed sequitur scientiam conditionatorum, aut est pars conditionis. Quare in actibus liberis nihil à Deo absolute decernitur, nisi prius scientia conditionata præcesserit.

72. E' contrario systema prædeterminantium est hoc. Primo. Per scientiam simplicis intelligentiæ cognoscit Deus quicquid potest, v. g. innumeros rerum ordines decernere, & innumera salutis obtinendæ media, idest cuiuscumque generis & conditionis auxilia, quorum efficaciam in sua tantummodo omnipotentissima voluntate reprehendat. Secundo. Voluntate generali

& an-

& antecedente volens omnium hominum salutem, auxilia sufficientia. quibus eam sibi comparare possint, subministrat. Tertio. Decreto suo absoluto statuit talibus hominibus gratiam ab inferno efficacem concedere, talibus vero denegare, & hinc est, alios absoluto & efficaci decreto ad gloriam & gratiam ex se efficacem prædestinare, alios vero saltem negativè reprobare. Quarto. Advenit scientia visionis, qua Deus videt quidquid revera facturus est, aut facturus esset, si aliqua adimpleretur conditio; quod si conditio minime adimpleatur, futurum hoc non ad scientiam visionis, sed simplicis intelligentiæ spectare contenditur. Qua propter, ut ad summam redigatur, quod docent, volunt, rectitudinem Divinæ scientiæ ex Divinis decretis antecedentibus accipiendam esse. Systema hoc à nobis rejectum esse illos non latet, qui nostra legerunt.

73. De reliquo, quod attinet ad censuras circa scientiam mediam accuratius aequifque rem perpenderunt duo ex recentioribus Thomistis. Unus est Natalis ab Alexandro 5. Hist. Ecclesiast. cap. 3. art. 8. ubi differens de Semipelagianorum erroribus, ait: *Cavendum tamen, ne quibusdam Theologis, qui scientiam quamdam mediam propugnant, Semipelagianismi erroris nota inuratur, quod imprudenter & temere novi quidam authores fecerunt, vel Semipelagianismi erroris ignari, vel studio partium in transversum acti &c.* Alius est Hyacinthus Serræ, qui in libro, qui inscribitur, Schola Thomistica vindicata, pag. 8. hæc habet. *Nullam, quod jus attinet, censuris illis inesse vim, iis adstringi neminem, nullique fas esse invalidos illas Pelagianismi notas inurere.*

74. Hinc rejicimus historiam illam, quam quidam Scriptor ex Ordine Prædicatorum sub ficto nomine Abbatis de Blanc edidit Lovanii circa Congregationes de auxiliis, ubi demonstrare contendit, Librum de Concordia Ludovici

Tom. II.

Molinæ, statim hac prodiit, variis censuris fuisse perstrictum; atque etiam Romanam, quam jam Clem. VIII. pronuntiaturus erat, nisi ex improvviso fuisset morte præventus, quamve Paulus V. jam in sua Bulla paraverat, sed variis politicis rationibus adductus ad aliud distulit tempus (Vide non tam Medietas, quam Pontificem Optimum Maximum hoc scribendi modo vulnerari). Contra quam historiam alia edita fuit Antwerpæ an. 1705. inscripta: *Contraversiarum de auxiliis*. In qua prior edita an. 1700. tanquam falsa redarguitur & confutatur. Sed nobis satis est, asserere decretum Innocen. X. emissum an. 1654. die 23. Aprilis, cujus verba sunt ista. *Cum tam Romæ, quam alibi circumferantur quedam asserta acta manuscripta, & forsitan typis excussa, Congregationum habitantium coram felic. record. Clem. VIII. & Paulo V. super questione de auxiliis Divinæ gratiæ, tam sub nomine Francisci Pegnæ olim Rotæ Romanæ Decani, quam Fratris Thomæ de Lemos Ordinis Prædicatorum, aliorumque Theologorum, & Prælatorum, qui, ut asseritur, prædictis interfuerunt Congregationibus, nec non quodam Autographum seu exemplar assertæ Constitutionis Pauli V. super definitione prædictæ questionis de auxiliis, ac damnationis sententiæ, seu sententiarum Ludovici Molinæ Societatis Jesu, eadem Sanctitas Sua presenti hoc Decreto declarat, ac decernit, prædictis actis assertis tam pro sententiæ Ordinis Sancti Dominici, quam Ludovici Molinæ aliorumque Societatis Jesu Religiosorum, & Autographo seu exemplari prædictæ assertæ Constitutionis Pauli V. nullam omnino esse fidem adhibendam, neque ab alterutra parte, seu à quocunque alio allegari posse, seu debere, sed super questione prædicta observanda esse decreta Pauli V. & Urbani VIII.*

75. Porro decretum Pauli V. sub anno 1611. die prima Decembris Urbani VIII. ann. 1625. die 22. Maii; & postremo Innoc. XII. ann. 1694. die 26.

Januarii, & 6. Februarii statutum habuit; ne Theologi, dum de Divinis auxiliis disputationem habent, aliqua erroris vel censuræ nota se afficiant, sed, prout Christiana modestia præcipit, ea in opinionibus suis tuendis libertate utantur, quam Ecclesia concedit: Est autem ut supra.

76. His animadversis. Admittendam esse scientiam hanc mediam, præsciendando modo ab alia sententia Scotistarum admittentium decreta concomitantia, per hoc nimirum, quod quidquid Deus determinat, determinet cum voluntate creata sibi objectivè præfenti, de qua re nullam questionem instituere placet, cum ipsi Scotistæ divisi sint in hujusmodi decretis admittendis, & plures ex ipsis nostram hanc scientiam mediam amplectantur, tanquam certum, probatum jam superest; Etenim, si debet admitti scientia, per quam Deus videat futura libera conditionata, quæ neque sit simplicis intelligentiæ, neque visionis, hæc erit scientia media, sed admitti debet scientia, per quam Deus videt futura libera conditionata, quæ non est simplicis intelligentiæ, ut omnes concedunt; neque visionis, ergo. Prob. minoris secunda pars, scientia visionis supponit decreta antecedentia, absoluta, & deberet esse causa futurorum, sed utrumque falsum esse, probatum est; ergo. Illud igitur à nobis tantum præstari debet, ut adversariorum momenta rejiciamus. Ideo &c.

## ARTICULUS IX.

### *Refelluntur Argumenta contra scientiam mediam.*

77. **M**ultum in hac re nobis laborandum esset, nisi jam elaboratum in antecedentibus, & dicendum infra de gratiæ efficacia; præcipua enim prædeterminantium argumenta in eo vim faciunt, quo decreta antecedentia admittenda esse, & gratiam esse ab in-

trinfeco efficacem. Contra utrumque vel actum est, vel agetur. Quare ne eadem pluries repetamus, plurima omittemus, ea nimirum, quæ desumuntur vel à Scripturæ auctoritate, vel à Sancti Augustini testimoniis; ideo negotium hoc brevè perstringemus; opponendo tantum ea, quæ à ratione argumentantur.

78. Horum primum est; Deum esse causam primam, primum movens & universalissimum, ergo Deus debet determinare creaturam, non è contra; atque ut servetur ordo adeo in rebus necessariis, cum Deus & creatura concurrant ad actum liberum, prius secundum ordinem causalitatis debet concurrere Deus, quam creatura, atqui admissa, scientia media, hæc servari non possunt, ergo.

Secundum est. Debet in Deo esse perfectum dominium circa hominum voluntates, sed in systemate scientiæ mediæ non servaretur in Deo perfectum dominium circa hominum voluntates, ergo. Prob. mi. in systemate scientiæ mediæ non posset Deus uti hominum voluntatibus, quando, ubi, & quomodo voluerit, quia deberet expectare consensus illarum prævisionem, ergo.

Tertium est. Scientiam mediam, Divinæ omnipotentis virtutem adimere, nam primo Deus circa futuros eventus anceps maneret, nec quidquam posset, antequam per scientiam mediam exploraret, quid in illis circumstantiis, & cum illo auxilio factura esset humana voluntas, ex quo videretur, in Deo non esse talem potestatem & virtutem, qua hominum voluntates, quo ipse voluerit, inclinaret. Secundo; quia nihil posset Deus ex omnipotentis sue thesauris promittere, sed ex sola præscientia sua, quod tamen falsum esse constat ex promissione facta Abrahæ circa gentium conversionem.

Quartum. Scientia media non servat in Deo primi liberi dignitatem, quia non determinaret creaturam, quæ est



est secundum liberum, sed potius ab hoc determinaretur.

79. Resp. ad primum. Jam dictum fuit quo pacto Deus à creatura determinatur; Conc. ant. ne. conf. etenim creatura quantum ad exercitium debet se ipsam determinare, & sic agere, ut possit absolute non agere, aliter libera non esset. Hanc de re necesse est, ut quando Deus ipsi exhibet concursum suum in actu primo adagendum, illum sic exhibeat attemperatum, & consentaneum, ut sit in ejus potestate illo concursu uti, vel non uti, si velit; Neque hoc Divinam minuit dignitatem, cum Deus sibi ipsi legem hanc imposuerit ita concurrendi, cum creatura ista, agere voluerit; Non est igitur talis ordo in rebus statuendus, ut Deus prius natura & causalitate incipiat producere, actum creatæ voluntatis, sed omnino simul, alioquin creatura respectu illius actus, quem Deus prius natura in illa produceret esset causa merè passiva. Alium nos ordinem assignamus, & satis causam primam à secunda, distinguimus. Primo. Quia illa à nulla alia causa vim operandi accipit, nec ab alia illius vis conservatur. Secundo. Quia causa secunda nullo modo posset operari sine causæ primæ cooperatione, potest tamen causa prima se sola operari. Tertio. Quia concursus causæ primæ per se primo universalis est, concursus vero causæ secundæ particularis.

80. Ad secundum. Si velint adversarii tale in Deo dominium sibi fingere, ut in creatura libertas non maneat, profecto verum est quod nobis opponunt, sed si servare velint dominium Dei cum libertate creata, nihil Deo rerum omnium domino derogatur. Quo enim pacto scientia illa, quæ Deo reprehensat innumeros modos, quibus Deus uti potest ad nostras voluntates superandas quando, & ubi voluerit supremum Dei Dominum auferet? Quod vero expectare debeat consensus prævisionem, hoc non obstat, & audies infra de gratiæ efficacia.

Ad tertium. Falsum omnino est, Deum accipitem fieri circa futuros eventus, non enim Deus utitur scientia conditionatorum aut ex ignorantia aut ex infirmitate, sed ex suavissima providentiæ suæ lege, qua voluit, hominem ita liberum esse, ut possit cuicumque auxilio gratiæ resistere, si velit. At rogo, derogat ne divini omnipotentia, nullum in præsentis rerum ordine esse gratiæ genus, cui homo resistere non possit? non profecto, cum hoc sit dogma fidei; ergo neque derogat Divini omnipotentia aliquid absolute nolle, nec quidpiam facere, nisi prius prævisio voluntatis consensu. Hac in re ait S. Hieronym. in cap. 49. *Isaia; Potentiam suam nostro arbitrio derelinquit, ut iusti voluntas primum consequatur.*

Ex his patet ad alium, promissit enim Deus Abraham fidem gentium ex thesauris sapientiæ suæ sciens, quod promissit potens esset facere, quam potentiam scientia media non minuit, sed dirigit, Deo proponendo media quibus servata hominis libertate quod promissit adimpleat.

Ad quartum. Immo præmotio physica non servat in Deo dignitatem primi liberi. Probo. Ut servetur primum, liberum debet servari secundum & quidem in propria, non in aliena voluntate, quod dico contra eos, qui existimant satis nobis fuisse libertatem Adami, sed præmotio physica non servat secundum liberum in voluntate propria, ut à nobis probatum fuit, ergo. Quare admissa physica præmotione Deus esset unicum liberum, non primum. Est igitur per nos Deus primum liberum, sicut est prima causa, de qua jam dictum est supra.

81. Oh. secundo. Hæc scientia media à nobis admissa est ad dirigendum Deum in suis Decretis absolute, ita ut primo Deus noverit per scientiam mediani quid homo sit conditionate operaturus, quam quid operaturus absolute, sed non est admittenda in Deo ad



ad hunc finem, ergo. Prob. mi. Deus in suis decretis absolutis habendis satis dirigitur per scientiam simplicis intelligentiæ, liquidem per hanc Deus comprehendit suam omnipotentiam, & videt innumera auxilia gratiæ, quibus potest hominum voluntates, in quodcumque voluerit, inclinare, ergo.

82. Præterea. Si per scientiam mediam Deus dirigeretur in suis decretis absolutis circa hominum salutem, fieri posset, non repugnare ex natura rei esse aliquem hominem, quem Deus de potestate sua absoluta convertere non posset, sed hoc ex terminis absurdissimum est, & contra illud Augustini in Ench. cap. 95. ubi ait: *Quis tam impiè despiat, ut dicat, Deum malos hominum voluntates, quas voluerit, quando voluerit, ubi voluerit, in bonum non posse convertere?* Ergo. Prob. maj. Non repugnat ex natura rei hominem inveniri, qui in nulla circumstantia nulloque tempore velit converti, ex alia parte quæcumque auxilia ipsi conferantur non habent infallibilem, & essentialiorem connexionem cum conversione, ergo.

83. Resp. conc. maj. ne. mi. ad prob. conc. ant. ne. conf. Etenim per scientiam simplicis intelligentiæ cognoscit Deus omnia auxilia gratiæ, quibus homo consentire quidem potest, sed etiam dissentire, & per hanc solam cognitionem non potest Deus aliquid absolute decernere circa liberas hominum voluntates & actiones, nam cognoscit quidem quid fieri potest, non tamen quod futurum est; Necessaria est igitur alia scientia, per quam Deus videat quid futurum esset, si hæc vel illa conditio poneretur, & hæc non est simplicis intelligentiæ, sed media & conditionata.

84. Ad secundum. Suppositio facta in argumento est pure metaphysica, & loquendo moraliter impossibilis est; Sicut enim, metaphysice loquendo, non repugnat omnes homines in eandem, quo ad omnia convenire sententiam, repugnat tamen moraliter, ita, meta-

physice loquendo, non repugnat omnem hominem cuilibet gratiæ seorsim, accepta dissentiri, repugnat tamen moraliter omnibus auxiliis fore dissentium; & quodnam auxilium aptum esset, ut de nolente assentiri fieret volens, in omnipotentia videt Deus, qui volens Paulum convertere, illi dixit durum, est tibi contra stimulum calcitrare. Aliud exemplum sit in vitiatione omnium peccatorum venialium; quamvis enim nullum sit peccatum veniale, quod seorsim homo sine gratia specialissima vitare non possit, attamen in tota collectione aliquid est; ad quod vitandum non habet homo potestatem moralem, & requiritur gratia specialissima, ita licet homo prævideatur à Deo dissenturus huic vel alteri auxilio, & cuicumque seorsim accepto, prævidetur tamen assenturus, si aliquid in tota auxiliorum collectione vellet Deus conferre in hac vel illa circumstantia, quæ magis idonea Deo videretur.

85. Ob. 3. Scientia media omnino inutilis est ad conciliandam humanam libertatem cum certitudine Divinæ prædestinationis, & cum gratiæ efficacia, ergo rejicienda. Prob. antec. primo quia Sanctus Augustinus illam conciliavit sine ope scientiæ mediæ, ut etiam testatur ipse Molina, qui in lib. de concord. quæst. 23. art. 4. & 5. ferme sibi gratulans inquit. Si Augustini tempore nata & explorata fuisset, forte nec Pelagiana hæresis nata fuisset, nec Lutherani tam imprudenter arbitrii nostri libertatem fuissent ausi negare.

Secundo. Ex modo quo Augustinus libertatem hanc comprobabat, multi ex fidelibus turbati sunt, ut scribunt Hilarius & Prosper in epist. ad eundem, turbari autem non potuissent, si scientia media usus esset.

Tertio. Si scientia media apta esset ad conciliandam libertatem &c. facilis esset concordia libertatis humanæ cum prædestinatione Divina, cum tamen Augustinus lib. de Gratia Christi cap. 47.

cap. 47. & lib. 4. contra Julian. cap. 8. hanc difficillimam esse fateatur.

Quarto. Idem Augustinus, ut explicet efficaciam gratiæ & certitudinem prædestinationis, semper recurrit ad omnipotentissimam Dei voluntatem, & illud dominium, quo magis continet voluntates hominum, quam ipsi suas.

Tandem. Quo pacto differt scientia media à modo, quo utebatur Faustus, cuius tritum erat. *Nisi præscientia exploraverit, prædestinatio nihil discernit.*

86. Resp. ne. ant. ad prob. etsi Sanct. Augustinus nunquam usus sit vocabulo scientiæ mediæ; admisit tamen scientiam conditionatam, ut à nobis probatum fuit, & Divinam præscientiam non esse causam futurorum, ut pariter fuit declaratum, & de mente S. Doctor's de gratiæ efficacia ampliora dicemus. Quod vero additur ex dicto Molina parum mea interest, excusari tamen potest, ibi sermonem habuisse non de scientiâ mediâ quantum ad substantiam, sed quantum ad methodum & majorem explanationem. Coëterum Augustinus agens contra Pelagianos ac Semipelagianos nunquam ex professo egit de concordia libertatis cum gratiâ & prædestinatione, hoc enim non erat præcipuus eorum error, sed totus erat in probando, gratiam esse necessariam ad quodcumque opus supernaturale, ad initium fidei & finalem perseverantiam, quod ab illis negabatur.

Ad secundum. Falsum est, turbatos fuisse fideles propter modum, quo usus est S. Augustinus in concilianda libertate cum efficacia gratiæ, etenim de hoc nullibi disputavit S. Doctor, sed turbati sunt, quia volebat gratiam prævenientem necessariam esse ad quodlibet opus salutare & initium fidei, atque merita sub conditione futura nihil prodesse.

Ad tertium. Ita se gessit Augustinus cum Pelagianis ac Semipelagianis, quia ipsi scientiâ conditionatorum abu-

tebantur, ut dictum fuit, & ex alia parte cum supponat gratiæ necessitatem, quam negabant componi posse cum libertate, ideo ut ipsos refelleret securius, & per id, quod ipsi negare non poterant, tum per id, cujus abusus non erat, non ad scientiam mediam, sed ad Divinam omnipotentiam recurrebat; Ex quo autem scientia media facilius explicet creatam libertatem una simul cum Divina præscientia & prædestinatione rejicienda non est, alioquin rejiciendi essent etiam illi Sancti Patres, qui ut facilius servent liberum arbitrium cum præscientiâ Dei, dicunt, non ideo res esse futuras, quia cognoscuntur à Deo, sed ideo cognosci à Deo quia sunt futura.

Ad quartum. Optime confugiebat Sanctus Augustinus ad omnipotentiam illam & Divinum dominium, quo Deus magis continet voluntates hominum, quam ipsi suas, nam per illam revera homines convertit, non tamen utcumque, sed ut supponentem scientiam mediam, per quam dirigatur. Oritur ergo certitudo Divinæ prædestinationis ex Divina omnipotentia, quia habere auxilia; quæ si homini dentur, convertatur & salvus fiat, in Divinæ omnipotentiae thesauris reperitur. Oritur vero etiam ex Divina præscientia, cum per hanc Deus cognoscat hoc non alio auxilio, in hac non in alia circumstantia hominem esse convertendum, & cum de fide sit, cuilibet auxilio hominem posse dissentiri, ideo antequam statuat per aliquod auxilium hominem convertere, necesse est, ut videat, illum revera tali auxilio non esse dissenturum, & ita concilietur certitudo præscientiæ & decreti Dei cum humana libertate, in quo sensu dicitur de correptione & gratia cap. 14. *Deum habere humanorum cordium quo placet inclinandum omnipotentissimam voluntatem.* Et certe Deus plus continet voluntates hominum, quam ipsi suas, quia non est in humana voluntate potestas habendi auxilium quo convertatur, est autem in Dei potestate, illud

illud auxilium dare, quo revera convetur.

Ad ultimum. Valde distat scientia media à dicto Fauſti. Hic enim cum Semipelagianis volebat, prædeterminationem non antecedere abſolutam merito- rum præviſionem, ſed pendere in ali-

quo prævio merito naturali, & in fidei initio habito ſine gratia, tum etiam in merito conditionatè præviſo, quamvis nunquam exituro, ut jam ſæpius dictum fuit. Hoc nos nunquam aſſerimus, Ideo &c.

## SEQUITUR QUÆSTIO IV.

### De modo, quo Gratia confertur.

#### ARTICULUS IV.

*Utrum gratiæ efficacia conſiſtat in aliqua phyſica qualitate, quæ intrinſecè efficax ſit.*

30.



**E**xclusa illa phyſica prædeterminatione, rem noſtram in Quæſtione quarta ſuſcep- tam iterum proſequimur, atque id in medium proferre contendimus, utrum opera ſupernaturalia pertinentia ad noſtram prædeterminationem, æternamque ſalutem, ita dependeant à gratia, ut hæc ſit ex natura ſua efficax, vel omnia haberi poſſint ſine hac intrinſeca efficacia, ſed præciſe per moralem ejusdem efficientiam reſpectivè ad voluntatem, quamvis influxum phyſicum præſtet in actum, quatenus in ipſo actu reperiatur aliquod prædicatum ipſi gratiæ una ſimul cum arbitrio concuerenti correfpondens. Totæ autem difficultas eſt, utrum gratia hæc efficax producat aliquid in voluntate agentis, per quod voluntas tanquam in ſe receptum ad ſanctè cogitandum pieque operandum, vel utrum conſiſtat in aliquo, quod ſolummodo moraliter ſe habeat, per hoc quod intellectum illuminet, affectum inflammet per ſolas illius illuminationes, piæque iſtiſque affectiones. Primum tuentur prædeterminantes. Secundum vero alii qui ſcien-

tiam mediam propugnant. Aliis terminis, utrum conſiſtat in aliquo precedente piæ affectiones & illuminationes, an vero formaliter in ipſis affectionibus & illuminationibus.

31. Dicendum. Efficaciam gratiæ non conſiſtere in aliqua phyſica qualitate, ſed in ſolis illuminationibus &c. moraliter ſe habentibus ad intellectum & voluntatem, proinde gratiam non eſſe ab intrinſeco efficacem.

Plurima quidem ſunt, quæ ad probandum aſſertum aſſerri poſſunt; ſed ut ordine claro diſtinctoque procedamus, incipiemus ex testimoniis Sancti Auguſtini, quæ præſertim in hac re maximi faciendæ ſunt, immo adverſarii firmiſſimè tenent pro ipſorum ſententia, ſtare tantum Doctorem. Sed antequam ipſius mentem aperiā, placet hoc argumentum proponere. Si gratiæ efficacia talis eſt, ut uni ſit apta, & ſuum habeat effectum, alteri non, & effectum privetur, gratia non eſt efficax ab intrinſeco, ſed per Auguſtinianam res ita eſt, ergo. Major patet quia etiam per Thomiſtas gratia efficax in eorum ſenſu in quacumque voluntate ſit, ſemper ſuo effectui conjungitur. Minor prob. ex toto lib. 1. ad Simplician. qu. 2. ubi diſtinguit gratiam efficacem ab inefficaci, & ſic concludit. *Igitur non volentis neque currentis, ſed miſerentis eſt Dei, qui hoc modo vocavit, quomodo aptum erat eis. Illi electi qui congruenter vocati.* Rurſus. *Non volent-*

*volentis &c. quia etiam multos vocat, eorum tamen miseretur, quos ita vocat, quomodo eis aptum est, ut sequantur.* Et infra. *Cujus miseretur, sic eum vocat, quomodo scit ei congruere, ut vocantem non respiciat.* Ergo per Augustinum gratiæ efficacitas explicatur per congruitatem respectu illius cui datur, & ideo talis est, ut uni sit apta & suum habeat effectum, alteri vero non, & suo privetur effectu.

32. Neque audiendi sunt plures oppositæ scientiæ, qui cum negare non possent, in dictis locis sermonem esse de vocatione & gratia congrua à nobis propugnata, dixerunt, ibi Augustinum non esse loutum juxta propriam sententiam aliquid stabiliendo, sed solum disputando; Cum inde dicat; *Et tamen intueamur superiora, & inde nostram, quantum Deus dederit, sententiam profiteremur.* Primo quia Doctor in lib. de prædestinat. Sanctorum cap. 4. approbat quod ad Simplicianum scripsit declarando se esse convictum, cum prius oppositum sentiret, & sibi postea aliter à Deo diceret revelatum cum ad ipsum scriberet. *Ecce (sunt verba ipsius) quare dixi superius, hoc Apostolico præcipue testimonio etiam me ipsum fuisse convictum, cum de hac re aliter saperem, quam mihi Deus in hac questione solvenda, cum ad Episcopum Simplicianum, sicut dixi, scriberem revelavit.* Secundo quia Augustin. lib. 1. retractationum cap. 23. reprehendit se, quod in prioribus operibus parum de gratiæ mysterio disseruerit, credi ergo non potest, in hac ex propria sententia non esse loutum, & si res ita esset, dicendum foret, quod tota Doctrina ab ipso tradita usque ad citata verba, *& tamen intueamur &c.* prorsus inanis esset, nulliusque auctoritatis, quod tamen à veritate alienum est, cum Doctores omnes illam producant. Tandem; Vel illa superiora referuntur ad Doctrinam præcedentem, & sic habemus intentum, vel ad sequentem, & ita nihil colligitur, quod contra nos sit; Ibi enim interrogat, quare Deus de hominibus conqueratur, si cujus

Tom. II.

vult miseretur, & quem vult indurat, cum potius homines de Deo conqueri possent, quod cum ipsis inæqualem in largiendo gratiam se demonstraret, & responderet, attendenda esse superiora verba Pauli, quæ erant ista. *Quid ergo dicemus, nunquid iniquitas est apud Deum?* Ex quibus infert, iuste Deum conqueri de peccatoribus, cum ipse ad peccandum non cogat, nec sufficientem gratiam neget, iuste autem non posse peccatores conqueri de Deo, quia ipsis vocationem congruam non det, sicut aliis, cum ipse nihil debeat, & dona sua, cui ipse voluerit, possit omnino gratis impertiri. Utrum autem hæc destruant quod prius dixerat, videat unusquisque, dummodo claris oculis velit videre.

33. Verum ex aliis Augustini locis amplius licebit ejusdem mentem cognoscere; Sed prius hoc argumentum expono. Si eadem gratia est, sub qua unus convertitur; & alius non convertitur, jam gratia ab intrinseco efficax non est, ut constat, sed eadem gratia est, sub qua unus convertitur, alius non convertitur, ergo. Prob. mi: ex Augustino in toto cap. 14. de bono perseverantiæ, ubi ait Tyrios & Sydonios relictos esse, qui tamen credere potuerunt (loquitur autem de potestate reducenda in actum) si virtutes à Deo factas vidissent, quas tamen videntes Corozaitæ & Betsaitæ conversi non sunt; quid vero ex hoc infert? En ipsius verba. *Ex quo apparet habere quosdam in ipso ingenio divinum naturaliter munus intelligentiæ, quo moveantur ad fidem, si congrua suis mentibus vel audiant verba, vel signa conspiciant.* Dixi, loqui de potestate reducenda ad actum; Prob. quia in Evangelii textu est hujusmodi Sermo. *Vē tibi Corozaim, Vē tibi Betsaida, quia si in Tyro &c. Nunc in cinere & cilicio poenitentiam egiissent.* Non dixit potuissent agere. Secundo quia in pluribus aliis locis iste mos est loquendi Augustini, ut potestatem vel non potestatem sumat pro actu, vel non actu; & ut sistam in eodem c. 14. citato, ubi de Judæis ait. *In eadem per-*

Q

dic-



ditionis massa relictis sunt etiam Judæi, qui non potuerunt credere factis in conspectu suo tam magnis clarisque virtutibus. Et tamen ly non potuerunt intelligendum est de non potestate non reducenda in actum, nam absolute potuerunt, aliter non peccassent; Unde prosequitur *Cur enim non potuerunt credere &c.* Ergo ex mente Augustini est, sub eadem gratia unum converti, alium non, proinde &c. Hinc fit, ut idem adnotavit, differri aliquando vocationem Divinam, ut sit congrua pro uno tempore, quæ non esset pro alio, quod ostendit super illa verba, ps. 142. *Cito exaudi me Domine* dicens; *pluviam differebas, ut hauriens imbiberem, sic ergo differebas; jam da, quia anima mea sicut terra sine aqua tibi.*

34. Alia quam plurima ex libris ejusdem afferri possent, quæ citantur à Belarmino, Suarez, aliisque, sed nos adductis contenti sumus: cum si præterea probaverimus, motionem descendentem à gratia prævenientem & operante esse moralem, & consistere in illustrationibus, & piis affectionibus voluntatis, quod est intentum nostrum, jam punctum evincimus. Jam vero hoc declarandum aggredior; & ab Augustino exordium sumo, lib. 2. de peccatorum meritis & remis. cap. 17. ait. *Ut autem innotescat quod latebat, & suave fiat quod non delectabat, gratia Dei est.* Et cap. 19. *Cum ab illo illius adjutorium deprecamur ad faciendam perficiendamque justitiam, quid aliud deprecamur, quam ut aperiat quod latebat, & suave fiat quod non delectabat?* Ea gratia operans ea est, quæ movet inspirando & illuminando objectum reprehensivum, & animam alliciens. Hoc clarissime demonstrat tract. 26. in Joan. quærens, quomodo à Patre trahantur homines ad Christum, *nemo enim venit ad me, nisi Pater meus traxerit illum.* Et respondet trahi, sicut oves trahuntur, si ramus viridis illis ostendatur, & trahuntur pueri, si nuces demonstrantur. *Ramum viridem, inquit, ostendis ovi, & trahis*

illam, nuces puero demonstrantur, & trahitur, si ergo, concludit, *ista quæ inter delicias & voluptates terrenas revelantur amantibus trahunt, quoniam verum est, trahit sua quemque voluptas, non trahet revelatus Christus à Patre &c.* Aperte igitur ex hisce similitudinibus colligitur, trahi homines per gratiam, quatenus per ipsam invitantur, alliciuntur; non quatenus determinantur, & à fortiori prædeterminantur.

35. In sensu nostro intellexerunt Augustinum celebriora Concilia, quæ omnem operantis gratiæ vim tribuunt illuminationi intellectus, quæ cognoscamus quid agendum sit, & inspirationi, seu piæ affectioni voluntatis, quæ id diligamus. Hac de re dixit Milevitan. can. 4. *Utrumque est donum Dei, & scire quid facere debeamus, & diligere ut faciamus.* Hac de re Concil. Arausic. 2. can. 7. ita definiit, *Si quis per naturæ vires bonum aliquod, quod ad salutem pertinet vitæ æternæ, cogitare, ut expedit, vel eligere, sive Evangelicæ prædicationi consentire possit confirmat absque illuminatione & inspiratione Spiritus Sancti, qui dat omnibus suavitatem in consentiendo veritati, hæretico fallitur spiritu.* Hac de re Concil. Trident. ut cœtera quæcumque præteream agens sess. 6. c. 5. de præparatione hominis ad justificationem inquit. *Justificationis exordium esse à Dei per Christum Jesum prævenientem gratia &c.* Ita ut tangente Deo cor hominis per Spiritus Sancti illuminationem &c. Quæ omnia, si perpendantur, nihil aliud tribuunt operanti, seu prævenienti gratiæ nisi illuminationem & inspirationem, proinde dicendum remanet in his, non vero in aliqua physica prædeterminante qualitate illam esse collocandam.

36. Sed si licet ulterius progredi excentum locis, quibus ex Concilio veritas à nobis stabilita confirmari posset, unum eligam, quod jam alibi indicavi, & illud est quod legitur cap. 11. *Deum non deferere justum nisi prius defertur*



*tur &c.* Si autem auxilium Divinum, efficax esset ab intrinseco, & in physica prædeterminatione consisteret, Deus prius defereret, quàm defereretur. Probo. Non stat, hominem deferere Deum nisi peccando, sed non stat, hominem peccare nisi per subtractionem auxilii efficacis, quia quoadusque hoc detur, si intrinsecè efficax est, nunquam homo peccabit, ergo. Prius igitur erit Deum subtrahere auxilium efficax, quam hominem peccare, ergo prius erit hominem à Deo deferri, quàm Deum ab homine. Ex alia parte non potest dici, à Deo deferri justum quantum ad auxilium sufficiens, quia hoc in primis non facit hominem justum, deinde perseverat etiam in ipso actu peccandi, ergo. Argumentum hoc mihi satis probans & evincens videtur.

## ARTICULUS V.

*Idem stabilitur ex testimoniis  
Scripturæ.*

37. **N**E sub eodem capite plura confundantur, post Augustinum & Concilia asseramus etiam Scripturarum testimonia, quibus præfatum nostrum assertum comprobemus, magisque stabiliamus. Producaturo vero illud in primis, de quo dictum est in antecedentibus. *ex Matt. 11. Væ tibi Corozaim, væ &c.* sed ut argumentum inde illatum vim retineat, videamus quid prædeterminantes respondeant. Dicunt porro Tyrrios & Sydonios fuisse credituros, non præcisè, si apud ipsos fuissent factæ illæ virtutes, sed quia ulterius data ipsis fuisset physica prædeterminatio, quæ non fuit data Corozaitis, & ideo isti nec crediderunt, nec poenitentiam egerunt, habebat enim Deus decretum conditionatum dandi illis hanc physicam præmotionem, si apud eosdem factæ fuissent dictæ virtutes.

38. Sed contra. Jam physica præmotio eliminata à nobis est. Sed hujus  
Tom. II.

modi responsio est omnino contra superius citatam Augustini explicationem. *Ex quo apparet &c.* num. 33. quæ illatio esset omnino frustranea, si per physicam præmotionem credituri essent, nam licet non habuissent illud intelligentiæ munus, & in omnibus antecedentibus fuissent deteriores, si fuisset illis data physica præmotio, adhuc credidissent. Secundo; data illi responsione fuisset omnino injusta Christi reprehensio & comminatio, immo prompta non defuisset excusatio, dicendo. Ut quid nos oburgas, si conversi non sumus, cum tamen alii conversi fuissent? Isti physicam habuissent prædeterminationem, quam nos non habuimus; Si & nobis illam dedisses, jam poenitentes fuissemus; Sine hac nunquam erimus; quid ergo mirum? An quia agere quid possumus, ut convertamur? Sed si ita te cum illis gessisses, sicut erga nos, & ipsi agere potuissent, sed non egissent, ideo par conditionis essent. Reprehende qui currum non trahit solus, illum comparando cum alio, qui trahit alterius auxilio, profecto iniuste reprehendes.

39. Dices fortasse, nos majora peccata gessisse, quibus prædeterminationis physici gratia indigni essemus, aut saltem majora impedimenta à nobis apposita esse, & ideo nos iuste exprobrari. Ita sanè dicunt, & asserunt S. Th. 3. contra gent. cap. 159. & sequenti. Male tamen dicunt. Notum est jam, in ipsorum systemate nullam rationem reddi posse, cur uni potius detur physica prædeterminatio quam alteri, etenim decreto Divino ante omnium futurorum præscientiam statutum fuit, huic dandam esse non illi; Secundo. Judæos obduratos esse in non credendo præsupponit carentiam physici prædeterminationis ad credendum, quia hac habita omnis cordis durities ablata esset, ergo illa obduratio præmotionem physicam impedire nequaquam potuit. Tandem. Si non dabatur physica præmotio propter peccata majora, propter hæc reprehendi

di poterant, nec tamen quia poenitentiam non egissent, reprehenduntur vero propter hoc. Potuissent immo dicere. Christe jocularis & fingis, nobis das externa signa, & illis dedisses physicam præmotionem. Nos vocas ad fidem, veniemus nunquam, nisi nos prædeterminas, sicut venissent Tyrii. Vis nos esse magis reos, da utrisque eandem virtutem.

40. Ita responderunt, & ita responsum rejecimus; attamen saltem argumentum retorquendo se ipsos conantur defendere. Levis quidem, & nulla hac defensio est; audiamus tamen. Non minus per prædeterminantes est necessaria gratia efficax ad poenitentiam, quam per nos sit necessaria gratia congrua, & tamen hac non fuit data Corozaitis, & fuisset data Tyriis, alioquin nunquam poenitentiam egissent, ergo pro utraque parte remanet eadem difficultas, & æquali modo potuissent se excusare, non fuisse congruè vocatos, sicut fuissent alii.

41. Sed contra, nequaquam est eadem difficultas, nec excusatio est æquè justa; nam physicam præmotionem dari pendet absolute à sola Dei voluntate, vocationem vero esse congruam vel non congruam pendet ab hominum voluntate, non enim sine hac congrua fieri potest; & si dicas, ergo congruitas gratiæ pendet à libero arbitrio, quod Pelagianum est, jam responsum accepisti art. 2. hujus questionis, pendet enim à libero arbitrio cooperante, proinde supponente gratiam, per quam & cum qua operatur, quod Pelagianum non est, sed omnino Catholicum, *ne dicam, solummodo Catholicum*; Et si iterum dicas, quod sicut datur impedimentum vocationi congruæ, ita dari potest impedimentum physicæ prædeterminationi, tibi ipsi contradicis, quia illa non dabitur sub prævisione talis impedimenti, nec à solo Deo, sed etiam à libero dependebit arbitrio, quod adeo contra nos repetitis. Dabitur ergo, replicabis, vocatio

seu gratia congrua ex prævisione cooperationis creaturæ; Hoc autem Semipelagianum est, cum diceretur ab istis, Deum præmia largiri, vel poenas infligere prævisis meritis, vel demeritis eorum, qui sine baptismate moriebantur. Verum male replicas; falsum est dari ex hujusmodi prævisione, cum etiam prævisa cooperatione non detur, sicut supra declaratum fuit, si Tyrionum exemplum perpendatur. Datur ergo, quando datur sub prævisione, non tamen ex prævisione, hæc inferret causalitatem in gratiam, non illa. Neque aliquo pacto cum Semipelagianis sentimus. Quis enim ex nobis asserit, salutem obtineri sub prævisione nostræ cooperationis, si gratia non detur, cui cooperemur, & cui non tantum prævideamur cooperaturi, si daretur?

42. Properamus nunc ad eximium gratiæ veritatis prædicatorem, Paulum videlicet. Quid ait iste 2. ad Corint. 6. *Adjuvantes exhortamur, ne in vacuum gratiam Dei recipiatis*. In hoc textu sermo est de gratia in genere ut præcisè à congrua vel incongrua, vel de mere sufficiente, vel de mere efficaci, sed quidquid dicatur, excluditur physica gratiæ prædeterminatio, ergo. Prob. prima pars min. si sermo est de gratia in genere, adhortatio Pauli supponit esse in proxima hominis potestate illam postquam receperit facere vacuum, vel non vacuum, ergo illam reddere efficacem, vel non efficacem; Si de gratia solum sufficiente, hæc per adversarios semper vacua remanet, idest sine opere & fructu; Hanc ergo reddi non vacuum, est illi cooperari, seu illa bene uti, per quam cooperationem bonumque usum redditur efficax. Si tandem de gratia solum efficaci, si monet Apostolus, ne in vacuum recipiant, supponit, hanc vacuum reddi per non cooperationem, ergo non erit efficax ab intrinseco, quod si vacua nunquam redditur, frustranea & ridicula erit hujusmodi exhortatio.

43. Respondere solent, posse homi-

minem reddere hujusmodi gratiam vacuum ut præcisam à congrua vel incongrua, immo ita illam reddere, si non prædeterminatur, facere vero ejusdem gratiæ fructum, si determinatur. Sed inanis omnino responsio; recipere enim hujusmodi prædeterminationem non est in hominis potestate, nec aliquid ab ipso fieri potest per quod moveatur Deus ad illam conferendam; debuisset ergo Paulus illos admonere, ut prædeterminationem reciperent, & ab ejusdem carentia caverent, sed admonitio esset vana, & risu accipienda; Supponit propterea, gratiam esse talis naturæ, ut homini data per suam cooperationem fiat non vacua, & per non cooperationem vacua.

44. Hinc infero, in adversariorum systemate vanas esse exhortationes, vana consilia, & exhortantibus & consulentibus respondere homines posse, si Deus me prædeterminabit, faciam, si non, nunquam faciam, & ex alia parte prædeterminationem nunquam promerebor. Vanum est, Petrum dicere ep. 2. cap. 1. *Satagite; ut per bona opera certam vestram vocationem & electionem faciatis*. Quodnam opus erit per quod certa fiat vocatio & electio? Si Deus me prædeterminando vocavit & elegit, certissima est vocatio & electio, sin minus, nunquam certa erit. Neque juvat dicere hoc esse per ordinem ad executionem, nam si vocatio & electio efficax est ab intrinseco certa erit, quin homo satagat, ut certa fiat. Prosequatur ergo Paulus argumentum, & dicat 1. ad Corint. 15. *Gratia Dei sum id quod sum*, sed statim subdat, sed *gratia ejus in me vacua non fuit* ut simul ostendat, gratiam & suam cooperationem, per quam vacua non fuit; *abundantius*, enim inquit, *illis omnibus laboravi* supponens ab ipso vacuum fieri potuisse, & ne in se ipso gloriaretur, sed in Domino, prosequitur dicens, *laboravi non ego sed gratia Dei mecum* id est ex Augustino, nec gratia sola, nec ipse solus, sed gratia Dei cum illo. Quod ut gratia vacua non sit, id est sit effi-

cax, non est petenda ratio à sola gratia, sed per respectum ad liberam arbitrii cooperationem. Quod si res ita non esset, cur diceret Deus proverb. 1. *Vocavi, & renuisti?* Cur ps. 94. *Hodie si vocem ejus audieritis, nolite obdurare corda vestra?* Cur Matt. 23. *Quoties volui congregare filios tuos, & nolui?* Cur per Isai. cap. 5. *Expectavi, ut faceret uvas, fecit autem labruscas*. Potuissent dicere, voca nos prædeterminando, & non renueamus nec corda obdurabimus, congrega nos eodem modo & vellemus; non expectares, ut faceret uvas, nec fecisset labruscas, si ut uvas faceret, tu dedisses. E' contra in sententia nostra omnes istæ responsiones evitantur.

## ARTICULUS VI.

*Idem probatur etiam ratione.*

45. **R**ationes illas, quibus Mediiste probant, gratiam ab intrinseco efficacem physiceque prædeterminantem omnem libertatem auferre hic preterimus, eas enim jam exposuimus in præcedenti disputatione ubi de Divina futurorum cognitione. Ab illis itaque hic abstinendo, sic primum argumentum instituo.

46. In actionibus supernaturalibus illud est admittendum quod ipsas sufficienter servat, & id excludendum quod ad ipsas necessario non requiritur. Illud enim axioma, *non sunt multiplicanda entia sine necessitate*, sicut verum est in Philosophicis, ita & in Theologicis, atqui per puram gratiam efficacem ab extrinseco explicatam per Sanctas illustrationes, inspirationes ipsaque affectiones, quibus moraliter intellectus & voluntas moveatur, sufficienter servantur actiones supernaturales, ergo. Prob. mi. in actionibus supernaturalibus reperiuntur vitalitas, libertas & supernaturalitas; sed per gratiam efficacem ab extrinseco explicatam per &c. servantur hæc omnia, ergo. Prob. mi. Voluntas ex natura

ra sua est facultas vitalis, & libera, gratia etiam efficax ab extrinseco & explicata per &c. est supernaturalis, sicut sunt supernaturales illustrationes & inspirationes, ergo. His omnibus addatur gratia adjuvans & cooperans, quæ ex terminis nequit esse physice prædeterminans, quid ultra deerit, ne habeantur supernaturales actiones? Habet profecto voluntas virtutem completam in ratione principii proximi per hanc solam gratiam, sicut sol non indiget alla virtute superaddita, ut luceat, nec ignis, ut calefaciat præter suam lucem suumque calorem cum Dei simultaneo concursu.

47. Atque ex hoc intelligas, quo pacto faciat Deus ut velimus atque ut operemur, juxta illud Ezechiel. 27. *Faciam ut in præceptis meis ambuletis &c.* Quod quidem negari non potest, nam ut agamus, & agendo simus filii Dei, oportet, nos à Deo agi, propter quod dicit Paulus ad Rom. 8. *Quicumque spiritu Dei aguntur, hi sunt filii Dei.* Unde Augustinus lib. de correp. & grat. cap. 2. *Intelligent, se Spiritu Dei agi, ut quod agendum est, agant, aguntur enim ut agant.* Hoc siquidem per puras illustrationes & pias affectiones haberi, declarat apertissime idem Augustinus lib. de Spir. & lit. cap. 14. ubi ait. *Visorum suasionibus agit Deus ut velimus, & ut credamus &c.* Et ulterius ratio ipsa confirmat, nam ad hunc finem illas Deus elargitur, qui jam previdit nos esse consensuros semper dependeret ab illis, proinde &c. Propterea, ut jam superius indicavi, possunt istæ considerari vel per respectum ad animam, vel ad actiones, per respectum ad animam moraliter se habent, per respectum ad actiones se habent physice; nisi velimus dicere, ad actiones concurrere Deum per gratiam adjuvantem & cooperantem, quam physice influere negari non potest, sicut admittitur concursus simultaneus, in quo concursu semper aliqua prioritas concedi Deo debet, quia sine ipso nihil creatura agere potest, non tamen illa

prioritas ab adversariis propugnata per quam creatura prædeterminetur.

48. Aliam rationem subdo, per quam ostendo, voluntatem per illas intellectus illustrationes, & sui pias affectiones totum id habere, quod ad supernaturales actus necessarium existimatur. Graviter tentetur homo, jam per hanc gravem tentationem, si gratia desit, infallibiliter peccabit, ideo gratiæ necessitatem ad vincendas graves tentationes cum Theologis admisimus, & tamen gravis tentatio nihil ultra facit, quam proponere, suadere, allicere ad peccandum, ergo a pari per illustrationes, & pias affectiones dabitur facultas ad supernaturaliter operandum, nec quidpiam ultra requireretur, quam proponere, suadere, allicere &c. Aliquibus Theologis hæc argumentandi ratio fortasse parum satisfacit, cum videamur, non plus virtutis Deo tribuere ad bonum, quam Dæmoni tribuamus ad malum. Sed si nos in hoc reprehendendi sumus, reprehendantur prius duo præcipui Doctores Augustinus & Hieronymus, qui simili exemplo uti sunt. Augustinus lib. de grat. & lib. arbitr. habet hæc verba. *Si tamen potens est Deus sive per Angelos malos, sive quocumque alio modo operari etiam in cordibus malorum hominum pro meritis eorum, quorum malitiam non ipse fecit, quid mirum, si per Spiritum Sanctum operatur in cordibus electorum suorum bona, qui operatus est, ut corda ipsa essent ex malis bona?* Hieronym. vero lib. 2. contra Jovinian. sub initio habet hæc alia. *Libri arbitrii nos condidit Deus &c. sicut in bonis operibus perfectio est Deus, sic in malis atque peccatis semina nostra sunt incentiva & perfectio Diaboli.* Argumento hoc nostro usus est ipse S. Th. qui lect. 5. in Joan. explicans quomodo Pater trahat ad Filium, inquit. *Aliquis homo trahit aliquid suadendo ratione, & hoc modo Pater trahit homines ad Filium vel per internam inspirationem, vel per miraculorum operationem &c.* Usus est Sot. lib. 1. de



de nat. & gr. cap. 16. dicens: *Quod Deus aliquo modo illuminet, inspiret, & tangat corda nostra absque voluntate nostra, patet similitudine tentationis ad malum.* Neque verum est, nihil plus ad bonum à nobis Deo tribui, quam Dæmoni tribuamus ad malum; Sed argumentum nostrum fit à fortiori; Si enim Dæmon nos moraliter movens ad malum, sufficit, ut mali simus; tanto magis Deus nos moraliter movens ad bonum, sufficiet, ut simus boni. Multo enim excellentiori modo potest Deus accommodare cordibus inspirationes suas, quam Dæmon suas tentationes, multoque majorem suavitatem infundere potest Deus ut ad honestum trahat, quam Dæmon ut trahat ad delectabile; Siftimus tamen semper in linea morali, quæ in indivisibili non consistit. Verum tamen est, neque hujusmodi moralem determinationem semper ad actus supernaturales necessariam esse, cum sufficere possit etiam minor, cui si voluntas humana responderet per gratiam adjuvantem, ipsi actus haberentur.

## ARTICULUS VII.

*Afferuntur in oppositum Sanctus Augustinus, & ipsum afferentibus satis fit.*

49. JAM dictum fuit adversarios nostros tanquam de propriæ sententiæ authore & præcone de Augustino gloriari. Pro modulo nostro Augustinum pro nobis proferre tum in præcedenti disputatione, tum in hac quæstione afferre studuimus. Quid igitur pro ipsis dicere videatur, justum est à nobis expendi, ne ea disimulemus, quæ contra nos militare videntur.

Primum quod opponitur est, Sanctum Doctorem lib. de gr. Christi c. 24. docere, *Deum occulta, mirabili, atque ineffabili potestate operari in cordibus hominum non solum veras revelationes, sed etiam bonas voluntates;* de correp.

& grat. cap. 6. *Posse Deum quem velit ad penitentiam potentissima suæ medicina potestate convertere;* in Ench. cap. 95. *Efficacissimam esse voluntatem Dei, quæ nihil vult, quod non faciat, omnia enim quæcumque voluit, fecit & posse hominum malas voluntates, quas voluerit, quando voluerit, ubi voluerit, in bonas convertere.* Idem semper repetitur in lib. de prædest. Sanct. cap. 20. de bono perseveran. cap. 6. de grat. & lib. arbit. cap. 20.

50. Respondebis omnia hæc esse vera, modum tamen à S. Augustino in dictis locis non indicari. Hæc servantur, si admittamus gratiam congruam, & ab extrinseco efficacem, sicut à nobis ex mente ejusdem Sancti Augustini probatum est. Operatur porro Deus in cordibus hominum non solum veras revelationes, sed etiam bonas voluntates, & quem vult convertit, quando vult, ubi vult, sed nec absolute antecederet vult, nec vult quando, nec vult ubi, nisi sub præscientia, & prævisione sua, ut jam declaratum fuit, & sicut nos explicamus gratiam efficacem per vocationem & gratiam aptam, ita explicamus efficacissimam per vocationem & gratiam aptissimam semper tamen in linea morali, & sic intellige adeo vulgatam Doctores auctoritatem, in qua dicitur, Deus efficacissimas vires voluntati tribuere.

51. Oppones. Data nostra Doctrina totum servaretur, quia voluntas hominis vellet, quamvis dependeret à gratia, sed juxta Augustinum hoc dici non potest, ergo. Prob. mi. Si res ita esset, gratiæ efficacia non est mysterium occultissimum, sed per S. Augustinum est hujusmodi, proinde ipse ad judicium Dei, & ejus investigabiles vias totum negotium reducit, ergo. Maj. declaratur, quia per nos dici posset, gratia est efficax uni, quia iste vult, non est efficax alteri, quia iste non vult, & sic totum mysterium revelatum compertumque fieret.

52. Sed contra conc. maj. ne. mi. ad prob.



prob. transf. maj. dīf. mi. est mysterium occultissimum in sensu diverso ab adversariis intento conc. in eo sensu me. mi. & Conf. Gratia efficacia & est mysterium, & mysterium non est, si, ut debet considerari, consideretur. Novit hoc Augustinus, & quin confugeret ad investigabiles Dei vias rem definivit, sicut nos definimus. In lib. de vera Religione cap. 7. inquit. *In arca Ecclesie quisque vel palea vel furmentum est pro voluntate sua de prædest. Sanct. cap. 6. ait citans verba Massiliens. Multi audiunt verbum veritatis, sed alii credunt, alii contradicunt, volunt ergo isti credere nolunt autem illi; respondet; Quis hoc ignorat? Quis hoc negat? Responsio ergo nostra est responsio Augustini, Est tamen per Sanctum Augustinum, & per nos occultissimum mysterium, in alio sensu, nimirum si consideretur secundum ordinem prædestinationis, nam semper quæstio manet irresoluta, cur Deus huic congruam dederit vocationem, idest vocaverit, quando erat prævisus consensurus, non dedit alteri, & propter hoc solum ad incomprehensibilia Dei judicia superest confugiendum. Vis mentem Augustini cognoscere? Augustinus ipse loquatur cit. cap. de prædest. Sanctorum. *Cum aliis præparetur, aliis non præparetur voluntas à Domino, videndum est utique quid veniat de: misericordia ejus, quid de judicio.* Verba sunt ejus; & clarius lib. 2. de peccat. meritis & remis. cap. 5. dixit. *Cur istum illo, illum isto modo adjuvet, penes ipsum, est & æquitatis tam secreta ratio, & excellentia potestatis.* In hoc sententia nostra magis arridere debet, quod etiam, mysteria magis declareat, & humano capiti magis se accommodet; Si fieri hoc posset cetera mysteria explicando, non ne fieret? An non laboramus quantum possumus, ut exemplis & similitudinibus Trinitatem exponamus?*

53. Secundum quod opponitur desumitur ex locis de gr. Christi, ubi dicit Doctor, hominem in operibus bonis agi

à Deo, idem autem videtur, agi ac prædeterminari, quod & magis confirmatur ex eo, quod habet cap. 2. de actibus Concilii Palestini, ubi ait. *Plus esse agi, quam regi, nam qui regitur aliquid agit, qui autem agitur vix agere videtur.*

Respondebis. Totum hoc bene dictum esse ab Augustino, & prius jam dictum esse ab Apostolo Paulo, qui omnes Dei filios à Deo actos esse cognovit; *Qui enim Spiritu Dei aguntur, hi sunt filii Dei.* Hoc autem non est dictum à Paulo propter physicam prædeterminationem, sed propter Spiritus Sancti inspirationes, & instinctus, quibus illos gubernat in quibus vel inhabitat, vel quos ad sui ipsius mansionem disponit. Vis claram Augustini mentem agnoscere? Legas illum in Enchir. cap. 94. hæc verba invenies. *Quamvis filii Dei spiritu Dei agantur, sic tamen spiritu Dei excitantur, & tamquam filii Dei ad Deum proficiunt, ut etiam spiritu suo interdum deficiant.* Vides jam ex istis nil aliud esse per magnum Sanctum Doctorem agi, nisi quod excitari; Vides ulterius ita agi & excitari, ut aliquando non agant, sed deficiant, quod certe non eveniret, si gratia in sensu adversariorum efficax esset. Quod si dixit, illum, qui agitur vix agere, profecto asserere non potes, nisi quia Dei gratia in operibus bonis principem obtinet locum, non vero quia propria actio etiam ipsi non conveniat, nisi te Lutheri Calvinique assecram fatearis. Accipe pro hac re alia verba ejusdem lib. de grat. Christi cap. 25. *Ut agant quod bonum est, ab illo aguntur qui bonus est, non quia nos non volumus, aut quia nos non agimus, sed quia sine ipsius adiutorio nec volumus aliquid boni, nec agimus.* Cur ergo, inquires, distinxit illa duo Augustinus regi, & agi plus huic tribuendo quam illi? Plus distinxit, respondeo, non, quia substantia diversam habeant significationem, sed quia agi plus habet emphasis & energiae, ad indicandum, regimen Divinum maximam habere virtutem

tenā ad hominis voluntatem reddendam promptissimam atque obsequentissimam, sicut licet eadem sit fidelitas in Deo, sive tantum promittat, sive promittat cum juramento, attamen ad majorem expressionem reperitur, Deum aliquando cum juramento promississe. Coeterum; præter superius dicta, verbum *agere* explicat Doctor per verbum *regere*, ser. 13. de verbis Apost. dicens. *Agī homines non lege præcipiente, minante, promittente, sed spiritu exhortante, illuminante, adjuvante*. Quid clarius pro re nostra vel afferri, vel unquam excogitari potest?

54. Tertium quod opponitur, est, maximam inter Augustinum & Pelagianos fuisse controversiam, atque istos illi objecisse, gratiam, ab eodem admissam, humanam auferre libertatem, ut colligitur ex quatuor libris contra ipsos, & lib. 4. contra Julian. cap. 8. Sed si Augustinus docuisset scientiam mediam, nullum hoc dicendi habuissent fundamentum, ut manifestum est, ergo. Quod magis declaratur, si perendamus, Pelagium negasse hanc gratiam physice prævenientem, ac prædeterminantem, contra quem cum egerit Augustinus, recte licet inferre, hanc ab Augustino fuisse traditam, alioquin superflua omnino fuisset disputatio. Totum hoc apertius habetur ex iis, quæ scribit ad Vitalem ep. 107. ubi leguntur hæc verba. *Inter eos agi de gratia quæstionem, utrum præcedat, vel subsequatur hæc gratia hominis voluntatem, hoc est, utrum, ideo nobis detur, quia volumus, an per ipsam hoc etiam efficiat Deus, ut velimus*.

55. Responsio jam patet ex alibi dictis, quia Pelagiani asseriebant, etiam ex concursu Dei simultaneo auferri libertatem creaturæ, ideo illum negabant, quare minor neganda est, aut etiam negandus esset concursus simultaneus tanquam ex mente Augustini, sed cur miremur, si ex Doctrina Augustini colligebant Pelagiani libertatis detrimentum, si nunc ex illa colligunt alii physicam

prædeterminationem, cum tamen hujus nullibi mentionem fecerit, immo ut ostensum est, contrarium omnino docuerit? Ignoranter aut calumniose id fecerunt illi, quomodo faciant isti judicare non audeo. Neque verum est, ita Augustinum probasse gratiam prævenientem, ut ipsam voluerit esse prædeterminantem; nam in primis quamcumque gratiam prævenientem & excitantem internam negavit Pelagius admittens dumtaxat doctrinam, legem, & revelationes, quibus homines excitarentur & in quibus totum adiutorium esse affirmabat, unde dicebat, non auxilio Dei, sed ex nobis effici voluntatem bonam. Secundo; etiamsi admisisset Pelagius gratiam prævenientem sufficientem, adhuc Augustinus in ipsum contendebat, volens hanc gratiam esse etiam efficacem, non tamen prædeterminantem, sed congruam, in sensu à nobis explicato. Ex verbis illis in Epist. ad Vitalem nihil ad rem evinci potest; Hic enim negabat; voluntatem credendi esse donum Dei, & tantum requiri, doctrinam fidei proponi, Quid igitur Doctor? Ipsum impugnatur, ostendens Deum in nobis facere ut velimus, & simul demonstrat modum, quo hoc facit per hæc verba. *Si ita præpararet, atque operaretur Deus hominis voluntatem, ut tantummodo legem atque doctrinam libero ejus adhiberet arbitrio, nec vocatione illa alta & secreta sic ejus ageret sensum, ut eidem legi ac doctrinæ accommodaret assensum, non opus esset orare &c.* notentur hæc omnia, præpararet, accommodaret. Et perspicies ex hoc testimonio nostram magis confirmari doctrinam.

56. Quartum, quod opponitur, est, sententiam nostram ita esse rejiciendam, sicut error Semipelagianorum. Mens enim istorum erat, initium bonæ voluntatis à nobis esse, non à Deo, & Deum adjuvare voluntatem nostram, non quia Deus incipiat, sed quia ista, contra quos agit Augustinus in toto libro de prædestinatione Sancti. sentit ergo efficientiam

consensus totam esse à Deo, neque verum esse consentire Deum, quia nos consentimur, sed nos consentiri, quia Deus facit nos consentiri. Roboratur magis argumentum, cum in eodem libro ita loquatur, ut velit totum dari Deo, & deinde addit contra duas epist. Pelagian. cap. 9. *Nunquid Christianus liberum arbitrium esse negat in hominibus, quia Deo totum tribuit, quod recte vivimus?* Ita autem dicere profecto contra sententiam nostram argumentum valet.

57. Respondebis; Ita argumentantes vel non intellexisse hæresim Semipelagianorum, vel nostram non percipisse sententiam. Illi siquidem dicebant initium salutis nostræ prius esse, quocumque gratiæ auxilio, neque illum haberi vel à voluntate cooperante gratiæ, vel à gratia cooperante cum voluntate, sed ab hac sola per proprias vires; Quapropter Augustinus scribens contra ipsos totum librum de prædestin. Sanct. dicit, per ipsos subijci gratiam arbitrio, tanquam arbitrii pedissequam, quod nos omnino detestamur & condemnamus, Hinc efficientia consensus tota tribuitur Deo, non quia etiam voluntas in consensum non insuat, aliter merè passivè se haberet, quod est Hæreticum, sed quia id, sine quo voluntas nunquam consentiret, totum est donum Dei, per quod explicatur majus robor argumenti propositi. Possumus autem in consensu considerare ordinem voluntatis Divinæ & humanæ, tum ipsum actuale consensum; Si ordinem, voluntas Dei antecedit voluntatem hominis, non quia hanc prædeterminet, sed quia præparat & allicit; Si vero actuale consensum, simul agunt tum voluntas Divina sive gratia, tum voluntas humana tanquam duæ causæ partiales, & ita verum est, Deum non adjuvare nisi voluntas coadjuvet, nec voluntatem agere, nisi Deus agat & adjuvet, quod est juxta veram fidem Catholicam.

## ARTICULUS VIII.

*Afferuntur in oppositum Scriptura, & afferentibus satis fit.*

58. **I**Nvito animo ad hoc punctum devenio, in quo quidquid à Thomistis sine aliqua nota afferitur contra nos ad probandam phylicam præmotionem, afferitur impie à Calvinistis ad probandum, Divinam gratiam inferre homini necessitatem. Sed si ostendero, omnium Scripturarum testimonia per nostram posse servari sententiam, certè magis Calvinianum errorem confutabimus, & Catholicam veritatem facilius sustinebimus.

59. Id in primis opponitur, in quo corda hominum & voluntates esse dicuntur in manu Dei, atque ineluctabili ipsius decreto. Proverb. 21. *Sicut divisiones aquarum, ita cor Regis in manu Domini, quocumque voluerit inclinabit illud.* In quo textu perpendendum est, non solum opera hominum, quæ facile Deus impedire posset ac mutare, sed ipsum cor hominum, idest ipsam internam electionem & volitionem in manu Domini esse ac contineri. 2. Paralip. 30. *In Juda facta est manus Domini, ut daret eis cor unum, ut facerent juxta præceptum Regis.* Esther 15. *Convertit Deus spiritum Regis in mansuetudinem.* Eccles. 9. *Sunt justi atque sapientes, & opera eorum in manu Dei.* Idest juxta paraphrasim Caldaicam. *Ab eo decretum, est omne, quod erit in diebus eorum.*

60. Hisce atque similibus respondemus, sicuti primo argumento desumpto ex S. Augustino in antec. Sunt igitur in manu Dei omnium voluntates & potestates, & quocumque voluerit; illas inclinat, sed per cogitationes sanctas & congruas, nec non inspirationes & affectiones ipsis cogitationibus correspondentes, sicut à nobis demonstratum fuit; & dum dicitur *quocumque voluerit* intellige Deum aliquid nolle, nisi prævisò consensu voluntatis dissenfu.

Hoc

Hoc etiam pacto tradidit tribui Judæorum unum totum populum excitando & movendo, ut infallibiliter suo Regi adhereret; quodve additur de Assuero, cujus spiritus conversus est à Deo in mansuetudinem, utique per cogitationes menti objectas, & per excitationem amoris erga Esther, magis explicat quod intendimus. Audiamus quid Esther à Domino petierat cap. 14. *Converte*, inquit, *consilium eorum super eos*. Et statim subdit; *Tribue sermonem in ore meo in conspectu leonis, & transfer cor illius*. En quo pacto cordis mutatio sermoni tribuitur, ita ut fuerit aptus, compositus, & accommodatus ad movendum cor Regis, quod non per physicam prædeterminationem, sed moralem motionem & suasionem mutandum erat, addeunte Deo interna cognitione & inspiratione. Ita explicandus est ultimus textus, quamvis aliæ explicationes non desint, præcipue vero opera iustorum esse in manu Dei, idest sub Dei judicio & trutina, cum qualia sint ipsis iustis ignotum sit, & nesciant, utrum amore vel odio digni sint. Quo pacto autem ab eo omne decretum sit, habes in præcedente disput.

61. Secundo id opponitur, quod ad efficaciam & Divinæ voluntatis omnipotentiam pertinere videtur. *Omnia enim quacumque voluit Dominus fecit*, ait David; *Omnis voluntas mea fiet*, legitur Isaia 46. *Non est qui possit resistere voluntati tue*, habetur Esther 13. Est igitur decretum Divinæ voluntatis semper prius deliberatione cujuscumque voluntatis creatæ, cum illud sit æternum, hoc temporaneum, illud progrediens à causa primâ, à qua pendet ac determinatur quilibet effectus causæ secundæ, sed hujusmodi decretum ita efficax, ut semper fiat, nec illi valeat humana voluntas, resistere est per physicam prædeterminationem, ergo.

62. Respondemus, in dictis Scripturæ locis contineri dogmata Catholica, in quibus nulla controversia esse potest. *Tom. II.*

test; Quis enim omnem voluntatem Divinam & efficacem semper adimpleri, Divinumque consilium semper permanere ibit inficias? Sed quæstio est, quomodo sit hæc voluntas Divina Divinumque decretum; Nos dicimus, voluntatem Divinam efficacem, Divinumque decretum præsupponere scientiam consensus liberi futuri, per quam scientiam dirigatur tam voluntas, quam decretum, ut velit & decernat quod infallibiliter erit. Est igitur decretum Divinum semper prius quacumque deliberatione voluntatis creatæ in se, non tamen in Divina præscientia, & in illo sensu omnis effectus causæ secundæ ab illo determinatur; Unde minor argumenti est falsâ. Major imminet difficultas adversariis in explicanda hac Divinæ voluntatis efficacia & physica decreti prædeterminatione, cum humana libertate; ut jam probavimus. Verum demus etiam, decretum Divinum esse absolutum & antecedens, adhuc contra nos nihil concluderetur. Nam Deus adhuc ita res disponeret fortiter & suaviter; ut moraliter movendo quidquid vellet assequeretur, cum absolute & antecederet decrevisset tum substantiam, tum modum magis consonum libertati, in quo sensu loquuntur illi Scotistæ, qui decreta antecedentia defendunt, nec tamen physicam prædeterminationem admittunt.

63. Tertium, quod opponitur, ex illis Scripturis evincitur, in quibus omnia opera nostra tribuuntur Deo. Sic Isaia 26. *Omnia opera nostra operatus es in nobis Domine*. 1. ad Corint. 2. *Operatur omnia in omnibus*. Et ad Philip. cap. 2. *Deus est qui operatur in nobis velle & perficere pro bona voluntate*. Verum quo pacto ex hisce physica prædeterminatio colligatur, profecto non video, nisi consequentia omnino sit ab antecedente aliena, cum omnia serventur per solum concursum Dei simultaneum, & si strictè intelligantur, totum tribuatur Deo, nihil arbitrio. Nostram profecto expositionem adhibuit S. Thomas.



super verba Apostoli citata, & in Comment. super cap. 26. Isaïæ, immo eam, insinuavit Apostolus in eodem capite, nam, cum dixisset: *Cum metu & tremore vestram salutem operamini*, statim adiunxit, *Deus est enim qui operatur in vobis*, Quibus verbis ostendit, homines quidem suam salutem operari, præcipue vero operari Deum, & Deum ita operari, ut sit in hominis facultate non perficere quod Deus incipit, & impedire illa auxilia, quibus velle & pericere Deus operatur in nobis, quod cum auxilio prædeterminante componi non potest, cum non subit hominis potestati, ut illud detur vel auferatur, proinde non est cur timeat, ne aut propter opera mala negetur, aut si detur, suo unquam careat effectu.

64. Quare autem omnia opera nostra præcipue Deo tribuantur, quamvis ex dictis satis colligi posset, placet amplius declarare; Primo ex Concil. Trident. dicente sess. 6. can. 5. *Hominem per Spiritus Sancti inspirationem non nihil omnino agere*, quo loquendi modo parum tribuitur homini, reliquum tribuitur gratiæ. Secundo ex Augustino jam citato. *Qui autem agitur, agere vix ipse intelligitur*. Homo autem est, qui gratia Divina agitur, proinde agit, sed vix agit, præcipue vero gratia agit. Tercio tandem hoc exemplo. Demus puerum, qui movere possit pondus unius libræ, si cum auxilio superaddito pondus moveat centum librarum, posset dicere, non ego moveo, sed auxilium superadditum mecum movet; ita liberum arbitrium, cum possit tantum actus naturales, quos excedunt actus supernaturales plusquamcentum excedant unum, si per gratiæ virtutem illos profert, gratiæ virtuti cum libero arbitrio elevato agente tribuendum est, tanquam causæ excellentiori. Hoc magis valet in illorum sententia, qui vitalitatem asserunt ab arbitrio provenire, supernaturalitatem vero à gratia, illi autem causæ præcipua vis agendi datur, cui prædicatum, quod

in effectu nobilius est, datur, proinde &c. Videant ergo quantum à sententia Pelagianorum differat nostra; Isti enim nihil gratiæ tribuebant, nos vero gratiæ primam dignitatem concedimus, cum ipsi totum concedere, ut simus Catholici, non possimus.

65. Alia Scripturarum loca prætereo, cum juxta dicta debeant explicari; esset aliquid tantummodo dicendum de prædestinatione; sed utrum hæc sit ex prævisione meritum, nec ne, est magna controversia inter Theologos, quam nos post ista expendimus. Sed si etiam fieret independenter à prævisione meritum, adhuc nihil contra nos probaretur, quia hæc infallibiliter esset executioni mandanda non per physicam præmotionem, sed per gratiam congruam, quæ certissimè danda esset omnibus prædestinatis; Sed si nobis objiciunt prædestinationem objectivam, nos ipsis opponeremus reprobationem. Si removeatur prædeterminatio physica, procul dubio solum imputabitur creaturæ, quod difficulter per ipsos. Sed de hac re alibi.

## ARTICULUS IX.

*Asseruntur in oppositum rationes,  
& refelluntur.*

66. **P**urima sunt, quæ contra sententiam nostram à ratione proficiuntur argumenta, partim quidem Philosophica, partim Theologica; Si nos ab iis abstinuimus, quæ ad Philosophiam pertinent, & ea tantum protulimus, quæ ad rem nostram de gratia conferunt, abstineant & adversarii, & ea tantum adducant, quæ ad præsentem materiem directè revocantur. Res itaque hoc pacto agetur, quamvis ita, ut etiam alia, aliqua saltem ex parte promoveantur, quæ tamen in articulo de scientia media prætermissa non sunt.

67. Primo itaque opponunt. Gratia operans ac præveniens talis est, ut ipsam



*San* Deus operetur in nobis sine nobis, sed pias cogitationes intellectus, & affectiones voluntatis non potest Deus operari in nobis sine nobis, ergo in istis nequit consistere gratia operans & preveniens. Prob. mi. pias cogitationes intellectus, & affectiones voluntatis sunt actus vitales, sed actus vitales non potest Deus operari in nobis, ergo.

68. Respondent communiter sententia nostræ propugnatores, gratiam prævenientem & operantem esse à Deo in nobis sine nobis libere concurrentibus, non tamen sine nobis physice & vitaliter operantibus, per quod satis servatur, pias cogitationes intellectus & affectiones voluntatis esse actus vitales, & tamen in sensu requisito esse in nobis sine nobis. Respondere tamen possumus, pias cogitationes &c. posse considerari ex parte principii quod & effective, & ex parte principii quo & formalis; in primo sensu sunt actus vitales & sunt in nobis & à nobis; in secundo sensu sunt à Deo tribuente species intellectus & moralem motionem voluntatis, in quibus gratia præveniens & operans consistunt, & sic sunt in nobis sine nobis, cum illa species & illa motio à solo Deo proveniant, & in nobis recipiantur, proinde sunt sine nobis active quamvis non sine nobis passive concurrentibus.

69. Secundum quod opponitur, multifariam proponi potest, sed quidquid dicatur ad hoc reducitur, quod si Deus per gratiam suam non prædeterminat creaturam ad bene agendum, jam determinatur per se ipsam, in linea ergo determinandi erit ens independens, & à se. Rursus Deum determinari per determinationem creaturæ, quia sequitur, Deum operari quia operatur homo, & ideo à Deo adjuvatur, quia vult consentire. Hoc autem omnino erroneum est. Si enim per nos dedecet, libertatem creatam determinari à Deo, majus inconveniens erit, Deum determinari à libertate creata. Hinc pars una operis boni fiet à libero arbitrio, altera à gra-

tia, sed quæ à libero arbitrio erit prior, quæ à gratia erit posterior. Tandem per nos sufficientia gratiæ esset à Deo, efficacia gratiæ esset à nobis, plus ergo in conversione nostra tribuehdum esset nobis, quam Deo, immo Deus expectaret consensum nostrum, ut sua gratia efficax fieret, quod totum omnino falsum est.

70. Et si huic argumento responsum sit, ubi de scientia media, attamen dum modo agimus de actionibus non solum liberis, sed etiam supernaturalibus, dicimus, primum falsum esse, idest creaturam absolute determinare se ipsam, siquidem ante sui determinationem datur determinatio moralis, quam per suasionem suas alliciendo & delectando illi Deus imprimat, sicut probatum est, quando vero se ipsam determinat, datur ulterius gratia adjuvans & cooperans, quæ simul cum creata libertate concurrat, & sine qua nunquam se determinaret & nunquam ageret, non erit ergo creatura etiam in hac linea independens & à se. Ad secundum negatur, Deum determinari per determinationem creaturæ, nec vera est illa causalis, Deum ideo operari quia operatur creatura, & creaturam à Deo adjuvari quia vult consentire; nam in ipsa operatione creaturæ & voluntate consentiendi est gratia adjuvans, quæ simul cum creatura operatur, cum similitate autem operationis, non stat priorem esse operationem creaturæ operatione Dei. Quare adnotandum est, has duas propositiones, Deum non operari nisi voluntate hominis cooperante, & Deum operari, quia voluntas hominis operatur, esse valde diversas, sicut diversa est quælibet propositio causalis à propositione simplici. In nostro casu prima propositio est vera, secunda est falsa, quod in omni operatione causæ secundæ potest demonstrari. Sic Deus non concurrat cum igne nisi ignis calefaciat, non concurrat tamen cum igne quia ignis calefacit, dici ergo debet in re nostra. Nisi creatura opereatur non operatur Deus, nisi velit consentire.

sentire non adjuvatur à Deo, non tamen quia creatura operatur, operatur Deus, quia vult consentire adjuvatur à Deo, & sic compertum erit nihil à nobis dici, quod dici non possit & debeat. Ex his corrui quod addebatur, idest unam partem boni operis fieri à libero arbitrio, alteram à gratia, nam in ipsa liberi arbitrii operatione involvitur operatio gratiæ, & ita etiam efficacia gratiæ est à nobis, sed per ipsam gratiam, sicut calefactio ignis est ab igne, illuminatio solis à sole, sed Deo simul concurrente.

71. Quantum ad ultimum, in quo dicebatur, Deum expectare consensum nostrum, quod apertissime est contra can. 4. Concilii Arausiaci citatum. *Si quis dixerit, ut à peccato purgemur, voluntatem nostram Deum expectare &c.* Paululum immorandum est, cum maximum ex hoc adversarii nostri existiment se fundamentum habere. Ad hoc evitandum dico. Deum consensum nostrum non expectare in aliquo sensu esse verum, in aliquo sensu esse falsum. Pro priori parte nihil afferam, cum jam sit definitio Concilii. Pro postrema vero Sacra Scriptura non deest; Apocal. 3. *Ecce ego sto ad ostium & pulso, si quis aperuerit, intrabo.* Hic autem loquendi modus clare indicat, Deum, postquam pulsaverit, expectare responsum, & notetur illa conditionalis, *Si quis aperuerit* expectat ergo ut ipsi homo aperiat. Isaïæ 30. *Expectat Dominus, ut misereatur nostri.* Et cap. 5. post recensitas gratias, quibus suam vineam ditavit, inquit Deus. *Expectavi, ut faceret uvas, fecit autem labruscas.* His igitur perspectis, non expectat Deus voluntatem nostram ut à peccatis purgemur quantum ad vocationem, illuminationem, aliaque huiusmodi, expectat tamen postquam vocati & illuminati sumus, ut ipsi respondeamus, ipsique cooperemur. Atque in hoc sensu fuisse Concilii definitionem, nullo modo ambigendum est; primo quia servari debent Scripturæ à nobis adductæ, nec dici potest contra earum-

dem veritatem quidquam Concilium definiisse. Secundo; si ita esset intelligendum, ut physicam prædeterminationem inferret, quid rogo Deus expectaret? An ut fieret auxilium efficax intrinsecè? Sed quis unquam id expectat, quod à sola propria libertate dependet? Expectabat profecto fructus à vinea, at physicam prædeterminationem vinea nec factura erat, nec facere poterat; tum, etiam data hac prædeterminatione statim vinea fecisset fructum, non data, vanum erat expectare. Verum amplius etiam licet Concilii mentem explicare; dum dicit, voluntatem nostram à Deo non expectari, ut purgemur, vel ut purgari velimus, contra quos tunc Concilium agebat? Certissime contra Semipelagianos dicentes, initium salutis desumi aliquid ex semetipso merente, saltem volendo, & desiderando salutem, & ideo asserabant, hanc esse voluntatem, quam Deus expectabat, ut salutem desideratam conferret; In hoc ergo sensu damnat Concilium quemcumque, qui dixerit, voluntatem nostram Deum expectare. At nos totis viribus hunc detestamur errorem, & dicimus, initium salutis nostræ non à nostro incipere arbitrio, sed à Dei vocatione, inspiratione, aliisque prævenientibus auxiliis; atque huic explicationi nostræ idem suffragatur Concilium, nam ut definitionis suæ rationem redderet, profert celeberrimam illam sententiam, *preparatur voluntas à Domino*. Preparatur autem eo modo, quo à nobis dictum fuit. Quod si quis diceret, Semipelagianorum errorem fuisse, Deum expectare eum, qui etiam fuit ad poenitentiam vocatus, & in hoc sensu fuisse damnatum, falsum omnino dicit, nec aliquem authorem pro se proferet, aut ex epistolis Hilarii & Prosperi ad Augustinum, vel Augustini lib. de prædestinat. Sanctorum quidpiam pro se inveniet.

72. Dices. Concilium non dicit, Deum non expectare voluntatem nostram

stram ut excitemur & vocemur, sed ut purgemur, ergoloquitur de voluntate etiam excitata. Præterea Apostol. ad Philipen. 2. ait: *Deum in nobis operari velle* non dicit, *nobiscum* ergo operatur per aliquid antecedens operationem nostram. Rursus ratio affertur. Causa non expectat effectum suum, quem habet quando vult, sed Deus per operantem gratiam est causa consensus nostri, cum sit causa cur homo velit, ergo illum non expectat.

73. Sed contra. Primum ly ut *purgemur* intelligi debet de purgationis incoatione, quæ tota est à Deo, non vero de integra purgatione, cum certum de fide sit, hanc etiam esse à nobis, aliter in justificatione nihil ageremus. Ad secundum. Quomodo Deus operetur in nobis velle, jam dictum fuit, & si velint ponderare verbum illud, non dicit *nobiscum* sequitur etiam, Deum in nobis *perficere* sed non *nobiscum*, quod est hæreticum, operatur ergo in nobis velle per suam vocationem altam & secretam, *ita movendo sensum, ut accommodet assensum* quæ sunt verba Augustini. Ad rationem. Consensus hominis est effectus procedens & à Deo, & ab homine, cum enim non expectat Deus, ut est effectus Dei, sed ut effectus hominis; solus Deus est causa vocationis, & pro hac hominem non expectat; sed aliud est, esse causam vocationis ad consensum, aliud est, esse causam consensus. Hunc profert gratia, hunc profert & arbitrium; ut Paulus tam magna & efficacissima vocatione traheretur, gratia Dei erat sola; ut vero Paulus converteretur, & laboraret pro Christo, gratia Dei non erat sola. *Non ego, sed gratia Dei mecum* ita loquitur Apostolus, ita sentit Augustinus.

74. Opponitur tertio sic. Si gratia operans non est ab intrinseco efficax, poterit à libero arbitrio inefficax reddi, sed hoc est falsum, ergo. Prob. mi. Si gratia operans posset &c. Id quod procedit à proposito Dei absoluto, & à

Divina voluntate, cui nemo resistit, posset inefficax fieri à libero arbitrio, sed hoc non propter dictam rationem, ergo. Alio modo argumentum efformatur. Gratia operanti congruæ vel fieri potest resistentia, vel non; Si potest, ergo gratia illa non erit efficax, si non, ergo omnes difficultates, quæ sunt contra physicam prædeterminationem, urgent contra hanc gratiam à nobis congruam appellatam.

75. Respondemus, ut jam diximus art. 2. hujus quæstionis, & hoc ab omnibus concedi debet, aliter si fieri non posset inefficax, homines ad assensum impelleret. Sed quia ad probandam minorem assumitur diversa ratio, ideo responsioni jam ibi allatæ addimus, advertendum esse ex Augustino de bono perseverant. cap. 9. & 10. cooperationem liberi arbitrii cum congrua vocatione dupliciter posse considerari, vel ut comparatur voluntati Dei, seu proposito æterno dandi congruam vocationem, vel actuali efficientiæ ipsius vocationis; rursus, vel prout est ratio, propter quam voluit Deus illam nobis elargiri, vel prout est ratio, ob quam vocatio in se fit efficax, & congrua. In priori sensu nihil omnino facit arbitrii operatio, nec propter hanc movetur Deus ad illam conferendam, sed est effectus gratiæ à Deo conferendæ, & ad summum est finis, propter quem voluit Deus libere illam conferre, quod non obstat, cum quomodocumque explicetur auxilium Dei efficax, dici debeat, hominibus conferri, ut illi infallibiliter cooperentur, licet non detur ipsis, quia cooperaturi sunt, in quo sensu loquitur Apostolus ad Ephes. 1. *Elegit nos ut offeremus Sanctis* non quia futuri eramus, & August. de prædestin. Sanct. cap. 17. *Intelligamus vocationem, quæ sunt electi, non qui eliguntur qui crediderunt, sed qui eliguntur, ut credant, & cap. 19. Non quia credidimus, sed ut credamus, vocamur.* Quod quidem ex eo amplius demonstrare licet, quod etiam si præviderit Deus plures vocatio-

ni consensuros, si data fuisset, tamen data non fuit, ut dictum est; Si autem sermo sit, comparando cooperationem liberi arbitrii efficientiæ vocationis & gratiæ, seu prout est ratio, ob quam vocatio in se sit efficax & congrua, dico, gratiam secundum se habere efficaciam suam, nec illam desumere ab arbitrio, effectum tamen suum habere non posse sine cooperatione liberi arbitrii, & ideo per ordinem ad effectum esse gratiam, & arbitrium duas causas parciales, per ordinem vero ad facultatem, quæ cum gratia debet ad effectum concurrere, gratiam esse causam moralem moraliter determinantem ipsam facultatem ad liberè assentiendum & operandum, & sic solum est argumentum priori modo propositum, præsertim cum propositum Dei absolutum, & Divina voluntas, cui nemo resistit, non sit, nisi sub prævisione infallibiliter sequuturi consensus creati, ut in nostro systemate.

76. Argumento posteriore modo efformato respondent aliqui gratia congruæ fieri posse resistantiam, ut servant in arbitrio libertatem, aliqui vero negant. Ego tamen censeo distinguendum esse; nam vel vocatio, seu gratia congrua sumitur secundum suam entitatem, vel ut vocatur congrua per ordinem ad effectum infallibiliter futurum. Si prior modo sumatur, dico, ipsi resistantiam fieri posse, quia per eam voluntas non determinatur nisi moraliter, & si velit. Si vero modo posteriore, dico, ipsi resistantiam fieri non posse, & quia procedit à proposito Dei sub prævisione consensus infallibiliter futuri, & quia gratia sit congrua per ipsum consensum actuale voluntatis tanquam per concausam, cogitari autem non potest, quomodo voluntas consentiendo resistere possit, nisi dicamus, resistere posse proprio actuali consensui, & nolle agere, dum agit, quod in terminis repugnantiam involvit.

77. Opponitur quarto sic. Admissa sententia nostra non est assigna-

bile, quid auxilium efficax auxilio purè sufficienti addat, nisi cooperationem arbitrii una simul cum auxilio simultaneo Divino, sed hoc non est dicendum, ergo. Prob. mi. Si hoc dicatur, auxilium efficax non facit, ut arbitrium consentiatur, sed cum arbitrio cooperante facit ipsum consensum, sed dici debet, auxilium efficax facere, ut arbitrium consentiatur, & non tantum &c. Ergo. Præterea. In nostro systemate conversio hominis non resolvitur ultimo in Divinam voluntatem, sed etiam in humanam, & unum credere, alium non credere non est tribuendum soli Divinæ voluntati, sed præcipuè humanæ, quia unus vult credere, alius non vult credere, & hoc dato, non est, cur Augustinus admiretur, quare hunc trahat, & alium non trahat, nam facile respondere quis posset, quia unus vult, alius non vult, & rursus falsum erit quod dicit Paulus: *Quis te discernit?* quia quilibet discernet se ipsum per suum velle, & nolle, sed hæc dicere absit, ergo.

78. Respondemus juxta dicta ubi sententiam nostram ratione probavimus, idest auxilium efficax etiam tale ab extrinseco facere, ut velimus, & consentiamur; Sed quia argumentum petit, quid hoc addat auxilio pure sufficienti, ideo dico, non addere aliquid, quod sit absolutum & distinctum à toto auxilio sufficiente, sed solummodo ordinem ad cooperationem liberi arbitrii infallibiliter futuram cum auxilio gratiæ simultaneo, & sic etiam gratia congrua distinguitur à non congrua non per aliquam proprietatem absolutam, sed quia illa est accommodata & attemperata tributa, seu cum Augustini phrasæ, *apta* non sic vero ista, & hoc modo causat velle, cum voluntatem excitet, moveat, & inducat, ut velit. Ad secundum; non est in quo reprehendamus, si hominis conversionem etiam humanæ voluntati tribuamus, immo hoc dicimus, esse unice & tutissime defendendum, alioquin in sui conversione esset tantummodo mortuum & passi-



passivum instrumentum. Aliud est ergo; hominem vocari ad conversionem, aliud converti. Quod vocetur, opus est solius Dei, quod vocatus convertatur, est etiam opus hominis non quidem secundum se sumpti, sed jam vocati & adiutorium habentis ex gratia, quod jam in ante dictis satis demonstravimus. Subsistit propterea adhuc admiratio Augustini, quare hunc trahat, alium non trahat, sicut admirandum mysterium est, quare hunc vocet, alium non vocet. Hoc siquidem totum dependet à Divina voluntate & decreto Dei absoluto, quod tamen satis adimpletur per gratiam congruam, quin ad physicam prædeterminationem confugiamus. Qui igitur non convertitur, non convertitur, quia non vult, qui convertitur, convertitur, quia vult, dispari tamen ratione, nam primus propria libertate & potestate non vult, secundus vero vult propria libertate, sed non propria potestate. Tandem servatur quod dicit Paulus; *Quis te discernit?* Certum enim est, fidelem ab infideli discerni, quia credit, & eum, qui convertitur, discerni ab eo, qui non convertitur; & quia Pelagiani dicebant, credere & converti fieri per proprias vires, ideo non Deus discernerebat, sed homo. Hoc à nobis non asseritur, sed dicimus, ipsam fidem & conversionem haberi quidem ab homine libere credente & se convertente, sed prius per vires gratiæ, Unde nos Deus per gratiam discernit, per quam actus salutares proferimus, & sic gloriari non possumus, quasi à Deo non acceperimus, cum talem gratiam accipiamus, Hæc fuit Apostoli mens in illis verbis, scribebat enim ad Corinth. qui de fide, aliisque operibus bonis, quæ exercebant, gloriabantur. Hæc mens Augustini contra duas Epistolas Pelagiano: cap. 7. Apostoli verba explicantis; *Tanquam, inquit, respondiſſet, discernit me fides mea, propositum meum, meritum meum; Quid enim habes, quod non accepisti, si autem accepisti, quid gloriaris, quasi non acceperis, hoc est, quasi de tuo sit, unde di-*

Tom. II.

*ſcerneris; ergo ille discernit, qui unde diſcernereris, impertit.*

79. Pro sententiæ nostræ complemento, quæ apud aliquos vel ignorantia vel injusto judicio ferme hæreſis appellatur, addam pro ea citari à Ledesma quæst. unica de auxiliis inter Theologos antiquiores, Scot. Alex. Bonavent. Marfil. Gabriel. Gregor. Henricum, Capreol. & Cajetan. Inter recentiores recensentur à Suarez, Sot. Alphons. de Castro, Michael de Palat. Ruardus, Driedo, Stapleton. Corduba, Pighius, alique plures; Immo contenditur hanc docuisse S. Thomam. De horum mente quæſtionem instituere non placet. Hoc certum est, melius & facilius Calvinum, & Lutherum per nostrum systema confutari.

## ARTICULUS X.

*Utrum prædestinatio fiat ante, vel post meritum prævisionem.*

80. **A**D plenam statuti quæſtionis resolutionem juvat etiam propositam difficultatem pendere nec non stabilire, omiſſis aliis, quæ de voluntate Dei prædestinantis dici possent, de quibus Deo auspice in proprio loco scripturi sumus.

Sub aliis terminis proponitur à Doctoribus hæc difficultas inquirentibus, an prædestinationis detur aliqua causa, non quidem consideratæ in executione, constans enim omnium sententia, istam non haberi nisi dependenter à meritis, sed in ordine intentionis. Dum vero prædestinationem audis, ſcias, hanc sumi posse vel per respectum ad primam gratiam, vel per respectum ad perseverantiam finalem & gloriam. Si in primo sensu accipiat, certum est, mere Divino fore beneficio abſcribendam, nec ex parte prædestinati aliquam causam reperiri, quod probat Augustinus cap. 15. exemplo Christi, qui cum sit nostræ prædestinationis exemplar, electus est ad

S

unio-



unionem hypostaticam absque ullis præcedentibus meritis, & sola gratuita Dei dilectione, quod etiam ego dicam in tractatu de Incarnatione; nec immerito ita sentiendum est, *Si enim gratia, jam non ex operibus, alioquin gratia non est gratia*, ait Apost. ad Rom. 11. *Non vos me elegistis, sed ego elegi vos* dixit Christus Joan. 15. Est igitur quæstio de prædestinatione ad gloriam.

81. Certum insuper est, parvulorum prædestinationem ad gloriam non fieri ex prævisione bonorum operum, quæ egissent, si ad ætatem adultam pervenire ipsis datum esset, ut contra Semipelagianos probat August. in lib. de prædestin. Sanct. nemo enim salvus sit propter merita conditionate futura, nec propter hujusmodi demerita damnatur, sed attendenda sunt merita vel demerita absoluta, dicente Paulo ad Corint. 5. *Oportere nos manifestari ante tribunal Christi, ut referat unusquisque prout gessit in corpore suo, sive bonum, sive malum.* Est igitur quæstio de prædestinatione adultorum, & quidem ante vel post prævisa merita comparanda non ex viribus solius liberi arbitrii, sed ex viribus gratiæ, nihil enim hominem mereri posse, quod ad salutem æternam conferat, jam declaratum probatumque est.

82. Tandem in hac re prorsus reiciendus est error Origenis, qui somnatus est, causam motivam nostræ prædestinationis fuisse merita comparata ante unionem animæ cum corpore. Hoc enim falsum omnino esse probant S. Cyril. Alexandr. lib. 1. in Joan. cap. 9. & Justinian. Imperat. ad Mennam Patriarcham Constantinopolitanum, ut habetur in appendice ad V. Synodum, immo damnatum fuit in 6. Synodo art. 10. ubi definitum habemus, animam esse formam corporis, quæ ante corpus producta non fuit, ut legitur in Gen. historia, ubi postquam Adam fuerit de limo terræ formatus, dicitur Deus inspirasse in faciem ejus spiraculum vitæ. Pro omnibus tamen sive rationibus, sive auctoritati-

bus sit textus Apostoli ad Rom. 9. dicentis. *Cum nondum nati fuissent, aut aliquid boni egissent, aut mali, non ex operibus, sed ex vocante Deo dictum est, quia major serviet minori. Jacob dilexi, Esau autem odio habui.* Igitur quæstio est de prævisione meritorum post unionem animæ cum corpore.

83. Quatuor sententias in hac re adinvenimus. Prima est, causam motivam prædestinationis esse præscientiam meritorum. Hanc docent Rubio, Vasq. Turrian. Amic. Pontius, Pennotus. Secunda est omnino opposita, ita ut aliam non agnoscat prædestinationis causam, quam gratuitam Dei benevolentiam. Hæc tribuitur à Thomistis S. Thomæ & à Mastro Scoto, eamque sequuntur communiter Neoterici cum Bellarmino, Petavio, Suarez, quapropter nota hic, nihil ad præsentem quæstionem conferre aut scientiam mediam, aut physicam, prædeterminationem. Tertia duplicem prædestinationem distinguit, unam singularem, ad quam pertinent insignes sanctitate viri, ut Beatissima Virgo, S. Joannes Baptista, Apostoli &c. Aliam communem cæteris hominibus; Illam à solo Divino beneplacito, hanc vero à meritorum prævisione devenire contendit. Pro ista citantur Ocham, Gabriel, Catharin. Quarta tandem secernit Angelos ab hominibus, illos intuitu proprii meriti prævisi, istos ex sola dilectione prædestinari testatur. Ita præ aliis Juvenin. Sed quidquid sit de hac prædestinationis divisione.

84. Dicendum cum prima sententia, in qua Scotus problematicus est, efficacem & absolutam prædestinationem ad gloriam esse post prævisa merita cum gratia comparanda.

Assertum hoc pluribus ex capitibus probandum est; primo quidem ex Sacris Scripturis, deinde Patrum monumentis, tandem rationibus Theologicis. A primis exordiamur. Matt. 25. *Venite, benedicti Patris mei, possidete paratum vobis regnum ab origine mundi.* Sed qua-

re paratum? rationem reddens, subdit, *esuri enim, & dedisti mihi manducare &c.* quam explicationem insinuat Chrysost. super illa verba Matt. 20. *Quibus paratum est à Patre meo*, dicens, *non est meum dare vobis, sed quibus labore ac sudore paratum est.* Perpendatur alius textus ibidem; *discedite à me maledicti in ignem æternum, qui paratus est Diabolo & Angelis ejus; esuri enim, & non dedisti mihi manducare*, ita igitur paratum est Regnum Cœlorum electis propter bona illorum opera, sicut reprobis supplicium propter mala, sed reprobis paratum est supplicium propter prævisa eorum opera mala, ergo etiam electis paratum est Regnum Cœlorum propter prævisa eorum opera bona.

85. Hoc amplius significat Paulus ad Corint. 2. dicens: *Oculus non vidit, nec auris audivit &c. quæ præparavit Deus iis, qui diligunt illum*, quo in textu verba hæc, *qui diligunt illum* juxta communem loquendi sensum causam indicant præparationis, nam si quis diceret, Regem præparasse purpuream vestem in prælio decertantibus, meritum in bello causa foret, propter quam præpararet. Tandem, alia quam plurima prætereundo, Jacobi 2. legitur: *Nonne Deus elegit pauperes in hoc mundo, divites in fide, & hæredes Regni, quod promissit Deus diligentibus se?* Quæ verba juxta contextum melius explicari non possunt, quam dicendo, divitiam seu meritum in fide hujusmodi electionis causam fuisse; ubi duo observanda sunt; Unam, Regni promissionem fieri diligentibus Deum; Alterum, electionem primo fieri ad fidem, deinde ad hereditatem Regni, ut innuatur prioritas ordinis meritum respectu gloria.

86. Hisce, aliisque Scripturæ testimoniis communi responsione occurrunt adversantes Doctores, intelligenda esse de prædestinatione ordine executionis, non intentionis. Ut hujusmodi responsio primo refellatur, devenio ad secundam partem argumenti, idest ad Pa-

trum monumenta, à quibus nostram explicationem accepimus; Clarissime eam tradunt S. Ambrosius & Chrysostom. Primus lib. 5. de fide cap. 6. ad illud Apostoli, *Quos præsciit & prædestinavit*. Inquit, *non enim antea prædestinavit, quam præsciret, sed quorum merita præsciit, eorum præmia prædestinavit.* Secundus vero Hom. 8. in cap. 25. Mat. ait: *O quanta gloria, quante beatitudinis hæc verba sunt? Nec dicit, accipite, sed hereditate quasi propria, quasi paternæ, quasi vestræ, quæ vobis à principio debebantur, nam antequam nati sitis, quia sciebam vos hujusmodi futuros, hæc vobis à me præparata fuerunt.* Quid manifestius afferri potest?

87. Sed quia, etsi aliorum Patrum auctoritates in omni materia magni ponderis esse debeant, illa tamen Augustini præsertim in hac re præhabenda sit; ideo Augustinum, id quod nos asserimus, tradidisse declarabo; quamvis non desint plures Scholæ Magistri, qui cum Petavio & Maldonato candidè fatentur, Sanctum Doctorem admisisse prædestinationem ad gloriam omnino gratuitam, & tamen Augustinum in hac parte defendendum esse, affirmare non trepident.

88. Antequam vero aliquid deponamus, præmittendum est, Sanctum Doctorem duplicem prædestinationem distinguere, unam, præmisso examine eorum, qui eligendi sunt vel rejiciendi, & hæc est secundum justitiam, ut ille videlicet eligatur qui dignus est, reiciatur vero qui indignus; alterum vero nullo præmisso examine, & hæc est secundum gratiam. Ecce illius verba ser. 100. de verbis Evangelii Luc. cap. 10. alias ser. 7. de verbis Domini secundum Mat. tom. 10. ubi ait: *Elegit autem Deus*, sicut inquit Apostolus, *& secundum suam gratiam, & secundum suam justitiam.* Quid est eligere secundum gratiam, nisi omnino gratis sine aliqua prævisione sed juxta suum beneplacitum? Quid eligere secundum justitiam, nisi ea opera eligendo, per consequens prævidendo, quæ secun-

dum suam gratiam erat quisque facturus. Et explicans illud ad Rom. 11. *Reliquia secundum electionem salvæ factæ sunt*. Sic Dominum loquentem inducit. *Ego illos elegi; quia vidi mentes eorum de me præsumentes, non de se*. Amplius idem præclarissimus Doctor lib. 1. ad Simplician. qu. 2. ante medium explicans illud ad Rom. 9. *Cum nondum nati fuissent &c.* Concludit. *Non ergo secundum electionem propositum Dei manet, sed ex proposito electio, idest, non quia invenit Deus bona opera in hominibus, quæ eligat; ideo manet propositum justificationis, sed quia illud manet, ut justificet credentes, ideo invenit opera, quæ eligat ad Regnum Cælorum, nam si non esset electio, non essent electi, nec recte diceretur, quis accusabit adversus electos Dei? Non tamen electio præcedit justificationem, sed electionem justificationis; Nemo enim eligitur nisi jam distans ab illo, qui reicitur, unde quod dicitur, quia eligit nos in ipso ante mundi constitutionem, non video, quomodo sit dictum, nisi præscientia; Hic autem quod ait, non ex operibus, sed ex vocante dictum est ei, quia major serviet minori, non electione meritorum, quæ post justificationem gratiæ proveniunt, sed liberalitate donorum Dei voluit intelligi, ne quis de operibus extollatur. Hic Sanctum Augustinum manifeste loqui de duplici prædestinatione, una ad gratiam, quæ sit ex liberalitate donorum, altera ad gloriam, quæ sit ex electione meritorum, quis inficiabitur?*

89. Testimonium hoc Sancti Augustini Doctores contrarios non mediocriter premit; Unde librum hunc, inquit, compositum esse ab Augustino cum esset adhuc Junior & Presbyter, antequam orta esset hæresis Pelagianorum & Semipelagianorum, coeterum, cum maturæ factus esset ætatis, & Episcopus, se retractasse. Sed hoc perperam omnino dicitur. Perperam primo, libros istos conscriptos dum esset junior, ut enim notat Tournely, fuerunt conscripti ann. 397. dum esset quadragenario major, & jam.

Episcopus. Perperam, Augustinum se retractasse, immo lib. 3. retractat. librum istum recensens, nihil plane ex illa secunda questione corrigendum invenit, & lib. de prædestin. Sanct. cap. 4. de bono perseverant. cap. 21. asserit, Doctrinam in illa contentam sibi à Deo fuisse revelatam, cujus verba à me adducta sunt in hac quæst. num. 32. Nunc addam id, quod cap. 4. lib. 3. retract. inquit. *Vid. tis, quid tunc de fide & operibus sentiebam, quamvis de commendanda Dei gratia laborarem; in qua sententia istos fratres nostros esse nunc video, quia non sicut legere libros meos, ita etiam curaverunt proficere mecum, nam si curassent, invenissent istam questionem secundum veritatem Divinarum scripturarum solutam in primo libro duorum, quos ad beatæ memoriæ Simplicianum scripsi. Tandem S. Augustinus, ut occurrat illis, qui ad ordinem executionis, tam frequenter confugiunt, lib. de prædestin. Sanct. cap. 3. hæc habet in fine. Ex præscientia igitur offensionis, ultionem ut iustus Judex prædestinavit, sicut ex præscientia virtutis prædestinatio solet fieri remunerationis. Atqui ita prædestinat ultionem ordine intentionis, ut non nisi post prævisa merita prædestinet, ut fatentur ipsi contrarii, ergo ita prædestinat remunerationem, ut non nisi post prævisa merita prædestinet.*

90. Quanquam quid plura ad Augustini mentem sincere explorandam adducam? Sanctus Fulgentius ejusdem, discipulus illam explicet; ait autem lib. 1. ad Monim. cap. 24. *Ostensusus Deus quid reddendum præciverit, & quid donandum, prædestinavit illos ad supplicium, quos à se præcivit voluntatis malo vitio discessuros, & prædestinavit ad regnum, quos ad se præcivit misericordiæ prævenientis auxilio redituros, & in se misericordiæ subsequenti auxilio esse mansuros.*

91. Superest modo, ut adductis scripturarum testimoniis, & Patrum momentis, rationes Theologicas pro senten-

rentia nostra proferamus. Primam desumo ex conditione ipsius gloriæ, ad quam quis prædestinatur non tanquam ad donum, sed tanquam bravium & mercedem, quæ sicut hujusmodi retribuitur in tempore, ita ab æterno hujusmodi præparatur. Argumentum hoc vim suam habet, si ab humanis ad Divina conscendamus; Si enim Rex aliquis proponeret præmium aliquod bene certantibus ea lege, ut nullus illud assequeretur, nisi qui victor esset, certe nunquam decerneret alicui præmium conferre, quamvis etiam illum diligere, antequam victorem aut certo præsciret, si tamen præscire posset, aut re ipsa videret; posset quidem illi tribuere arma meliora ad certandum. Cum ergo Deus vitam æternam omnibus proponat ut præmium, eamque promittat legitime certantibus & usque in finem perseverantibus, non potuit non expectare victoriam, ut hujus intuitu præmium conferre decerneret; Sed quia præscius futurorum est, & omnia, tanquam si præsentia essent, videt, fit, ut non expectando victoriam in tempore, sed eam ab æterno prævidendo, ad gloriam tanquam præmium prædestinet. Atque ut verum fatear, quodnam esset hoc Decretum efficax & absolutum gratis prædestinandi ad gloriam, quæ non nisi per merita bonorum operum comparanda est? Ad hæc. Vita æterna nobis, sub conditione promittitur, semper enim subintelligitur conditio, si mandata servemus. *Quasi vero*, dicit Trident. sess. 6. ca. 20. *Evangelium sit nuda & absoluta promissio vitæ æternæ sine conditione observationis mandatorum*. Ergo etiam voluntas Dei, qua nobis vult vitam æternam, est conditionata, si enim promissio est signum voluntatis. etiam conditionata promissio est signum conditionatæ voluntatis, ergo non est voluntas in Deo absoluta dandi æternam vitam, nisi prævisio complemento conditionis, sub qua promittitur.

92. Secundum argumentum desu-

mere placet ex meritis Christi, atque illud breviter ita proponere. Quoscunque Deus prædestinavit, ex meritis Christi prædestinavit, & non utcumque, sed ut unicuique applicandis. *Elegit enim nos in ipso ante mundi constitutionem*, ad Ephes. 1. & act. 4. *Non est aliud sub Cælo nomen, in quo oporteat nos salvos fieri*. Ergo antequam Deus aliquem prædestinaret, Christi meritorum applicationem prævidit, ergo etiam merita prædestinati, quæ ab hujusmodi applicatione tanquam fundamento & præcipua causa meritoria progrediuntur.

93. Tertium argumentum desumo tanquam à posteriori. Regnum Cælorum in nostra positum esse libertate, ideo in oratione Dominica dicimus, *adveniat Regnum tuum*, & Apocalip. 3. legitur. *Tene quod habes, ne alius accipiat coronam tuam*. At si nos Deus ad illud eligeret nulla libertatis nostræ, proinde meritorum ratione inspecta, jam à nostra libertate non penderet, nemo enim, qui semel electus ad gloriam, est in vas honoris, posset se efficere vas contumeliæ, quod tamen falsum esse ait Paulus 1. ad Timot. 2. cum non minus putet, unumquemque emundando se à peccatis posse evadere vas honoris ex vase contumeliæ, quam è contra si à justitia decidat, ex vase honoris evadere posse vas contumeliæ: rursus posset quilibet respondere. Si Deus habet clavem, & ita claudit, ut nemo possit aperire, ita aperit, ut nemo possit claudere, jam si electio mea non pendet à libertate mea, si electus ero, peribo nunquam: & sic argumentum illud tritum. Vel sum prædestinatus, vel non sum, sibi quisque præfigere posset.



## ARTICULUS XI.

*Refelluntur argumenta contraria.*

94. **O**ppones primo ex Sanctis Scripturis, in quibus omnia mala & pericula ab electis propelluntur, & ipsis gratiæ conceduntur beneficia, non ex alio fine, nisi ex absoluta & efficaci intentione ipsis gloriam conferendi, quo dato sic argumentaberis. Prædestinatio est mere gratuita, & prior quacunque meritorum prævisione, si ex efficaci intentione prædestinationis Deus electis gratiæ dona concedit, & omnia mala propellit, atqui res ita se habet, ergo. Prima pars min. ostenditur. Act. 13. *Crediderunt quotquot erat præordinati ad vitam æternam.* In hoc textu præordinatio ad vitam æternam dicitur causa, fidei. Joan. 15. *Non vos me elegistis, sed ego elegi vos, ut eatis, & fructum afferatis* in hoc textu electio est causa fructus. Ad Ephes. 1. *Elegit nos in ipso ante mundi constitutionem, ut essemus Sancti* in hoc textu electio est causa sanctitatis, non sanctitas causa electionis. Ad Roman. 8. *Quos prædestinavit, hos & vocavit, quos vocavit, hos & justificavit, quos autem justificavit, illos & glorificavit.* In textu prædestinatio est causa vocationis, justificationis, & glorificationis, ergo Deus ex efficaci intentione prædestinationis Deus dat electis dona gratiæ, quare si hæc sunt omnino gratuita, à fortiori gratuita erit illa. Prob. secunda pars primæ minoris. Luc. 12. *Nolite timere pusillus grex, quia complacuit Patri vestro dare vobis Regnum.* Nota ly *complacuit.* Et statim inferes, ergo prædestinare ad Regnum est mere gratuita Divina liberalitas. Sap. 4. *Raptus est, ne malitia mutaret intellectum illius, aut ne scitum deciperet animam ejus.* Et rursus; *Consummatus in brevi explevit tempora multa, placita enim erat Deo anima illius, propter hoc properavit educere illum de medio iniquitatis.* Tandem. Matt. 24. *Nisi brevitati fuissent dies illi, non fieret*

*salva omnis caro, sed propter electos breviantur dies illi.* Ex quibus omnibus constat, electos ab hisce periculis ereptos esse, non alia ratione, nisi quia erant prædestinati, ergo.

95. Resp. ne. primam propositionem; ad argumentum transf. maj. nam licet vera sit de intentione efficaci conditionata, non tamen de intentione efficaci absoluta, ne. mi. ad prob. ex nullo textuum adductorum, quod intendunt, evincunt; non ex primo, nam ibi dicuntur quidem credidisse omnes præordinati ad vitam æternam, sed quomodo præordinati sint, non explicatur, immo verosimile non est, omnes qui crediderunt, ad æternam vitam fuisse præordinatos; aliter dici potest, ibi sermonem fieri de præordinatione ad gratiam fidei, quæ potest æterna vita appellari juxta illud Joan. 17. *Hæc est vita æterna, ut cognoscant te solum Deum verum, & quem misisti Jesum Christum.* Non ex secundo, cum etiam in eo sermo non sit de electione ad gloriam, sed ad fidem, vel Apostolatam; manifestum est hoc, quia inter eos, quibus dictum est: *Non vos me elegistis &c.* erat etiam Judas, qui certe reprobus erat, & rursus in contextu legitur: *Elegi vos de mundo, propterea odit vos mundus.* Non poterat autem mundus eos odio habere propter prædestinationem ad gloriam. Non ex tertio; Pariter enim ibi sermo est de electione ad gratiam. Hoc evinco primo quia ignorabat Apostolus, quinam electi essent ad gloriam. Secundo quia scribebat tunc ad omnes illos fideles, qui certe omnes ad gloriam prædestinati non erant. Tertio, quia gratias agit pro vocatione illorum & justificatione, ait enim: *Benedictus Deus, & Pater Domini nostri Jesu Christi, qui benedixit nos in omni benedictione spiritali in Cælestibus in Christo, sicut elegit nos in ipso ante Mundi constitutionem, ut essemus sancti & immaculati in charitate.* Non ex ultimo, etenim respondemus ut supra; nec obstat dici, & glorificavit, nam quo-



quomodo ad glorificationem elegerit, non indicatur; nisi velis cum pluribus Doctoribus, præsertim Estio, nomine glorificationis juxta phrasim græcam non significari æternam gloriam in Cœlis, sed quandam externam illustrationem per dona linguarum, sanitatum, miraculorum & hujusmodi, per quæ Sancti & electi sui etiam apud homines conspicui redduntur. Hæc responsio non placet, etenim fuerunt plures Sancti & finaliter justī, qui tamen apud homines nihil habuerunt hujusmodi. Melius arbitrari meo diceretur, vocationem esse à solo Deo, & hanc esse sine prævisione meritum, justificationem esse à Deo & à consensu creaturæ, & hanc non dari nisi ex prævisione consensu, & ita dicendum de glorificatione.

96. Quantum ad probationem secundæ partis illius minoris; in primo textu non loquitur Christus absolute sed conditionate, revera inter pusillum gregem erat Judas; proponit igitur Christus Apostolis Regnum sub conditione, idest, si bonis operibus Divina adjuvante gratia illud comparare voluerint, & de facto subdit. *Vendite quæ possidetis & date eleemosynam, quasi dicatur.* Complacuit Patri vestro dare vobis Regnum, si tamen hæc opera peregeritis, nec movere nos debet verbum illud *complacuit*. Nam præter explicationem datam dici potest, electionem etiam ad gloriam esse gratuitam & secundum Divinum beneplacitum fundamentaliter & incohesive, non formaliter & ultimate, sicut dicitur ubi de merito condigno pertractabitur. Textus ille Sapient. 4. nihil probat, nam raptum fuisse justum ex hac vita non infert ante prævisam merita fuisse prædestinatum, immo ex sequentibus contrarium colligi posse videtur, inquit enim, *consummatus in brevi explevit tempora multa, placita enim erat &c.* Sed est placita propter gratiam & merita, ergo. In textu postremo sit sermo non de prædestinatione ad gloriam, sed de obsidione Jerosoly-

morum, quæ si diutius durasset, etiam electi ex Judæis fame gladioque periissent. Quod si etiam de salute spiritali sermo esset, profecto de prædestinationis ad gloriam sine meritum prævisione non posset intelligi, nam posita absoluta prædestinatione, sive breviati fuissent dies illi, sive non, salvi effecti fuissent, cum decretum absolutum irritum esse non possit.

97. Instabis. Atqui etiam electio ad gloriam æternam omnino gratuita, est, ergo. Prob. sub. mī. multiplici Scripturæ testimonio. Primo ex illo Apost. ad Rom. 9. *Cum nondum nati fuissent, aut aliquid boni egissent aut mali (ut secundum electionem propositum, Dei maneret) non ex operibus sed ex vocante dictum est ei, quia major serviet minori, sicut scriptum est Jacob dilexi, Esau autem odio habui. Quid ergo dicemus? Nunquid iniquitas apud Deum? absit. Moyses enim dicit, miserebor cujus misereor, & misericordiam præstabo, cujus miserebor.* Rursus ibidem. *Igitur non volentis, neque currentis, sed miserentis est Dei.* Et infra. *O homo, tu quis es, qui respondeas Deo? Nunquid dicit signentum ei, qui se finxit; Quid me fecisti sic? An non habet potestatem figulus luti ex eadem massa facere aliud quidem vas in honorem, aliud vero in contumeliam?* Tandem post exemplum Pharaonis, qui induratus à Deo fuerat, concludit. *Ergo cujus vult misereatur, & quem vult indurat.* Nulla est ergo causa prædestinationis nisi misericordia Dei.

98. Resp. ne. ant. Primus textus jam à nobis explicatus fuit juxta S. Augustini Doctrinam num. 88. Si tamen illum admittunt adversarii juxta sententiam suam, pari ratione debebunt admittere, etiam reprobationem esse ante prævisam demerita, cum æquali modo dicatur. *Aut aliquid boni egissent aut mali, Jacob dilexi Esau autem odio habui, &c.* quod tamen nemo Catholicorum admittit; loquitur ergo Apostolus dum-

taxat de inæquali distributione gratiæ & donorum in hac vita.

Sed ad uberiores doctrinam duplex-modus perpendatur, quo textus ille posset intelligi; vel enim intelligitur juxta literam, vel juxta spiritum. Si primum, ibi sermo est de duobus populis Israelitico & Idumæo, Rebecæ enim, Gen. 25. à Domino petenti, quare parvuli, in utero colliderentur, responsum fuit. *Due gentes sunt in utero tuo, & duo Populi in ventre tuo dividuntur, Populusque Populum superabit, & major serviet minori.* Et cum dictum fuit *Jacob dilexi, Esau odio habui* non ad prædestinationem ad vitam æternam vel reprobationem spectat, sed ad bona & mala hujus sæculi, etenim Malacchiæ 1. cum dixisset Deus, *Jacob dilexi &c.* explicat dilectionem & odium hisce verbis. *Posui montes ejus, idest Esau in solitudinem, & hereditatem ejus in dracones deserti.* Dilexit itaque Jacob, quia dedit ei terram lacte & melle fluentem, odio habuit Esau, quia dedit ei terram sterilem, & desertam; Si secundum, sermo est de vocatione ad veritatem Evangelii, & fidem Christi, quæ procul dubio omnino gratuita est; atque hoc faciebat Apostolus, ut superba Judæorum corda reprimeret, qui suis legis operibus ita gloriabantur, ut se merito proprio ad fidem vocatos esse arbitrarentur, atque iniquo animo ferrent, gentiles in eo beneficio sibi pares effectos esse. Hæc est Sancti Augustini interpretatio, cujus lib. 1. ad Simplic. qu. 2. verba sunt ista: *Intentionem Apostoli, quæ per totam epistolam viget, tenebo quam consulam.* Hæc est autem, ut de operum meritis nemo gloriatur, de quibus audebant Israelitæ gloriari, quod data sibi legi servissent, & ex hoc evangelicam gratiam tanquam debitam meritis suis percipissent, quia legi serviebant. Unde volebant eandem gratiam dari gentibus tanquam indignis, nisi Judaica Sacramenta susciperent.

99. Textus alii intelliguntur de

prædestinatione ad fidem & gratiam? Non est igitur volentis neque currentis, sed Dei miserentis, quia ipsum salutariter velle & currere ex præveniente & adjuvante misericordia & gratia descendit. Ex eadem massa facit Deus alios vas in honorem ipsis suam gratiam & sua dona præstando, alios in contumeliam, ipsis pro sui libertate & dominio gratiam non largiendo; in quo etiam sensu cujus vult miseretur, & quem vult indurat, quæ postrema verba non sunt accipienda positive, sed negative.

100. Post ea, quæ ex Scripturis adversantes opponunt, plura Augustini loca, quibus sententia nostra rejiciatur, congerere contendunt. Sed quia nimium prolixè me gererem, nec quidpiam facerem quam ea quæ apud Petavium & Tornellium, in meam paginam advocare, ideo, quo pacto explicandus sit egregius Doctor, regulam tradam. Ubicumque igitur videtur, prædestinationem sine ullis prævisis meritis edocere, vel loquitur contra Pelagianos & Semipelagianos excludendo nimirum prævisionem meritum, quæ sunt sine viribus gratiæ ex solis naturæ conatibus, vel de prædestinatione ad gratiam non ad gloriam, vel etiam si ad gloriam, intelligi debet in radice, vel loquitur de omnibus prædestinationis effectibus, non determinando tamen ordinem causalitatis inter ipsos. Cæterum; ut amplius videamus, Sanctum Augustinum nihil nobis oppositum tradidisse attendamus quod ipse in lib. de grat. & lib. arb. ait cap. 6. *Pelagiani dicunt, illam gratiam quæ datur in fine, idest æternam vitam, meritis nostris precedentibus reddi, respondendum est eis; Si merita nostra sic intelligerent, ut etiam ipsa dona Dei esse cognoscerent, non esset reprobanda ista sententia.* Sed nos ita dicimus prædestinationem ad gloriam fieri dependenter à prævisione meritum, quæ sunt dona Dei, quia sunt ex Dei gratia, ergo Augustinus sententiam nostram non reprobatur, immo ut probavimus, appro-

approbat. Eodem modo explicamus Prosperum, Fulgentium, quoslibet.

101. Oppones ratione Theologica. Prædestinatio ad gloriam est voluntas efficax dandi gloriam, sed voluntas efficax dandi gloriam prior est cujuscunque meriti prævisione & omnino gratuita, ergo. Prob. mi. Voluntas efficax dandi gloriam est prior voluntate efficaci dandi gratiam, sed ita, est prior cujuscunque meriti prævisione &c. ergo. Mi. patet, cum meritum nullum dari possit aut prævideri nisi dependenter à gratia. Prob. maj. Voluntas efficax finis prior est voluntate efficaci mediorum, juxta illud. *Finis primus in intentione*, sed voluntas efficax dandi gloriam est voluntas finis, voluntas efficax dandi gratiam est voluntas mediorum, ergo. Argumentum hoc innititur illo principio. Omnis ordinatè volens prius vult finem quam media.

102. Resp. conc. maj. ne. mi. illius probatio vera est de voluntate efficaci conditionata dandi gloriam, non de efficaci absoluta, & voluntas efficax finis prior est voluntate efficaci mediorum, quando media ad finem dependent à sola voluntate illius, qui finem intendit, non quando dependent etiam ab alio. Voluntas igitur efficax dandi gloriam, vel sumitur conditionatè, vel absolutè, si in primo sensu, transmitto priorem esse prævisionem meritorum, quia continetur in hac propositione. Volo dare gloriam, si Petrus v. g. consensum dabit gratiæ. Si in secundo sensu nego; & ratio est, quia hujusmodi absoluta voluntas non solum habetur ex collatione gratiæ, sed etiam à consensu creaturæ prævisio, quare voluntas efficax finis prior est voluntate mediorum, quando omnia media conducentia ad finem dependent à voluntate illius, qui vult finem, non ita, si aliquod medium dependet etiam à voluntate illius, cui finis proponitur. Sic autem res se habet in casu nostro, nam gloria, quæ finis est, non solum pendet à Deo volente gratiam tanquam

medium, sed etiam à creatura libere gratiæ consentiente, ideo prævideri debet istius consensus, & per consequens meritum, ut voluntas finis dicatur efficax non solum conditionatè sed etiam absolutè. Ex hac doctrina explica principium illud à quo desumebatur argumentum; cui respondet Ocham. in 1. dist. 41. qu. 1. in fine duplicem finem distinguens. Unus, inquit, est finis, quem quis sibi assequendum proponit; Alius vero, quem quis proponit alteri, & liberè assequendum relinquit. Primus finis prior est in intentione quolibet medio, & sic v. g. qui vult sibi justificationem & merita ex intentione gloriæ, prius intendit gloriam, quam ipsam justificationem & merita. Secundus vero finis posterior est medio conducente ad finem, quia qui vult finem, quem alter liberè assequatur, nequit absolutè efficaciter velle, nisi videat, utrum alter positurus sit media, quæ ad finis assequutionem prærequiruntur. Ita autem se habet æterna gloria, quæ non est finis ipsius Dei, sed finis, quam Deus creaturæ proponit, ideo &c. Præterea. Adductum argumentum solvitur à pluribus dicentibus, illud esse verum de gloria, ut finis mediorum est, non ut merces est, nam sicut Deus non potest intendere poenam nisi prævisâ culpa, ita non potest intendere præmium nisi prævisô merito. Dux priores responsiones aptiores sunt, ex quibus solvuntur omnia argumenta, quæ ab adversariis congeruntur.

103. Quod autem dico de prædestinatione ad gloriam, dico etiam de perseverantia finali, quæ non datur nisi prævisâ creaturæ cooperatione, & quæ, licet sit magnum donum, suppliciter emereri potest, licet cum datum fuerit amitti contumaciter non possit, ut ait August. de bono perseverant: cap. 6. Quod si quis contenderet perseverantiæ donum non posse esse sub merito nec quidem congruo, nunc transmittam, sed ne argumentum inde inferant, ergo sicut

datur perseverantia finalis sine ulla meritorum praevisione, ita etiam datur praedestinatio ad gloriam; nam in hoc discrimen est, quod perseverantia finalis in eo sensu in quo non est sub merito, à sola Dei voluntate progreditur juxta definitionem Tridentini sess. 6. cap. 13. ubi ait. *Quod donum aliunde haberi non potest, nisi ab eo, qui potens est cum, qui stat, statuere ut perseveranter stet, & cum, qui cadit, restituere.* Et certe à sola Divina providentia & misericordia pendet, nunc hominem ex hac vita migrare, cum justus est, è contra aeterna gloria pendet tum à Dei voluntate, tum à meritis creaturae, sic enim fuit à Deo statuta & propolita, qui decedentibus in gratia promissit beatitudinem tanquam coronam, non tamen justis promissit finalem perseverantiam; ideo hæc esse potest omnino gratuita, si passive sumatur, non illa. Aliter etiam dici posset. Perseverantia finalis vel sumitur prout est conjunctio gratiae cum morte & sic non est sub merito propter dicta, vel sumitur prout supponit gratiam conjungendam cum morte & sic cadit sub merito, idest sub opere creaturae, sicut cadit ipsa justificatio.

104. Finem imponat huic difficultati S. Franciscus Salesius, qui in Epist. ad Patrem Leonardum Lessium data 27. Augusti ann. 1618. assertum nostrum hisce verbis confirmat. *Sententia illa antiquitate, suavitate, scripturarum, auctoritate nobilissima de praedestinatione ad gloriam post praevisa opera, sane mihi gratissima fuit, qui nimirum eam semper ut Dei misericordiae ac gratiae magis consentaneam, veriore, ac amabiliorem, existimaui, quod etiam tantisper in libello de amore Dei indicavi &c.*

## ARTICULUS XII.

*An Deus conferat omnibus auxilia sufficientia ad salutem.*

105. **M**ultifariam dividenda est praesens difficultas, nam cum inter omnes homines reperitur inaequalitas peccatorum, videndum est, si dentur aliqui hujusmodi auxiliis sufficientibus carentes. Porro inter peccatores, aliqui sunt, qui aliquando peccant, aliquando poenitentiam agunt, aliqui peccant & poenitentia augendo in peccatis persistunt & voluntantur, aliqui, qui nondum ad fidem pervenerunt, sed acriter fidei mysteria rejiciunt & pernegant, & vocantur infideles positive; aliqui, qui non credunt, quia non sunt eis propolita mysteria; & sunt infideles negative. Tandem aliqui, qui nondum vel ad usum rationis pervenerunt, vel in matris utero mortui sunt sine baptismate. De hisce omnibus resolvenda res est, quæ ut ex omni capite pertractetur, expedit prius, quod in sequenti paragrapho inquiritur contra Jansenium stabilire.

## §. I.

*An in Deo sit vera & sincera voluntas salvandi omnes. Et Christus pro omnibus & singulis mortuus sit.*

106. **D**uplicem videor difficultatem proponere, una tamen est, nec quod primo inquiritur, sine secundi definitione decerni potest, ac pertractari, & miror, à veteribus Theologis rem ita peractam esse, ut de voluntate Dei salvandi omnes perquirent, de Christi vero morte nihil declararent, cum tamen Apostolus 1. ad Timot. 2. utrumque simul commemoret, immo Divinae voluntatis omnes salvos faciendi, unicam in Christo Jesu Dei & hominum mediatore rationem agnoscat & fateatur; ait enim. *Qui omnes homines vult sal-*



*salvos fieri, & ad agnitionem veritatis acnre, Unus enim Deus, Unus & mediator Dei & hominum Christus Jesus, qui dedit redemptionem semetipsum pro omnibus.* Porro ex his verbis confurgit difficultas; nam primo de qua voluntate loquatur Apostolus clarum non est, & quo pacto sit intelligendum verbum illud *omnes* non constat, cum Augustinus illud aliquando coarctet ad solos prædestinatos explicando per distributionem accommodam, ita ut sensus sit, neminem salvari, nisi quem Deus vult salvare, ut habet in Ench. cap. 103. to. 3. & de prædestin. Sanct. cap. 8. de correp. & grat. cap. 14. lib. 4. contra Julian. cap. 8. & ep. 107. ad Vitalem; aliquando vero dicat, intelligendum esse non pro singulis generum, sed pro generibus singulorum, ita ut Deus velit de quolibet hominum statu, sive Judæi sint, sive Gentiles, sive divites sive pauperes, sive mares sive fœminæ, aliquem saluum fieri, ut pariter habet in locis superius citatis.

107. Prætermiſſis in hac re omnibus Pelagianorum ac Semipelagianorum erroribus asserentium, Deum velle omnes homines salvos fieri, si velint, sed hanc voluntatem solis naturæ viribus & conatibus, vel initio fidei tribuebant, de his enim satis dictum est; docent Calvinistæ, voluntatem Dei omnes salvos faciendi ex Adami culpa fuisse suspensam, & ita neque Christum pro omnibus omnino mortuum esse, quod & tradunt Janseniani iisdem fundamentis innixi, nimirum, quia omnis Dei voluntas efficax est, nec sine maximo infinitæ Divinæ potestatis detrimento inefficax ex creaturæ vitio admitti potest. Sed etiam inter Catholicos non est eadem sententia; Siquidem plures, ut Zumel, Bannez, Alenf. & Marfil. penes Gonzalez inquirunt, hanc voluntatem non esse actu & formaliter in Deo, sed solum metaphoricè & signi. Plures vero admittentes, hanc voluntatem esse antecedentem & beneplaciti, asserunt,

Tom. II.

eam versari circa media, quæ salutem antecedunt, non vero directè & immediatè circa ipsam salutem, pro qua opinione citantur Gabr., Maj., Durandus, immo etiam ipse Scotus. Rursus alii opinantur, voluntatem istam esse solius complacentiæ, pro quo dicto afferuntur Vasquez & Turrian. Alii tandem defendunt, Deum velle salutem omnium hominum voluntate antecedente & beneplaciti, quæ sit vera & sincera positivè in Deo, & hoc pacto etiam Christum pro omnibus & singulis mortuum esse. Cum istis.

108. Dicendum primo. Deum voluntate antecedente & beneplaciti velle omnes & singulos homines salvos fieri. Si à me petis hujusmodi voluntatum explanationem, à te peto ea legi, quæ dicam in tractatu de Deo Uno. Hujus etiam primi dicti probationem præteribo; pendet enim potissimum ex eo, quod probetur, Deum omnibus dare auxilia sufficientia ad salutem, & Christum pro omnibus & singulis mortuum esse. Primum demonstrabo post ista. Ut vero secundum ostendam.

109. Dicendum secundo. Christum pro omnibus & singulis mortuum esse.

Atque in primis mortuum non esse pro solis prædestinatis, in quo puncto est tota controversia, præter alios Scripturæ textus manifestum fit ex illo Jo. 17. *Non pro eis rogo tantum, sed & pro iis, qui credituri sunt per verbum eorum in me.* Et rursus. *Quos dedisti mihi custodiri, & nemo ex eis perit, nisi filius perditionis.* Ex quibus argumentum ita conficitur. Christum mortuus est pro iis omnibus, qui in ipsum credituri erant, & quos ipsi dedit Pater, sed non solum prædestinati in ipsum credituri erant, nec illos tantum dedit ipsi Pater, ut constat, ergo. Præterea ad Rom. 8. legitur: *Si Deus pro nobis, quis contra nos? qui etiam proprio filio suo non pepercit, sed pro nobis omnibus tradidit illum.* Manifestum est autem nos omnes non fuisse prædestinatos.

T 2

110. Ista



110. Ista porro fuit omnium Sanctorum Patrum sententia. Augustin. tract. 4. in Joan. loquens de Judæis ad Christum non conversis inquit. *Populi autem spernentes propter superbiam suam humilitatem Dei, crucifixerunt Salvatorem suum & fecerunt damnatorem suum.* Fuit igitur Christus etiam eorum Salvator, ergo etiam pro illis mortuus est. Et in ps. 68. de Juda proditore ait: *Projecit pretium argenti, quo ab illo Dominus venditus erat, nec cognovit pretium, quo ipse à Domino redemptus erat.* S. Hieronym. in Comment. 2. ad Corint. cap. 5. super illa Apostoli verba: *Christus pro omnibus mortuus est.* Hæc habet. *Solus inventus est, qui ut immaculata hostia pro omnibus, qui erant in peccatis mortui, offerretur; Atque in epis. ad Occan. Mentitur Joannes Baptista & digito Christum & voce demonstrans; Ecce agnus Dei, ecce qui tollis peccata mundi, si sunt adhuc in hoc sæculo, quorum Christus peccata non tulerit.* Idem docent Ambros. lib. de Paradiso cap. 8. lib. 2. de Cain & Abel cap. 3. lib. 3. de offic. cap. 3. Cyprian. tract. de opere & eleme. ubi Dæmonem adversus eos, qui æternis suppliciis addicti sunt, ita loquentem inducit. *Ego pro istis, quos mecum vides, nec alapas accepi, nec flagella sustinui, nec crucem pertuli, nec sanguinem fudi, nec familiam meam pretio passionis, & cruoris redemi &c.* Quæ autem non fecit Dæmon, fecit Christus &c.

111. Liceat tamen paulisper aliquantulum regredi, atque ut magis ostendam contra Janseñum, Christum non solum mortuum esse pro electis, aliorum vero salutem neglexisse, sicut Dæmonis neglexit liberationem, duo Scripturæ testimonia proferam. Illud in primis quod scribit Apost. 2. ad Corint. 5. *Dedit redemptionem semetipsum pro omnibus nobis, & unus pro omnibus mortuus est, sicut omnes mortui sunt, & omnes in unum peccaverunt.* Super quæ verba August. contra Jul. lib. 4. cap. 9.

inquit. *Apostolus unum dixit fuisse, in quo omnes peccaverunt, in illo autem mortui sunt omnes, ut moreretur alius unus pro omnibus.* Argumentor. Sed in uno omnes & singuli mortui sunt, ergo unus pro omnibus & singulis mortuus est. Secundum est aliud, quod legitur Luc. 25. ubi Christus Patrem oravit dicens: *Pater dimitte illis, quia nesciunt, quid faciunt,* constat autem non omnes crucifixores fuisse electos. Hinc ab Innocentio X. damnata fuit hæc Janseñii propositio. *Semipelagianum est dicere, Christum pro omnibus omnino hominibus mortuum esse, aut sanguinem fudisse.*

112. Juxta Scripturarum & Sanctorum Patrum doctrinam plures non defuerunt Conciliorum definitiones. In Arelaten. ann. 475. post lectam & approbatam epis. Fausti Regien. Episcop. ad Lucid. Presbyt. habetur: *Anathema illi, qui dixerit, quod Christus non pro omnibus mortuus sit, nec omnes homines salvos esse velit.* In Mogunt. 2. sub Raban. Archiepis. ann. 848. damnatus fuit Gotescalc. qui veterum Prædestinatorum errorem excitaverat. Tandem, ut omnia, quæ fortasse in dubium revocari possent, nec hujusce loci est probare, prætereamus, sufficiat Trident. quod sess. 6. de justific. cap. 2. dicit: *Missum à Patre Christum, ut & Judæos, qui sub lege erant, redimeret, & gentes, quæ non sciebantur justitiam, justitiam aprebenderent, atque omnes adoptionem, filiorum reciperent.* Hunc proposuit Deus propitiatorem per fidem in sanguine ipsius pro peccatis nostris, non solum autem pro nostris, sed etiam pro totius mundi.

113. Fuit igitur & est in Deo vera & sincera voluntas omnes & singulos salvandi, & pro omnibus & singulis mortuus est Christus; & quidem voluntas hæc fuit directè, & immediatè ad salutem æternam, nec solum ad aliquam media, quod clarum est, si perpendamus, media non esse elegibilia nisi propter finem, immo finem prius intentum esse, quam quodlibet medium. Quod si hæc

Divina voluntas & Christi redemptio in solis prædestinatis suum effectum consequitur, non potest inde inferri, ergo tantum istos vult salvos fieri, & tantum pro istis Christus mortuus est. Hoc siquidem est verum de voluntate absoluta, & consequente efficaci, non de antecedente & conditionata, quam solum nos propugnamus, & quam ex mente Patrum & Conciliorum magis ostendimus. S. Hieronym. in cap. 1. epist. ad Ephes. de voluntate Dei ita loquitur. *Vult salvare omnes, & in agnitionem veritatis venire, sed quia nullus absque propria voluntate salvatur, vult nos bonum velle, ut cum voluerimus, velit in nobis & ipse suum implere consilium.* S. Ambros. in ps. 72. *Venit Christus ut peccatum mundi tolleret, vulnera nostra curaret, sed quia non omnes medicinam expetunt, sed plerique refugiant, ideo volentes curat, nec adstringit invitos.* S. August. tract. 12. in Joan. *Quantum in medico est, sanare venit agrotum; Ipse se interimit qui præcepta medici servare non vult; Venit Salvator ad mundum; quare Salvator dictus est mundi nisi ut salvaret mundum, non ut judicaret mundum? Salvare non vis ab ipso? ex te judicaberis.* Sed quia nimium diuturnum esset omnia Sancti Augustini testimonia proferre, ejus mentem fidelissimus discipulus Sanctus Prosper exponat; ait autem præter multa in respon. ad 2. objectionem. *Sincerissime credendum, atque profitendum est, Deum velle, ut omnes homines salvi fiant, siquidem, Apostolus, cujus ista sententia est, sollicitissime præcipit, quod in omnibus Ecclesiis piissime custoditur, ut Deo pro omnibus hominibus supplicetur, ex quibus, quod multi percant, percuntium est meritum, quod multi salvantur, salvantis est donum.* Ex qua auctoritate sic. Pro illis omnibus mortuus est Christus, pro quibus orandum est, & orat Ecclesia, atqui pro omnibus & singulis orat Ecclesia, & orandum inquit Apost. 1. ad Timot. 2. ergo.

114. Ex hisce omnibus apparet tur-

pissime Jansenium errasse, neque errori suo suffragari quod sæpissime repetit, idest Christi passionem & sanguinem, fuisse pro omnibus, & singulis quantum ad valorem & sufficientiam pretii, non tamen valorem & pretium, à Christo fuisse exhibitum & Deo Patri oblatum; etenim in adductis textibus sermo est de voluntate liberandi, redimendi, salvandi, quod servari non potest per solam sufficientiam, & pretii valorem, sicuti quis non diceretur velle captivum liberare, si valorem pecuniæ sufficientem in arca contineret, & animum non haberet paratum in libertatem captivi pecuniam impendendi; immo quantum ad se attinet, non impenderet obice, tantum appositum ex parte alterius. Est propterea hac voluntas Dei efficax ex parte sui effectum obtentura, nisi creatura resistat; quod quidem apertissime insinuat Trident. sess. 6. cap. 13. ubi habet. *Quamvis nemo sibi aliquid de ea absoluta certitudine sibi polliceatur, tamen in Dei auxilio firmissimam spem collocare & reponere omnes debent, Deus enim, nisi illius gratiæ defecerint, sicut capit opus bonum, ita perficiet.* Quod si non perficit, Divinæ voluntatis defectui aut imbecillitati tribuendum non est, sed humani arbitrii vertibilitati ac malitiæ; Sicut si quis, sole mundum illuminante, clauderet oculos, non soli culpæ vertetur, sed oculos claudenti, si non videret; Ex alia parte nec Deus debet, nec Deus vult arbitrii libertatem adimere, ut statuta providentia servetur, & ratio meriti vel demeriti non auferatur. Ut enim ait S. August. lib. de Spir. & lit. cap. 33. *Vult Deus omnes homines salvos fieri, non sic tamen, ut eis adimat liberum arbitrium, quo vult vel bene vel male, utentes justissime judicentur.* Porro ex hoc universali judicio, quod Christo reservatum est, alia possent argumenta, proponi. Sed nos expositis contenti sumus.

## §. I I.

*Refelluntur argumenta in oppositum.*

115. **O**ppones 1. Voluntas Dei salvandi omnes vel non est efficax, vel non est sincera, ergo. Prob. ant. Si voluntas Dei salvandi omnes esset efficax & sincera, omnes salutem assequeretur, sed hoc est falsum, ergo. Prob. maj. Omnes salvarentur, si nullus impedimentum apponeret, sed si voluntas Dei esset efficax & sincera, nullus apponeret impedimentum, ergo. Prob. mi. Si voluntas Dei esset efficax & sincera, daret auxilia ad salutem necessaria, per quæ nullus impedimentum apponeret; ut enim quis dicatur sincere & efficaciter velle aliquem finem, dat ea omnia, quæ ad finem prærequiruntur, ita ut per ipsum non stet, ergo si &c. Et revera quod omnes non salvantur, à Deo provenit, qui cum dare posset auxilia efficacia, noluit dare.

Confir. Voluntas, quæ sit efficax conditionate, si seria & sincera sit, non potest admitti in eo, in cuius potestate est adimplere conditionem, sed in Dei potestate est adimplere conditionem, qua omnes salvarentur, ergo. Maj. constat, quia si hæc voluntas non conjungitur cum effectu, ideo est, quia non vult, si autem non vult, quomodo est sincera & seria? Rursus hujusmodi voluntas antecedens pugnare videtur cum voluntate consequenti, sic enim Deus vellet, & nollet omnium salutem.

116. Respond. argumentum hoc excludere omnem voluntatem Dei conditionatam & ex parte sui efficacem, quam tamen dari necessum est ex dictis de scientia Dei. In forma: ne. ant. ad prob. omnes propositiones veræ sunt de voluntate seria & sincera absoluta & consequente, falsæ de voluntate seria & sincera conditionata & antecedente, ad quam probandam seriam & sinceram satis est, Deum dare auxilia sufficientia ad salutem, quibus habitis non attinet

ad Deum impedimentum auferre, sed ad creaturam, quare si non auferatur, non Deo vertendum, sed creaturæ, quæ auxiliis sufficientibus, cum possit uti, non utitur. Hoc magis valet in scientia mea negante gratiam ab intrinseco efficacem.

Ex his patet quid respondendum: argumento in confirmatione posito; negatur enim major; ad prob. voluntas hæc non conjungitur cum effectu, quia non vult consequenter, non quia non vult antecedenter, & ideo voluntas hæc non est seria & sincera consequenter, est tamen antecedenter. Quare autem voluntate consequente nolit, maximum mysterium est, quod investigandum non esse monet Augustinus, de quo Sanctus Prosper in resp. ad 14. objectionem inquit. *Cur autem illum retineat, illum non retineat, nec possibile est comprehendere, nec licitum vestigare.* Et libro de vocat. gent. cap. 20. sive sit Properi sive alterius Doctoris, legitur. *Verumtamen de hac altitudine discretionis Dei non conturbabitur cor humilitatis nostræ, si firma & stabili fide omne iudicium Dei justum esse credamus, nec appetamus habere cognitum, quod voluit esse secretum, & ubi investigari non potest, quare ita iudicat, sufficiat scire quis iudicet.* Sed plura non proferam, satis, ubi de gratiæ efficacia, dictum est, si quod divisim dictum est, simul colligatur.

Patet insuper hanc Dei voluntatem antecedentem non opponi consequenti, tanquam si Deus velit & nolit. Non pugnabat per Jansenium in statu naturæ innocentis & respectu Angelorum, quia juxta ipsum volebat Deus omnes Angelos salvos fieri, qui tamen omnes salvi facti non sunt, erat ergo illa voluntas antecedens, consequens non erat. Ratio autem hujus est, quia voluntas antecedens, ut dicam in tract. de Deo uno, fertur in hominem salvandum absolute & omnibus personæ circumstantiis præcisè non attento merito vel demerito, assensu vel dissensu creaturæ, voluntas vero

consequens fertur in hominis salutem, attentis omnibus circumstantiis, & sic bene operantem usque in finem vult salvare, male operantem in fine damnare vult & punire. Utriusque exemplum, afferunt Doctores, & ipse S. Th. 1. p. q. 19. art. 6. ad 1. hisce verbis. *Unumquodque secundum quod bonum est sic est volutum à Deo; Aliquid autem potest esse in prima sui consideratione, secundum quod absolute consideretur, vel bonum vel malum, quod tamen prout cum aliquo adjuncto consideratur, quæ est consequens consideratio ejus, è contrario se habet; Sicut hominem vivere bonum est, & hominem occidi est malum secundum absolutam considerationem; Sed si addatur circa aliquem hominem, quod sit homicida, sic bonum est cum occidi, & malum est cum vivere; Unde potest dici ( ecce exemplum ) quod Judex justus antequam vult hominem vivere, sed consequenter vult homicidam suspendi, similiter Deus vult omnem hominem salvari, sed consequenter vult quosdam damnari secundum exigentiam suæ justitiæ.* Dixi supra, omnibus persona circumstantiis præcisè ne inferret Janfenius, ergo præcisè circumstantia peccati Originalis vult Deus omnes homines salvos fieri; siquidem peccatum Originale non est circumstantia personæ, sed naturæ; & homo consideratus sine hac circumstantia est homo in abstracto, & merum ens rationis, cum seclusa Dei ordinatione & decreto homo esse nequeat sine tali peccato, ut suppono.

117. Dices. Si salvare hominem præcisè omnibus circumstantiis personalibus bonum est, etiam salvare hominem cum talibus circumstantiis bonum est, ergo si ea ratione vult omnes salvare voluntate antecedente, vult etiam voluntate consequente, ergo omnes salvarentur. Sed contra ne. secundam partem præced. antec. Velle enim salutem omnium hominum secundum se est quid bonum, nec est majoris aut saltem æqualis boni impeditivum, at velle eorundem salu-

tem etiam attentis circumstantiis voluntate consequenti esset quid impeditivum alterius boni reluctantis, vel in effectibus Divinæ justitiæ, vel in varietate Divinæ providentiæ etiam in ordine gratiæ, vel etiam in majore gratiæ æstimabilitate, orta ex eo, quod non omnibus conferatur, proinde &c.

118. Ob. 2. Primo quia voluntas illa generalis & antecedens est omnino sterilis & otiosa, cui nullus correspondet effectus & operatio, quod quidem, etiam declaratur exemplo Judicis juxta mentem S. Th. quamvis enim Judex velit, hominem vivere, quatenus homo est, vult tamen eum mori, quatenus reus homicidii est, nec ulla illi media suppeditat, quibus possit mortem à se avertere, ergo. Secundo. Hujusmodi voluntas antecedens potius velleitas appellanda est, quam voluntas teste S. Thom. 1. p. qu. 19. art. 6. ad 1., sed nulla velleitas in Deo admittenda est, ergo. Tercio. Illa particula *omnes* in textu Apostoli omnes & singulos homines non complectitur, sicut enim, dum dicitur Gen. 6. *Omnis caro corrumperat viam suam.* Et ps. 31. *Omnes declinaverunt, simul inutiles facti sunt* non inferitur, omnes & singulos fuisse injustos, ita &c.

119. Resp. ne. ant. ad prob. licet non correspondeat collatio gratiæ efficacis, correspondet tamen collatio auxiliorum sufficientium. Pro exemplo Judicis, quod ad rem explicandam aptum est, dico, non in omnibus parum esse rationem. Deus enim provisor est generalis, & imponens præcepta, quæ servantur, ne dicatur impossibilia præcipere, omnibus conferre debet ea media, per quæ possit illa servare, per consequens comparare salutem. Hac de re voluntas antecedens, per quam Deus vult omnes homines salvos fieri, comparatur etiam voluntati mercatoris, qui imminente tempestate vult merces servare, & tamen voluntate consequente illas projicit, mercator tamen adhibet, quantum ad se attinet omnem diligentiam



tiam sufficientem ad illas conservandas, ergo etiam Deus, quantum ad se spectat, præbet omnia media; ut omnis homo salvus fiat, modo tamen à nobis exposito.

Ad 2. si hæc voluntas antecedens consideretur comparative, idest comparatur voluntati consequenti, velleitas dici potest, si autem consideretur absolute & secundum se, est vera & sincera voluntas, ideo docet S. Th. 1. p. qu. 19. art. 6. voluntatem antecedentem esse, secundum quid, non vero simpliciter, idest conditionatam, non absolutum.

Ad 3. fateor, particulam *omnes* non semper pro singulis accipi, ut constat ex textibus adductis aliisque quam pluribus, attamen explicari debet juxta circumstantias textus, juxta Ecclesiæ consensum, juxta Patrum explicationem, ut cum dicitur: *Omnes in Adam peccaverunt* ly *omnes* complectitur omnes & singulos præter Beatissimam Virginem, pro qua specialis militat ratio; & jam pro hac re adduxi Sanctum Augustinum num. 111.

120. Plura opponuntur ex doctrina Sancti Augustini, quæ tamen explicari debent de voluntate consequente, efficaci, & absoluta, non de antecedente, & efficaci quidem ex parte Dei, sed conditionata, & quamvis textum Augustinus explicaverit, sicut supra dictum est, non tamen dixit, ita explicari debere, sed solummodo posse. Ut autem explicationem nostram vanam non esse demonstramus, præter rationes à nobis expositas, testes adducimus Sanctum Thom. & Sanct. Bonavent. Primus in 1. dis. 46. qu. 1. art. 1. ad 1. inquit: *Verbum Apostoli intelligitur de voluntate antecedente, non de consequente, sed secundum Augustinum intelligitur de consequente.* Secundus vero in 1. dis. 46. qu. 1. art. 1. ait: *Egregius Doctor Augustinus duplicem facit vim in modo distribuendi, sed Damascenus facit vim in modo volendi.* Nota, hanc divisionem voluntatis antecedentis & consequentis desumi ex doctrina

præsertim Sancti Damasceni, ut dicam in tract. de Deo Uno.

121. Ob. 3. ad probandum, Christum non esse mortuum pro omnibus & singulis. Primo ex Scriptura pluribus in locis dicitur Christum mortuum pro multis. Sic Mat. 20. *Filius hominis venit non ministrari, sed ministrare, & dare animam suam redemptionem pro multis: c. 26. Hic est sanguis &c. qui pro vobis & pro multis effundetur.* Et Apost. ad Hebr. 9. *Christus semel oblatu est ad multorum exhaurienda peccata.* Insuper pluribus in locis innuitur perfecta passio tantummodo pro prædestinatis, & ad summum, pro solis fidelibus. Sic Joan. 10. *Animam meam pono pro ovibus meis.* Matt. 1. *Ipse salvum faciet populum suum à peccatis eorum.* Et 15. dixit Christus se missum, non esse nisi ad oves quæ perierunt Domus Israel. Ad Eph. 5. *Christus dilexit Ecclesiam, & se ipsum tradidit pro ea, ut illam sanctificaret, mundans lavacro aquæ in verbo vite.* Et Joan. 6. *Hæc est voluntas ejus, qui misit me, Patris, ut omne, quod dedit mihi, non perdam ex eo.* Ex quibus aliisque similibus sic potest subsumi, atqui oves Christi sunt solum prædestinati, de quibus dictum fuit. *Oves meæ vocem meam audiunt.* Qui ad Ecclesiam pertinent sunt solum fideles & baptizati, ergo ad summum Christus mortuus est tantum pro prædestinatis, & ad summum pro fidelibus. Adde; Christum mortuum esse pro quibus oravit, atqui oravit tantum pro prædestinatis juxta illud Joan. 20. *Non pro mundo rogo, sed pro iis, quos dedisti mihi,* quibus consonat id quod scribit Sanct. Augustin. 21. de Civit. cap. 24., nimirum; *Si Ecclesia de aliquibus certa esset, quod prædestinati sint in ignem æternum ire cum Diabolo, tam pro eis non oraret, quam nec pro ipso,* ergo Christus, qui omnia sciebat, pro solis prædestinatis oravit; & profecto non est admittenda in Christo oratio inanis, quæ non exaudiat, inquit enim Joan. 11. *Ego sciebam, quia semper me audis.* Sed si oraf-

set



fet pro reprobis, oratio fuisset inanis nec exaudita, ergo.

122. Resp. primos textus intelligendos esse de efficacia non de sufficientia, de applicatione Christi absoluta & consequenti non antecedenti & conditionata. Sed præterea advertendum est, quod sicut aliquando particula *omnes* sumitur pro multis, ita particula *multi* sumitur pro omnibus, exemplum habemus in epist. ad Rom. 5. ubi ait Apostolus. *Unius delicto multi mortui sunt* & tamen omnes mortui sunt, testante eodem Apostolo. *Omnes in Adam peccaverunt*. Immo Apostolus probat 2. ad Corint. 5. quod sicut in Adam mortui sunt, ita pro omnibus Christus mortuus est, de quo argumento jam dictum fuit num. 111. Juxta priorem intelligentiam explicantur etiam textus secundo loco adducti; Sed addo; Aliud esse, omnes actu esse oves Christi, & aliud, omnes esse posse oves Christi, & Christum velle omnes hujusmodi esse, licet primum non sit verum, verum tamen est secundum, & hoc sufficit pro re nostra; Omnes & singuli sunt oves Christi, si velint, quod si nolint, hoc fit contra Christi intentionem, & Dei voluntatem, non est distinctio apud Deum Judei & Greci; Omnia enim dedit Christo Pater in manus juxta illud ps. 2. *Postula à me, & dabo tibi gentes hereditatem tuam, & possessionem tuam terminos terræ*. Perperam tandem intelligitur ab adversariis illud: *Omne, quod dedit mihi Pater, non pereat*. Datus fuit Judas, qui tamen periit, juxta textum adductum num. 109. Si periit Judas datus à Patre, quid mirum, si pereant tot alii quamvis Christo traditi à Patre? Ad additum ne. mi. cujus falsitas evincitur ex primo textu adducto in probatione nostra, & ex alio Joan. 5. *Ut mundus credat, quia tu me misisti*. Sed mundus constituitur non solum per prædestinatos, sed etiam per reprobos & infideles, ergo. Tandem Luc. 23. *Dimitte illis, non enim, sciunt quid faciunt*, sed illi non erant

Tom. II.

omnes prædestinati, ergo Christus non oravit tantum pro prædestinatis. Aliquando igitur Christus rogavit pro solis prædestinatis & Apostolis, aliquando vero etiam pro aliis & quibuscumque, pro illis quidem oratione efficaci & absoluta, pro aliis vero conditionata & solum antecedente. Si de illa loquamur, semper fuit exaudita non si de ista; constat hoc, etenim oravit Patrem Mat. 26. *Pater si possibile est, transeat à me calix iste*, nec tamen calix transivit, per quod refellitur ultimum; Nunc devenio ad textum S. Augustini, quem juxta doctrinam Sancti Bonaventuræ aliter etiam explicabo in sequentibus; nihilo tamen minus dispar est ratio de precibus Ecclesiæ & de Christi oratione, etenim oratio Ecclesiæ præsupponeret eorum, qui damnandi essent, reprobationem, ideo in omni sensu inanis esset oratio; at deprecatio Christi pro reprobis antecederet eorum reprobationem, ratio est, quia reprobatio est effectus abusus, seu non usus gratiæ, non usus gratiæ supponit collationem gratiæ, collatio gratiæ præsupponit meritum Christi, proinde etiam ejus orationem, propter quam vel tanquam futuram, vel præsentem, vel præteritam qualibet gratia collata fuit, & conferenda est, ideo &c.

123. Afferri possent alia testimonia Sancti Augustini, quæ tamen juxta superiorem doctrinam explicanda sunt, cui addo Concil. Trident. sess. 6. de justificatione cap. 3. ubi ait: *Et si Christus pro omnibus mortuus sit, non omnes tamen mortis ejus beneficium recipiunt, sed ij dumtaxat, quibus meritum passionis ejus communicatur*.

### §. III.

*Utrum Deus omnibus conferat auxilia sufficientia ad salutem.*

124. **N**UNC faciliori perfectiorique calamo, difficultatem istam art. 12. propositam resolvamus; quamvis

V.

vis

vis autem apud omnes catholicos pars affirmativa sit certa, attamen, utrum hujusmodi auxilia sint solummodo preparata, vel etiam oblata inter ipsos est quaestio. Primum defendunt Alenf. Gonet. Godoy, & nonnulli alii Thomistae. Secundum vero Scotistae, Salmantic. & frequentius Neoterici. Cum istis.

Sentiendum; omnibus & singulis, cujuscumque conditionis sint, data esse à Deo auxilia sufficientia ad salutem. Hoc valet de adultis, de parvulis dabitur in fine resolutio. Adverto autem, auxilia sufficientia alia esse remota, & alia proxima, rursus, haec alia remissa, alia intensa & uberiora. Procedit conclusio de auxiliis sufficientibus praecise acceptis, seu disjunctive, ita ut Deus vel haec, vel illa conferat.

125. Prob. conclusio generatim. Omnes & singuli tenentur ad mandatorum observationem, sed si ipsis non essent data auxilia sufficientia ad hujusmodi observationem, non tenerentur, ergo. Prob. mi. Nemo tenetur ad id, cujus observatio impossibilis est, immo neque Deus praecipit quod est impossibile, sed si non essent data auxilia sufficientia ad salutem, mandatorum observatio impossibilis esset, cum ad hanc naturae vires non sufficiant saltem per ordinem ad finem supernaturalem, & in praesenti providentia, ergo.

Dices; adhuc omnes teneri ad mandatorum observationem, & peccare formaliter, si non servant, non quia habent auxilia sufficientia, & facultatem observandi mandata; Sed quia habuerunt, & culpa propria amiserunt, ex quo fit subtractionem auxilii sufficientis esse poenam praecedentis culpa, & ita impossibilitatem servandi praecepta consequentem esse liberum arbitrium, proinde imputabilitatem culpabilem nequaquam adimere. Manifestum est hoc. Quis per ebrietatem amisit posse evitare homicidium, & per culpabilem carentiam brevari factus est impotens ad recitandum

officium, non ne adhuc peccat ille perpetrando homicidium, iste non recitando officium? Ita à pari, quamvis peccatores auxilia sufficientia non habeant, & impotentes sint ad servanda mandata, adhuc non observando peccant, quia, voluntarie facti sunt impotentes.

126. Sed contra; Multifariam propositum argumentum refello, dico primo quod si haec impossibilitas non sit in causa praevisa & voluntaria sufficit ad excusandum à peccato, unde ait S. Augustinus, culpandum esse Loth, quantum meretur ebrietas, non quantum incestus cum filiabus commissus, atqui subtractio auxilii sufficientis non est praevisa sequutura ex praecedenti culpa, immo peccator potius existimat sibi non defutura auxilia, ad poenitendum, nec scit, per quodnam peccatum contrahatur destitutum, ergo. Secundo nego absolute ad peccatum, proprie tale & in se ipso sufficere facultatem illud vitandi praeteritam culpabiliter amissam, sed tunc inferri potest tantummodo, esse peccatum in causa, nec habere diversam malitiam à malitia praecedentis peccati, per quod facultas amissa est, & hoc pacto homicidium sequiturum ex ebrietate non habet malitiam diversam à malitia ebrietatis, atqui peccata, quae committuntur ab hominibus etiam post voluntariam excacationem & obdurationem, sunt in se ipsis peccata, alioquin post excacationem & obdurationem impune & absque novo demerito possent praecepta violare, ergo. Tercio sequeretur, quod si aliquis culpa sua factus esset demens, omissio omnium praceptorum, ut audiendi sacrum die festo, & jejunandi diebus praescriptis esset culpa vertenda, quod tamen est contra Sanctum Augustin. lib. 3. de libero arbit. cap. 18. & 19. penes Alvarez lib. 11. de auxiliis disp. 112.

127. Neque obstant aliqua dicta S. Augustini, quibus videtur innuere, carentiam auxiliorum ex praecedenti culpa derivare. Affero quod legi de correptione & gratia. cap. 11. ubi loquens de adjutorio, quo

quo Adam poterat perseverare, si voluisset, inquit. *Nunc autem quibus deest tale adjutorium, jam pœna peccati est*, ergo in pœnam præcedentium delictorum potest esse subtractio auxiliorum, quibus possit homo perseverare, & consequenter bene operari. His consona est doctrina S. Th. 2. 2. q. 2. art. 5. dicentis. *Auxilium quibuscumque datur, misericorditer datur, quibuscumque autem non datur, ex justitia non datur in pœnam præcedentis peccati*. Et 3. contra gentes cap. 16., ubi ait, quod etsi aliqui non habeant potestatem vitandi peccata, nihilominus non vitatio culpæ imputatur, quia hic defectus ex culpa præcedente in eis relinquitur.

128. Non obstant inquam, nam Augustinus distinguit duplex auxilium sufficientius, unum tribuens posse operari sine lucta & faciliter, aliud tribuens posse operari difficilius & cum lucta. Illud asserit non dari, & esse pœnam peccati, ex quo concupiscentia & pugna inter sensum & rationem promanavit, aliud vero dari non negat. Sanctus Thom. in textu loquitur de privatione auxilii efficacis, non sic mere sufficientis; Vel dic, utrumque Sanctum Doctorem loqui de privatione auxilii proximi & uberioris, non sic remoti & absolute talis. Ad ultimum jam dictum est supra, hoc verum esse, quando in præcedenti peccato prævisa fuit hæc impossibilitas ad vitanda peccata.

129. Prob. secundo conclusio de peccatoribus obduratis & excæcatis. Quamvis dentur peccatores obdurati & excæcati, attamen in Sacris Scripturis vocantur ad pœnitentiam, sed frustra vocarentur, nisi ipsis darentur auxilia sufficientia ad salutem, ergo dantur. Major patet nam ipsis dicitur. *II. 31. Convertimini sicut in profundum recesseratis*. Ezech. 37. *Vivo ego dicit Dominus, nolo mortem peccatoris, & rursus, Convertimini convertimini, quare moriemini? 2. Petri 3. Non tardat Dominus promissionem suam, sed patienter agit propter vos, no-*

Tom. II.

*lens aliquos perire, sed omnes ad pœnitentiam reverti*. Minor ex terminis patet, si enim non habent posse pœnitentiam agere, manifestum est, si ad pœnitentiam vocantur, potius irrideri, sicut, si quis oculis careret, frustra immo non citra injuriam ipsi diceretur, ut videat. Neque dicatur, satis esse, si ipsi hujusmodi auxilia parata sint, etenim auxilium paratum & non collatum nullas ad agendum vires conferre, compertum est, sicut medicina parata & non collata nullam vim habet ad sanandam ægroti infirmitatem, & in carceribus clauso nihil prodest, claves ad aperiendum paratas esse, si ipsi non conferantur, instabis fortasse, medicinam paratam, quamvis non collatam habere vim ad sanandum, si velit ægrotus illam sibi aptare, sicut & claves paratæ ad aperiendum, si velit captivus manum ad illas extendere, quare si non sanetur, aut liberetur ipsi tribuendum est; Sed frustra instas, etenim ex hoc probatur, auxilia sufficientia parata sufficere, si peccator velit, sed ut velit debet habere auxilium, quo possit velle, & hoc non satis erit, si paratum tantummodo sit, alioquin semper redit argumentum. Quis obduratur Pharaone? Et tamen Chrysost. super cap. 9. Epist. ad Rom. ser. 171. inquit; *Tulit Pharaonem multa patientia ad pœnitentiam inducere volens*. Quis nequior Judas? nec tamen, quibus converti posset, caruit auxiliis, ut testatur S. Ambros. hom. de Paradiso.

130. Dices. Si Scripturas attendamus, potius hisce peccatoribus auxilia sufficientia denegari comperiemus; Aliquando Deus omnino illos deserit; ideo pl. 8. *dimisi eos secundum desideria cordis eorum* & Jerem. 7. *Projiciam vos à facie mea*. Aliquando dicuntur peccatores non posse corrigi, nec posse misericordiam consequi; ideo Eccles. 7. *Considera opera Dei; quod nemo possit corrigere quem ille despexerit*; & 2. Machab. 9. legitur de Antioch. *Orabat hic sceleratus Dominum, à quo non erat misericordia*.

consequuturus. Et ad Hebr. 12. habetur de Elau; *Non invenit poenitentiae locum, quamvis cum lacrymis inquisivisset eam.* Aliquando peccata dicuntur irremissibilia, ideo Mat. 12. *Qui autem dixerit verbum contra Spiritum Sanctum, non remittetur ei neque in hoc saeculo, neque in futuro.* Et Joan. 5. *Est peccatum ad mortem, non pro illo dico, ut oret quis Si vero Sanctos Petrus adeamus, clarius docent nihil.* Celebre est dictum illud Augustini de verbis Domini; *Cum vult, idest peccator obduratus, non potest, quia quando potuit, non voluit, ideo per malum velle perdidit bonum posse.* Cui consonat aliud Isidori lib. 2. de sum. bono cap. 15. *Non nulli ita despiciuntur à Deo, ut deplorare mala sua non possint, etiam si velint.* Quamobrem plura nobis exempla offeruntur legenda vel audienda, in quibus ostenduntur peccatores in mortis periculo constituti, prohibuisse adstantium preces, cum sibi amplius non prodescent, quod dici non posset, si tunc haberent auxilia sufficientia ad salutem. Ratio etiam suffragatur, nam si esse possunt homines ita in gratia confirmati, ut gratiam nequeant amittere, cur esse non poterunt homines ita in peccato obdurati, ut peccatum nequeant deponere?

131. Sed contra. Omnes istae auctoritates, & si quae sint aliae, explicandae sunt de privatione auxiliorum vel efficacium, vel sufficientium, quae sint proxima & uberiora, non vero quae sint remota & absolute sufficientia; sicut homines corrigi nequaquam posse, & peccata aliqua non posse remitti, non est intelligendum absolute, sed solummodo difficulte, de qua re agitur in tract. de poenitent. Rursus deesse tempus ad poenitentiam agendam, obtinendamque misericordiam, sicut solent peccatores procrastinando semetipsos decipere, propter quod ait August. tract. 33. in Joan. *In quo Propheta mihi legis, quia promisit tibi Deus longam vitam; & Greg. hom. 12. Qui poenitenti venium spondit, peccanti diem crastinum non promisit.* Sed duo satis di-

versa sunt, non dari auxilium ad poenitentiam, non dari majus vitae spatium, ad poenitentiam; Primum tantummodo est ad rem nostram. Quod si Sanctorum Patrum testimonia strictè explicare contenderemus, non solum peccatoribus obduratis contingeret, auxiliis sufficientibus destitutos esse, sed etiam ipsis iustis. An non iustus Petrus, priusquam Christum negaret? & tamen audi quid de negante Petro scripserit Chrysost. hom. 2. in Joan. *Neque enim frigiditate, sed superbia auxilii derelictu contigit,* & hom. 3. in epis. ad Hebr. *Negatio Petri non tamen erat socordia ac negligentia, quam ex eo quod Deus eum deseruerit;* Quod jam, ante docuerat August. ser. 124. de tempore dicens. *Quid est homo sine gratia Dei, nisi quod fuit Petrus cum negavit Christum? & ideo Beatum Petrum paululum Dominus subdeseruit,* Nec tamen dices, Patres intelligendos esse in hoc sensu, quod à iustis & à Petro auxilia, sufficientia Deus subtraxerit. Ita responde exemplis; nisi velis dicere, Dæmonum fraude in hanc desperationem homines fuisse prolapsos. Nunc ad rationem postremo productam, negando in primis antec. quod tantum est verum potentia consequente, & ut ajunt, adjuvanda, non antecedente & actuabili. Secundo omittendo ant. & negando confirmationem in gratia non extrahit hominem à statu viæ, immo ipsum perficit, obduratio vero auferens facultatem ad conversionem, & afferens carentiam auxiliorum sufficientium, hominem à statu viæ extraheret, & tendentiam ad terminum prorsus adimeret, per quam rationem probant plures Doctores sententiam nostram.

132. Videtur tamen ex illis textibus Chrysostomi & Augustini de Sancto Petro adductis sic argumentum fieri posse; Deus quandoque etiam iustis auxilia denegat sufficientia, ergo multo magis peccatoribus obduratis. Prob. ant. auxilia sufficientia negavit Petro, antequam Christum negaret, sed Petrus tunc erat ju-



justus, ergo. Prob. maj. Negatio Petri ex dictis textibus non tam frigiditati, secordiae, ac negligentiae Petri tribuenda est, sed Divinae gratiae auxiliique defectui, ergo; quod constat, quia quo adusque non desit auxilium Dei, semper homini tribuendum est, si peccat.

Hic respondemus primo ex generali regula à nobis statuta in prima probatione num. 125. Si enim Petrus auxiliis sufficientibus caruisset, Christum negando, non peccasset. Intelligenti itaque sunt Sancti Patres de carentia, auxiliorum efficacium, vel proxime uberiorum, non de quibuscumque. Quod si hoc non tribuitur pigritiae, frigiditati, & secordiae Petri, intellige Petrum in eo statu, in quo erat, dum dixit Christo, etiamsi oportuerit me mori tecum, non te negabo, non absolutè. Brevius tamen, non fuit tribuendum frigiditati, secordiae, ac negligentiae Petri, sed nimiae ejusdem fiduciae, qui sibi metipsum fidens in ea verba prorupit, *etsi omnes scandalizati fuerint &c. etiamsi oportuerit me mori tecum &c.*

133. Prob. tertio de infidelibus; & ratio desumitur ex quo si coeteris hominibus dat Deus auxilia sufficientia ad salutem, etiam infidelibus dabit ad fidem, si de adultis loquamur, est enim fides initium salutis, & sine qua impossibile est placere Deo; rursus, quia Deus vult omnes homines salvos fieri, & pro omnibus Christus mortuus est, ut probavi, ergo. Punctum tamen hoc validius suadebimus, si scripturae auctoritatem innitatur. *Illuminat enim*, ait Joan. cap. 1. *omnem hominem venientem in hanc mundum*. Apostol. inquit, *vult omnes homines &c. et ad agnitionem veritatis venire*. Ps. 18. habetur, *nec est qui se abscondat à calore ejus*. Merito propterea insert S. Augustin. lib. 1. de gen. cap. 3. omnes posse, si velint, credere & se ad praecepta servanda convertere; & S. Prosper. *Elaboratum est, ut in cunctis retro saeculis probaretur, gratiam Dei omnibus adfuisse quod cer-*

te etiam de infidelibus dictum esse nullus ibit inficius.

134. Dices. Hæc omnia servari, si auxilia sint parata, & Deus, quantum ad se pertinet, illa det, quamvis in homine non sint recepta, atque primum dicendum tantum relinquatur, nisi velimus prorsus à mente Sancti Augustini recedere, & à S. Thom. quem in hac parte etiam nos sequimur. Augustin. ep. 107. ad Vitalem inquit: *Scimus, gratiam Dei non omnibus dari; & serm. 11. de verbis Apost. cap. 4. Communis est omnibus natura, non gratia*. Angelicus de verit. q. 24. art. 15. in corp. hæc habet. *In nullo inveniuntur omnes homines convenire, nisi in aliquo naturali; & 3. contra gent. cap. 159. Deus, quantum in se est, paratus est omnibus gratiam dare, vult enim omnes homines salvos fieri*: nota illa verba, *quantum in se est, paratus est*.

135. Sed contra. Jam supra declaratum fuit, quo pacto frustraneum sit confugere ad auxilia parata, & non collata; nihileminùs amplius declaro. Si homo per auxilia sufficientia exhibita & non collata seu in se ipso recepta salvari posset, ut requiritur ad servandos textus à nobis adductos, posset tantummodo per facultatem extrinsecam, sicut auxilia, ista tantum extrinsecè se habent, sed hoc non sufficit, ergo. Prob. mi. primo exemplo causæ partialis, quæ potest effectum proferre, si alia causa ipsi uniatur, non verò si tantum parata sit, & hoc pacto creatura posset totum id, ad quod elevari potest, quia id potest per virtutem extrinsecam Dei, quod tamen est falsum, nisi hæc virtus ipsi conferatur, aut saltem extrinsecè applicetur. Secundo probaretur, etiam damnatis non deesse auxilia sufficientia ad salutem, quia Deus quantum est de se habet remedium & auxilium aptum ad ipsos salvandos; nec officit, ipsis non offerri, nam offerri peccatoribus in via & non præberi, appellabimus titulum sine re, & idem in substantia, sicut dictum fuit de medicina &c.



136. Ita doctrinam adversantium rejecimus, operæ tamen pretium est, laudatas auctoritates exponere. Augustinus ibi non sumit pro gratia auxilia, sufficientia, sed fidem & charitatem, propter quas fidelis discernitur ab infideli, & justus ab iniusto, ut videri potest in lib. de prædest. Sanct. cap. 4. Angelicus docet, ut constât in contextu, in nullo omnes homines convenire nisi in natura, convenientia permanente & jure debita, non sic in transeunte & ex suppositione debita, sicuti est gratia explicata per auxilia sufficientia. In secundo loco ly *quantum est de se* pertinet ad distinguendam gratiam efficacem à sufficiente, non vero ad distinguendam collationem gratiæ ab oblatione, videlicet, quantum est de se est paratus ad conferendam gratiam efficacem; Cum ipsa gratia sufficiens, præsertim per nos fieret efficax, si creatura vellet.

137. Oppones primo & omisso Augustini testimonio, *si noster Ecclesia, qui prædestinati sunt in ignem æternum* &c. de quo num. 121. inquit idem Augustinus, *solis prædestinatis ad æternam vitam, non autem omnibus ejus bona opera profuerunt* non igitur bene inferitur ex generali voluntate Dei antecedente salvandi omnes collatio auxiliorum sufficientium ad salutem; Unde Janfen. lib. 3. de gratia Salvatoris asserit, *illam generalem voluntatem salvandi omnes, & illam sufficientis gratiæ omnibus conferendæ præparationem, Augustinus, Prosper, Fulgentius, & antiqua Ecclesia velut machinam à Semipelagianis introductam repudiavit*. Neque deest ratio; nam ut loquitur S. Thom. Ita Deus vult voluntate antecedente omnium salutem, & voluntate consequente reproborum damnationem, sicut rectus Judex vult voluntate antecedente salutem furis, & voluntate consequente ejusdem mortem, atqui Judex rectus esto velit &c. non dat furi auxilia sufficientia ad evitandam mortem, ego neque Deus dat reprobis auxilia sufficientia ad evitandam damnationem.

138. Jam primum textum Augustini expendimus num. 122. Illum tamen expendit alio modo S. Bonavent. in 1. dis. 46. art. 1. ad 3. dicens, Ecclesiam non esse oraturam pro reprobis, si ipsos certo cognosceret, quantum ad æternam salutem in consequendam, non autem quantum ad auxilia sufficientia obtinenda, quæ componuntur cum damnatione, tum quantum ad committenda minora peccata, per quæ minor injuria inferretur Deo, & sibi reprobis minora supplicia cumlaret; Verum hæc responsio non satisfacit, cum fieri posset argumentum, ergo etiam Christus, qui certissime noverat reprobos, oravit tantum pro ipsis, ut sic haberent auxilia sufficientia, non tamen per ordinem ad æternam salutem. Secundo textui jam occurrimus, valere nimirum de efficacia non de sufficientia; Qua de re S. Th. ponderans illa verba Mat. 26. *Hic sanguis novi testamenti, qui pro multis effundetur*. Ait: *Sanguinem Christi effusum esse pro multis, & pro omnibus, quia si consideretur sufficientia, ipse est sufficiens pro peccatis nostris, & non pro nostris tantum, sed totius mundi, sed si consideramus efficaciam, effectum non habet, nisi in his, qui salvantur, & hoc ex culpa hominum*. Immerito propterea & stultissime dixit, quod dixit Janfenius. Ad rationem; non in omnibus tenent exempla; in hoc autem dispar est ratio, quod Judex rectus, ut Judex est, tenetur tantum ad infligendas poenas pro delictis, & voluntate antecedente vult salutem furis, ut homo est; Deus autem cum etiam in ordine gratiæ sit provisor universalis, habet sub hac ratione & voluntatem antecedentem dandi omnibus auxilia sufficientia, & voluntatem consequentem non bene utentibus id est reprobis poenas infligendi. Præterea. In humanis legibus supponuntur vires sufficientes ad illarum observationem, aliter essent leges injustæ; ad servandam autem legem Divinam non sunt in hominibus sufficientes vires; debet igitur Deus

Deus illas impertiri, ne præcipiat impossibilia.

139. Ob. 2. loquendo de infidelibus. Dantur per S. Th. 2. 2. qu. 10. artic. 1. infideles negative; sed ita non dantur omnibus auxilia sufficientia ad fidem, ergo. Prob. mi. Ut dentur infideles negative, ipsorum infidelitas culpæ verti non potest, sed si haberent auxilia sufficientia ad fidem, ipsorum infidelitas culpæ verti posset, ergo. Hinc S. Augustin. tract. 89. in Joan. quærens, utrum illi, ad quorum notitiam Christus non venit, excusationem habeant, respondet, habere non de omni peccato, sed de hoc, quod in Christum non crediderunt, ergo quantum ad hoc auxilia sufficientia non habuerunt.

140. Resp. transf. maj. quæ ab aliquibus negatur; dis. maj. non dantur &c. auxilia proxima & immediata sufficientia conc. remota & mediata ne. mi. & conf. in sensu distinctionis; & verum est, infidelitatem negativam culpæ verti non posse. Infideles carere auxiliis proximis & immediatis ad habendam fidem, non negatur, carere tamen remotis & mediatis non conceditur; quod sic explico. Vel infidelis sequutus est ductum rationis, vel non; Si primum dicatur, jam certissimè tenendum est cum S. Th. qu. 14. de verit. art. 11. ad 1. & alibi lumen recepturum à Deo quo fidei mysteria percipiat & audiat; & ad sequendum illum habuit auxilia non solum sufficientia, sed etiam efficacia. Si secundum, jam peccavit; sed si non habuisset auxilia sufficientia ad servandum, non servando non peccasset, ergo. Porro hæc auxilia ad servandum, seu sequendum ductum rationis erant auxilia remota & mediata sufficientia ad habendam fidem, ergo hic infidelis habuit &c. Hinc S. Prosper de infidelibus ait: *Li- cet abundantia gratiæ pari antea largitate non fluxit, tamen adhibita est mensura, quæ sufficit.*

141. Dices; Cum auxiliis remotis ad fidem infidelitas sine culpa non est, ergo

non est negativa, sed positiva. Prob. ant. cum auxiliis remotis ad observandum, præceptum, non observantia præcepti sine culpa non est, ergo à pari. Ant. patet, quia pluribus peccatoribus non conferuntur nisi auxilia remota, & tamen si præcepta non servant, peccant.

Sed contra. Ne. ant. ad prob. dis. ant. si præceptum constet, ac sit promulgatum conc. si non constet, nec sit promulgatum ne. ant. & conf. eodem modo. Infidelitas negativa duplici modo potest inculpabilis esse; uno, si non darentur auxilia sufficientia ad credendum, in quo sensu neque infidelitas positiva peccatum esset; alio, si præceptum credendi non sit sufficienter promulgatum, nec objecta fidei sint proposita. In re nostra nemo est infidelis negative ex primo capite, est tamen ex secundo & idem dico de peccatore, qui habet auxilia remota ad servandum aliquod præceptum, nec tamen peccaret, si præceptum non esset sibi propositum, illudque invincibiliter ignoraret.

142. Urgebis. Ipsa carentia propositionis eorum, quæ credenda sunt, culpabilis est, ergo non credendo semper peccat. Prob. ant. ideo datur hujusmodi carentia, quia non est sequutus ductum rationis, sed non esse sequutum ductum rationis culpabile est, ergo.

Sed contra ne. ant. ad prob. dis. maj. ideo &c. Nesciendo se habiturum auxilia sufficientia ad credendum si esset sequutus; non habiturum, si non esset sequutus conc. è contrario ne. maj. Illud autem culpabile dicitur, quod in causa est prævisum & voluntarium, consequenter &c. Cur ergo, inquires, docui in tractatu de fide, esse non posse ignorantiam invincibilem incarnationis? Respondeo, me ibi etiam docuisse, non esse damnandum hominem propter carentiam hujus fidei, sed propter alia peccata, quæ impediunt mysterii notitiam, unde ignorantia invincibilis non potest esse, non quia ipsa culpabilis sit per respectum ad mysterium, sed per respectum

actum ad causam, propter quam mysterium notum nequaquam est factum. Ex dictis habes quid respondendum addito ex S. Augustino.

143. Instabis. Deest igitur illis auxilium proximum ad fidem; Sed quibus deest auxilium proximum ad fidem, deest quodcumque auxilium ad salutem, ergo. Prob. sub. mi. auxilium ad salutem est auxilium ad actum supernaturalem, sed cui negatur auxilium proximum ad fidem negatur quodcumque auxilium ad actum supernaturalem, ergo. Prob. mi. omnis actus supernaturalis regulam sumit à fide, quæ est primus actus salutaris, & appellatur radix & initium salutis nostræ, proinde ex Augustino de prædest. Sanct. cap. 6. habetur. *Sicut prima gratia non est ex meritis ita nec fides.* Huiusmodi autem non esset, si aliquis actus supernaturalis illam præcederet.

Sed contra ne. sub. min. ad prob. diff. maj. auxilium proximum ad salutem debet esse supernaturale conc. remotum, subdiff. debet esse ad actum supernaturalem remote conc. proxime ne. maj. & ita ad reliqua. Sicut auxilium ad salutem aliud est proximum & immediatum, aliud remotum & mediatum, ita auxilium ad actus supernaturales & ad ipsam fidem aliud est proximum & immediatum, aliud remotum & mediatum; auxilium immediatum & proximum ad fidem debet esse ad actum supernaturalem, non sic remotum nisi remote, quo si quis bene utatur, accipiet inde à Deo novas illuminationes atque inspirationes, per quas ad fidem perveniet juxta Doctrinam Sancti Thomæ toties repetitam, non quod usus ejusdem per se conferat ad huiusmodi illuminationes atque inspirationes, sed ex Divina misericordia, quæ, si non apponatur impedimentum, vult omnes illuminare, & ad agnitionem veritatis venire. Ex hoc fit, omnem actum supernaturalem proxime regulam desumere à fide, quæ pariter proxime est initium & radix nostræ salutis, non sic vero omnis actus supernaturalis

remote, nimirum remota & negativa dispositio ad actum supernaturalem, & in hoc sensu intellige tum Concilium tum Augustinum.

Responsio tamen communis proposito argumento est; omnem actum supernaturalem regulam sumere à fide vel late vel stricte dicta, ideo vel à fide, prout est assensus præstitus Divino testimonio, vel ab actibus fidem præcedentibus, ut est iudicium speculativum & practicum circa mysteriorum credibilitatem, & pia affectio, imperiumque voluntatis, & hoc modo omnibus datum, esse auxilium si non ad fidem stricte dictam saltem ad ipsam late acceptam, cum quo stat infidelitas negativa, atque juxta hanc doctrinam explicant allatas auctoritates. Id tamen mihi non aridet, nam quomodo esse potest iudicium practicum & speculativum circa mysteriorum credibilitatem, pia affectio imperiumque voluntatis, nisi mysteria, sint proposita? si autem sunt proposita, jam infidelitas negativa non est.

144. Oppositiones, quæ fieri possunt de peccatoribus obduratis, jam expositæ sunt; alias tamen subdam omitendo communissimum illud desumptum ex Jerem. 51. *Curavimus Babylonem & non est sanata derelinquamus eam* ex quibus verbis ita argumentum conficitur. Babylon. fuit relicta, sed non quantum ad auxilia efficacia, ergo quantum ad sufficientia. Prob. mi. fuit relicta quantum ad illa auxilia, quibus curata fuit, nec fuit sanata, sed hæc non fuerunt auxilia efficacia, quia per hæc infallibiliter sanata fuisset, ergo. Aliter itaque sic. Potest Deus in poenam præcedentium delictorum privare hominem usu rationis, ergo etiam auxiliis sufficientibus tum proximis tum remotis, ant. patet in Nabuchodonosor. Secundo Augustinus in exposit. epist. ad Rom. de Pharaone obdurato inquit, ipsius inobedientiam non fuisse culpabilem; en verba ejusdem. *Non ergo hoc illi imputatur, quod tunc non obtemperavit, quandoqui-*

dem.

*dem obdurato corde obtemperare non poterat.* Ergo quia tunc nec habuit auxilia sufficientia remota. Tandem idem Augustin. lib. 4. contra Julian. cap. 1. ait. *Deus non est benevolentior scelestissimis & impiissimis hominibus propria voluntate repugnantibus, quam innocentissimis parvulis, qui propria voluntate non repugnant.* Sed esset benevolentior, si conferret auxilia sufficientia, quamvis remota, cum hæc aliquando pluribus parvulis non conferantur, ergo.

145. Resp. omittendo responfionem omisso argumento, quæ jam patet ex dictis, relictam scilicet Babylonem quantum ad auxilia sufficientia proxima non remota, vel etiam quantum ad auxilia proxima, sed uberiora, non absolute juxta dicta ex S. Prospero. Ut tamen verum fatear, necesse non est ad hanc distinctionem confugiant Theologi, cum in textu sermo sit de Babylone derelicta, quantum ad bona temporalia & de sui destructione, ut legenti compertum esse potest. Ad 1. conc. ant. dis. conf. etiam auxiliis sufficientibus post statum viæ, & quando non obligant præcepta conc. in viæ & quando obligant præcepta ne. conf. Jam huic argumento responsum est supra; Si quis autem incidat in amentiam, durante amentia est moraliter mortuus incapax meriti vel demeriti. Ad 2. verbum illud *non imputatur* non debet intelligi absolute, sed comparative, idest non imputatur sicut ipsum peccatum obdurationis, sicut blasphemio habitu non imputatur blasphemia ad culpam, sicut imputatur antequam habitu blasphemus evadat; vel dic, in eo textu parum auctoritatis habere Augustinum, cum expositio illa facta fuerit sub initio suæ fidei & parum accuratè, ut idem fatetur lib. 1. retract. cap. 23. Ad 3. argumentum probat nimis, cum probet, neque aliis peccatoribus, utcumque sint peccatores, tribui auxilia sufficientia, quia Deus non est benevolentior istis, qui propria culpa prolapsi sunt, quam innocentissimis parvulis, qui voluntate

Tom. II.

propria non ceciderunt. Ibi itaque sermo est de poenis infligendis post mortem, quæ certe acriores infliguntur hominibus, quam parvis, atque hanc fuisse mentem Augustini, ambigendi locus non relinquitur, cum scriberet contra Julianum, contententem pueros damnari propter peccata, quæ commisissent, si permansissent in vita. Sed quoniam in minore dicitur, aliquando pluribus parvulis auxilia sufficientia non conferri, ideo ad hoc punctum resolvendum progredimur.

146. Sentio, etiam parvulis dependenter à voluntate aliena dari auxilia sufficientia ad salutem, loquendo per se. Dictum probatur ea ratione, quæ superius ostensum fuit, esse in Deo voluntatem salvandi omnes, sicut pro omnibus Christus passus est; & pro hoc stat auctoritas Sancti Prosperi ( Si ejusdem hic liber est ) de vocat. gent. cap. 23. ubi ait; *Non irreligiose arbitror credi, neque inconvenienter intelligi, quod isti paucorum dierum homines ad illam pertineant gratiæ partem, quæ semper universis est impensa nationibus, qua utique si bene eorum uterentur parentes, etiam ipsi per eosdem jurentur.*

Dixi, *dependenter à voluntate parentum* ut afferatur discrimen inter auxilia, quæ conferuntur adultis, & ea, quæ parvulis, illi siquidem gaudent voluntate propria, isti sunt sub aliena; dixi, *per se* quia aliquando contingit, parvulis baptismum conferri non posse propter aliquod impedimentum ortum ex concursu causarum secundarum, quem Deus impedire noluisset, nec ad impediendum tenebatur, hunc enim statuit tanquam provisor generalis, ad quem spectat, unumquodque sinere suos motus peragere, neque fieri miraculum debet, quando sine hoc infans baptizari non potest. Plerumque evenit, baptismum parvulis non conferri, aut istos in utero materno mori priusquam nascantur, culpa à parentibus derivata, sive sint parentes immediati, sive mediati, quam

X

cul-

culpam utique parentes ipsi evitare potuerunt; & licet in aliquo casu fortuito id etiam accidat, attamen potuerunt parentes se in talibus circumstantiis non constituere, in quibus & propter quas id evenit.


147. Contra hoc militant potissimum quædam Sancti Augustini momenta; dicit in primis de natura & grat. cap. 8. *Ego autem dico, parvulum natum in eo loco, ubi ei non potuit per Christi Baptismum subveniri, morte præventum idcirco talem fuisse, idest sine lavacro regenerationis exiisse, quia aliud esse non potuit; & infra, quamvis Christianus non solum non fuerit, sed nec esse potuerit. Et clarius de bono perseveran. cap. 12. Plurimumque festinantibus parentibus, & paratis ministris, ut baptismus parvulo*

*detur, Deo tamen nolente non datur, quæ cum parvulum in hac vita non tenuit, ut detur. Quod alibi frequenter repetit.*

148. Propter hoc aliqui nostræ sententiæ propugnatores Augustinum explicare non nituntur, & fatentur, ipsum oppositum docuisse, satis sibi arbitrantur, si pro se Prosperum habeant; attamen, ut vides, non adeo coarctamur, ut ipsum explicare non possimus, dicendo, id verum esse loquendo per accidens, non per se; vel *ly non potuit, & non potuerit* intelligendum esse de potestate proxima, & non remota; & *ly Deo nolente* excludere voluntatem consequentem, non antecedentem, aut voluntatem impediendi motus aliarum, causarum &c.

## SECTIO UNICA.

### De Jansenio, & ejus Systemate.

1.  LURA quidem in hac re producturus essem, si ea omnia, quæ ad Jansenium pertinent, recensere placeret, in qua certe potius Historici munus obirem quam Theologi; Cum tamen hoc Cornelii Jansenii nomen tam celebre factum sit, ut in mulierum etiam ore sæpissimè personet, nec solum in Scholis, in quibus ejusdem doctrina ad trutinam revocatur, verum etiam in secularium nocturnis diurnisque confabulationibus in medium afferatur, ideo illud prorsus præterire non potui; Qui vero plura de eo cupiat non ignorare, Eminentissimum de Noris præsertim consulat.

2. Anno 1585. in Territorio Leerdamenensi apud Batavos ex Catholicis parentibus ortum duxit; Lovanii à Jacobo Jansenio, qui doctrinam Michaelis Baii plurimi faciebat, strenuèque propugna-

bat, Philosophicas ac Theologicas Questiones exceptit; Parisys nobili cuidam adolescenti instituendo præfatus fuit, inde Bajonam se conferens illius Collegii Primarii munere perfunctus est, & post annos aliquot Lovanium reversus novum Sanctæ Pulcheriæ Collegium Provisorum pecunia extruxit; ibi anno 1617. laurea Doctorali in Theologica facultate donatus fuit, atque ab eadem Academia bis in Hispaniam Delegatus commissa sibi negotia tanta cum laude perfecit, ut ann. 1630. Regius Sæcrarum Litterarum Professor fuerit institutus, atque eo anno typis excudendum tradidit sub nomine Alexandri Patricii Armacani Theologi librum, quem inscripsit *Mars Gallicus*. In eo parum verecunde contra Gallorum Reges actum est, idcirco in Jansenium commota tempestas, quam tandem evadens an. 1635. Episcopus Iprensis fuit consecratus. Brevi tempore pasto-



storali infula enituit, nam duos post annos peste correptus occubuit; Vix tunc ultimam manum apposuerat operi, cui titulus *Augustinus*. Quod cuidam Capellano suo commendavit, ut illud typis re prius communicata cum Liberto Fromondo & Henrico Caleno mandari curaret. De ejusdem ingenio, moribus ac eruditione hæc sub initio ejusdem libri leguntur: *In rebus semel prudenter destinatis magnanimus, acer & instans. Ingenium ipsi fuit acerrimum, judicium gravissimum, memoria capacissima, subtilis cholera non nihil habuit. Ad istas naturæ dotes accefferat studium noctu diuque infatigabile, & veritatis immensus amor; Rogatus aliquando à sodali, quodnam Dei attributum maxime ei cordi esset, & veneretur, veritatem respondit &c.* Sed profecto qui veritatem tam sollicitè amavit ac quasi vixit, in hoc libro non invenit, quamquam neque in hoc reprehensibilis; etenim ante mortem hæc verba habuit. *Si Romana Sedes aliquā mutari vellet, sum obediens filius, & illius Ecclesiæ, in qua semper vixi, usque ad hunc lectum mortis obediens sum.* Quod amplius cap. 29. libri proemialis & in epilogo totius operis contestatus est sequentibus verbis loquens de Romano Pontifice Petri successore. *Super illam petram ædificatam Ecclesiam scio. Quicumque cum ipso non colligit, spargit, apud quem solum incorrupta Patrum servatur hereditas. Quidquid ab ista Petri Cathedra, in cujus communione à teneris vixi, & porro vivere & mori fixum est; ab isto Principis Apostolorum successore, ab isto Christi Domini nostri Vicario; ab isto Ecclesiæ Christianæ universæ capite, moderatore, Pontifice præscriptum fuerit, hoc teneo: quidquid imprecabatur improbo, damnatum damno &c.*

3. An sicut lingua ita & animo senserit Jansenius, ad me non interest, qui de omnibus recte cogito; novit Deus, qui scrutatur renes & corda, certe si lib. proemial. cap. 28. perlegamus, ipso sub initio Jansenius videtur errasse, in-

Tom.II.

quit enim, se confidere puram Sancti Augustini doctrinam à quingentis annis à Scholis Catholicis exulem, revocare. Hæc non fuit totius Ecclesiæ levīs injuria, tanquam si per quinque sæcula in Sancti Augustini mente intelligenda Ecclesia defecisset. Per viginti & duos annos huic libro perficiendo totam Jansenius operam dedit, nec mirum si tantum temporis dederit, plurima etenim continet in tribus Tomis. In primo octo sunt libri de heresi Pelagiana. In secundo quatuor sunt partes. In prima, de ratione, & auctoritate in rebus Theologicis pertractatur. In secunda de gratia primi hominis & Angelorum. In tertia per quatuor libros de statu naturæ lapsæ; In quarta per libros tres de statu naturæ puræ. In tertio Tomo duæ sunt partes. Primam absolvunt decem libri de gratia Christi; secundam unicus liber, qui inscribitur, Paralelum erroris Massiliensium & opinionis quorundam recentiorum.

4. Plura equidem sunt in hisce libris, præter ea, de quibus dicemus, quæ non sine moderati animi nausea percipi possunt. Ita de omnium Theologorum Schola ipse opinatur, ut ista dixerit lib. proem. cap. 28. *Neque spem, neque cupiditatem, neque naturam, neque gratiam, eamque neque Angelorum, neque hominum, neque plantarum, neque lapsum, neque sufficientem, neque efficacem, neque operantem, neque cooperantem, neque vitium, neque virtutem, neque opus bonum, neque peccatum, neque originale, neque actuale, neque præmium, neque supplicium, neque liberum, neque servum arbitrium, denique neque vetus, neque novum testamentum intelligere videantur.* Soli igitur Jansenio intelligentiæ munus, & veritatis agnoscendæ privilegium reservata erant. Si hæc tibi parva videntur, audi quid dicat ep. 16. admirans enim doctrinam Sancti August. non tantum sui, sed etiam præteritorum temporum Theologis ignotam fuisse, inquit. *Ingenue dicam quod*

*sentio, existimo post Hereticos à nemine magis quàm à disputatoribus illis Scholasticis adulteratam & corruptam esse Theologiam. Sed quod tolerari non potest; ibidem dicit: Cum Augustinum degusto, fastidit Thomas, & loquens de Thomistarum & Patrum Societatis sententia circa physicam præmotionem & scientiam mediam hæc habet. Audeo dicere, mihi compertum esse, quod etsi utraque tùm Jesuitarum, tùm Thomistarum Schola usque ad extremum judicii diem, disputatura sit, tantum à veritate sit aberratura, in quantum utraque ab ipsa centum leucis distat.*

5. Fromondi itaque & Caleni Lovaniensium Doctorum cura Jansenii liber prodiiit, sed vix lucem aspexit, cum factò Romæ examine à Summo Pontifice Urbano VIII. ann. 1641. per Constitutionem, quæ incipit: *In Eminenti prohibitus, damnatusque fuit.* Jansenio mortuo contigit, quod Jansenius vivus jam dubitaverat; etenim epif. 19. *Non audeo, inquit, dicere, quid sentio de prædestinatione & gratia, ne forte antequam omnia parata & matura sint, mihi quod alijs, accidat. Romæ damnetur, sicut damnatus fuit Bajus.* Et ep. 63. protestatur, *daturum se operam, ne se vivente, liber suus in lucem prodeat, quo vitæ suæ tranquillitas possit turbari.* Mitissima, tamen fuit Urbani sententia, quippe qui duabus tantum ex causis librum damnaverit; Prima erat, quia contra decretum Pauli V. ann. 1611. & suum ann. 1625. de non scribendo circa materiam de auxiliis editus fuerat. Secunda erat, quia in ipso continerentur plures propositiones Baii, quas jam Pius V. & Gregorius XIII. damnaverant.

6. Damnato libro magnus Jansenianorum questus ac dolor. Missis Romam à Lovanienfibus duobus, Synnichio & Papio, qui libri Jansenii causam agerent, factum est, ut Summus Pontifex audiendis ac maturè discutiendis ipsorum querelis tres Cardinales, videlicet Bernardinum Spadam, Joannem Bap-

tistam Pamphilium, qui fuit Innocentius X. & Lellium Falconerium præficeret; Iterum innovata sed non mutata Bulla, quam prius subreptitiam existimaverant, de qua Alex. VIII. an. 1690. hanc propositionem proscriptis. *Bulla Urbani VIII. est subreptitia; Urbanus tamen à Ministris Catholici Regis, ut sua contra hujusce librum Constitutio in Belgio solemniter promulgaretur, unquam obtinere non potuit.*

7. Defuncto Urbano ad Petri Sedem evectus Innoc. X. statim ad Gubernatorem Belgii Marchionem Castrì Rodrici breve misit, in quo ait: *In isto ab hac Sancta Sede vetito Jansenii libro expressam novimus ac reassumptam doctrinam Michaelis Baii, cujus improbatìs opinionibus vehementer commotus Philippus II. claræ memoriæ Regis animus easuavit sollicitudine ac zelo, ut præcipuis ille monitis suo in Urbe oratori acriter præscripsit, impendè ageret cum Pontificibus prædictis Pio ac Gregorio, ut eas abolitas omnino vellet ac damnatas.* Data insuper ad omnes Belgii Episcopos epistolæ; sed non nisi anno 1648. Catholici Regis jussu ac studio Leopoldi Archiducis Constitutio Urbani promulgata ac recepta fuit, ea quidem lege, ut nemo Civile aut Ecclesiasticum munus obtinere posset, nisi prius juramento firmaret, *se obsequentem esse Sanctæ Romanæ Ecclesiæ ac SSmo D. N. Innocentio X. Pontifici Romano, & acceptare debita obedientia Constitutionem Urbani, in qua damnatur & prohibetur liber Jansenii.*

8. His Romæ & in Belgio ita peractis, etiam à Sorbonica Academia Jansenii doctrina rejecta ac damnata fuit, omnibusque severè injunctum, ne aliqua è damnatis à Pio V. & Greg. XIII. propositionibus propugnaretur. Subinde plures propositiones Jansenii ad examen & censuram revocatæ. Septem istæ fuerunt, quamvis duæ postremæ postea prætermisæ. Prima hæc erat. *Aliqua Dei præcepta hominibus jussis volentibus*

*Et resonantibus secundum præsentem, quas habent vires, sunt impossibilia: deest quoque iis gratia, qua possibilia fiant. Secunda. Interior gratiæ in statu naturæ lapsæ nunquam resistitur. Tertia. Ad merendum & demerendum in statu naturæ lapsæ non requiritur libertas à necessitate, sed sufficit libertas à coactione. Quarta. Semipelagiani admittebant prævenientis gratiæ interioris necessitatem; & in hoc erant Hæretici, quod vellent eam talem esse, cui posset humana voluntas resistere vel obtemperare. Quinta. Semipelagianorum error est, dicere Christum pro omnibus omnino hominibus mortuum esse, aut sanguinem fudisse. Sexta. Sensu olim Ecclesia, privatam Sacramentalem penitentiam pro peccatis occultis non sufficere. Septima. Naturalis attritio sufficit ad Sacramentum penitentiae. De quinque prioribus propositionibus magna lis, & controversia gravis excitata est.*

9. Hac de re octoginta quinque Episcopi Gallicani illas quinque Jansenii propositiones ad Innoc. X. detulerunt; anno itaque 1650. ad Pontificem Maximum supplices litteræ delatæ sunt. Initium est. *Majores causas ad Sedem Apostolicam referre sollemnis Ecclesiæ mos est, quem fides Petri nunquam deficiens perpetuo retineri pro jure suo postulat &c.* Vides, quanta eo tempore Gallicana Ecclesia Summo Pontifici obsequens fuerit. Undecim tamen ex altera parte Episcopi datis ad eundem Pontificem epistolis de hac delatione conquesti sunt; Sed nihil per istas actum est, nec commoveri Pontifex potuit, ne 12. Aprilis ann. 1651. Congregatio institueretur, in qua juxta octoginta quinque Episcoporum petitionem propositiones in examen vocarentur, suisque juxta meritum censuris afficerentur. Delecti fuerunt Cardinales Julius Roma Sacri Collegii Decanus, Bernardinus Spada, Martinus Ginettus, Dominicus Sechinus, paulo post Roma è vivis sublato, Fabius Chigijs, qui fuit Alexander VII. atque

isti additus est Cardinalis Pamphilius; omnes experientia, scientia, mentisque sagacitate nemini inferiores. Secretarius Congregationis fuit Albizius Sancti Officii Assessor, tredecim ex Religiosis Ordinibus Doctiores Theologi designati. Duo S. Dominici, duo Sancti Francisci, duo S. Augustini, duo Carmelitæ Discalceati, unus Capuccinus, unus Seruvita, duo Theatini, unus ex Societate Jesu. Ex his non deerant qui Jansenii libro faverent, quorum nomina præterire placet.

10. Pro tuendis quinque delatis Jansenii propositionibus nonnulli tanquam ab aliquibus Gallicanis Episcopis deputati Romam adventarunt, idest Domini Brouffe, Delane, & Angran, deinde Pater Desmares, & Dominus Manesier; è contrario ad promovendam propositionum censuram accesserunt DD. Hallier, Lagant, & Joyfel. Plura, quæ facta sunt, renuit animus ferre, ne aliquos ex præcipuis Religiosorum ordinum viros Jansenii partes adjuvare demonstrare contingat. Factæ & repetitæ sunt Congregationes plures etiam præsentem Pontifice; Omnium rationes multoties auditæ, ac tandem post longam maturamque duorum annorum discussionem, indictis ad Divinum implorandum auxilium privatis publicisque precibus prolata Pontificio ore sententia est, tali pacto, ut prima propositio declaretur *temeraria, impia, blasphema, anathematice damnata, & hæretica*. Secunda, *ut hæretica*. Tertia, *ut hæretica*. Quarta, *falsa & hæretica*. Quinta, *falsa, temeraria, scandalosa, & intellecta in eo sensu, ut Christus pro salute dumtaxat prædestinatorum mortuus sit, impia, blasphema, contumeliosa, Divinæ Pietati derogans & hæretica*.

11. Missa hujusmodi Constitutio ab Innoc. X. ad omnes Catholicos Reges, præsertim vero cum Epistola sua ad Regem Galliarum, quæ debita reverentia excepta, in toto Regno promulgata fuit; excepta etiam maximo gaudio & plausu ab Episc

Episcopis, qui datis ad Pontificem Epist. die 15. Julii ipsi gratias retulerunt, gratulantes summo pere, quod auctoritate sua grassantem pestem ejecisset.

12. Omnia nunc esse composita quis dubitaret? At non ita fuit. Jansenii defensores attonitum prius animum collegerunt, atque ut aliquod effugium pararent, duo dixerunt; Unum, propositiones illas Jansenii non esse; Alterum, in sensu Jansenii non esse damnatas. Hac de re Gallicani Praefules, ut nova hac Jansenianorum machinamenta everterent, de remedio deliberaturi conveniunt. Quatuor Archiepiscopis, & totidem Episcopis librum Jansenii ad examen sedulo revocandi, & cum damnatis propositionibus conferendi demandata Provincia fuit. Decem Congregationes coactae sunt, & demum communi suffragio statutum, damnatas ab Innocentio propositiones revera in libro Jansenii reperiri, easque damnatas in eo sensu in quo à Jansenio asseruntur, & explicantur, quod à Gallicano Clero in comitiis generalibus annis sequentibus habitis ratum confirmatumque fuit.

13. E' vivis translato Innocentio die 7. Januar. an. 1655. successor fuit Cardinalis Chigijs, appellatus Alexander Septimus, qui à Gallicanis Episcopis admonitus, quas novas fraudes astutiasque Jansenii fautores molirentur, iterum Innocentii Constitutionem confirmavit, novamque Constitutionem die 26. Octobris ann. 1656. edidit contra non nullos iniquitatis filios (sunt eiusdem verba) qui praedictas quinque propositiones, vel in libro praedicto Cornelii Jansenii non reperiri, sed fictas & pro arbitrio compositas esse, vel non in sensu ab eodem intento damnatas fuisse asserere magno cum Christi fidelium scandalo non reformidabant. Pergit Pontifex. Quinque illas propositiones ex libro praememorati Cornelii Jansenii Episcopi Iprensi, cui titulus Augustinus, excerptas, ac in sensu ab eodem Cornelio intentas damnatas fuisse declaramus & definimus, atque ut tales inusta

scilicet eadem singulis nota, quae in praedicta declaratione & definitione unicuique illarum singulatim inuritur, iterum damnamus. Atque ut deinceps nullus fraudibus & inanibus evasionibus locus pateret, anno 1665. die 15. Februarii idem Alex. VII. votis Regis Christianissimi & Episcoporum Galliae annuens hanc novam edidit Constitutionem.

## CONSTITUTIO.

**C**ornelii Jansenii haeresim in Galliis praesertim serpentem, ab Innoc. X. filic. record. Praedecessore nostro fere oppressam, ad instar colubri toruosi, cujus caput attritum est in varios gyros & cavillationum deflexus euntem, singulari Constitutione ad hunc finem edita extinguere conati sumus. Sed ut multiplices hostis hominum generis artes adhibet, nondum plane consequi potuimus, ut omnes errantes in viam salutis redirent.... Nullum aliud remedium opportunius pestiferæ hujus contagionis reliquiis extirpandis adhiberi potest, quam si omnes certam formulam subscribant nostra auctoritate firmatam.

## Formula subscriptionis.

**E**go N. Constitutioni Apostolicæ Innoc. X. datæ die 31. Maii ann. 1653. & Constitutioni Alexandri VII. datæ die 16. Octobris ann. 1656. Summorum Pontificum me subijcio, & quinque propositiones ex Cornelii Jansenii Libro, cui nomen AUGUSTINUS. Excerptas, & in sensu ab eodem auctore intento, prout illas per dictas Constitutiones Sedes Apostolica damnavit, sincero animo rejicio ac damno, & ita juro. Sic me Deus adjuvet & hæc Sancta Dei Evangelia.

14. Mirum est, quanta exarserint ira Janseniani, quam tamen tegere verbisque fucare studuerunt; Quid actum sit, quæve explanationes adinvenerint referre prætereo. Quia tamen noverant Cle-



**Clementem IX.** qui Alexandro successerat, velle quod definitum fuerat prorsus servari, se absque ulla restrictione illi formulæ subscripturos esse professi sunt. Quid vero in hac re Clemens IX. senserit infra patebit ex Clementis XI. Constitutione. Verum ea est hominum infirmitas ac versutia, ut ori cor non correspondeat, & à dictis facta omnino recedant. Hinc factum est, ut aliqui in Duacensi Academia professores Jansenii doctrinam iterum excitarent; inter istos fuerunt duo, quorum primus Gilbert, qui iussus fuit se retrahere; Alius eminenti nomine dictus Arnaldus, in cuius thesibus illæ etiam inventæ sunt. *Liber-tas indifferentiæ in statu naturæ corruptæ figmentum est purè humanum ex reliquiis Philosophiæ Pelagianæ natum.* II. *Sine gratia efficaci non tantum nihil boni non facimus, sed nec facere possumus, qui secus sentit; Semipelagianus est.* III. *Gratia sufficiens sensu Molinistico error est & hæresis: sensu Thomistico, fatuitas, ineptia.* IV. *Episcopus Iprensis sætione Moliniana damnatus est; Non aliam ille circa gratiam, quam purè Augustinianam Doctrinam propugnavit. Nec ullus Pontifex usquam suæ fallibilitatis dedit argumentum, quàm cum damnatæ sunt quinque propositiones in sensu à Jansenio intento.* V. *Alexander VII. sua constitutione altum gratiæ Evangelicæ vulnus inflixit, cujus nondum obdusta cicatrix.*

15. Sed quo magis aliquorum Gal-lorum ingenia & depravatæ mentes Jan-senio adherere etsi occultè conarentur, eo magis sollicita cura summus Urbis & Orbis Pastor Jansenii errores evellere satagebat. Hinc Alexander VIII. ann. 1690. die 20. Decembris triginta & unam propositiones ex Janseniorum libris depromptas tanquam temerarias, scandalosas, injurias, male sonantes, hæresi proximas, erroneas, hæreticas. esse, respectivè declaravit. Subortis deinde in Belgio novis circa subscriptionis formulam contentionibus Innocen. XII. aliorum Pontificum Constitutiones duo-

bus Brevibus confirmavit. Secundum tantummodo adducemus, datum anno 1696. die 24. Novembris in quo sunt hæc verba.

## BREVE SECUNDUM INNOCENTII XII.

16. **N**on sine admiratione intelleximus, nonnullos istis in Diœcesibus reperiri, qui verbis & calamo ausi sint affirmare, supradicto nostro brevi alteratam seu reformatam esse Constitutionem Alexandri VII. 16. Octobris anni 1656. editam, nec non formularium ab ipsomet pronuntiatum, cum dicto Bre-vi utrumque specificè confirmetur, & omnino intenderimus, & intendamus iisdem adhaerere, & nequaquam sine, ut aliquid addatur, vel dematur à prædicto formulario, illud quovis modo alterando in aliqua ejus minima parte, sed quod in omnibus & singulis ejus partibus, uti mandavimus, mandamus etiam ad amussim observari. Quod si prædicti Jansenista interne & absque eo quod deveniant ad aliquem actum externum, dum jurant formularium &c.

17. Ex illa voce prædicti existimant, se nulli Pontificiæ censuræ obnoxios esse, dum enim sic appellantur revera Janseniani non sunt, sed tantum ficti; ideo dixerunt in prima propositione damnata à Clero Gallicano in generalibus comitiis congregata ann. 1700. *Phantasma Jansenismi quæsitum ubique, sed nusquam repertum, præterquam in laboranti quorundam phantasia cui addiderunt alias tres propositiones injurias Pontificibus, qui Jansenium condemnarunt, quæ tamen omnes ab ipso Gallicano Clero damnatæ fuerunt.*

18. Tot è Vaticano jaculatis fulminibus quis attritus non caderet? Janseniani non ceciderunt, aut cadentes non dixerunt cum Saulo: *Domine quid me vis facere.* Sed anno 1702. proditi libellus quidam, inscriptus: *Famosus con-*  
*scien-*



*scientiæ casus.* In hoc describitur Clericus quidam, qui Sacramentalem absolutionem non obtinuit, quia confessus fuerat, se re ipsa quinque propositiones absolute damnare, ac formula fidei ab Alexandro VII. præscripta subscripsisse, sed quantum ad questionem facti, seu attributionem illarum quinque propositionum libro Jansenii, existimare se Religiosum sufficere silentium. Huic sententiæ quadraginta Doctores Theologi Parisienses, nescio an sponte an dolo, subscripserunt. Res pro Jansenianis prospere acta esset, immo actam esse ipsi cogitaverant; Sed Clemens XI. Pontifex Maximus eo, quo Spiritus Sancti præditus erat lumine, Decreto dato 13. Februarii 1703. hujusmodi casus decisionem penitus reprobavit. Breve missum fuit ad Lodovicum XIV. Galliarum Regem; Incipit. *Audivimus nuper &c.* ac tandem ab eodem Pontifice edita fuit Bulla 15. Junii ann. 1705. quæ incipit: *Vineam Domini Sabaoth*; in qua renovantur, & confirmantur omnes præcedentium Pontificum Constitutiones, omnes exceptiones & explicationes Jansenianorum rejiciuntur, & illa decisio præmemorati casus conscientie reprobat. Sed utinam res finita esset; radix hæc pessima adhuc germinat spinas, adhuc Apostolica pungitur auctoritas. Sub pacis larva maximum bellum; Plura dicerem; sed hæc de Janseniana Historia scriplisse sufficiat; In hac re consulentem exopto, legentem nolo.

19. Sed quo tandem tota hæc Jansenii Doctrina, pro qua totannis ipse laboravit, & qua tot labores ab aliis extorsit, totaque Romanæ Ecclesiæ fastidia protulit? Omnia quidem ad unum caput revocantur, & tanquam semitæ plures ad unum terminum perducunt, idest ad unam gratiam ex se efficacem; rejecta quacumque alia. Hoc jam falsum esse, nos demonstravimus, sed ejusdem mentem hic tantummodo aperire debuimus, non confutare. Satis enim contra ipsum factum est.

20. Voluit autem Jansenius hanc gratiam ex se efficacem consistere in victrici delectatione, seu in delectatione relative superiore, ita se explicat lib. 8. de gratia Christi cap. 2. & alibi. Ut autem hoc totum intelligatur. Duplex in primis in ejus sensu est distinguenda delectatio; Una, quam appellavit coelestem, & illa est, qua voluntas hominis ad bonum inclinatur, alia, quam vocat terrenam, & illa est, qua ad delectabile, malumque pertrahitur. Utraque victrix ac proinde superior dici potest, quamvis tamen idem non sit esse superiorem ac victricem, in eo sensu quo victrix in illius systemate nuncupatur, ut infra dicam. Est igitur, inquit ipse, voluntas hominis propter peccatum, multum infirma, ideo non nisi à quadam dominante delectatione inflecti ac determinari potest ad bonum vel ad malum; inde est, quod hujusmodi delectatione necessario ad agendum applicatur, juxta illud Sancti Augustini; *Secundum id operemur necesse est, quod amplius nos delectat*. Et ideo impossibile est delectationem majorem vinci à minore; quod quidem explicatur exemplo bilancis, in qua si duo sint inæqualia pondera necesse est ea pars inclinetur ac deprimitur, in qua majus est pondus, nec unquam fieri potest oppositum.

21. Si vero quæras ab ipso, quenam sit hujus delectationis natura, statim respondet lib. 4. de grat. Christi cap. 11. esse quemdam vitalem animi motum, indeliberatum, quo voluntas in aliquod objectum tanquam sibi conveniens ac jucundum fertur, & hoc sive loquamur de coelesti, sive de terrena delectatione per respectum ab bonum honestum, vel delectabile. Ex hisce porro motibus indeliberatis alii deliberati progrediuntur, quales sunt actus amoris, desiderii, spei & hujusmodi.

22. Hic jam perspicis hujusce delectationis necessitatem non ex natura ipsius voluntatis, sed tantum ex ejusdem infirmitate proficisci, ut ipse probat lib. 4.

lib.4. de gratia Christi c.9. & 10. Perspicis ulterius delectationem unicam esse causam propter quam voluntas hoc vel illo modo operatur, ita ut si non esset delectationis pondus nullo pacto ad operandum traheretur.

23. At per Jansenium hæc delectatio utcumque non est; si enim diceret, Deum voluntatem in bonum trahere, suadendo & alliciendo relinquendo tamen facultatem ad oppositum, à sententia nostra non recederet; Sed ab ipso ita delectatio hæc vitrix & superior explicatur, ut in conflictu duarum delectationum una gradibus alteri præponderet, ac ideo necesse sit, minor à majore vincatur; Hinc harum delectationum natura & virtus non est absoluta, sed relativa, ut ostendit lib.8. de gratia Christi cap.2. & juxta hoc duplicem etiam in homine distinguit potentiam, quæ per gratiam confertur. Unam dicit absolutam, quæ consistit in ipsa natura gratiæ secundum se spectata, & in voluntate Dei antecedente, qua voluntas in bonum ordinatur præcisâ quacumque subiecti circumstantia; Aliam vocat relativam, comparata scilicet voluntate ad majorem vel minorem cupiditatis delectationem.

24. Ex his breviter Jansenianum systema tibi subjeci, non enim per singula ejus dicta, aut illorum, qui ejusdem defensores se profitentur, nobis licitum est evagari. Plura contra auctorem suum afferre non prohiberemur, sed ex dictis in propriis locis satis superque constat quam falsum sit. Hic pauca subdam, rejiciendo illam majorem delecta-

tionem per gradus, illamque potestatem relativam.

25. Primo. Quicumque sit non inferiores aut inæquales, sed semper pares habet vires, quibus vel mediâ vel immediatè, vel remotè vel proximè oppositam vincere concupiscentiam possit. An non ait Apost. 1. ad Corint. 10. *Fidelis Deus qui non patietur vos tentari supra id quod potestis?* An non definit Concilium Trident sels.6. cap.11. *Deus impossibilia non jubet, sed jubendo monet facere, quod possis, petere quod non possis?* Sed oportet, Augustinum audiamus. Dicit autem lib. 1. de peccat. meritis & remis. cap.39. loquens de baptizato infante. *Si post baptismum vixerit, atque ad ætatem capacem præcepti, pervenire potuerit, ibi habet cum qua, idest concupiscentia, pugnet eamque adjuvante Deo superet, si non in vacuum gratiam ejus suscepit, si reprobatus esse noluerit.* In cap.5. epis. ad Galat. ait: *In hac vita etiam si existant desideria carnis de mortalitate corporis, tamen mentem ad consensionem peccati non subjugant.* Infinitus essem si omnia vellem in medium producere.

26. Peto tandem à Jansenio; Cur Angeli & primus homo in gratia non perseverarunt? Gratiam collatam Angelis & homini in eo statu in delectatione sitam esse ipse concedit immo ita docet, ex alia parte nulla in ipsis erat delectatio terrena & concupiscentiæ, ergo prior delectatio debuisset semper vincere, ergo debuissent semper in gratia perseverare. Sed hæc satis.



## QUÆSTIO V.

*De Gratia Habituali.*

Uætionem explicandam, aggredimur, quæ in aliquibus ad fidei dogmata spectat, in aliquibus ad Philosophicas & mere speculativas difficultates non solum ut factum postulat, sed etiam ut possibile sibi vindicatur, revocatur. Porro de hisce postremis diuturnum sermonem contexere, cum nihil emergat utilitatis, animus reluctatur, eo vel maxime, quod à Recentioribus Theologis, tanquam inanum quæstionum authores antiqui Theologi in hoc reprehendantur; nec inficior, immo, ut verum fatear, idem sentire non erubescio. Nihil tamen minus ita me geram, ut quod veteres dixerint, non abscondam, quod vero ad punctum Theologicum pertinet, plenarie, quantum potero, declarabo.

## ARTICULUS I.

*Plura, quæ de habituali gratia fuerunt à Theologis pertractata.*

1. **S**UB ipso quæstionis initio, quod promiseram, seruo. Primo fit magna quæstio inter Doctores Thomistas, & Scotistas, quo pacto gratia habitualis sit Divinæ naturæ participatio; Res hanc enim homines Divinæ fieri naturæ participes, ita certum est, sicut procerto tenendum quod à Divina Scriptura nobis demandatum esse profiteamur; Legatur autem epist. 1. Petri cap. 2. & invenietur de nobis dictum; *Ut Divinæ efficiamur consortes naturæ.* Joan. 1. *Dedit eis potestatem filios Dei fieri.* Rursus; *ex Deo nati sunt.* 1. Joan. 3. *Ut filii Dei nominemur & simus.*

2. Contra quod non est, filiationem

istam esse per adoptionem, quæ in humanis non habetur per novam participationem naturæ; etenim, in primis apud nos filii adoptivi non dicuntur ex Patre adoptante nati, sicut iusti nati dicuntur ex Deo; deinde, ut quis apud homines adoptivus fiat, jam supponitur homo, non sic ut homo apud Deum adoptetur, supponitur iustus, sed per ipsam gratiam adoptivus fit juxta illud psal. 8. *Ego dixi Dii estis, & filii excelsi omnes.*

3. De modo itaque tota difficultas instituitur. Volunt Thomistæ esse participationem physicam Divinæ naturæ, quantumvis non Divinæ essentia. Volunt vero Scotistæ, esse solummodo participationem moralem. Si autem à Thomistis petas, quare per gratiam participetur Divina natura, non essentia, respondent, hoc esse inter utramque discrimen, quod essentia Divina intelligitur per ordinem ad se, seu esse, tanquam primum constitutivum per quod aliqua res est in se ipsa; natura vero intelligitur per ordinem ad operari, tanquam primum & radicale principium, per quod aliqua res operatur. (Veniam da benigne Lector, si hisce terminis utar, si secus facerem aliorum mentem non explicarem.) Ille loquendi modus apud nostrorum temporum Theologos adeo remotus est, & exosus, ut petant, quid intelligatur per hoc esse radicale & primum; & si respondeas, distinguendas esse potentias rei à natura rei, ita ut illæ sint proxima agendi ratio, hæc vero remota; inquirunt, ignotum perignotius explicari, nec video, cur in hoc reprehendi, aut quomodo convinci possint; & sane, si de re loquamur, ut loqui debemus, hæc distinctio remoti & proximi admitti non debet, cum natura à potentiis suis non distinguatur.

guatur; quidquid dicant Thomistæ, & ad summum ad Philosophicam quæstionem, quæ prorsus inanis est, nec alio titulo pertractatur nisi Scholasticorum veterum gratia, tota lis revocatur. Si vero à Scotistis inquiras, quare per gratiam participetur moraliter Divina natura, statim respondent, quia per gratiam habent iusti reſtitutionem in suis operationibus, quatenus sunt juxta regulas morum, honestatis, & legis, itaut sicut peccatum est in legis difformitate, ita gratia consistat in conformitate.

4. Patrum Thomistarum rationes in eo præcipue sunt, quod ex una parte participatio physica naturæ Divinæ non repugnat in linea supernaturali, sicut non repugnat, immo datur in linea naturali, ex alia parte hujusmodi participatio nulli rei magis convenire potest, quam gratiæ habituali, quæ unicè à Scripturis & Patribus dicitur Divinæ naturæ participatio, ergo. Præterea. Natura Divina physicè accepta est principium primum, & radicale Divinarum operationum, idest cognitionis & dilectionis ipsius Dei, sed gratia habitualis est hujusmodi in homine, cum ab ipsa profuunt cognitio & dilectio Dei super omnia, sicut à semine profuit messis, proinde gratia dicitur semen gloriæ, ergo.

5. Scotistæ è contra afferentes disparem valde rationem inter participationem in linea naturali, & participationem in linea supernaturali; alioquin sequeretur, quod sicut in illa esse potest, & est participatio substantialis, ita esse posset, ac esset in linea supernaturali, assertum suum probant, ex quo gratia habitualis in nobis non sit, nisi ad sanctos mores & legis Divinæ conformitatem, quæ, cum ad lineam moralem pertineat, non nisi moralem sibi vindicat participationem; & ita explicatur amicitia quæ est inter Deum & creaturam, & jus ad hereditatem, quod per gratiam habituale acquiritur; & si secus diceretur, non esset potior ratio, cur gratia

Tom. II.

esset participatio Divinæ naturæ, & non esset aliorum attributorum, ut immutabilitatis, immensitatis, æternitatis. Neque placet quorundam responsio dicentium, hæc attributa esse tribuenda essentiæ, non naturæ, nam negari non potest naturam Divinam cui tantum tribuere volunt esse radicem operationum, esse radicem intellectus immutabilis, æternæ &c. nec tamen gratia est radix in homine hujusmodi intellectus, nisi in linea morali; & si infes, esse participationem dumtaxat inadæquatam, jam te perſpicio, in hujusmodi participatione admittere præcisiones objectivas. Ulterius tamen in hac re non progredior, cum rem inanem existimem.

6. Progrediuntur tamen Doctores, inquirentes, an sit participatio physica formalis, vel virtualis. Illam virtualem appellant, quæ habetur ab alio tanquam à causa efficiente, & ita semen est virtualis participatio generantis, & species impressa objecti, vel habetur ab alio continente eminenter & non formaliter rem participatam, sicut est v. g. calor in sole. Illam formalem dicunt, quæ ab alio adinstar formæ communicatur, ita, ut formaliter reperiatur id, quod participatur, in utroque extremo, & in eo, à quo est, & in eo, in quo est participatio. Pro formali participatione contendere videntur, Suarez, Ripalda, Ferre, Gonetius, aliique. Utramque opinionem conciliant Salmantic. Puteobonell. vero item hanc de pura voce contendit. Scotistæ vero juxta principia sua formalem omnino excludunt. Vide quæso, quibus in rebus humani ingenii virtus exhauriatur, aut saltem occupetur.

7. Sed iterum alia difficultas inter Thomistas & Scotistas confurgit; an scilicet per gratiam constituantur homines amici Dei, filii & hæredes æternæ gloriæ tanquam per virtutem ipsi gratiæ intimam & essentialem, ut primi contendunt, an vero solum per extimam Dei ordinationem, ut contendunt secundi;

Y 2 con-

convenire enim hæc omnia hominibus gratiam habitualement habentibus, nemo potest inficias ire, nisi Sacrarum Scripturarum veritas infringatur. *Accepistis spiritum adoptionis filiorum Dei*; ad Roman. 8. *Ut adoptionem filiorum recipereamus*; ad Galat. 4. *Prædestinavit nos in adoptionem filiorum*. Ad Ephes. 1. atque hoc sæpe aliis in locis invenitur, in quibus non dicimur servi, sed amici, hæredes quidem Dei coheredes autem Christi; quodve disertè definivit Concil. Trident. sess. 6. cap. 4. ubi dicit; *justificationem hominis esse translationem ab eo statu, in quo nascitur Filius primæ Adæ in statum gratiæ adoptionis filiorum Dei*. Et cap. 7. docet, *fieri per susceptionem gratiæ & donorum, unde homo ex injusto fit justus, ex inimico amicus & heres*. Quæ omnia elegenter tradiderunt S. Patres præsertim Cyprianus & Chrysologus citati à Gonet. disp. 2. num. 106.

Pro Thomistar. sententia stant Suarez, Medina, Ovied. Exparza, nostrique omnes. Pro Scotistis vero Ocham. Gabriel. Marfil. Henrick. Coninch. Amicus. Istos censuratur qui velit, parum nostra interest quidquid dicatur.

8. Tertio inquirunt, utrum gratia creetur, vel educatur. Jam quid sit creatio, quid educatio, constat ex philosophicis, si tamen peripateticam doctrinam quis acceperit, quia qui modernorum systema sequitur hanc educationem & ignorat & negat, aut saltem irridet. Stant pro gratiæ educatione Thomistæ, Mastrius, Suarez, Nostri; Stant pro opposita parte plures Scotistæ cum Alenfi. Ratio pro primis colligitur ex intrinseco educationis requisito, videlicet gratiam dependere, ut fiat & conservetur, à subiecto, ergo. Prima pars antec. ostenditur, quia de facto alia accidentia, quamvis sint spiritalia & supernaturalia, sicut sunt omnes supernaturales actus, dependent, ut fiant, utpote vitales actus à principio à quo sunt, & in quo debent recipi, quæ ratio valere debet etiam de habitibus, quamvis non perti-

neant ad vitalitatem, secus educatio repugnaret in omni forma non vivente, quod est falsum, ergo. Secunda pars antec. declaratur, quia cum gratia, velut accidens, exigit inhaerere, dependet secundum se à subiecto ut conserveatur, hoc enim modo distinguuntur ea, quæ per se subsistunt, ut est anima rationalis, & ea, quæ per se inhaerent, ergo.

9. Confirmant, quia quando desinit gratia non transit in nihilum omnino, intelligitur enim desinere per solam separationem à subiecto, quod tamen remanet, ut experientia comperitur est, immo remanet cum capacitate ad iterum gratiam habendam, ut pariter experientia & fide ratum tenemus, ergo etiam non fit ex nihilo omnino, non igitur creatur. Prima consequentia tenet, quia quod incipit per creationem desinit per annihilationem per se loquendo, ut commune profert eloquium. His suffragatur quod docet S. Th. 1. p. qu. 104. art. 4. idest in operibus gratiæ de facto annihilationem non inveniri; Non potest ex alia parte affirmari, gratiam fieri per actionem, quæ concreatio appellatur; Siquidem ista intelligitur per hoc, quid fiat aliquid per eandem actionem per quam fit subiectum, at res hæc nequaquam contingit, cum certum sit gratiam habitualement non fieri per eandem actionem per quam fit anima, ergo.

10. Ratio pro secundis est, quia gratia habitualis à solo Deo est saltem loquendo ordinarie & principaliter, Deus autem non indiget concursu alterius causæ efficientis, neque materialis, nihil ergo prohibet, eam esse per creationem, & si nihil prohibet, quare id non asseramus? Præterea; nobilior est gratia, quàm sit ipsa anima rationalis, si ergo hæc est per creationem, etiam illa, potiori ratione. Tandem in Christo & Beatissima Virgine pro eodem instanti quo fuit anima, fuit etiam gratia, ergo concreata fuit, non est igitur de intrinseca



seca natura gratiæ fieri per educationem. Has rationes & superius adductas perpendat qui velit, posset quibuscumque non inconveniens apparere responsio.

11. Quarto inquiritur, an gratia distinguatur re à charitate. Realem distinctionem insinuant omnes Thomistæ cum suo Doct. hic qu. 110. art. 3., & alibi, quibus adduntur S. Bonavent. in 2. dis. 27. art. 1. qu. 2. Egidius, Suarez, Valentia, Nostrique. Eandem negant Scot. in 2. dis. 27. §. *Ideo alia est*, Durand. Bacon. Bellar. Exparza. Aliqui vero problematicè sentiunt; ut Sylvius, Vasquez, Madernus. Porro multifariam sumitur charitas; aliquando sumitur pro Deo ipso, in quo sensu dicitur. *Deus charitas est* vel pro actu, quo Deus nos diligit, & pariter est ipse Deus, cum quilibet actus Dei Deus sit; hoc ergo pacto certum est, charitatem esse re distinctam à gratia. Aliquando sumitur pro dono creato, quod à Deo producitur in anima per actum suæ charitatis, & hoc modo nullam admittendam esse distinctionem, compertum est, cum certum sit, gratiam esse huiusmodi donum à Divina nobis charitate collatum. Aliquando sumitur vel pro actu, quo nos diligimus Deum, vel pro habitu, & sub hac ratione ita evincitur distinctio, sicut actum à quocumque habitu distingui non dubitamus. Aliquando tandem sumitur pro habitu virtutis Theologicæ, & de hac tantummodo inter Doctores citatos est controversia.

12. Probant Thomistæ sententiam suam primo ex Scripturarum testimoniis. Ad Ephes. 6. *Charitas cum fide à Deo Patre, gratia cum omnibus qui diligunt.* Ad Roman. 5. *Charitas Dei diffusa est in cordibus nostris per Spiritum Sanctum, qui datus est nobis*, ubi indicatur donum Spiritus Sancti, quod per gratiam habetur, prius esse charitate, unde hæc se habet ut fructus, gratia vero ut radix juxta illud ad Galat. 5. *Fructus autem, Spiritus* (id est collationis Spiritus San-

cui factæ per gratiam) *est charitas, gaudium &c.* Scripturis adduntur etiam Concilia. Trident. sess. 6. cap. 7. dicit, justificationem fieri per susceptionem gratiæ & donorum, quod esset superfluum additum, si dona, & per consequens charitas, à gratia distincta non essent; Idem definit Muguntin. cap. 7. de justificatione.

13. Videtur colligi ex ratione; Primo quia, ut docet S. Thom. pluribus in locis, natura ex genere suo distingui debet re à qualibet virtute, atqui gratia se habet ad instar naturæ, charitas ad instar virtutis, ergo. Mi. patet, quia gratia debet esse vel physicè vel saltem moraliter participatio Divinæ naturæ, proinde naturæ munus & proprietates sibi vindicat; Prob. maj. natura ex genere suo datur ad esse, virtus vero ad operari, ita ut illa sit principium operandi solum remotum, & radicale, hæc vero proximum & formale, & illa intelligi debeat huic præexistens, unde virtus à Philosopho dicitur, *dispositio perfectæ ad optimum, dico autem perfectum, quod est dispositum secundum naturam*, ergo prius est, unumquodque in sui natura esse constitutum, quam habere virtutem, seu dispositionem. Secundo, quia inter fidem & gratiam datur realis distinctio, ergo etiam inter gratiam & charitatem, ant. patet, quia in peccatore remanet fides, nec tamen remanet gratia; Prob. consequentiâ. Sicut fides est virtus per se infusa se habens ut potentia, ita & charitas, ergo eodem modo de utraque loqui debemus, sicut loquimur de potentiis animæ quantum ad distinctionem vel identitatem. Tercio quia, si gratia esset distincta à fide, & non à charitate, dari posset natura distincta ab intellectu, & non à voluntate, cum fides ad intellectum pertineat, & charitas ad voluntatem, sed hæc natura repugnat, ergo. Prob. mi. repugnat natura, quæ volitiva sit, & non sit intellectiva, & si aliter posset, saltem prius esset volitiva quam intellectiva, ergo. Præterea. Prius est par-

participari Divinum intellectum quam Divinam voluntatem, ergo si gratia distinguitur à fide per quam homo participet fidei Divini intellectus, à fortiori distinguetur à charitate, per quam participet Divinæ voluntatis; Ultra quod sequeretur, quod cum fides oriatur à gratia tanquam à radice, oriretur etiam à charitate, & ita fieret, participatio Divini intellectus progredi à participatione Divinæ voluntatis, quod est invertere ordinem prioris & posterioris.

14. Probant Scotistæ sententiam suam primo pariter ex Scripturis, in quibus quidquid de gratia dicitur vel ipsi tribui potest, dicitur etiam de charitate istique tribuitur. Prima Joan. 3. *Videte qualem charitatem dedit nobis Pater, ut filii Dei nominemur & simus.*

1. Petri 4. *Charitas operit multitudinem peccatorum.* Ad Ephes. 1. *Elegit nos in ipso, ut essemus sancti & immaculati in charitate.* Rursus 1. Joan. 4. *Qui manet in charitate in Deo manet &c.* Quare plerumque fit mentio charitatis & non gratiæ, plerumque gratiæ & non charitatis, ad innuendum in charitate contineri gratiam, in gratia contineri charitatem. Immo videtur Apostolus altius de charitate sentire, quàm de gratia, cum toties dixerit, hominem sine charitate esse veluti æs sonans aut cymbalum tinniens, & nihil ipsi sine charitate prodesse.

15. Probant secundo rationibus; & sicuti Thomistæ adduxerunt primam juxta propria principia statuentia distinctionem inter substantiam & virtutem operativam, inter animam & facultates animæ, ita Scotistæ argumentantur juxta principia propria statuentia identitatem, quare, quomodo efformandum sit argumentum, parum etiam intelligenti manifestum erit. Secundo ex inseparabilitate, quæ reperitur inter gratiam & charitatem rectè potest inferri realis identitas, quamvis enim non semper inseparabilitas identitatem significet,

quando vel invenitur oppositio relativa, aut disparata, vel quando effectus sunt omnino diversi, nihilominus contrarium dici debet, si contrarium contingat, sed hoc est in nostro casu, ut considerari potest, ergo; per quam rationem refellunt quod supra à Thomistis dicebatur, & quod postremo additum fuit, quanti ponderis sit argumentum, haud difficulter videri potest. Remaneat ergo utraque sententia in sua probabilitate, cum quidquid dicatur, tutissimè dicatur.

## ARTICULUS II.

*Utrum gratia habitualis sit quedam qualitas inherens physice anime.*

16. **F**UIT Magistri Sententiarum opinio in 1. dif. 17. litt. B. C. D. E. gratiam habitualement & charitatem esse, ipsum Spiritum Sanctum, ita ut Deo grati simus, Deumque diligamus ex charitate, quæ est ipse Spiritus Sanctus in sui substantia nobis communicata, & peculiari quodam modo unitus, quod ab omnibus Theologis postea rejectum fuit, & ab unico Scoto in eandem distinct. fuit ejus mens benigne explicata. Lutherus vero Calvinus, Melanct. Bucerus unanimi ore calamoque docuerunt, gratiam habitualement seu formam justificantem nullo modo esse qualitatem in anima nostra receptam, sed consistere dumtaxat vel in extrinseca peccatorum condonatione, vel in iustitia Christi nobis imputata, vel in quodam extrinseco favore. Contra istos res magis pertractanda est, ubi de justificatione disputatio instituetur. Interim modo.

17. Dicendum esse dogma fidei, gratiam habitualement & justificantem esse physice intrinsecam & inherentem animæ.

Si Concilium Tridentinum asserre vellem, tam perspicue veritas hæc appareret, ut lucem negaret qui eam non pro-

profiteretur. Quid enim definit sess. 6. can. 11. ? Verba proferamus. *Si quis dixerit, homines justificari vel sola imputatione justitiæ Christi, vel sola remissione peccatorum exclusu gratiæ & charitate, quæ in cordibus eorum per Spiritum Sanctum diffundatur, atque illis inhaereat, aut etiam gratiam, quæ justificamur, esse tantum favorem Dei, anathema sit.*

Quibus verbis non tantum nostrum statuitur, sed hæreticorum errores ad litteram rejiciuntur. Pergit Tridentinum, & cap. 7. docet, *causam formalem nostræ justificationis esse justitiæ Dei, non quæ ipse justus est, sed quæ nos justos facit, & nos renovari in justificatione per susceptionem gratiæ & donorum.* Ergo sicuti hæc dona intrinsecè recipiuntur in anima, ipsique physice inhaerent, ita etiam gratia, per quod refellitur quod à Magistro dicebatur, nam eadem ratione infertur, charitatem illam, per quam nos diligimus Deum, non esse illam per quam Deus diligit. Afferre tamen non prohibeor Concil. Viennense sub Clem. V. celebratum in Gallia, in quo decretum fuit, inter tot sententias, quæ tunc erant apud Theologos, illam esse recipiendam, quæ defendit, infundi in baptismo tam parvulis, quam adultis habitus gratiæ & donorum, ut habetur in Clement. prima de Summa Trinit. & Fide Catholica. Non immerito propterea Catechismus de Sacram. Baptismi asserit; *Gratiam cam esse, per quam non solum peccatorum sit remissio, sed Divina qualitas in anima inhaeret, ac veluti quidam splendor & lux, per quam homines ad omnia opera bona sunt habiles.* Per quas ultimas particulas indicatur non solum actio, sed etiam habitus, seu qualitas ipsis hominibus inhaerens.

18. Ratio autem S. Th. 1. p. qu. 12. art. 1. est, quia dum nobis infunditur gratia habitualis, Deus nos amat non amore simplicis complacentiæ & affectivo, sed benevolentia effectivo & efficaci; *Amas nos*, inquit S. Bernardus de

amore Dei, *in quantum nos efficit tuos amatores, nos affectu, tu effectu.* Aliquid ergo in nobis producit, quod in nobis sit, & certe aliquem amare efficaciter est illi velle bonum, bonumque conferre. Plura alia omitto, quod etiam in argumentis contrariis faciam, cum de hac re agendum sit, ubi res contra hæreticos propriè instituetur.

19. Hic primo opponam quod Magister Sententiarum pro sua profert opinionem; profert autem illud 1. Joan. 4. *Deus charitas est* proinde charitas in recto affirmatur de Deo, quod dici non posset, si charitas tantum à Deo esset tanquam à causa, à qua gratia producitur & nobis infunditur; Sic dici non potest, Deus est fides, est spes, est patientia, sed tantum cum addito, idest, spes mea, patientia mea, ut habetur in psalmis, & tamen fatemur hæc virtutes dari nobis à Deo. Hoc equidem est, quod docuit S. Augustinus lib. 15. de Trinit. cap. 19. dicente: *Si in donis Dei nihil est majus charitate, & nullum est majus donum Dei, quàm Spiritus Sanctus, quid consequentius est, quam ut ipse sit charitas, quæ dicitur Deus & ex Deo.*

20. Sed contra. Jam dictum fuit, quod sicuti justitia duplex est, una, quæ ipse justus est, alia, quæ nos justos facit, ita in Deo duplex est charitas, una, quæ se ipsum amat, alia, quæ nos reddit sui amatores. Charitas, quæ de Deo affirmatur in recto, est charitas prima, charitas vero, quæ gratia convenit habituali, est charitas secunda; Illa Deus est, ista Deus non est, sed à Deo est. Quapropter nihil mirum, si nec fides, nec spes, nec patientia, aut alia possint in recto dici de Deo, quia nec Deus sibi ipsi credit, nec in se ipsum sperat, nec aliquid in ipso reperitur, quod sit patientiæ objectum. Juxta hæc explicatur Sanctus Augustinus tam in auctoritate adducta, quam in aliis, quas distinctione citata Magister producit.

21. Oppones secundo contra rationem à nobis expositam. Gratia habitualis

tis, quæ dic itur aliquid productum, & nobis inhærens, illa est, per quam evadimus Deo grati, atque à Deo efficaci amore dilecti, sed possumus esse Deo grati, & à Deo dilecti sine aliquo in nobis producto, nobisque inhærente, ergo. Prob. mi. Objectum est cognitum & visum, quin aliquid producatur in objecto cognito & viso, ergo etiam objectum, esse potest Deo gratum, & dilectum, quin in ipso aliquid producatur. Ratio autem est, quia ille Divinus amor erga creaturam est in priori, & independens à quacumque forma communicata subiecto, quod gratum & dilectum denominatur.

Præterea. Potest intelligi Divinus amor erga creaturam, quin aliquid in creatura producat, ita enim se habet in actu prædestinationis qui certè specialissimus est, nec tamen aliquid ponit in prædestinato, & quamvis etiam dicendum foret, per hunc amorem aliquid produci, satis hoc fervaretur, si diceremus, efficere auxilia actualia.

Demum, etiam creatura Deum amat, nec tamen aliquid in Deo producit, ergo etiam Deus amare potest creaturam, quin tamen aliquid in creatura producat; quod etiam alia paritate declaratur; Sicut enim odium Dei in creaturam, nihil agit intrinsece in creatura, ita & amor; cum uterque sit liber; libere proinde respiciens creaturam.

22. Resp. conc. maj. ne. mi. ad prob. conc. ant. ne. conf. Si disparem rationem quæris, hæc est, quia cognitio & visio ita fertur in objectum, quod cognitum & visum denominatur, ut supponat in ipso rationem formalem, propter quam cognoscitur & videtur, at Divinus amor non supponit in creatura bonitatem, propter quam amatur amore benevolentia, proinde creaturam amatam denominare non potest, nisi hujusmodi bonitas communicetur. Neque officit, esse priorem & independentem ab hac forma communicata, nam etiam actio solis, per quam aer illuminatur, est indepen-

dens & prior luce in aere producta, & tamen non aliter aer illuminatus denominatur nisi per lucem in ipso productam. Ad secundum. Licet actus prædestinationis nihil ab æterno ponat in creatura, ponit tamen tempore opportuno, præsertim tempore mortis cum gratia conjungendæ; neque Divina benevolentia talis absolute servari potest per sola auxilia actualia, etenim hæc conjungi possunt, & persæpe conjunguntur cum peccato, at hic loquimur de amore illo, qui in nobis id efficiat, quod cum peccato non conjungitur, neque in præfenti providentia conjungi potest, reddendo nos gratos & dilectos, immo etiam diligentes, proinde &c. Ad ultimum; mirum non est, si creatura amando Deum nihil producat in Deo, quia in Deo amata bonitas immutabilis præsupponitur ac æterna, non sic præsupponitur in creatura, & ideo à Deo produci debet; Quod vero dicitur in ultima paritate non tenet; nam creatura habet ex propriis per quod odio habeatur à Deo, non autem habet ex propriis ut propriis per quod diligatur.

### ARTICULUS III.

*Utrum in peccatore sit necessaria aliqua dispositio ad gratiam habitualem.*

23. **D**ifficultas hæc tantum de peccatoribus adultis resolvenda foret, Lutherus tamen qui in libro de capt. Babylon. cap. de baptis. docere videtur infantes, cum baptizantur, habere fidem actualem, eam etiam ad parvulos referre nos compellit. Fortasse Lutheri mens ambigua foret, nisi in Wirtemberg. conciliabulo an. 1536. ejusdem mentem ipsi Lutherani explicassent; Hæc autem docuerunt. Primo infantes in baptismo salvos fieri per aliquam propriam actionem. Secundo; hanc parvulorum actionem esse quemdam novum sanctumque motum. Tercio hunc motum, etsi infantes non sunt intelligen-



gendi virtute præditi, esse inclinationem ad credendum & diligendum Deum motibus fidei & dilectionis similem. Proinde fit in Lutheranorum errore, etiam in parvulis necessariam esse aliquam dispositionem ad gratiam habitualement.

24. Dicendum. In parvulis nullam esse dispositionem.

Prob. Si aliqua in parvulis esset dispositio ad gratiam habitualement, hæc vel esset actualis fides, vel aliquis motus actuali fidei omnino similis, sed nec actualis fides, nec motus actuali fidei omnino similis, ergo. Prob. prima pars mi. quæ melius exponi non potest quam Doctrina S. Augustini ejusdemque ratione; In quo enim actualis fides potissimum sita est? non in alio quam in pio voluntatis affectu & mentis assensu rebus à Deo revelatis, atqui infantes utriusque incapaces sunt, ergo etiam actualis fidei. Hoc certe adeo compertum est, ut Sanctus Augustinus epif. 57. ad Dardanum hæc habuerit. *Nescire Divina parvulos qui nec humana adhuc noverint, si verbis velimus ostendere, vereor ne ipsi sensibus nostris facere videamur injuriam.* Hoc est, quod colligitur ex Sacris Literis, Deuteron. enim 1. legitur. *Parvuli boni & mali ignorant distantiam.* Ridiculum igitur & omnino fictum est, eos posse credere.

25. Ex his aliud argumentum confurgit, quo utitur Bellarm. de Sacram. Baptif. cap. 11. Fides actualis haberi non potest, nisi innoverit Divina revelatio, quæ vel sit immediate à Deo, aut per verbum Dei auditum vel lectum, sed Divina revelatio neutro modo potest parvulis innoscere, ergo. Non posse primo modo ipse Lutherus concedit, cum sit omnino extraordinarius, sed neque secundo & probatur. Si parvulis innoscere posset Divina revelatio per verbum Dei auditum, præsertim per verbum, quo exorcizantur adjuvantibus Ecclesiæ precibus, ut ipse fatetur, sed hoc non, ergo. Mi. declaratur, nam si per verba exorcismi fides hæc gignere-

tur, hisce verbis aures intenderent parvuli, cum tamen contrarium videamus; Præterea, omittantur hæc verba, sicut multoties omittuntur, dum instante mortis periculo baptismus confertur à quavis muliercula, per quod verbum tunc parvuli fidem concipiunt? & tamen valide confertur, & gratia habitualis infunditur.

26. Prob. secunda pars primæ mi. Quinam sunt isti motus, quos similes fidei & dilectioni asserunt Lutherani? sunt ne corporei, vel spirituales? si primum, jam ab actibus fidei & dilectionis qui spirituales sunt, distant omnino; Si secundum, ergo à cognitione non distinguuntur, sicut enim oculus non movetur nisi videndo, sic aliter non movetur animus, quam intelligendo. Quod si parvulorum motus, dum baptismum suscipiunt, consideremus, eos potius infidelitati & odio similes, quam fidei & dilectioni affirmabimus. Pependit hoc S. August. & epif. cit. inquit. infantes vagitibus & fletibus baptismum potius reluctari, quod certe sine crimine non facerent, si uterentur rationis & voluntatis arbitrio. Hinc contra Lutherum stat eorum argumentum, qui dicebant irritum esse baptismum in infantia collatum; hoc sic proponitur. Parvuli, dum baptizantur, ejulant, consequenter refugiant; vel igitur id intelligentes agunt, vel non intelligentes, si hoc dicatur, ergo non credunt, si illud, ergo sacrilegè agunt, qui Sacramentum recusant; Omnia autem hæc complectitur & excludit Concil. Trident. sess. 7. can. 13. ita definiens. *Si quis dixerit, parvulos eo quod actum credendi non habent, suscepto baptismo inter fideles computandos non esse, ac propterea cum ad annos discretionis pervenerint, esse rebaptizandos, aut præstare, omitti eorum baptismum, quàm eos non actu proprio credentes baptizari in sola fide Ecclesiæ, anathema sit.*

27. Ob. 1. Si parvuli, dum baptizantur, non crederent, enorme foret mendacium, quando minister à parvulo



petit, an credat, & respondetur pro ipso, *credo*. Rursus, si certum est, illum non credere, ut quid interrogat, an credat? Secundo. Illi tantum sunt baptizandi qui sunt capaces instructionis, & per consequens fidei actualis, sed parvuli sunt baptizandi, ergo sunt capaces instructionis fideique actualis. Maj. ostenditur, nam Christus Mat. 24. præcepit Apostolis. *Docete omnes gentes, baptizantes eos in nomine Patris &c.* Tertio Marci ultimo Christus ait. *Qui crediderit & baptizatus fuerit, salvus erit* atqui parvuli per baptismum salvi sunt, ergo credunt. 4. Mat. 18. dixit Christus, *Qui scandalizaverit unum de pusillis istis, qui in me credunt &c.* Pusilli ergo credunt, 28. Resp. mendax est Lutherus, non qui pro infantulo respondet, *credo*. Qui enim ita respondet, non significat, illum credere actu proprio sed alieno, idest fide matris Ecclesiæ, ut enim ait S. Augustin. ser. 10. de verbis Apostoli. *Accommodat Mater Ecclesia infantibus aliorum pedes, ut veniant, aliorum cor ut credant, aliorum linguam, ut constentur.* Quod quidem merito factum est; sicut enim Adami peccato pergravantur, sic aliena fide, idest Ecclesiæ eriguntur. Ad secundum ne. maj. ad textum, ibi sermo est de baptismate adultis conferendo; subditur enim, *docentes eos servare omnia quaecumque præcepi vobis* quod certe ad parvulos, referri non potest; Satis igitur istis est, si cum ad usum rationis pervenerint, instruuntur, Ad tertium eodem modo, agitur namque de illis, ad quos Apostolicam prædicationem, ut converterentur, dirigebat; dirigebat autem ad adultos, in quibus non solum est necessaria propria fides, sed etiam poenitentia, & prioris vitæ detestatio. Ad quartum. Pro pusillis non debent intelligi parvuli vix in lucem editi; advocavit enim Christus parvulum, & statuit in medio eorum, qui propriis pedibus incescit; illi autem parvuli, de quibus est noster sermo, scandalii sunt incapaces,

29. Juxta hæc explicanda sunt etiam omnia, quæ de fidei necessitate vel in Sacris litteris, vel in Sanctis Patribus inveniuntur, ut illud ad Hebr. 11. *Sine fide impossibile est placere Deo*. Et. *Accedentem ad Deum oportet credere, quia est &c.* Tenent enim de actuali fide saltem aliquando habita in adultis, non sic in parvulis nisi de fide habituali, quam una simul cum gratia accipiunt in justificatione per baptismum, ut loquitur Trid. sess. 6. cap. 7. Quanquam & dici potest, parvulos etiam habere actualem fidem non propriam, sed alienam, idest Ecclesiæ, per quam Deo placere possunt & ad Deum accedere, sicut per peccatum alienum Deo displicent, & à Deo recedunt.

30. Ob. 2. Parvuli dum baptizantur, Spiritum Sanctum accipiunt, ergo accipiunt aliquam Spiritus Sancti operationem, sed non possunt accipere actum fidei, & dilectionis proprie & cum cognitione, ergo aliquos novos motus, qui fidei & dilectioni similes sint. Hoc quidem evenit in Joanne Baptista, qui præsentem Christo, quem Virgo Mater gerebat in utero, *exultavit*, Luc. 1. ergo præsentem Ministro, qui parvulum baptizat, parvulus novos motus non edet?

Resp. conc. ant. ne Conf. accipiunt etiam gratiam habitualement, & omnia habitualia dona fidei, spei, & charitatis, qui neq. sunt fides & dilectio cum cognitione, neque motus sine cognitione. Ad exemplum. Joannes Baptista non habuit motus sine cognitione, sed revera exultavit cum gaudio, quod cognitionem supponit; & hoc est juxta mentem Ambrosij, Bedæ, aliorumque Patrum in ejus loci commentariis. Neque dicat Lutherus. Ergo Joannes Baptista habuit propriam fidem, ergo & ceteri infantes. Consequentiam hanc negat S. Augustinus episcopus 57. hæc scribens. *Quamquam etiamsi usque adeo in illo puero est acceleratus usus rationis & voluntatis ut intra viscera materna jam posset agnoscere,*

credere, consentire, quod in aliis parvulis etas expectatur, ut possint, hoc in miraculis habendum Divinæ potentie, non ad humanæ trahendum est exemplar naturæ, nam quando Deus voluit etiam jumentum mutum rationabiliter est loquutum, nec ideo sunt admoniti homines in deliberationibus suis etiam asina expectare consilia, quo circa nec quod factum est in Joanne contemno, nec inde regulam, quid sentiendum sit de parvulis, figo, immo id de illo propterea mirabiliter prædico, quia in aliis non invenio. Hæc adnota, & vide, quam impudenter mentitus sit Kemnitijs, qui inter Lutheri & Augustini sententiam nihil esse discriminis, affirmare non trepidavit.

31. Ita rejecta Lutheranorum dementia; superest aliquorum doctorum, quos Catholicos prostemur, mentem indagare. Capreo'us enim & Paludanus existimant parvulos disponi ad gratiam habitualement, per quemdam habitum seu characterem, Cajetanus vero per meritum Christi Domini; Neutrum tamen ex hisce admitti potest, non primum, quia habitus infusi supernaturales comitantur gratiam habitualement, ut traditum fuit à Concilio Tridentino à nobis superius citato, ergo non possunt ad gratiam habitualement disponere, idem dicitur de caractere, cum iste tamquam aliquis animi ornatus gratiam habitualement subsequatur, & in lege veteri non deear gratia habitualis, nec tamen aliquis erat character. Tandem quod dicitur de merito Christi supplente actum parvulorum, est admittere in parvulis dispositionem, quæ sit extra parvulos, & requiritur quidem ad causam efficientem meritoriam, non tamen ex parte subiecti. Est ergo quæstio de adultis. Qua in re.

32. Dicendum. Ad habendam justificationem in adulto peccatore est necessaria aliqua dispositio.

Prob. primo auctoritatibus Sacræ Scripturæ. Zachar. 1. *Convertimini ad me, & ego convertar ad Vos.* Luc. 13.

Tom.II.

*Nisi penitentiam egeritis, simul omnes peribitis.* His accedunt omnia, quæ de fidei necessitate dicta sunt in proprio tractatu; Trident. etiam sess. 14. cap. 4. hanc veritatem definivit dicens. *Fuit autem quovis tempore ad impetrandam veniam peccatorum hic contritionis motus necessarius.* Quod est juxta mentem Augustini ser. 15. de verbis Apostoli dicentis. *Qui fecit te sine te, non te justificat sine te,* & Innoc. III. cui tribuitur estatum illud. *Quod consensu contrahitur, sine consensu minime relaxatur.*

33. Prob. secundo ratione, quæ 1. colligitur ex laudata auctoritate. Nemo fit peccator nisi propria voluntate, ergo nemo fit justus nisi propria voluntate, sed hoc non esset, nisi ad infusionem, gratiæ esset necessaria aliqua dispositio, ergo. Secundo sic proponitur. Quando homo adultus de peccatore fit justus, datur in ipso maxima mutatio, cum status gratiæ & status peccati maximè distent inter se, sed hæc mutatio haberi nequit sine aliqua prævia dispositione, quæ pendeat ab electione agentis, si liberum est, ut in casu, ergo. Mi. ostenditur, nam, Deus de facto aliquem non movet nisi secundum modum proprium uniuscujusque, & ideo si agens liberum est, à Deo non movetur absque motu liberi arbitrii.

34. Si autem quaratur. Utrum dispositio ad gratiam debeat esse physica, vel moralis. Dicendum contra Alvarez, Gonet. pluresque Thomistas, esse morale.

Prob. Dispositio physica ea est, quæ ex natura sua exigit introductionem formæ, ita ut quadam naturali necessitate producat formam, & non intersit beneficentia producentis, rursus remaneat saltem secundum aliquam sui partem, cum ipsa forma, è contra dispositio moralis ea est, quæ reddit quidem subiectum dispositum, non tamen &c. Sed hoc postremo modo non primo se habet dispositio ad gratiam, ergo. Prob. mi. quo ad primam partem, nam per hoc quod

quod quis amet Deum super omnia non habet jus, ut debeat amari à Deo, & Divinus amor semper procedit à Dei beneficentia & liberalitate; Secunda pars declaratur, quia charitas actualis, quæ est dispositio ultima ad gratiam, necessario non permanet cum ipsa gratia, siquidem potest quis in gratia perseverare, quin amet actu, ergo. Contra utrumque dictum nihil opponi potest, quod alicujus momenti censendum sit.

#### ARTICULUS IV.

*Utrum ultima dispositio ad gratiam sit effectivè ab ipsa gratia habituali.*

35. **I**nter dispositiones ad habitua-  
lem gratiam alias esse remotas,  
& alias proximis omnibus notum est.  
De illis nulla difficultas esse potest, cum  
certum sit, illas etiam tempore gratiæ  
habitualis infusionem præcedere, & ali-  
quando fieri possit cum ipsa infusione,  
nequaquam conjungi. De proximis igitur  
dispositionibus, immo de ultima,  
quæstio promovetur, nimirum de chari-  
tate & contritione, quæ ex Trident.  
sess. 14. cap. 4. reconciliat hominem Deo  
etiam priusquam Sacramentum Pœni-  
tentia suscipiatur, de qua Proph. ps. 50.  
*Cor contritum & humiliatum Deus non despicies.* Hanc effectivè progredi ab  
ipsa gratia habituali docuerunt inter  
Thomistas Cajet. Conrad. Sot. Lauren.  
à S. Theres. Can. & prius Albertus Ma-  
gnus in 4. dis. 17. art. 1. inter Moder-  
nos vero Vasquez & Valent. Contra-  
rium omnino tradiderunt Scot. in 4.  
dis. 14. quæst. 2. S. Bonavent. Alex. Du-  
ran. Paludan. Corduba, Suarez, Ca-  
cher. Puteobon. &c. Cum istis.

36. Sentiendum; Ultimam dispo-  
sitionem ad gratiam habitualement nequa-  
quam effectivè à gratia habituali pro-  
cedere.

Prob. Ultima dispositio ad gratiam  
habitualement non procedit effectivè à gra-

tia habituali, si hujusmodi dispositio  
prior est gratia habituali, cum prius ne-  
queat ab eo quod est posterius efficienter  
dependere, sed res ita se habet, ergo.  
Prob. mi. Prior est ultima dispositio gra-  
tia habituali, si prius est hominem esse  
contritum, quàm gratiam habitualement  
habere, sed prius est hominem esse con-  
tritum quàm gratiam habitualement habere,  
ergo. Prob. mi. ex Concil. Trident.  
quod sess. 6. cap. 3. ait: *Hanc præparatio-  
nem & dispositionem justificationis ipsa con-  
sequitur;* & rursus. *Unusquisque gratiam  
consequitur secundum mensuram dispositio-  
nis.* Sed primum non esset verum, si  
prius esset haberi gratiam habitualement,  
quàm contritionem, ut ex terminis pa-  
tet. Secundum omnino corrueret, quia  
sic non daretur gratia secundum mensu-  
ram dispositionis, sed dispositio juxta  
mensuram gratiæ, ergo.

37. Conceditur igitur gratia homi-  
ni, quia contritus est, non datur vero,  
ut contritus fiat, quæ causalis tanti ha-  
benda est, ut illa admissa sententia op-  
posita prorsus evanescat necesse sit. Quod  
tamen magis declaro primo ex Concil.  
Arausic. can. 25. quod expendens illud  
Pauli 1. ad Corinth. 7. *Misericordiam con-  
sequutus sum, ut sim fidelis* colligit, non  
esse veram istam causalem, misericor-  
diam consequutum esse, quia erat fidelis.  
Secundo ex Hieronymo ad Eph. 1. & Au-  
gust. de prædestinat. Sanctorum cap. 17.  
super illa verba Apostoli ad Eph. 1. *Ele-  
git nos in ipso ante mundi constitutionem,  
ut efficeremur Sancti* inferentibus, non esse  
nos electos à Deo quia eramus Sancti;  
ergo à pari si homini infunditur gratia,  
quia contritus est, non potest dici gra-  
tiam infundi, ut contritus fiat. Ratio  
hujus attenditur per particulas *Ut &  
Quia*. Illa enim denotat causam fina-  
lem, quæ prior est in intentione, ulti-  
ma in executione, & est effectus illius  
habitus vel facultatis, quæ datur ad  
hunc finem; Ista vero significat cau-  
sam priorem in ordine executionis,  
quæ sit vel medium, vel principium ta-

lis effectus, si ergo contritio est medium ad gratiae consequutionem, effectus gratiae esse non poterit.

38. Hoc argumento premuntur adversarii, & mirum est tam varias ipsorum legere responsiones. Primo dicunt, distinguendam esse in gratia duplicem rationem, genericam unam, specificam aliam; gratia sub ratione generica est radix contritionis & charitatis, & ita prior est contritione & charitate, sub ratione vero specifica, quatenus est sanctificans & remissiva peccati, est contritione & charitate posterior, & sub illa ratione prius infunditur gratia & conceditur, ut peccator conteratur, sub hac ratione prius datur contritio & charitas, & sic dicitur dispositio ultima ad gratiam.

39. At hoc quo pacto dici ac sustineri possit, fateor à me non intelligi. Peto, utrum hac gratia generica & specifica in gratia habituali re distinguatur. Si hoc affirmetur, est contra omnium Philosophorum regulam nunquam differentium gradum genericum à specifico; Si non distinguitur, ergo dum gratia infunditur secundum unam rationem, infundetur etiam secundum aliam, & ideo si sub una consideratione datur homini, quia contritus est, dabitur etiam sub alia; Sed si adversarii velint has duas rationes in gratia distinguere, idem à me fiet de contritione & charitate, & dicam de actu contritionis & charitatis dari rationem genericam, & specificam, primam, in quantum quod est donum gratuitum & infusum; Secundam in quantum quod est actus poenitentiae, at propter hoc poterit ne infundi contritio vel charitas prius secundum unam rationem, posterius secundum aliam? non profecto, ergo à pari. Infunditur ergo gratia sicut producitur; sed producitur simul tum genericè tum specificè, ergo etiam secundum utramque rationem simul infunditur.

40. Respondent secundo ambas causales esse veras. Verum est, gratiam habituales infundi, quia homo contri-

tus est, & verum, gratiam habituales infundi, ut homo contritus fiat, & ita fit, gratiam esse priorem & posteriorem contritione, sed secundum diversa. Ut autem explicent haec diversa; inquit; Ultimam dispositionem in gratiam exercere causalitatem materiale, gratiam vero in ultimam dispositionem exercere effectivam. Verum & hoc satis non percipio; etenim etiam admissio, hanc mutua causalitatem in diverso genere, cause non repugnare; Si ultima dispositio praesupponitur gratiae in genere causae materialis, jam debet esse in semetipsa priusquam sit gratia, & si est in semetipsa, quomodo potest à gratia, tanquam à causa efficiente provenire? Praeterea. Ultima dispositio & est simul causa materialis, quia se tenet ex parte subiecti, in quo recipitur gratia, & est simul causa efficiens, cum sit impetratoria & meritoria gratiae. Ergo.

41. Respondent tertio; gratiam esse priorem ultima dispositione ex parte agentis, idest in sui productione, posteriorem vero ex parte subiecti, idest in sui receptione & unionem, & in hoc sensu dari homini, quia contritus est, in illo vero dari, ut contritus fiat. Ad quam responsionem videtur reduci quod ab aliis asseritur, nimirum gratiam in statu indeterminato esse priorem, in statu determinato esse posteriorem, per hoc quod Deus decernat futuram contritionem dependenter ab auxilio actuali, vel habituali indeterminate, deinde intuitu contritionis ita futura determinat pro ipsius principio potius habituale quam actuale auxilium.

42. Nihil tamen ex his admitti potest. Quis enim dicet, ultimam dispositionem prius produci ab agente, quam recipi in subiecto? pro illo priori in quo erit? producitur ab anima & recipitur in anima tanquam actus immanens & vitalis. Hoc praesertim valet in illorum sententia, qui non admittunt productionem & unionem, tanquam aliquid distinctum; & quamvis admittatur, in  
act



actibus tamen vitalibus est peculiaris repugnancia; Tum in sententia illorum, qui docent, actionem ex parte agentis, & passionem ex parte subiecti esse unam eandemque rem. Quod autem ultimo addebatur, sine aliquo fundamento vel auctoritatis, vel rationis profertur. Si tibi obscura protuli, non mea hæc culpa Lector sed Adversariorum.

43. Hæc omnia, quæ adeo diversa sunt, & proinde oppositæ sententiæ infirmitatem demonstrant, & nostræ probationis robur, ponderavit Vasquez, propterea aliam responsionem excogitavit absolute negando, gratiam infundi, quia homo contritus est, sed infundi, ut contritus fiat. Illam enim dat Deus, ut moveat arbitrium, non quia movit per contritionem. Doctrina hæc à nullo alio producta, tam falsa est, quam peregrina, cum apertissime Concilii Tridentini definitionibus opponatur. Hoc enim sapissime assignat principia, per quæ Deus animam movet, ut se ad gratiam disponat, & nunquam assert habitum gratiæ, sed alia gratiæ auxilia, & sic sels. 6. cap. 5. docet, justificationis nostræ initium esse à vocante & præveniente gratia, ut per excitantem & adjuvantem gratiam ad justificationem disponamur, & cap. 6. inquit: *Disponuntur autem ad iustitiam, dum excitati Divina gratia & adjuti &c. atque hanc dispositionem justificationis ipsa consequitur per susceptionem gratiæ & donorum*, ut statim sels. 7. ergo Deus per hanc habituales gratiam arbitrium non movet; sed per aliam omnino distinctam, & gratia illa confertur, quia jam prius movit arbitrium, immo confertur ad mensuram præcedentis motionis & dispositionis, ut dictum fuit. Quod si prælaudatus Doctor contendat sibi consulere explicando, Concilium loqui de aliis dispositionibus, non vero de contritione perfecta extra Sacramentum; male explicat, nam ibi Concilium sermonem habet de illa contritione, quæ fuit quovis tempore necessaria, sed hæc est con-

tritio perfecta, ergo de hac loquitur.

44. Sed quia conclusio nostra procedit potissimum contra Thomistas, illam Sancti Thomæ Doctrina placet corroborare. Docet autem Angelicus 1. p. qu. 62. art. 2. ad 3. ubi agit de conversione sic. *Ad hanc non exigitur aliqua habitualis gratia, sed operatio Dei ad se, animam convertentis*. Et cap. 2. qu. 109. art. 6. in corp. habet hæc verba. *Ad hoc autem, quod homo præparet se ad susceptionem huius doni, non oportet præsupponere aliquod aliud donum habituale in anima, quia sic procederetur in infinitum, sed oportet præsupponi aliquod gratuitum auxilium Dei interius animam moventis*. Tandem qu. 23. de verit. cap. 8. opponens sibi hoc argumentum. *Contritio est actus meritorius, sed actus meritorius non est nisi à gratia, ergo contritio est à gratia*, respondet, contritionem esse à gratia, tanquam causa informante, quam distinctionem non adhibuisset, si ab ipsa esset tanquam à causa effectrice, sed absolute concessisset argumentum.

45. Hæc aliique similibus auctoritatibus sui Præceptoris pluribus adversantes Thomistæ respondere nituntur. Primo loqui de dispositione imperfecta; sed hæc jam superius rejecta fuit; deinde asserendo alia in oppositum ejusdem testimonio, ut est illud 1. 2. qu. 113. art. 8. in corp. ubi ait: *Ipsa moventis motio est gratiæ infusio; & primum est gratiæ infusio; Secundum est motus liberi arbitrii in Deum*. Præterea; eodem art. ad 2. ubi dicit: *Motus liberi arbitrii nature ordine præcedit consequutionem gratiæ, sequitur autem gratiæ infusionem*. Verum hæc omnia debent intelligi de gratia actuali; vel Sanctus Doctor sibi contradixit, quod ego ipse non dicerem.

46. Ob. 1. ex Scripturis, ex Patribus, ex Conciliis. 1. Joan. 4. *Non quasi nos dilexerimus Deum, sed quoniam ipse prior dilexit nos*. Sed dilectio Dei explicatur per infusionem gratiæ, ergo prior est infusio gratiæ, quam dilectio nostra, ergo gratia prior est ultima dispositione.

Joan. 15.



Joan. 15. *Si quis in me non manserit, mittetur foras sicut palmes, & arefcet*, ergo sine gratia, per quam manemus in Christo, aliquis fructus vitæ haberi non potest, ergo neque ultima dispositio ad gratiam.

Augustinus tract. 75. in Joan. *Quomodo diligimus, ut Spiritum Sanctum accipiamus, quem nisi capiamus, diligere non valeamus*. Ergo prius est, nos habere Spiritum Sanctum, qui per gratiam habitualement habetur, quam quod ipsum diligamus, in quo sita est ultima dispositio. Idem innuit lib. de spir. & lit. cap. 8. ubi docet, non posse nos diligere & implere justitiam, nisi prius sanemur, sanamur autem per gratiam habitualement. Gregor. Magnus hom. 30. in Evangel. *Qui mente integra Deum desiderat, profecto jam habet, quem amat, neque enim quisquam posset Deum diligere, si eum, quem diligit, non haberet*. Ergo prius est, haberi Deum, quod sit habitualis gratiæ beneficio, quam Deum à nobis diligi.

Concilium Arauficanum pluribus in locis hoc indicat, can. 4. & 6. docet, voluntatis præparationem & dilectionem Dei dari nobis per infusionem Spiritus Sancti, quæ infusio alia non est nisi infusio gratiæ habitualis. Et can. 18. definit, dilectionem Dei & contritionem, mereri remissionem peccatorum & gloriam, omnis autem actus meritorius procedit à gratia habituali; *debetur merces*, inquit Concilium, *bonis operibus, si fiant, gratia autem præcedit, ut fiant*.

47. Resp. primum textum multifariam explicari posse, quin ad infusionem habitualis gratiæ deveniamus; proinde minor est falsa. Explico autem primo; A' Deo nos prius diligi, quatenus congruè nos vocat & prævenit, & in hoc rellucet prima dilectio Divina erga peccatores, ex qua fit, quod homo diligat Deum, & inde Deus diligit hominem dilectione tali, ut ipsi gratiam habitualement infundat. Explico secundo hanc priorem dilectionem Dei servari per dilectionem, qua homines prædestinavit

ad gratiam, per quam prius certe dilexit, quam diligeretur, non enim vos me elegistis, sed ego elegi vos. Explico tandem; Ibi ad literam sermonem esse de charitate, qua Deus misit filium suum in hunc mundum, nullo modo de illa, qua gratiam habitualement largitur. Remota esse, expendamus verba; Sunt ista. *In hoc est charitas, non quasi vos dilexerimus Deum, sed quoniam prior ipse dilexit nos & misit filium suum propitiationem pro peccatis nostris*. Secundus textus primo potest intelligi de mansionem in Christo per finalem perseverantiam, quæ certe gratiam habitualement præsupponit, & sine qua homines mittentur foras, & in igne damnationis arefcunt; Quod si etiam intelligatur de mansionem per gratiam habitualement, nihil evincitur, etenim qui habet ultimam dispositionem, ad gratiam, statim gratiam habitualement juxta ejus mensuram consequitur, & sic habetur mansio in Christo per gratiam, quin dicamus, ultimam dispositionem à gratia derivare. Sed quid dicendum, pro illo priori instanti, pro quo dispositio gratiam præcedit? Non esset cur responderemus, non enim Christus hæc subtilitates in sui loquutione perpendebat, sed loquebatur de statu, prout est necessarius ad salutem; attamen dico, pro illo signo hominem incipere manere in Christo, & manere in Christo ultimo dispositivè, immediate vero manere in Christo completè & formaliter; Unde directè dis. conf. ergo sine gratia per quam manemus formaliter in Christo non potest haberi aliquis fructus vitæ formaliter conc. dispositivè proxime. conf. & subf. sufficit enim gratia actualis.

Prima auctoritas Sancti Augustini prolata est contra Semipelagianos, qui asserabant, primum actum dilectionis nostræ erga Deum esse ex sola libertate creata, & ideo contra ipsos dictum fuit, nos non posse diligere Deum, ut Spiritum Sanctum accipiamus, nisi prius Spiritum Sanctum habuerimus, id est ipsius Spi-

Spiritus Sancti auxilium actuale; unde consequentia falsum dicit, si asserit, Spiritum Sanctum haberi tantum per gratiam habitualement. Secundum Augustini testimonium cum proportionem accipiendum est; nam si sermo sit de iustitia perfecta & perseverante, certum est, haberi non posse nisi per sanitatem, quam confert gratia habitualis, si autem de iustitia actuali & ultimo disponente, quam statim sequitur gratia habitualis, hæc habetur per sanitatem, quam confert gratia actualis, per quam ipsam iustitiam habemus; atque hoc pacto explico S. Gregorium; Qui enim mente integra Deum desiderat, jam habet quem amat, vel habitu & perfectè, vel actu & dispositive; sive, habet quem amat vel ut habitorem vel ut motorem iuxta diversos gradus dilectionis.

Juxta hæc accipiendum est Concilium Arausicanum, nam Spiritus Sanctus dicitur etiam nobis infundi per auxilia actualia cum fiant in nobis, in quo sensu etiam dicit Ecclesia in quadam collecta. *Infunde nobis Domine tuæ charitatis affectum*. Quod vero dilectioni & contritioni tribuatur meritum remissionis peccatorum, juxta illud. *Remittuntur ei peccata multa, quia dilexit multum* loquitur Concilium de necessitate gratiæ actualis, quæ debet præcedere, ut fiat; aut hoc meritum inesse non propter charitatem & contritionem formaliter, sed solum dispositive, formaliter vero, quia immediate informatur gratia habituali.

48. Ob. 2. ratione. Ultima dispositio ad gratiam habitualement est ab ista effectivè, si debet præsupponere habitum infusum gratiæ, sed ultima dispositio ad gratiam habitualement debet præsupponere habitum infusum, gratiæ, ergo. Prob. mi. Ultima dispositio ad &c. debet præsupponere quidquid se habet ad instar potentiæ, sed habitus infusus gratiæ se habet ad instar potentiæ, ergo. Secundum. Si ultima dispositio ad gratiam non esset effectivè ab ipsa gratia, non esset

meritoria de condigno gloriæ, sed hoc non, ergo. Prob. maj. nullus actus esse potest meritorius de condigno independentè à gratia, quæ dicitur principium meriti, ergo. Idem alio modo promovetur. Actus contritionis est meritorius de condigno gloriæ, ergo procedit ab homine ut dignificato per gratiam; Ant. pat. alioquin contingeret, gloriam quandoque adultis concedi, sicut parvulis, idest non merito proprio. Prob. conf. Actus meritorius de condigno gloriæ nequit gratiam præcedere, ergo si &c. Prob. ant. Si posset præcedere, posset etiam mereri primam gratiam, sed hoc non, etiam loquendo de gratia habituali, cum Trid. sess. 6. cap. 8. dicat. Nihil eorum, quæ justificationem præcedunt, ipsam justificationis gratiam promereri, ergo.

49. Resp. conc. maj. ne. mi. ad prob. argumentum probat, etiam dispositiones remotas debere præsupponere habitum gratiæ, quia debent præsupponere quidquid se habet ad instar potentiæ; directè dis. maj. idest, quidquid cum potentia constituit conc. quidquid in ipsa potentia permanet ne. maj. conc. mi. ne. conf. debet autem præsupponere auxilium actuale, per quod potentia fit proximè apta ad ultimam dispositionem; & habitus infusus se habet quidem ad instar potentiæ in eo, in quo jam est, sed negò tunc ab ipso haberi dispositionem proximam ad gratiam habitualement, sed tantummodo ad augmentum gratiæ; ex quo sic argumentor, & assertionem meam corroboro. Dispositio ad augmentum gratiæ non habetur effectivè ab ipso augmento, ergo etiam dispositio ad gratiam non habetur à gratia. Ad secundum Vega, Lorca, & Lugus negant absolute minorem. Ego vero juxta supradicta dis. maj. non esset meritoria de condigno gloriæ secundum se & pro illo priori naturæ conc. ut immediate informata per gratiam ne. maj. & eodem modo ad argumentum alio modo promotum dis. antec. actus contritionis est &c.

est &c. pro instanti reali, quo est cum gratia conc. ant. pro eo priori, quo est dispositio ad gratiam ne. ant. & cons. juxta etiam doctrinam S. Th. num. 44. Præterea; Argumentum allatum probat etiam de ultima dispositione una cum Sacramento Baptismi, vel poenitentiae, & tamen in Sacramento non est à gratia habituali. Neque vero sequeretur, gloriam concedi adultis sicut parvulis, quia istis conceditur sine aliqua prævia dispositione, non illis. Ut tandem Tridentino respondeas, memineris, in principiis nostris ultimam dispositionem non esse physicam, sed moralem & impetratoriam, ad hanc autem spectat, esse separabile, secundum se quod impetratur.

50. Dices impugnando responsionem datam argumento primo. Id admittendum est, quod ad habendam hanc ultimam dispositionem connaturalius censeretur debet, sed connaturalius censeretur debet haberi à gratia habituali quam ab actuali, ergo. Prob. mi. Contritio seu charitas est participatio Divinae voluntatis, sed connaturalius est participationem Divinae voluntatis haberi à gratia habituali, ergo. Prob. mi. Connaturalius est, participationem Divinae voluntatis haberi à participatione Divinae naturae, sed gratia habitualis est participatio Divinae naturae, ergo. Præterea. Contritio, utpote vita supernaturalis in actu secundo, supponit principium per quod anima supernaturaliter vivat, sed principium, per quod anima supernaturaliter vivit, est gratia habitualis, ergo.

51. Sed contra conc. maj. ne. mi. ad prob. idem argumentum fit etiam de fide, quæ est tantum dispositio remota ad gratiam, & est participatio Divini intellectus. Dis. ergo maj. contritio &c. est participatio transiens Divinae voluntatis conc. permanens ne. maj. è contra dis. mi. ne. cons. & sic ad prob. si autem loquamur de contritione habituali concedo hanc haberi per gratiam, hanc enim alia dona subsequuntur. Ad secundum

Tom. II.

conc. maj. dis. mi. principium per quod &c. est gratia habitualis etiam conc. tantum ne. mi. & cons. Vivit igitur anima supernaturaliter etiam per gratiam actualem, per quam intelligitur elevata in ratione principii actuum supernaturalium, & gratia habitualis est principium per quod anima supernaturaliter vivit permanentem & quantum ad esse, non transeuntem & quantum ad operari.

52. Ob. ultimo. Non repugnat, actum, qui sit ultima dispositio ad habitum, esse ab ipso habitu, ergo. Prob. ant. primo. Causæ possunt sibi mutuo esse causæ, sic calor est dispositio ad formam ignis, & forma ignis est principium productivum caloris; Unde calor prior est igne in genere causæ materialis, ignis est prior calore in genere causæ efficientis. Rursus. Est vulgatum illud exemplum; Aperitio fenestram præcedit tanquam dispositio ingressum venti, & tamen habetur ab ipso vento effective, aperiente fenestram, ita in re nostra, gratia habitualis ingrediens animam, hanc effective movet ad actum contritionis & nihilominus contritio est dispositio ordine naturæ præcedens gratiæ habitualis ingressum. Tandem est commune dictum apud Philosophos; Ultimam dispositionem ad formam esse ab ipsa forma, ergo à pari.

53. Resp. ne. ant. si loquamur de dispositione præparante subiectum ad formam, ut in casu, secus vero si de illa dispositione, quæ non præparat sed ornat, & bene afficit subiectum jam habens formam. Ad Primum exemplum, cogimur ut respondeamus philosophicas quæstiones animo invito repetere. Pro quare dico, vel sustineri in generatione, novæ formæ fieri resolutionem usque ad materiam primam, & sic nulla dispositio præcedentis compositi remanet, nec ulla nova in materia producitur pro introductione formæ novæ sed solum ad expulsiorem antiquæ, & tunc nulla dispositio est à forma sed simul cum forma non hanc præcedens sed subsequens & cum,

A 2

illa

illa permanens, Vel sustineri, non dari hujusmodi resolutionem usque ad materiam primam, sed remanere aliqua priora accidentia, & tunc datur aliqua ultima dispositio ad formam novam, quæ tamen non est ab ipsa forma genita, sed a principio generante prius disponente subjectum ad formæ receptionem, quàm ipsam formam producente, & ideo, vel calor disponit subjectum ad novam formam ignis, vel ipsam formam ignis subsequitur. Si primum, nego produci à nova forma ignis, si secundum non est ad rem, quia ultima dispositio ad gratiam præcedit gratiam, sicut probatum est; & ita responde ultimo adducto in argumento. Ad secundum exemplum, ut brevius me expediam, dico, ab ipso vento impellente haberi effectivè aperitionem fenestæ, & aperitionem fenestæ non esse causam ingressus venti, sed solum se habere ad instar ablati impedi-menti; Sic autem se non habet gratia habitualis ad contritionem, neque contritio ad gratiam habitualem.

## ARTICULUS V.

*Quænam sit causa efficiens gratiæ habitualis.*

54. **E**TSI in unaquaque re quatuor agunt Philosophi, & de istis etiam in materia gratiæ sermonem faciat Concil. Trident. sess. 6. cap. 7. dicens, causam finalem justificationis esse gloriam Dei, ac Christi, tum vitam æternam, efficientem esse misericordem Deum, meritoriam dilectissimum Unigenitum Dei, instrumentalem Sacramenta, materialem vero esse hominem, formalem tandem esse ipsam gratiam, quæ cum sit forma, aliam causam formalem habere non potest; nihilominus hic à nobis agendum non est vel de meritoria, cum hoc pertineat ad tractatum de Incarnatione, vel de instrumentali, cum hoc spectet ad tractatum de Sacramentis. Neque

de finali quidpiam inquirendum videtur; nam si sermo sit de causâ finali extrinseca præcipua, hæc est gloria Dei, propter quam tanquam finem universalem omnia Deus operatur; Si de minus principali, hæc est gloria Christi, juxta illud ad Corinth. 13. *Omnia vestra sunt, Vos autem Christi & aliud ad Ephes. 1. In quo credentes signati estis spiritu promissionis sancto in laudem gloriæ ipsius.* Si de particulari; hæc est propria unius cuiusque beatitudo juxta illud ad Rom. 6. *Habemus fructum nostrum in sanctificationem, finem vero vitam æternam.* Si tandem de causâ finali intrinseca, hæc est justificatio nostra & donorum supernaturalium infusio. Superest ergo agendum de causâ efficiente physica, tum de materiali. Pro primi puncti resolutione.

55. Suppono tanquam certum & ab omnibus Theologis admissum, solum Deum de facto esse causam efficientem gratiæ. Hoc aperte traditur in Sacra Scriptura. Ps. 83. *Gratiam & gloriam dabit Dominus.* Ad Rom. 3. *Unus est Deus, qui justificat.* Marci 2. *Quis potest dimittere peccata, nisi solus Deus?* Job. 14. *Quis potest facere mundum de immundo conceptum semine, nonne tu qui solus es?* Merito propterea Augustin. lib. de peccat. mer. & remiss. cap. 14. dicit. *Si quis potest dicere ego justifico te, etiam dicere potest, crede in me.* Adde, Tridentinum aliam causam præter Deum non afferre. Quæstio est igitur de alia providentia & potestate absoluta.

56. Dicendum. Nullam creaturam neque per absolutam potestatem esse posse causam efficientem gratiæ; jam intelligis principalem. Ita communissime Theologi cum S. Th. 1. 2. qu. 112. art. 1. & alibi contra Ariagam & Madernum.

Prob. Nulla creatura potest esse causa efficiens gratiæ, si hæc necessario debeat esse à natura Divina, sed ita est, ergo. Maj. patet, quia nulla creatura potest habere naturam Divinam, prob. mi. gratia est participatio nature Divinæ,



ergo necessario esse debet à natura Divina; Prob. conf. si gratia est participatio naturæ Divinæ reddit hominem similem Deo, sed si reddit hominem similem Deo potest esse tantum à natura Divina, ergo si &c. Mi. ostenditur, quia causa princeps alicujus effectus illa est, cui effectus primo, & per se assimilatur, & profecto, nulla natura inferior conferre potest participationem naturæ superioris, sic anima rationalis non potest communicare participationem naturæ Angelicæ, neque Angelus ultimus participationem naturæ Angeli supremi. Neque dicas, hoc totum verum esse, si loquamur de creatura considerata secundum se, non autem si de prædita aliqua superiori qualitate. Etenim contra, & roboratur propositum nostrum argumentum.

56. Nulla creatura potest per aliquam qualitatem elevari ad operandum ad instar causæ participalis aliquem effectum, ad quem non habeat aliquam proportionem, & virtutem intrinsecam incohatam, ut suppono ex iis, quæ dicuntur de potentia obedientiali, sed nulla creatura potest habere hujusmodi proportionem, & virtutem intrinsecam incohatam respectu gratiæ habitualis, ergo. Prob. mi. nulla creatura potest habere &c. ad participandam naturam Divinam, aliter jam fieri posset natura Divina, ergo. Quod si posset participare gratiam, quam habere supponitur, tunc contingeret participatio participationis naturæ Divinæ, non vero ipsius naturæ Divinæ.

57. Præterea. Nulla qualitas supernaturalis potest esse principaliter productiva gratiæ, sive hæc qualitas sit ipsa gratia, sive à gratia distincta, ergo. Prob. prima pars min. primo quia gratia habitualis non est per se ipsam operativa, & datur ad esse, non ad operari. Secundo quia si gratia posset esse qualitas productiva gratiæ, vel esset in eo subiecto, in quo est, vel in diverso subiecto, non in eo, in quo est, alioquin simile ageret in simile, immo in idem, & in eodem subiecto esse possent duo acciden-

tia solo numero distincta, quod est contra Doctrinam Philosophorum; non in diverso, quia nullum habemus exemplum aut vestigium qualitatis spiritualis, quæ transeunter agat. Prob. secunda pars ejusdem minoris, quia si talis qualitas esset diversa à gratia, & posset producere gratiam, esset causa æquivoca, ergo esset perfectior gratia, quod incredibile est, cum gratia dicatur qualitas indefinita, & radix omnium perfectionum supernaturalium. Quod si hoc de gratia, aut de alia qualitate à gratia distincta dicamus, idem asserendum erit v. g. de lumine gloriæ, & sic illud produci poterit vel ab ipso lumine gloriæ, vel ab alio præter Deum, quod non intelligo.

58. Confirm. conclusio. Producere gratiam est hominem spiritualiter generare in filium Dei, cum jure ad hereditatem, sed creatura, quæ habet gratiam, non potest ita alium generare, ergo. Ratio autem est, quia ad generandum, requiritur, quod generans habeat naturam in statu perfecto, cum generatio ex Philosophis sit opus perfecti, quæ ratione infantes, licet sint ejusdem naturæ cum homine, generare non possunt, sed natura Divina solum in Deo est in statu perfecto, in creatura vero diminute & accidentario modo, ergo. Merito propterea hic concludit Angelicus. *Neceffe est, quod solus Deus deificet communicando consortium naturæ Divinæ per quamdam similitudinis proprietatem, sicut impossibile est, quod aliquid igniat, nisi solus ignis.*

59. Ob. 1. Ignis v. g. produci potest vel ab alio igne, vel à Deo, ergo etiam gratia vel à Deo vel ab alia gratia. Prob. conf. Tam ignis est participatio Dei, ut authoris naturalis, quam gratia sit participatio Dei, ut authoris supernaturalis, & rursus tam invenitur correspondentia in prædicatis specificis inter gratiam & gratiam, quàm inter ignem & ignem, ergo si &c.

Resp. conc. ant. ne conf. disp. est, quia ignis perfecte continet naturam,



ignis, & ignis, qui produceretur verè esset ignis, at gratia non perfectè continet naturam Dei, & gratia, quæ per gratiam produceretur, verè non esset participatio naturæ Divinæ, sed participatio participationis, sicut dixi. Juxta hæc distinguendum est antec. quod assertur ad probandam consequentiam. Præterea. Ignis est participatio Dei, ut authoris naturalis, tanquam causæ universalis, quæ propterea non excludit veram causalitatem causarum particularium, gratia è contra est participatio Dei, ut authoris supernaturalis, tanquam causæ particularis proximæ, & immediatæ; ideo &c. Ad additum. Antec. est verum, si sermo sit de gratia & gratia producta à Deo, non de gratia, quæ produceretur à creatura, quia hæc non esset participatio Divinæ naturæ, sed participationis naturæ Divinæ, ex dictis.

60. Ob. secundo; habens gratiam, potest producere habitus supernaturales fidei & spei &c. correspondentes habitibus, ergo etiam potuit producere, aliam gratiam. Prob. conf. non minus illi sunt participationes Divini intellectus & voluntatis, quam gratia sit participatio Divinæ naturæ, ergo si &c. quod magis sic roboratur. Licet fides v. g. sit à gratia, non tamen potest inferri, quod sit participatio gratiæ, sed quod sit participatio Divini intellectus, ergo licet gratia esset à gratia non per hoc esset participatio gratiæ, sed naturæ Divinæ.

61. Resp. transf. ant. ne. conf. etenim si de actibus loquamur, cum isti vitales sint & liberi necessario produci debent à potentia vitali & libera; Si autem de habitibus ant. est falsum, possunt enim tantum à Deo infundi propter rationem in argumento adductam. Ad prob. actus illi sunt participationes Divini intellectus & voluntatis transeunter & mediate, idest media gratia, supposito quod habeantur in homine justo, at gratia est immediata participatio naturæ Divinæ, & ideo non potest præsupponere aliquod, medio quo participetur. Sed

dices, in homine peccatore habentur actus fidei & spei, qui sunt participationes Divini intellectus & voluntatis, immo habenter etiam habitus, quin tamen habeantur per gratiam, ergo immediate participatur intellectus, & voluntas Divina, sicut per gratiam immediate, participatur natura, ergo si non potest produci gratia nisi à Deo, quia hæc est participatio naturæ Divinæ, neque poterunt produci actus fidei, & spei, quia hi sunt participationes intellectus & voluntatis Divinæ.

62. Sed contra. Quantum ad actus fateor hos esse in peccatore, sed media gratia actuali, uti probatum fuit, & ideo nunquam immediate participant intellectum, & voluntatem Divinam, atque isti etiam non possunt esse nisi per concursum specialem immediatum Dei. Quantum vero ad habitus; fateor, remanere in peccatore semel tamen justificato, unde remanent mediante gratia, quam etsi non habeat, tamen habuit, si vero peccator iste nunquam justus fuit, nunquam habuit habitum fidei & spei. Præterea. Participatio intellectus & voluntatis Divinæ per fidem & spem non, infert spiritualem generationem cum jure ad hereditatem &c. sicut infert participatio gratiæ habitualis, quæ proinde non poterit haberi nisi à Deo.

Collige, quod si à gratia separantur effectus isti, quaestio nostra nulla esset.

63. Ob. tertio. Saltem per gratiam Christi Domini, quæ fuit gratia unionis hypostaticæ poterit habitualis gratia produci, ergo saltem Christus ut homo poterit esse causa efficiens gratiæ. Prob. ant. gratia unionis præstantior est gratia habituali, ergo. Præterea. Ipsa gratia habitualis Christi poterit hoc præstare. Probo. Quanto gratia est perfectius unita subjecto, tanto præstantiores effectus potest proferre, ut constat in Patria, ubi est radix luminis gloriæ, & in Adamo, in quo erat radix justitiæ originalis & integritatis, sed gratia habitualis erat per-

perfectissimè unita Christi humanitati, ergo poterat præstantissimum effectum proferre, sicut est gratiam producere. Rursus. Christus Dominus non imperfectiori modo habet gratiam habitua-lem, quam quodlibet agens naturale habeat. suam formam naturalem, sed agens naturale potest aliam formam similem producere, ergo etiam Christus &c. Tandem. Ad Christum pertinet excellentiori modo gratiam producere, quàm conveniat cæteris rebus, sed cæteris rebus convenit producere instrumentaliter, ergo ad Christum pertinebit producere principaliter.

64. Resp. ne. absolute ant. quamvis dici posset cum Medina & Cabrera, Christum esse causam principalem secundariam gratiæ sanctificantis in omnibus iustis. Ad prob. dico, maiorem excellentiam, quæ relucet in gratia unio-nis esse tantummodo ad constituendum suppositum, non vero ad immutandas facultates humanitatis assumptæ, quæ propterea non possunt aliquid physice efficere quod antea non poterant, nisi eleventur per aliam qualitatem supernaturalem, quare cum huiusmodi qualitas repugnet, uti probatum est, sequitur &c. Ratio autem horum est, quia, personalitas Verbi unitur humanitati tanquam terminus, non tanquam forma informans vel formaliter vel æquivalenter. Quomodo ergo, inquires, intelligendum erit illud Joan. 1. *Gratia & veritas per Jesum Christum facta est?* Intellexit sane S. Th. de Christo tanquam de causa principali, aitenim in 4. dif. 5. qu. 2. art. 2. *Agens principale in baptizando est ipse Deus per auctoritatem, & ipse Christus secundum quod homo.* Resp. intelligendum esse in hoc sensu, quod Christum tum ut Deus, tum ut homo est causa gratiæ & veritatis, & ipsi convenire, esse agens principale, sed sub diversa consideratione, nam ut Deus est agens principale physicum, ut homo est præcipuum instrumentum, idest instrumentum conjunctum Divinitati, ut Deus

est principium effectivum, ut homo est principium meritorium, quod est juxta S. Th. loco cit. ibi enim addit hæc verba, *cujus meritum operatur in baptismo.* Ad secundum ne. ant. ad prob. dif. maj. præstantiores effectus intra propriam spheram, & cum quibus servat ordinem & proportionem conc. aliter, ut in re nostra ne. Ad tertium, major est vera in aliquo sensu, quatenus Christus habet gratiam habitualem perfectissimo modo, qui nulli creaturæ convenire potest, in aliquo sensu est falsa, quatenus agens naturale habet formam naturalem substantialiter & in esse completo; Christus autem habens gratiam possidet naturam. Divinam solum participative & in esse diminuto, proinde licet agens naturale &c non tamen Christus &c. Quapropter si S. Th. 1. p. qu. 7. art. 9. inquit: *Christum habuisse maximam gratiam, sicut ignis, qui est causa caloris in omnibus calidis, est maxime calidus.* Ly sicuti intelligendum est in priori sensu, non in posteriori. Ad ultimum; patet quid dicendum ex respons. ad primum.

65. Ob. ultimo. Virtus productiva gratiæ non esset infinita, quia ipsa gratia non est qualitas infinita, ergo poterit communicari creaturæ. Præterea. Virtus creativa potest convenire creaturæ, ergo à fortiori eductiva, sicuti est productio gratiæ. Tandem. Omnipotentia Divina communicata creaturæ potest producere quidquid producit omnipotentia Divina, ergo etiam natura Divina communicata creaturæ, potest producere quod producit natura Divina, sed hæc producit sui participationem, ergo etiam creatura poterit &c.

66. Resp. ad primum à nobis non negari efficientiam gratiæ, quia ad hujus productionem requiratur virtus infinita, sed ex aliis capitibus, ut constat ex probatione nostra; sed si etiam negaremus titulo infinitatis, recte negaremus, quamvis enim in productione gratiæ non appareat infinitas ex parte termini, reperitur tamen ex parte principii, quia hoc

hoc debet esse Divinum. Addo, argumentum probare, communicari posse creaturæ proinde id, quod finitum est, quod tamen est falsum. Ad secundum conc. ant. ne. conf. argumentum enim, à majori ad minus non tenet, quando non sistimus in eodem genere rerum, quia quod minus est in uno genere, esse potest majus in alio. Itaque virtus creativa major esteductiva, si utraque sit in linea naturali, eductiva vero est major creativa, si illa sit in linea supernaturali, hæc in naturali, gratiam autem producere per educationem est aliquid producere in linea supernaturali, immo id, quod omnium supernaturalium est maximum. Ad ultimum. Dis. ant. nec tamen potest producere participationem omnipotentia Divina conc. & potest producere &c. ne. ant. & sic ad reliqua; & de facto natura Divina communicata creaturæ per gratiam producit, quod producit natura Divina, idest intellectum & volitionem supernaturalem; nunquam tamen potest producere participationem ejusdem naturæ Divinæ, sicut habens omnipotentiam communicatam, nunquam producit participationem Divinæ omnipotentia, licet ejusdem effectus producat.

67. Nunc breviter assignanda est causa materialis seu receptiva ejusdem gratiæ. Volunt Thomistæ, hanc esse ipsam animam secundum se consideratam, Scotistæ verò esse voluntatem; & clarius; Qui asserunt, habitum charitatis re distinguui à gratia, dicunt, gratiam esse in anima tanquam in subiecto immediato, qui vero sentiunt oppositum in illo puncto, sentiunt & in isto, excepto S. Bonavent. & Ripalda; Quare, sicut inanem existimavimus questionem illam circa distinctionem inter gratiam & charitatem, ita & istam; & sicut per nos non distinguuntur potentia animæ ab anima, ita vanum est distinguere subiectum gratiæ à subiecto charitatis; Qua in re deberemus confugere ad præcisiones objectivas, quod in hac materia

Theologum dedecet; Sit igitur subiectum anima, sit voluntas, nihil interest, & qui in hisce nugis immorari velit, plura apud authores inveniet, quibus tempus proterat & ingenium.

## ARTICULUS VI.

*Expenduntur plura de gratia habituali.*

68. **Q**Uæ solent à Doctoribus de gratia habituali ulterius inquiri, non multum sibi postulant studii, atque ex iis, quæ in Philosophia tradita suppono, facillimè resolvuntur. Nihilo tamen minus, ne quid lateat quod Theologi tractant, à me breviter expenduntur.

Queritur 1. an gratia habitualis inæqualiter detur, & responso est affirmativa, sive loquamur de diversis personis pro eodem tempore, sive de eadem persona pro tempore diverso. Hoc apertè colligitur ex Trident. sess. 6. cap. 7. ubi dicit, gratiam dari ad mensuram dispositionis, quod inconsulto dictum esset, si vel gratia esset eadem, vel semper eadem dispositio; tum ex Florent. in lit. unionis de Sacram. Euchar. & multo ante idem definitum fuit contra Jovinian. in Concil. Mediol. sub Siricio Papa. Contendebat autem Jovinianus esse in omnibus iustis æqualem gratiam, quia existimabat, omnia opera hominis victoris esse æqualis meriti, quem deinde errorem excitarunt Novatores cum Luthero arbitrate, omnes justificari per justitiam Christi imputatam, quamvis aliqui gratiæ inæqualitatem admiserint propter inæqualem fiduciam, qua quis sibi persuaderet, justitiam Christi sibi magis, vel minus imputari.

69. Fundamentum autem asserendi quod à nobis statutum fuit desumitur ex Sacris Scripturis. 2. ad Corint. 9. *Augebit incrementa frugum justitiæ vestrae.* Ad Eph. 4. *Unicuique vestrum data est gratia secundum mensuram donationis Christi.* Apocalip. ultimo. *Qui iustus est*

*justificetur adhuc.* Hac in re plurima, Sanctorum Patrum sunt testimonia, quibus dicuntur alii aliis sanctiores, & stelle in claritate à stellis differre; Sufficiat tamen illud Augustini in epist. 57. ad Dard. ubi ait; *Deus totus adesse rebus omnibus potest, & singulis totus, quamvis in quibus habitat pro sue capacitatis diversitate alii amplius, alii minus &c.* Neque vero ratio deest; nam primo gratia est in genere qualitatis, qualitas autem, quæcumque sit, capax est majoris & majoris intensiōis in infinitum, ideo repugnat per me qualitas infinita, & quamvis etiam non repugnaret, tamen non debet admitti de facto gratia infinita. Secundo si gratia non posset augeri, superflua essent post primam justificationem omnia alia opera bona, superflua Sacramenta &c. Immo etiam data falsa Hæreticorum doctrina adhuc iustitia esset inæqualis, quia si hæc imputatur ex fiducia, sicut dari potest una fiducia major alia, ita deberet dari una gratia major alia.

70. Dices, gratia habitualis consistit in indivisibili, ergo non potest una, gratia esse major alia. Prob. ant. natura & vita consistit in indivisibili, nec unum dicitur vivere magis alio, ergo etiam gratia, quæ appellatur vita spiritualis animæ. Sed contra ne. ant. & ad prob. antec. esse verum de vita substantiali, quia ad substantiam ut substantia est, pertinet non suscipere magis & minus, quo ad usque est in eadem specie, falsum tamen est de vita accidentali, quæ potest magis vel minus participari, & intensius fieri, talis autem est vita per gratiam. His adduntur ea omnia, quæ tradunt Theologi de inæqualitate visionis beatæ, de qua nos suo loco.

71. Quæritur secundo. An gratia habitualis habeat terminum intrinsecum magnitudinis.

Respond. negative. Ratio est, quia si haberet hunc terminum intrinsecum, vel haberet ex parte Dei, vel ex parte sui, vel ex parte subjecti, sed ex

neutro capite, ergo. Prob. prima pars min. Deus est infinitus, nec unquam talis sit ejusdem participatio, ut amplius participari non possit, nec ita diligitur, ut non sit amplius diligibilis, ergo ex parte Dei &c. Prob. secunda pars; quia si habet hunc terminum intrinsecum ex parte sui, hoc esset, quia est res creata, & omne creatum finitum est, sed hoc non valet de qualitate accidentaria, quia licet sit catagorematicè finita, syncategorematicè tamen infinita est, ergo. Prob. tertia. Dum sermo est de gratia, non est attendenda capacitas naturalis subjecti, sed obediētiālis, unde ait S. Thom. 2. 2. qu. 24. art. 3. *Quantitas charitatis non dependet à conditione nature, vel ex capacitate naturalis virtutis.* Atqui capacitas obediētiālis creaturæ, utpote subdita Deo infinito in agendo, non habet &c., ergo. Habebit igitur gratia tantummodo terminum extrinsecum magnitudinis idest in præscientia & Divina prædestinatione, quatenus Deus decrevit tantam dare, & non majorem, in quo sensu intelligendi sunt Sancti Patres, si qui afferantur, inter quos Sanctus Bonaventura.

72. Quæritur tertio. Unum gratia in homine lapsa possit augeri, usque dum fomes extinguatur; dixi, *in homine lapsa*, indicaturus sermonem non esse de Beatissima Virgine.

Respond. negative, quod est contra Pelagian. si credamus S. Hieronymo in epist. ad Thesiphon. ostenditur responsio primo ratione. Non potest dari peccatum, per quod auferatur potestas bene operandi, ergo non potest dari gratia, per quam auferatur facultas male operandi. Secundo quænam operationes hanc sibi gratiam promereri possent? aut quibus hujusmodi gratia promissa est? immo solet oppositum evenire, qui enim perfectius operantur, per sepe vehementiores somitis stimulos patiuntur. Hinc Apostolus cui tanta gratiæ copia concessa est, *sentio dicebat, aliam legem in membris meis, repugnantem legi mentis meæ,*



*meæ*, & rursus. *Datus est mihi stimulus carnis meæ, qui me colaphizet.* Quare si alicui viro concessum aliquando legimus huiusmodi privilegium, id non gratiæ habituali tribuendum, sed distincto alteri beneficio.

73. Queritur quarto. Utrum gratia sit perfectior reliquis habitibus virtutum, etiam luminæ gloriæ, & Dei maternitate.

Resp. affirmative. Ratio primæ & secundæ partis est, quia licet Divinæ perfectiones sint realiter aequales, immo sint una simplex perfectio, attamen in propria linea saltem virtualiter inæquales sunt, & illa perfectior censenda est, quæ communicatur ut radix cæterorum, sicut natura censetur perfectior attributis, & essentia proprietatibus, atque gratia se habet adinstar naturæ, reliqui habitus adinstar proprietatem, ergo. Secundo quia quod est principium in pluribus lineis perfectius est eo, quod est principium in unica tantum linea, sed primo modo se habet gratia, secundo modo reliqui habitus, ergo. Ratio tertiæ partis desumitur ex illo dicto Augustini tract. 10. in Joan. *Mater mea, quam appellatis felicem, inde felix, quia Verbum Dei custodiavit, non quia in illa caro factum est.* Et rursus, *Beata Virgo felicior fuit percipiendo fidem Christi, quam concipiendo carnem Christi.* Et tandem lib. de Virginit. cap. 3. *Materna propinquitas nihil Mariæ profuisset, nisi feliciter Christum corde, quam carne gestasset.* Quod quidem satis indicavit Christus, cum Mulieri dicenti: *Beatus venter, qui te portavit.* Respondit. *Quin immo Beati qui audiunt Verbum Dei, & custodiunt illud.* Secundo, quia Maternitas est quidem physica causalitas in Christi humanitatem, nullam tamen includens excellentiam nisi extrinsecam, & ut ajunt, terminative; è contra gratia habitualis est excellentia & dignitas intrinseca cuicumque operationi tribuens dignitatem, ergo.

74. Dices contra secundam partem

responsionis. Habitus patriæ perfectior est habitu viæ, sed lumen gloriæ est habitus patriæ, gratia est habitus viæ, ergo illud perfectius ista. Præterea. Major est perfectio finis, quam medii, cum hoc sit propter illum, atqui lumen gloriæ est finis, gratia est medium, ergo. Tandem. Per visionem beatam evadimus magis similes Deo: *Cum enim apparuerit, similes ei erimus, quia videbimus eum sicuti est.* Sed ubi est major similitudo Dei, est major perfectio, ergo.

Sed contra. Dis. maj. qui sit tantum habitus viæ conc. qui sit simul habitus viæ & patriæ ne. maj. è contra dis. secunda parte minoris ne. conf. Ad 2. dico finem esse excellentiorem medio puro, non autem eo medio, in quo tantum in sui radice & principio continetur etiam finis, sic intellectus est perfectior intellectione, & arbor suo fructu. Ad 3. dis. maj. per visionem beatam evadimus &c. in linea intentionali conc. in linea physica vel morali ex qua progreditur ipsa similitudo intentionalis ne. maj. è contra distincta mi. ne. conf. Dicamus igitur cum Sancto Augustino. Potius optandum, esse in inferno cum gratia, quam sine gratia in Paradiso.

75. Dices contra tertiam partem. Titulo Maternitatis debitus est Beatissimæ Virgini cultus hyperdulæ, non sic titulo gratiæ habitualis, & ita Maria habet quandam dignitatem infinitam, quam propter gratiam non habet, ergo Maternitas perfectior est gratia.

Sed contra. Dis. ant. titulo Maternitatis habentis excellentiam ex parte termini conc. ex parte sui subdis. titulo Maternitatis, & simul gratiæ habitualis conc. solius Maternitatis ne. ant. & conf. Porro argumentum adductum non tenet; nam etiam Crux adoratur cultu laetræ, nec tamen in Cruce est aliqua intrinseca dignitas, nec major quam gratiæ perfectio; Debitus igitur est etiam Virginis Maternitati cultus hyperdulæ, sed sumendo Maternitatem simul cum gratia. *Qui enim fecerit voluntatem Pa-*



tris mei, hic meus Frater, & Soror, & Mater est. Hæc est affinitas illa, quæ cum in Virgine major & excellentior

sit, quàm in quovis alio, excellentior rem etiam sibi vindicat cultum,

## Q U Æ S T I O VI.

### De Justificatione.

#### ARTICULUS I.

##### Quædam circa Justificationem Vestibula.

**P**riusquam ad dirimendam quæstionem de justificatione progrediamur, non est abs re plura præmittere, quæ de ipsa voce & ca-

lamo protulerunt Hæretici. Apud Calvinum, Lutherum, eorumque Sectatores nihil aliud intelligitur, nisi peccatorum remissio, per quam homo pronuntietur justus ac declaretur, quamvis revera in se ipso justus non sit; quod quidem evincere arbitrantur, quia in Scriptura Sancta, verbum hoc justificare, sit forense, institutum ad absolvendum aliquem à crimine sic ps. 50. legitur: *Ut justificeris, & vincas cum judicaris.* Isaïa. 5. *Va, qui justificatis impium.* Proverb. 17. *Qui justificat impium, & condemnat justum, abominatio est.* Et Mat. 12. dixit Christus; *Ex verbis tuis justificaberis, vel condemnaberis.*

2. Quamvis tamen in hac re conveniant Hæretici, in varias nihilominus abjere sententias; immo tanta fuit opinionum confusio, ut ipsimet, veritatem repriendam esse, desperent; Si Lutherum interrogemus, respondet, causam formalem justificationis nostræ esse fidem, & Christum per fidem apprehensum; ait enim in Comment. ad cap. 2. ad Galat. *Sicut Sophista* (hoc nomine nos appellat) *dicunt charitatem informare, & imbucere fidem, sic nos dicimus Christum informare, & imbucere fidem,*  
Tom. II.

vel formam esse fidei; ideo concludit, Christus per fidem apprehensus est justitia Christiana, propter quam à Deo justus reputatur, & æterna vita nobis donatur. Hoc vero ita docuit, ut paulo infra soli fidei justificationis meritum tribueretur, addit enim. *Est ergo formalis justitia nostra ipsa fides & nebula cordis, hoc est fiducia in rem, quæ non videtur.*

3. Magistrum suum sequutus Melanct. in confess. August. art. 4. docet, ipsam fidem nobis coram Deo pro justitia imputari, etsi in apolog. confess. art. 4. & duobus sequentibus hoc non tribuat fidei propter ipsius virtutem, sed propter Christi meritum, quia sic concipimus Dei misericordiam.

4. Osiander vero, quamvis Lutheri Sectator sicut Melanct. ita non docuit, sed recensens viginti discrepantes opinioniones, asserit, formalem causam nostræ justificationis esse ipsam justitiam, qua Deus justus est, & sic exposuit, quod Lutherus tradidit. Christum in nobis habitantem esse nostram formalem justitiam. In hoc medium tenuit viam, sed minimè tutam; nec agnovit cum Lutheranis aliis justitiam imputativam, nec cum Catholicis intimam & inhærentem, sed solum inhabitantem; quare concludit, Deum non acceptare ullam justitiam, nisi quæ est sui propria, sibi que essentialis.

5. Osiandro aliquo modo adhæsit Matthias Illyricus, aliquo modo ab ipso recessit. Voluit enim iste cent. 1. lib. 2. justitiam nostram sitam non esse in Divina substantialique justitia, sed in toto

opere, quod Christus homo & Deus, veluti mediator Dei & hominum, pro nobis obtulit, atque in hunc sensum de-  
venerunt in colloq. Altemburgensi Lu-  
therani rigidi, idest Saxonici, & mol-  
les, idest Electorales. Obedientia, sta-  
tuerunt, & meritum Christi est res ipsa,  
quæ nobis imputatur, est justitia ipsa,  
quæ nobis donatur, atque adscribitur.

6. Sequitur Calvinus; & lib. 3. in-  
stitut. cap. 11. sentiens cum Lutheranis  
nullam esse in nobis justitiam inharen-  
tem, & nobis imputari justitiam Christi,  
ita ut propter ipsam condonentur pec-  
cata, docuit supra Lutheranos, in ipsa  
peccati condonatione seu remissione,  
nostram consistere justificationem, ad  
quod dicendum inducitur, quia justi-  
ficationem sumit pro nomine forensi,  
ut supra dictum fuit.

7. Tandem Bucerus librum edidit,  
quem inscripsit *concordia*, fortasse ut ali-  
quos Catholicos seduceret, ut factum  
fuit. Hic duplicem justitiam excogita-  
vit. Unam imperfectam, quam virtuti-  
bus nobis inherentibus concessit; (Ecce  
sic ad Catholicos accedebat,) aliam per-  
fectam, quam in justitia Christi nobis  
imputata prædicavit) ecce sic ad Luth-  
eranos) Nunquam enim, dicebat, justi-  
tia nostra hujusmodi esse potest, ut judi-  
cium Dei sustinere valeat, nam, ut le-  
gitur, *non intres in judicium cum servo  
tuo, quia apud te non justificabitur homo.*  
Necesse est, nobis imputetur justitia  
Christi, qua induti & quodammodo testi-  
coram Deo apparere possimus, justique  
declarari, quapropter non deleri pecca-  
ta sed tegi tantum sequebatur.

Ex his omnibus apparet, quid à  
nobis præcipue agendum sit in hac qua-  
stione, ut hæc omnia, quæ contra no-  
stram fidem Diaboli fraude inventa  
sunt, examinemus & refellamus. Sed  
quia jam præcipuum punctum in tractatu  
de fide resolutum est, an scilicet justi-  
ficatio haberi possit per solam fidem,  
ideo hoc omittendo.

## ARTICULUS II.

*Utrum Justificatio nostra consistat for-  
maliter in justitia Christi nobis im-  
putata, per consequens, utrum  
in justificatione verè peccata  
remittantur vel solum  
tegantur.*

8. **E**ST hic error ille Sectariorum  
refellendus, quo juxta superius  
dicta docent, justificationem nostram in  
hoc tantum consistere, quod quamvis  
justi non simus, attamen justii declare-  
mur, & per gratiam Christi nobis impu-  
tatam & à nobis apprehensam ita tegan-  
tur peccata nostra, ut ante Divinam ju-  
stitiam non appareant; etenim, si vel-  
lent Hæretici justitiam & merita Chri-  
sti ita nobis imputari, ut nobis donen-  
tur, & Deo à nobis offerri possint pro  
peccatis nostris ex quo Christus super se  
pro illis satisfaciendi onus suscepit;  
eorum non esset improbanda Doctrina,  
sed quod Christi justitia ita nobis impu-  
tetur, ut per ipsam justii nominemur &  
simus, ut loquitur Joan. hoc nullo pacto  
potest admitti; sed revera dici debet in  
justificatione aliquid intrinsece nobis  
donari, quod neque sit justitia Christi,  
nec solum tegantur peccata, sed revera  
deleantur, ita ut amplius non sint.

9. Colligimus hoc ex Divinis Scrip-  
turis, ex quibus deinde ratio deducetur.  
Primo. In veteri Testamento plura no-  
bis afferuntur testimonia. Isaïa 44. *De-  
levi ut nubem iniquitates tuas, & quasi  
nebulam peccata tua.* Ezech. 36. *Effun-  
dam super vos aquam mundam, & munda-  
bimini ab omnibus inquinamentis vestris.*  
Ps. 50. *Asperges me hyssopo & mundabor;  
lavabis me, & super nivem dealbabor.*  
Ps. 102. *Quantum distat ortus, ab occiden-  
te longe fecit à nobis iniquitates nostras.*  
Mich. 7. *Projiciet in profundum maris  
peccata vestra.* Porro ita nubes, ac nebu-  
la dissipantur, ut nec quidem earum  
vestigium relinquatur, ita per aquam  
mundam purgantur vestes, ut nulla for-  
des

des remaneat, ita per hyssopum mundantur quæ asperguntur, ut nullum supersit inquinamentum; neque possunt hæc intelligi per hoc solum, quod rubes tegantur, aut tegantur fordes, præsertim si detur dealbatio super albedinem nivis, ergo; rursus, ita à nobis longè fieri iniquitates & in mare projici, est eas omnino tolli, ergo.

10. Secundo in novo testamento plura similia immo magis expressa reperiuntur. Jo. 1. *Ecce agnus Dei, ecce qui tollit peccata mundi.* 1. Joan. 1. *Sanguis Jesu Christi mundat nos ab omni peccato.* Act. 3. *Convertimini, ut deleantur peccata vestra.* Ad Hebr. 1. *Peccatorum purgationem faciens.* 9. *Christus semel oblatus est ad multorum exhaurienda peccata.* Ad Ephes. 5. *Eratis aliquando tenebræ, nunc autem lux in Domino.* Et rursus. *Ut exhiberet ipse sibi gloriosam Ecclesiam, non habentem maculam, neque rugam.* Quæ omnia vera esse non possent, nisi dicamus, in justificatione peccata non solum tegi, sed omnino deleri.

11. Quamquam vero omnes laudatæ Scripturæ à nobis omitterentur, unam asserre sufficeret, quæ arbitratur meo convincantur Hæretici necessum est. Ea autem est, quam tradit Apostolus ad Roman. 4. ubi ait. *Sicut per inobedientiam Adami peccatores constituti sunt multi, ita per obedientiam Christi justii constituuntur multi*, atqui per inobedientiam Adami fuimus revera peccatores, & ipsa non fuit tantum nobis imputata, sed revera peccatum intulit, ergo etiam per obedientiam Christi sumus revera justii, neque ipsa est tantum nobis imputata, sed re peccatum aufert. Quare Adam fuit causa efficiens injustitiæ nostræ, non sic formalis, & Christus est causa efficiens justitiæ nostræ, non sic formalis. Argumentum hoc amplius instauro. Per Christum fuit nobis restitutum quod fuit in Adamo perditum quantum pertinet ad imaginem & similitudinem Dei, ut loquuntur Sancti PP. sed in Adamo non perdidimus tantum justitiam imputati-

Tom. II.

ve talem, neque imaginem & similitudinem Dei per imputationem, sed veram & intrinsecam justitiam, ergo etiam per Christum nobis restituitur justitia vere, & non tantum imputative. Quod si per Christi justitiam nobis imputatam nos justii possumus appellari, quare Christus per injustitiam nostram ipsi imputatam non dicitur peccator, injustus, sceleratus, & quod horrendum est, Diaboli filius?

12. Progredior modo ad evertendum potissimum Hæreticorum fundamentum; asserunt enim, imputationem hanc necessariam esse non tantum quia peccatum semper in nobis est, sed quia justitia nostra nequit esse hujusmodi perfectionis, ut nos justificandi vim habeat. Si hoc falsum esse demonstro, causa finita est; demonstro autem sic. Si in hac vita esse potest perfecta fides, spes, & charitas, etiam justitia nostra perfecta esse potest quantum attinet ad substantiam, nam si loquamur de intensione, ultro concedimus hanc perfectionem non inveniri, sed hæc spectat ad majorem justitiam, non ad justitiam simpliciter; atqui in hac vita esse potest perfecta fides, spes, & charitas, ergo. Prob. mi. primo de fide, si fides in hac vita perfecta esset non potest, ubi erit? num in Patria? minime; quia in patria evacuabitur. Præterea; ait S. Petrus Epif. 1. cap. 1. *Ut probatio vestra fidei multo pretiosior auro, quod per ignem probatur, inveniat in laudem & gloriam.* S. Joan. epif. 1. cap. 5. *Hæc est victoria, quæ vincit mundum, fides nostra.* Sanctus Paulus ad Hebr. 3. *Accedamus cum vero corde in plenitudine fidei.* At quo pacto hæc vera essent, si fides foret tam languida & infirma, ut contendunt Hæretici? Ad probandam secundam partem minoris, quæ ad spem pertinet, utor cap. 6. epif. ad Hæbr. quod sic concluditur. *Fortissimum solatium habeamus, qui confugimus ad tenendum propositum quam sicut anchoram habemus animæ firmam ac tutam.* De Charitate autem quid dicam?

B b 2

Ut

Ut hæc perfecta sit quid requiritur, nisi quod Deus diligatur ex toto corde, ex anima tota? At hoc nonne in pluribus hominibus evenit, quod olim dictum fuit de David Eccl. 47. *De omni corde suo laudavit Dominum, & dilexit eum, qui fecit illum?* An vanam dicemus. promissionem à Deo factam in Deuter. c. 30. *Circumcidet Dominus cor tuum, & cor seminis tui, ut diligat Deum in toto corde, & in tota anima sua?* Si Joan. 15. dixit Christus: *Majorem hac dilectionem nemo habet, ut animam suam ponat quis pro amicis suis.* Nonne hoc in tot Martyribus factum esse & legimus & admiramur? Quid ergo prohibet, etiam in hac vita dari perfectam charitatem asseramus? dabitur igitur & perfecta justitia.

12. Nunc devenire ad perpetuam omnium Sanctorum Patrum traditionem; sed ipsi adversarii concedunt, justificationem per Patres consistere in renovatione internâ & sanctificatione, & in tantum temeritatis processit Kemnitius; ut in 1. p. examinis Concilii Trident. dixerit, ideo à Patribus hoc dictum esse, quia rudes erant, & verborum proprietatis imperiti. Calvinus vero, qui in aliis solum Augustinum admittere solet, eum in hoc excipit & dicit lib. 3. instit. cap. 11. §. 15. *At ne Augustini quidem sententia recipienda est, qui gratiam ad sanctificationem refert, qua in vitæ novitatem per Spiritum regeneramur.* Adeo clare Sanctus Doctor veritatem hanc nostram docuerat, ut hæc à Calvino negari non poterat, quin negaretur Augustinus. *Quid est aliud, inquit ep. 81. ad Crescon. justitia cum in nobis est, vel quolibet virtus, qua rectè sapienterque vivitur, quam interioris hominis pulchritudo?* Et 15. de Trinit. cap. 8. *Quæ natura cum à suo conditore justificatur à deformi forma formosam, transfertur in formam.* Idem docent Ambros. lib. 6. Exam. cap. 8. Hieronym. lib. 1. adversus Pelagian. Prosper. in respon. ad cap. 6. Gallorum, omnesque

Patres Græci, Basil. lib. 1. de Baptis. cap. 2. Chrysost. hom. 16. in primam ad Corinth. Nyssenus, Nazianzenus &c.

Hæc omnibus necesse ea quæ definita sunt à Concilio Tridentino, de quibus à nobis dictum fuit, art. 2. præcedentis quæst.

### ARTICULUS III.

*Afferuntur Hæreticorum argumenta, & refelluntur.*

13. **P**rima argumenta desumunt Hæretici ex iis, quæ in epist. suis tradidit Paulus. Prima ad Corinth. 1. legitur de Christo. *Qui factus est nobis à Deo sapientia, & justitia, & redemptio.* 2. ad Corinth. 5. *Deus erat in Christo mundum reconcilians sibi, non reputans illis delicta ipsorum.* Rursus ibidem. *Eum, qui non noverat peccatum, pro nobis peccatum fecit, ut nos efficiamur justitia Dei in ipso.* Ex primo textu sic licet inferre, ergo justitia nostra est justitia Christi; ex Secundo sic, ergo ideo reconciliamur, quia nobis peccata non reputantur, idest imputantur. Ex tertio sic, ergo sicut peccata nostra fuerunt imputata Christo, nec tamen fuerunt in Christo, ita justitia Christi fuit imputata nobis, nec tamen est in nobis.

14. Pergunt Hæretici. Ad Ephes. 1. *Deus nos acceptos habuit in dilecto filio suo,* ergo nos non habet acceptos in nobis, ergo in nobis nulla est justitia. Ad eosdem 4. *Induite novum hominem, qui secundum Deum creatus est.* Hæc autem similitudo ab indumento desumpta innuit nos justificari per justitiam extrinsecam, quæ nos tegat, ne turpitudine nostra Dei oculi offendantur, & sicuti Jacob indutus vestimentis Esau primogeniti fuit pro primogenito reputatus, & à Patre cum benedictione hæreditatem obtinuit, ita nos induti justitia Christi benedictionem à Domino regnumque Cælorum consequimur.

15. Resp. textus Apostoli verissimos esse,



esse, sed non juxta mentem Hæreticorum, ita ut justī simus ex justitia, quæ est in Christo nobis imputata, sed aliā de causā, quia videlicet fuit causā efficiens meritoria justitiæ nostræ & sapientiæ & redemptionis, cum nos redemerit, justosque sapientesque fecerit nos Patri suo reconciliando. Hoc novum, non est in scripturis Sanctis, nam etiam dicitur fortitudo nostra, patientia nostra, salus nostra, nec tamen hæc intelligenda sunt nisi in genere causæ efficientis, juxta illud ps. 36. *Salus autem justorum à Domino*. Præterea. Dicitur Christus justitia nostra, quia Patri satisfecit pro nobis, & dum nos justificat, satisfactionem istam communicat nobis & donat, tanquam si esset satisfactio nostra, nec enim per justitiam nostram nobis in hærentem satisfacimus Deo vel pro culpis nostris, vel pro pœna æterna, sed justitia nostra cum remissione culpæ & pœnæ est effectus satisfactionis Christi, quæ ex Trident. sess. 6. cap. 7. nobis in justificatione confertur & applicatur, In hoc autem sensu vere justitia & merita Christi nobis imputantur.

16. In secundo textu ly *non reputans delicta eorum* secum infert veram delictorum remissionem, & infusionem justitiæ, ut infra magis ostendam; atque hoc est juxta ejusdem Pauli doctrinam ad Colos. 2. ubi ait. *Convolvistis vos Christo, donans vobis omnia delicta, delens quod adversus nos erat Chyroglyphum decreti*, & infra, *abundantiam gratiæ & donationis & justitiæ accipientes regnabunt in vita per ipsum* igitur justificatio non consistit in sola non imputatione delictorum, sed in eo quod deleatur peccatum, & accipiatur abundantia gratiæ & justitiæ.

17. Pro tertii textus explicatione, sufficeret quod diximus; Si enim non solum nominamur, sed & sumus justī per justitiam Christi, etiam Christus dici debet atque esse iniquus per injustitiam nostram. Factus igitur est Christus peccatum, seu peccator pro nobis, quia susce-

pit onus satisfaciendi pro peccatis nostris, in quo maximè apparuit ejus justitia, qui enim pro peccatore satisfacit peccator esse non potest. Quapropter imputata sunt ei peccata nostra, ut fieret hostia pro populo, non ut fieret per ipsa peccator, & ita nobis imputatur justitia Christi, idest satisfactio per Christum, sed non propterea per hanc justī sumus; si vere à nobis peccatorum maculæ sordesque non tollantur; Dicimur autem, nos *justitia* in illo, quo termino potius uti voluit Paulus, quàm nos dicere *justos*, ut servaret antithesim cum voce *peccatum*. Quod tamen inconveniens non est, sicut dixit Christus Apostolis Mat. 5. *Vos estis lux mundi*; & Apost. ad Ephes. 2. *Eratis aliquando tenebræ, nunc autem lux in Domino*. Sed quemadmodum Christus non imputativè, sed verè factus est hostia pro peccato, ita nos non imputativè, sed verè evadimus justī, divinamque justitiam nobis in hærentem participamus.

18. Quartus textus mirificè pro nobis assertur, ex illo namque probatur, non solum per filii merita nobis peccata remitti, sed etiam animabus nostris pulchritudinem, per quam à Deo diligamur, infundi, & per quam utique in nobis existentem ipsius efficiamur amici. Hæc est expositio Chrysof. tam fidelis Sancti Pauli Epistolarum interpretis in comment. laudati loci, ubi similitudinem profert cujusdam scabiosi à morbo libertati, & dicit, hunc venustum non reddi ex eo præcisè quod à scabie liberetur, sed per alia adjuncta, ita & animam nostram esse à Deo dilectam, non quia solum à peccato liberetur, sed etiam, quia alia positivè ipsi tribuuntur, & in ipsa permanent; Hoc autem nobis præstat Deus in dilecto filio suo cui omnia debemus, & cujus meritorum intuitu omnia nobis donavit.

19. Ultimus denique textus magis probat quod à nobis traditum est sumendo argumentum à peccato Adæ, quod nobis non tantum imputatum fuit, sed

vere



vere fuit in nobis; etenim antequam, Apostolus diceret, *indulto novum hominem*, dixit, *deponite veterem hominem, secundum pristinam conversationem*. Subsumo, sed deponere veterem hominem est deponere peccatum quod in nobis est, ergo induere novum hominem est assumere iustitiam, quæ in nobis est. Nec moveat in oppositum similitudo indumenti per quod tegimur, etenim alio titulo iustitia, etsi nobis inhæreat & non tantum imputetur, vestis nomine potest appellari; Primo quia non est nobis naturalis sed extrinsecus advenit per donum Spiritus Sancti, & sic explicat Sanctus Augustinus ser. 15. de verb. Apostoli illa verba: *Sacerdotes tui induantur iustitia*, inquit. *Vestis accipitur, non cum capillis nascitur, pecora de suo vestiuntur*. Secundo; quia per vestes distinguuntur homines, & sic iustitia distinguit justum ab injusto, & facit, ut Christum, qui in corde residet, homines opere & moribus exprimat. Denique frequenter in Scripturis *inducere* sumitur pro abundantius habere, sic ps. 64. *Induti sunt arietes ovium, & valles abundabunt frumento*. Et Judicium 6. legitur: Spiritus Domini induit Gedeon, idest copiose super Gedeon descendit; & sæpe in psalmis habetur, *induuntur confusione* scilicet fiat tam magna confusio, ut omnibus sit manifesta. Sic igitur dum dicitur, *indulto novum hominem* est dicere tunc homines induere iustitiam, cum abundantius gratiam & iustitiam habentes eam per sanctas operationes etiam extrinsecus producant, & ita contingat quod dictum est. *Sic luceat lux vestra coram hominibus, ut videant opera vestra bona, & glorificent Patrem vestrum, qui in Cælis est*. Ex hisce omnibus constat, in quonam sensu exemplum Jacob induti vestibus Esau teneat, nimirum, si referatur ad satisfactionem Christi & ejusdem merita, quibus veluti tecti veniam à Deo imploremus, verum, est, si ad iustitiam, qua formaliter iustimus, est falsum; sed profecto ad rem

non est, si rectè perpendatur; nam Jacob vestitus indumentis Esau significabat Christum indutum hædinis pellibus peccatorum, & ita benedictionem obtinuit à Patre, ut in ipso gentes omnes benedictionem acciperent.

20. Argumentum secundum desumitur ex quo quod nomen justificationis sit nomen forense, quod significat justum declarare, non tamen facere, ut dictum fuit per Scripturas adductas sub initio quæstionis num. 1. Præterea; psal. 31. legitur: *Beati, quorum remissa sunt iniquitates, & quorum tecta sunt peccata*. Et rursus. *Beatus vir, cui non imputavit Dominus peccatum*, ergo justificatio in hoc præcisè consistit, quod peccata tegan- tur, & non imputentur, nam si in quopiam alio collocaretur, non posset vir ille rectè dici Beatus.

21. Resp. ad primum; licet apud homines, quos aliorum innocentia, vel iniquitas latet, accipi possit hoc verbum *justificare* tanquam forense, idest justum declarare, non sic tamen apud Deum, qui cum scrutetur renes & corda, neminem declarat justum, nisi revera justus sit, & sicuti, si iudices humani declararent aliquem justum, quamvis reus esset, male agerent, ita si Deus justificaret declarando aliquem justum, qui revera peccator esset, male declararet, quod esset Deum destruere. Sed falsum est, semper in Scripturis verbum hoc forense modo usurpari, maxime in re de qua disputationem habemus; jam allatus est textus Apostoli, in quo comparatur iustitia hominum per peccatum Adæ iustitiæ ipsorum per obedientiam Christi, sed rursus perpendamus illa verba ad Rom. 8. *Quis justificavit hos & glorificavit*. Peto, illos glorificare, nonne fuit verè gloriosos efficere? ergo etiam illos justificare est vere justos facere; quare sic amplius argumentor. Gloria Christi non fuit mere hominibus imputata, ergo etiam iustitia Christi non fuit mere hominibus imputata. Quidquid de gloria dicetur, dicam ego de iustitia.

22. Ex hac doctrina colligendum, quod quotiescumque dicitur, aliquid à Deo hominibus imputari, revera in hominibus est, vel tanquam causa vel tanquam effectus, si ab eo habeatur denominatio; & ita explicata illud, quod dicitur, Abrahamum credidisse, & illi reputatum esse ad justitiam, hæc enim reputatio, seu imputatio non est simplex existimatio, sed talis, ut ipsi veritas in re correspondeat, sicuti cum dicitur; *Ei, qui operatur, merces non imputatur secundum gratiam sed secundum debitum*. In quo textu non explicatur merces imputata secundum solam existimationem, sed secundum rem.

23. Ad secundum dico, tegi peccata apud Deum idem esse ac peccata prorsus deleri, quod enim adhuc est, Deo occultum esse non potest, cum ipsius oculis omnia nuda & aperta sint. Hoc autem in re nostra prorsus dici debet. Lege, Scripturas Sanctas, & sæpe reperiēs, hæc duo tegere peccata & delere peccata, mutuo conjungi. *Ne operias iniquitatem eorum, & peccatum eorum non deleatur* ita 2. Esdræ cap. 4. *Averte faciem tuam à peccatis meis, & omnes iniquitates meas dele* ita ps. 50. *Remissisti iniquitatem plebi tuæ, operuisti omnia peccata eorum* ita, ps. 84. Merito itaque dici potest beatus ille vir, cui non imputavit Dominus peccatum, quia si peccatum non imputatur, neque est, vel si est, & non imputatur, Deus injustus & insipiens est. Ita satis superque datum esset Calvino responsum, sed quia dicit, ibi non exprimi peccatorum remissionem, & tamen hominem dici beatum, ideo ulterius dico, in primis satis exprimi, si versiculus totus legatur, additur enim, *nec est in spiritu ejus dolus* nota ly. *non est* sed si ego opponerem alios similes textus, in quibus homo dicitur beatus, nec tamen ulla peccatorum remissionis sit mentio, quid mihi responderet? Opponere non prohibeor. Legat ps. 111. inveniet. *Beatus vir qui timet Dominum*, ps. 118. *Beati immaculati in via*. Mat. 5. *Beati pau-*

*peres spiritu beati qui lugent* &c. Abeat ergo, & se multum laborasse nihil coepisse glorietur.

24. Magistri tamen vices agere contendit Kemnitiū, Metaphysicus potius quam Theologus sic promovet argumentum. Non imputare peccatum non est delere peccatum & justitiam infundere, ergo doctrina nostra non tenet; Prob. ant. Si non imputare peccatum esset delere peccatum & justitiam infundere, imputare peccatum esset justitiam delere, & iniquitatem infundere, sed hoc non est dicendum, ergo. Maj. patet paritate rationis. Minor etiam, secus Deus imputando peccatum infunderet. Præterea. Cum proverb. 12. legitur. *Homo astutus tegit scientiam* quis unquam explicabit, *delet scientiam*? ergo dum dicitur, *Deus tegit peccatum* cur explicabitur, Deus delet peccatum.

25. Sed contra. Ne. ant. ad prob. ne. maj. nec paritas tenet, nam non imputationem peccati sequitur infusio gratiæ & justitiæ, quæ est à solo Deo; imputationem autem peccati non consequitur infusio iniquitatis à Deo, sed hæc est à solo homine, qui per se satis est, immo solus est ad id, quod est malum. Præterea. Argumentum juxta regulas Dialecticæ non bene procedit, cum enim non imputare peccatum & justitiam infundere sit propositio contradictoria huic imputare peccatum est justitiam non infundere, debet paritas ita proponi. Deus, non imputando peccatum, justitiam infundit, ergo imputando peccatum justitiam non infundit, & sic consequentia concederetur; debet autem sumi contradictoriè, sicut contradictoria sunt hæc, imputare peccatum, non imputare peccatum. Ad ultimum. Concedo rem aliquam tegi non esse semper rem deleri, plura immo teguntur, ut magis conserventur, plura vero teguntur, ut deleantur, sicut unguentis teguntur vulnera; attamen dum agimus de aliquo, quod oculis Dei abscondatur, idem est tegere quod delere,

ut

ut supra declaratum fuit, & revera si alicujus sapientia à Deo tegetetur, ea esset revera deleta. Hisce omnibus addo explanationem, qua Sanctus Justinus Martyr. indial. cum Triphone exponit illa verba, *Beatus, cui non imputavit Dominus peccatum.* Hæc sunt ejusdem verba. *Beatus &c. hoc est, cui poenitenti Deus peccata remittit, non sicut prædicitur Vosmetipsos fallentes, & alii quidam vestri similes asseverant, etiamsi peccatores fuerint, modo Deum noverint, non imputabit eis Dominus peccata.* Vides, nostri temporis Hæreticorum errorem aliis temporibus fuisse evulgatum. Tandem S. Augustinus in dictum ps. *Non sic, ait, intelligatis, quod dixit peccata cooperta esse, quasi sibi sint.* Quid clarius?

26. Ultimo argumentantur. Primo ex quo meritis & justitiæ Christi fieret injuria, si non per istam, sed per aliam justitiam nobis inhaerentem justificaremur, & hinc nobis occasio superbiendi daretur, si propriam justitiam habereamus. Secundo; ex quo justitia nostra sit admodum imperfecta, nec ante Divinum conspectum audeat apparere, *non enim intres in judicium cum servo tuo, quia non justificabitur in conspectu tuo omnis vivens.* Idcirco ait Gregorius lib. 8. Moral. cap. 23. *Quantalibet justitia polleant, nequaquam sibi ad innocentiam vel electi sufficiunt, si in judicio districtorequirantur.*

27. Resp. nihil à nobis meritis ac justitiæ Christi derogari, dum ipsam justitiam nobis inhaerentem ab illorum virtute & istius excellentia tanquam à causa provenire fateamur; Multum tamen derogant adversarii, cum dicant, Christum suis meritis & laboribus, morte & sanguine non potuisse à Patre impetrare, ut peccata nostra verè delectentur, nosque ad veram justitiam perduceremur. Neque hoc pacto superbiendi nobis datur occasio. Totum enim hoc, quantumcumque est, quod certè maximum est, Dei donum esse profiteamur. Quid enim

habes, quod non accepisti? Sed si propter hoc homo gloriari posset, posset etiam gloriari de fide, quam tamen necessariam esse Hæretici non insciantur. Ipsi superbiunt magis, qui Christi justitiam apprehendisse se jactitant, nec cuiquam Sancto semetipsos æquare verentur, immo Lutherus in serm. de Natali Virginis Mariæ, omnes credentes Virgini reddit æquales. Ad tertium. Jam demonstratum est, justitiam nostram, quantum ad Substantiam attinet, esse perfectam, dicitur autem homo in conspectu Dei non justificari, vel quia justificatio hominis non est opus hominis secundum vires proprias sed secundum vires gratiæ, vel quia cum ipsa justificatione adhuc reperitur quedam admixtio peccatorum venialium, vel quia licet sit deleta culpa, nondum tamen satis pro poena factum est; & ita intelligit Gregorium, quem miror asserri ab Hæreticis, cum ipsi nullam fidem adhibendam esse per sæpe detrectent.

#### ARTICULUS IV.

*Utrum actus contritionis seu dilectionis Dei super omnia habeat sine gratia inhaerente vim justificandi.*

28. **E**tsi ex præcedentibus satis comperum fiat, justificationem nostram haberi per habitum gratiæ, per quam deleantur peccata, & animæ imprimatur venustas quædam, per quam grata sit Deo; nihilominus apud recentiores Theologos solet promoveri quæstio, utrum hoc conveniat etiam actui dilectionis Dei super omnia, seu contritionis. In hujus resolutione tres sententiæ recensentur. Prima, quam docent Joan. à S. Th. Sotus, Bellarmin. Suarez, Granad. Cacheran. asserit, actum contritionis non solum de facto non habere vim justificandi, sed neque de possibili, saltem loquendo de ea justificatione, quæ per gratiam habituales confertur. Secunda quam primo tradidit Vasq. deinde am-

amplexi sunt Meratius, Turrianus, Hurtadus, oppositum tenet omnino, ita ut Tridentinum definiens, justificationem fieri per formam inhaerentem, non per imputationem, definierit tantum contra Sectarios, an vero esset actus vel habitus, non definivit. Tertia quam statuit Scot. in 1. dis. 17. qu. 1. & in 4. dis. 14. qu. 2. §. de secundo principali, sustinet, de facto actum contritionis seu dilectionis formaliter non justificare, posse tamen in alia possibili providentia. Hæc est sententia inter alias media, & juxta istam.

29. Sentendum primo per actum contritionis seu dilectionis Dei &c. non haberi formaliter justificationem.

Prob. 1. ex Divinis Scripturis. Zachariae 1. *Convertimini ad me, & ego convertar ad vos.* Isaia 35. *Revertatur ad Dominum, & miserebitur ejus, quia benignus & misericors est.* Ecclesiast. 17. *Quam magna misericordia Domini, propitiatio illius convertentibus ad se.* Ex quibus, prætermisiss aliis quam pluribus, sic argumentor. Justificatio non habetur formaliter per id, quod Deus à nobis postulat, & cui Deus justificationem promittit, nec per id, cui, ut justificemur, addi debet novum beneficium & nova benignitas, sed ita se habet actus contritionis, seu dilectionis Dei super omnia, ergo.

30. Scripturas istas, aliasque similes multifariam explicant doctores oppositi. Omitto id, quod ait Vasquez, intelligendas esse de conversione, seu de charitate imperfecta; etenim ultra dicta in præceden. qu. adnotandum est primo, in dictis locis fieri promissionem misericordiae & veniæ infallibiliter obtinendæ, quod conversioni solummodo imperfectæ convenire non potest; Secundo, ibi sermonem esse de conversione, de qua dictum fuit. *Scindite corda vestra, & convertimini ad me in toto corde vestro.* Quæ procul dubio perfecta est, nec alia perfectior esse potest.

31. Dicunt itaque primo in hujus-

Tom. II.

modi locis nequaquam justificationem promitti, sed vim ac virtutem contritionis indicari, sicut, si diceretur, *si sol calefaciet aerem, frigus expelletur*, ergo sicuti hoc non obstante expulsio frigoris habetur per aeris calefactionem, ita per actum charitatis habetur justificatio, quod amplius sic demonstratur. Ezech. 18. legitur. *Si averteris se justus à justitia sua, morietur & nihilominus mors habetur formaliter per ejusdem aversionem, ergo à pari, dum dicitur, si homo convertetur ad Deum, Deus convertetur ad Dominum, si revertatur ad Dominum, Deus miserebitur ejus, explicatur effectus formalis conversionis.*

32. Verum hæc evasio non suffragatur; etenim si peccati remissio esset effectus formalis conversionis, & charitatis, & non beneficium omnino distinctum, idem promitteretur sub conditione sui ipsius, quod omnino alienum censendum est, & semper cum aliquid sub alicujus operis conditione promittitur, aliud distinctum post positam hujusmodi conditionem obtinendum esse significat. Præterea. Ita textus à nobis adductos explicare, est communem Patrum expositionem rejicere, qui in illis locis promissionem & decretum Divine voluntatis verese ad Deum convertentibus indulgentiam largiendi contineri fatentur. Pro omnibus sit S. Augustin., qui in lib. 83. questionum qu. 68. inquit de peccatore, *quod est magno gemitu & dolore penitentem misericordia Dei dignus fuerit, non ipse est, qui se relinqueretur, interiret, sed misereantis Dei, qui ejus precibus, & doloribus subvenit; Parum enim est velle, si Deus non misereatur, sed Deus non misereatur qui ad pacem vocat, nisi voluntas præcesserit, quia in terra pax hominibus bonæ voluntatis:* quæ verba, afferens lib. 1. retract. cap. 26. ait; *Hoc dictum est post penitentiam, nam est misericordia Dei etiam ipsam præveniens voluntatem.* Fatetur ergo maximus Doctor misericordiam Divinam, quæ poenitentiam consequitur, ergo remissio pec-

C c



peccati formaliter in ipsa poenitentia, non consistit. Ex quo habetur disparitas, quare expulsi frigoris habeatur per aeris calefactionem, non sic per actum charitatis habeatur formaliter peccatorum remissio; & quantum ad ultimum, vel antecedens est verum tantum in sensu causali, non formali, vel dispar est ratio, quia mors habetur ex sola hominis voluntate, peccatorum autem remissio non tam consistit in conversione hominis ad Deum, quam in conversione Dei ad hominem, neque illa est formaliter ista, ut infra magis demonstrabitur.

33. Dices, responsionem hanc vim suam habere contra Vasquez, aliosque; attamen in Scotistarum sententia admitti nequaquam posse; nam sequeretur, neque gratiam ipsam justificare formaliter, cum per ipsos non justificet ex natura rei, sed ex Divina ordinatione; Unde hæc ipsa ordinatio erit novum beneficium à gratia distinctum; quo posito sic proponitur argumentum. Licet præter gratiam aliquod novum beneficium requiratur ad remissionem peccati, attamen gratia per se ipsam peccatum remittit, ergo licet præter charitatem requiratur aliquod novum beneficium ad remissionem peccati, attamen charitas per se ipsam &c.

34. Nihilominus minus dicendum est, etiam in principiis Scoticis argumentum & responsionem vim suam retinere, nam licet ultra infusionem gratia requiratur Divina ordinatio ad remittendum peccatum, attamen hæc ordinatio non sequitur post gratia infusionem, ut forma sequitur dispositionem, & ut res promissa conditionem cui facta fuit promissio, sed in ipsa gratia infusione includitur de facto voluntas, quæ Deus velit peccatum remittere, & hujus voluntatis inclusio est juxta exigentiam ipsius gratia, contra quam tamen exigentiam posset Deus operari; E contra remissio peccati est post actum contritionis seu dilectionis, tamquam forma post dispositionem, & in actu cha-

ritatis seu &c. non includitur voluntas Dei remittendi peccatum, sed tantum promittitur, proinde &c.

35. Respondent secundo in textibus adductis promitti solummodo auxilium ad conversionem, tanquam si diceretur, *convertimini & convertar* idest, si volueritis converti, ego adjuvabo, & auxilio meo ad vos me convertam, & hoc admitti debet, cum sine conversione Dei ad hominem, hominis conversio esse non possit ad Deum; Cum igitur Deus promittit conversionem suam homini se ad ipsum convertenti, necesse non est, ut aliam conversionem & aliud beneficium ipsi promittat, nam si homo per contritionem convertitur ad Deum, etiam Deus adjuvando peccatorem, ut contematur, ad peccatorem convertitur, eum diligit, & ipsius misetur, & in hoc sensu sunt illa verba citata Ecclesiast. 17. *Quam magna misericordia Domini & propitiatio illius convertentibus ad se.*

36. Sed profecto nec effugium hoc robur argumenti debeat; nam in Scripturis duo promittuntur, quæ sunt inter se valde distincta; & promittitur auxilium actuale Dei, quo homo, si velit, possit ad Deum converti, & convertatur; & promittitur alia Dei conversio, quæ sit post ipsius peccatoris conversionem, ut cum legitur Jerem. 3. *Convertimini, & sanabo vos.* Et 1. Jo. 1. *Si confiteamur peccata nostra, fidelis & iustus est, ut remittat nobis peccata nostra.* Unde sicut prima conversio ad hominem est magna misericordia Dei erga hominem. Ita secunda conversio post actum charitatis erit magnum beneficium, quod dici non posset, si per actum charitatis sine alio superaddito formaliter justificaretur.

37. Multo minus tandem probabilis est responsio aliorum dicentium, promissionem remissionis factam actui charitatis referri ad remissionem poenæ temporalis, non autem culpæ ac poenæ æternæ, quæ ablata culpa etiam auferitur, quod suadetur, quia in Divina Scriptura



ra promittitur remissio sed non certè atque infallibiliter, ut patet ex illo Joel. 2. *Quis scit, si convertatur, & ignoret Deus.* Et Act. 8. *Penitentiam age ab hac nequitia tua, si forte remittatur hæc cogitatio cordis tui.* Atqui hoc dici nequit de remissione culpæ ac pœnæ æternæ, ergo debet intelligi de remissione pœnæ temporalis.

38. Minus inquam probabilis est huiusmodi responsio. Primo quia promissiones istæ sunt hominibus existentibus in peccato, ergo sunt promissiones versantes circa culpam ac pœnam æternam; Secundo; quia ita dicendo daretur locus detorquendi quaslibet Scripturas, in quibus peccatorum remissio promittitur, & ita dum dicitur, *quorum remiseritis peccata, remittuntur eis*, & Baptisma dari in remissionem peccatorum, de remissione pœnæ temporalis explicari posset, quod minime; Neque vero officit, huiusmodi remissionem sub dubio proponi ac sperari; primo quia particula *forte* non semper dubitationem innuit, sed vel aliquid mysterium, vel rei difficultatem, vel arbitrii libertatem, de qua re diximus ubi de scientia conditionatorum; secundo quia, & hoc est ad rem nostram, verbum illud dubitandi non est propter incertitudinem remissionis culpæ, si verè habeatur contritio, sed propter incertitudinem ipsius contritionis, an vera fuerit vel non. Admitto tamen multoties etiam ad remissionem pœnæ temporalis referri posse; sicut Jonæ 3. dixerunt Ninivitar: *Quis scit, si convertatur & ignoret Deus.* Et David ps. 31. postquam dixerat: *Tu remisisti iniquitatem peccati mei.* Addit *pro hac orabit ad te omnis sanctus.* Et Eccles. 5. legitur, *de propitio peccato noli esse sine metu.*

39. Nunc assertionem nostram probare placet secundo ex Doctrina Concilii Tridentini. Duo ejusdem eligo testimonia. Primum habetur sess. 6. cap. 7. & can. 3. ubi actus charitatis recensetur tanquam dispositio ad obtinendam pec-

catorum remissionem, constat autem dispositionem ad formam ipsam formam non esse. Secundum habetur sess. 14. cap. 4. ubi docet, actum contritionis fuisse quovis tempore necessarium ad impetrandam veniam peccatorum, si autem formaliter justificaret, profecto peccatorum veniam non impetraret, sed esset ipsamet venia peccatorum & remissio; & nota juxta Tridentinum, justificationem fieri per infusionem gratiæ & justitiæ inhærentis ac permanentis, quod de actibus verum esse non potest, siquidem isti, quamvis in aliquo sensu dici possint infusi, attamen propriè & adæquatè non sunt, quia produciuntur etiam a nobis, & licet propriè dicerentur infusi, attamen non sunt permanentes nisi moraliter, quod Concilii mentem definitionemque non servat. Atque hoc præsertim dicendum est, quia, secus si homines per istos actus justè formaliter fierent, fierent etiam per semetipsos, & sic falsum esset quod dicitur Isaïæ 43. *Ego sum ipse qui deleo iniquitates tuas.* Et quod habetur Marci 2. *Quis potest dimittere peccata, nisi solus Deus?* Quod licet sit dictum a Phariseis, attamen cum veritate dictum est, quia ipsi propter hoc negabant Christum esse Deum, & si credidissent, a Christo posse dimitti peccata, ipsum Deum esse credidissent; ut notavit August. lib. 50. homiliarum hom. 23. cap. 7. Ex quo novum argumentum proponi potest.

40. Si vero horum omnium ratio requiratur; multiplex afferri potest & solet; illam tamen eligo, quam assert Scot. in 1. dis. 17. qu. 2. §. ad solutionem, & sic exponitur. Status justitiæ non habetur nisi per formam permanentem, & habitualementem, sed actus contritionis non est huiusmodi, quia quilibet actus ex natura sua est transiens, ergo. Prob. maj. status justitiæ est permanens & habitualis, idest homo justus est Deo acceptus etiam dum non operatur, ut patet in dormientibus & parvulis baptizatis, ergo. Hinc cum Concil. Tri-

assignet tantummodo unicam causam formalem nostræ justificationis, scilicet justitiam Dei, non qua ipse justus est, sed qua nos justos facit, dicendum est, quod si parvuli formaliter per habitum non per actum iustificantur, etiam ita formaliter iustificentur adulti.

41. Totum hoc magis corroboro; primo quia status iustitiæ habetur cum filiatione adoptiva & amicitia Dei, sed fundamentum huius filiationis & amicitie non est formaliter actus charitatis, sed gratia habitualis, quæ ex dictis est participatio Divinæ naturæ, ergo. Secundo quia non potest explicari hæc amicitia Dei per hoc præcisè quod creatura diligit Deum, sed etiam, immo potissimum per hoc quod creatura diligitur à Deo, & diligitur permanentè & complete iuxta illud Joan. 14. *Qui diligit me, diligitur à Patre meo, & ad eum venimus & mansionem apud eum faciemus.* Sed creaturam diligi à Deo permanentè non consistit formaliter in dilectione creaturæ erga Deum, quia esse posset dilectio creaturæ sine hac dilectione Dei, ut dictum fuit in præced. quæst. ergo.

42. Dices. Actus peccati, quamvis transiens, relinquit hominem formaliter & habitualiter peccatorem, ergo etiam actus contritionis quamvis transiens constituet hominem formaliter & habitualiter iustum. Sed contra; Jam disparitas allata est contra primam Adversariorum responsionem, cui ulterius addo, quia homo intelligitur habitualiter peccator per solam moralem perseverantiam peccati, & deformitas, quæ per peccatum in anima remanet, habetur per carentiam oppositæ formæ & deordinationem ad Deum; è contra homo non intelligitur habitualiter iustus per solam moralem perseverantiam actus charitatis, & pulchritudo, quæ per iustitiam remanet in anima, est aliquod positivum physice inhærens animæ, ut definit Concil. Trident. & Catech. Roman. alibi à nobis citatus. Præterea. Sequitur primum, quia peccatum ne-

cessario odio habetur à Deo, at actus charitatis necessario non diligitur à Deo, sed solum ex Divina acceptatione, & promissione suæ dilectionis ideo &c. quod infra magis etiam declarabitur.

43. Ob. 1. Ex Sanctis Scripturis. Ezech. 18. *Si impius averterit se ab impietate sua, ipse animam suam vivificabit.* Luc. 7. *Remittuntur ei peccata multa, quia dilexit multum.* 1. Petri 4. *Charitas operit multitudinem peccatorum.* Idem autem per Catholicos est operire, quod delere & remittere; ideo docet Concil. Trident. sess. 14. cap. 4. *Contritionem charitate perfectam hominem Deo reconciliare.* Ergo.

44. Respondeo, istos omnes similesque Textus intelligendos esse de charitate se habente tamquam ultima dispositione ad remissionem peccatorum, non tamquam de forma remittentis peccata; Sed ad uberiorem doctrinam liceat postremum Sancti Petri dictum expendere. Expendit illud Sanctus Chrysost. hom. 4. in act. Apost. de alienis peccatis, cum in contextu sermo sit de mutua charitate habenda, ut patet ex illis verbis, *ante omnia autem in vobismetipsis mutuam charitatem habentes.* Ita propterea dicitur charitas operire multitudinem peccatorum, quia mutuus amor hoc præstat, ut unus alterius defectus vel excuset, vel dissimulet, vel abscondat, prout amoris ordo permisit; Quare in hoc sensu obiectio ex illo petita contra nos non procedit. Quod si velint illud explicare de amore erga Deum, jam dictum est, dispositivè tantum se habere, & adinstar causæ impetratorie non formalis, nisi forte dicas, ea omnia dicta esse de charitate non actuali sed habituali, quam ultro concedimus formaliter iustificare, cum ab habitu gratiæ nequaquam separari possit, & quamvis etiam distingueretur, ipsam gratiam præsupponeret. Juxta hæc explicandum est Tridentinum. Adde, hæc omnia tribui etiam aliis virtutibus, ut ostendi in pri-

primo Tomo, ubi de insufficientia fidei ad iustificandum.

45. Ob. 2. ex Patribus. Augustin. ser. 11. ad fratres in Eremito. *Accipite, compunctionem, quia sanctitas animarum est, remissio peccatorum est.* Et lib. de morib. Eccles. cap. 12. *Qui separatur à Deo dilectione redit in Deum.* Hieronym. ep. 27. de contrit. *Quæ peccata stictus ipse non purget? quas inveteratas maculas hæc lamenta non abluant?* Ambros. in ps. 50. in illa verba, *peccatum meum contra me est semper.* Inquit, *Charitas abscondit errorem, remittit etiam ipsa peccata.* Bernard. in lib. de modo bene vivendi serm. 10. *Compunctio cordis sanitas est animæ, compunctio lacrymarum remissio est peccatorum.* Tandem S. Chrysost. hom. 7. in 2. ad Timot. comparat charitatem igni, & peccatum rubigini, sicut igitur ignis omnem consumit rubiginem, ita charitas omne peccatum. Idem exemplum adhibet S. Gregor. Magnus hom. 33. in Evangelia, ergo.

46. Resp. Patres non in alio sensu loquutos esse, quam in sensu Scripturarum, eo igitur pacto quo Scripturas exposuimus, etiam Patres exponimus. Verum tamen est, quod ait Augustinus, nos per dilectionem redire in Deum non solum dispositivè & efficienter, sed etiam formaliter, sed hoc non sufficit completæ amicitiae, in qua sita est iustificatio, sed ulterius requiritur, Deum redire ad nos, ut superius dictum fuit. Verum, insuper est, charitatem esse animæ pulchritudinem & sanitatem, non tamen integram atque perfectam, ut requiritur ad iustitiam; Sed quid mirum, si hæc de charitate dicantur, cum unicuique virtuti hanc laudem præstiterit Aristoteles? Exemplum ignis in hoc servatur, quod sicut iste efficienter consumit rubiginem, ita charitas dispositivè & efficienter moraliter impetrando consumit peccatum.

47. Ob. 3. ratione. Actus contritionis & charitatis est per se forma expulsi va peccati, ergo est forma per se, iustificans. Prob. ant. actus contritionis

& charitatis reparat in homine omnem de ordinationem, & Deo ita satisfacit, sicut peccatum offendit, sed nihil ultra requiritur, ut formaliter iustificet, & peccatum remittat, ergo. Prob. prima pars maj. deordinatio, quæ per peccatum est in homine, habetur per aversionem à Deo, & per conversionem ad creaturam, sed actus contritionis tribuit aversionem à creatura & conversionem ad Deum, ergo. Prob. secunda pars primæ mi. eadem ratione, & rursus sic. Tantum bonitatis est in actu contritionis ad placendum Deo, quantum malitia fuit in peccato ad displicendum Deo, ergo. Prob. ant., tum quia malitia peccati non potest excedere bonitatem actus contritionis, idest contritionis, cum sit privatio; tum quia, si peccatum habet infinitatem ex parte Dei offensi, etiam contritioni non deest infinitas ex parte Dei dilecti; tum quia, potius in actu contritionis relucere debet major bonitas, quia malitia peccati est ex defectu naturæ, bonitas autem contritionis est ex virtute gratiæ, proinde est ordinis excellentioris.

48. Resp. ne. ant. ad prob. ne. ant. quo ad secundam partem, quæ esset distinctio primæ partis, si sola proponeretur; ad prob. primam patet quid respondendum; ad secundum ne. ant. ad prob. dis. ant. malitia actus peccati &c. in ratione aversionis & conversionis conced. in ratione debiti satisfaciendi ne. ant. & Conf. & sic ad aliam prob. ratio utriusque est, vel quia deficit actus contritionis in valore morali propter improprietatem inter personam offensam, & satisficientem, ita responderet Thomista, vel quia malitia peccati de se est inductiva offensa, bonitas autem contritionis non est inductiva satisfactionis, nisi à Deo acceptetur, ita responderet Scotista. Ad tertium illud antecedens ad summum est verum, si attendatur principium, à quo est, non si attendatur terminus, ad quem est.

46. Respondent alii distinguendo in

in peccato duplicem considerationem. Una est voluntarietas, propter quam quis censetur velle permanere in affectu erga creaturam, alia est obligatio passiva, propter quam remanet obstrictus juri Divino, quod habet Deus ad exigendum à peccatore satisfactionem; prima auferitur per actum contritionis, non secunda nisi vel Deus relaxet debitum, vel peccator satisfaciatur; ad expellendum autem peccatum non satis est auferri voluntarietatem, nisi auferatur simul & dicta obligatio, quod ostendi potest exemplo voti, in quo pariter datur voluntarietas, & obligatio reddendi Deo, quod promissum est, & licet per retractationem auferatur illa, non tamen ista, nisi vel Deus cedat juri suo, vel res promissa reddatur. Non potest igitur dici, per actum contritionis posse formaliter expelli peccatum, sed solum dispositivè, & effectivè moraliter, cui dispositioni correspondet infusio gratiæ tanquam novum beneficium ipsi promissum, uti probatum fuit.

50. Ob. 4. alia ratione. Actus contritionis est forma, quæ esse non potest cum peccato habituali, ergo. Prob. ant. actus contritionis est forma, quæ esse non potest cum peccato actuali, ergo neque cum peccato habituali; Prob. conf. peccatum habituale nihil est aliud, quam ipsum peccatum actuale non retractatum & moraliter perseverans, ergo si &c.

Resp. ne. ant. quod est tantum verum dispositivè ultimo & in sensu effectivo; ad prob. conc. ant. ne. conf. ad prob. dis. ant. nihil est aliud in sensu physico & active conc. in sensu morali & passive ex parte creaturæ, & activè ex parte Dei ne. ant. & conf. Hoc autem morale superadditum est obligatio, quæ creatura tenetur ad satisfaciendum, & jus quod habet Deus ad exigendam satisfactionem, ut dictum fuit. Argumentum autem nimis probat, quia sequeretur, quod etiam propositum melioris vitæ, & voluntas non peccandi, cum

esse nequeat cum peccato actuali, nec esse posset cum peccato habituali, quod tamen asseret nemo. Plus ergo requiritur ad delendum habituale, quam ad impediendum actuale, præsertim quod istud impediri potest etiam per actum virtutis, quæ sit tantum in ordine naturali.

51. Ob. 5. alia ratione. Demus hypothesein, in qua homo peccator fieret à Deo beatus, & perduceretur ad Dei visionem, per hanc formaliter justificaretur, sicut & per dilectionem in patria, ergo etiam in via per actum dilectionis, qui ab actu dilectionis in patria specie non differt, formaliter justificatur. Præterea. Qui diligit Deum, etiam si careat amore habituali, est amicus Dei, ergo diligitur à Deo, cum amor ex natura sua reciprocos sit, neque Deus patiatur se ab aliquo diligi, quin diligentem diligit, juxta illud proverb. 8. *Ego diligentes me diligo*, sed nihil ultra requiritur ad formalem justificationem, ergo. Rursus. Homo diligens Deum nequit esse objectum odij Dei, sed amoris & benevolentiae etiam si nullus sit habitus, ergo.

52. Resp. anteced. negari à nostræ sententiæ assertoribus dicentibus, per visionem beatam hominem non iustificari formaliter, sed ideo iustificari, quia visioni & dilectioni in Patria debita est iustitia inhærens & consummata, quæ vel antecedit, vel subsequatur; & si Deus nolle istam conferre, ille homo non esset intrinsecus iustificatus. Utrum vero possit visio beata componi cum peccato habituali, non est quæstio hic dirimenda; admissio tamen illo antecedente, duplici responsione non careo; primo negando, charitatem in Patria specie non differre à charitate viæ quantum ad effectum, ut contendere videtur Scot. in 3. dis. 26. & in 4. dis. 49. qu. 5., nam licet sit eadem potentia, idem obiectum, & idem habitus, quia charitas nunquam excidit, quia tamen diversa est propinquitas, & applicatio obiecti in via & in Patria, potest in hac charitate diversa ratio



ratio specifica sustineri, sicut ignis calefacit tantum lignum à longe, & ignitum reddit lignum quod prope sit, in quo certe non solum est differentia specifica, sed etiam generica. Secundo. Etiam admittendo in hac utraque charitate specificam unitatem, una potest formaliter iustificare, alia non. Potest charitas Patris, quia est actus permanens, & actualis possessio reddens hominem omnino felicem, proinde excludens quancumque miseriam, ut est peccatum. Non potest charitas viri, quia huic hæc omnia deficiunt.

53. Ad 2. ant. est verum de amore incompleto & ex parte unius extremi, non de completo, & ex parte utriusque; Neque dici potest, & ex parte utriusque sua reciproci esse, quis enim negat, unum posse alium amare, quin tamen redametur? Quod si Deus diligit diligentes se, hoc non est ex natura amoris creaturæ ad Deum, sed ex Divina misericordia, qua per gratiam se diligentes efficit iustos, amore creaturæ se habente tanquam prævia dispositione, quam Divinus amor infallibiliter sequitur, tanquam res amoris creaturæ promissa. Ad ultimum; ant. est verum dispositivè, non formaliter; sed quia huic dispositioni promissa est gratia & benevolentia Dei, ideo nunquam est obiectum odii qui diligit Deum.

54. Ob. 6. alia ratione. Iustificatio facta per actum firmior & dignior est iustificatione facta per habitum, ergo si gratia tanquam habitus formaliter iustificat, etiam actus charitatis. Prob. ant. Si Deus iustificaret peccatorem per habitum sine aliquo peccatoris actu, & posset auferret illum habitum sine ipsius culpa, non amplius maneret iustus, quia auferretur id, à quo iustitia habetur, si vero fuisset iustificatus per actum & dilectionem, etiamsi privaretur habitu sine propria culpa, adhuc remaneret iustus, quia illa reëritudo collata per actum, non posset à Deo auferri, ergo. Præterea. Contritio & charitas est per-

fectissimus actus, quem per auxilium gratiæ possit producere creatura, ergo est actus formaliter sanctificans. Prob. conf. non minus perfectissimus actus, quam perfectissimus habitus est perfecta animæ sanctitas, ergo si gratia, quæ est perfectissimus habitus &c. etiam contritio & charitas, si est perfectissimus actus.

55. Resp. negando suppositum antecedentis, cum supponat id quod est in questione, & à nobis negatur, id est iustificationem fieri per actum, non potest igitur esse firmior & dignior, si absolute non est. Nihilo tamen minus ne. ant. ad prob. transf. ant. quo ad primam partem; Quantum ad secundam; vel homo ante illum actum erat peccator, vel non; Si primum; Si Deus non remisit peccatum, adhuc remanebit peccator, præsertim quod si Deus nolit illum acceptare, perinde se habet, ac si homo nihil fecisset. Si secundum. Si auferatur habitus, per quem prius erat iustus, amplius iustus non erit, quia esset sublata forma, per quam erat iustus. Sed peto, quare Adversari asserant, illam reëritudinem collatam per actum à Deo auferri non posse? eodem modo ego dicam, non posse auferri etiam illam reëritudinem collatam per habitum; nam si in primo casu remanet relatio ad actum præteritum, etiam in secundo casu remanet relatio ad præteritum habitum; & hac ratione dixi transf. ant. quo ad primam partem, cum dici posset, adultum iustificationem in hypothesi remanere iustum propter merita præcedentia, quæ neque fuissent mortua, neque mortificata, & ex alia parte fuissent formata per habitum præcedentem, qui propterea esset sublatus quantum ad esse physicum, non sic quantum ad esse morale, quod satis servatur per habitum, qui fuerit, licet amplius non sit sine culpa illius, à quo sublatus est.

56. Ad aliud. Negatur consequentia, & eius probatio; charitas enim est perfectissimus actus creaturæ, sed nisi correspondeat charitas Dei, ad sanctifi-



candum formaliter non sufficit; & quamvis hæc dicatur plenitudo legis, & ideo per ipsam servetur Divinæ legis conformitas, attamen satis non est ad sanctitatem supernaturalem conferendam; per quam homo particeps sit Divinæ naturæ, & habeatur semen gloriæ, ut loquuntur Sancti Patres, sed solum justitiam legalem, quæ nisi accepta sit Deo ex vi suæ promissionis, in se formaliter justificationem non habet. Neque dicatur, per actum charitatis haberi perfectiorem unionem, quam per habitum, quia illa habetur modo vitali, ista non; etenim hæc præsupponit illam, & in adultis sine illa non datur; neque mirum sit, si unio per gratiam, quæ ex parte creaturæ vitalis non est, sit perfectior unione per charitatem; quæ vitalis est, nam illa habetur à solo Deo diligente creaturam modo speciali, hæc habetur à creatura diligente Deum, at vis comparare amorem Dei erga creaturam amoris creaturæ erga Deum? Stulta prorsus comparatio.

57. Ob. ultimo. Saltem in adulto non habente nisi peccatum originale actus dilectionis sufficiens erit ad expellendum peccatum, ergo. Prob. ant. Efficacior esse debet istius conversio ad Deum, quam sit aversio à Deo, ergo. Prob. ant. istius conversio ad Deum est per propriam voluntatem, & positiva, aversio est per voluntatem alienam & negativa, sed conversio facta per propriam voluntatem & positiva efficacior est, quam aversio facta per voluntatem alienam, & negativa, ergo. Præterea. Pœnitentia est specialis virtus, qua intendimus Deo satisfacere, ergo debet habere pro objecto aliquam formam, per quam Deo satisfaciamus, sed hæc forma non est, nisi actus dilectionis, ergo. Prob. mi. hæc forma non est habitus gratiæ, quia satisfactio non est sine aliqua actione creaturæ, quam non involvit habitus gratiæ, ergo. Rursus. In statu naturæ puræ actus dilectionis Dei ut authoris naturalis fuisset sufficiens forma ab intrinseco expulsi-  
peccati contra Deum ut authorem natu-

ralem, ergo etiam in statu naturæ elevatæ actus dilectionis Dei ut authoris supernaturalis est forma sufficiens ab intrinseco expulsi-  
peccati contra Deum ut authorem supernaturalem. Ant. pat. quia ex una parte debuisset pro eo statu esse aliquod remedium pro peccato, ex alia non potuisset esse aliquod ad instar habitus, quia per talem habitum homo fuisset extractus à conditione puræ naturæ.

58. Resp. admissio, adultum esse, posse cum solo peccato originali ne. ant. ad prob. esto efficacior sit istius conversio, quam sit aversio, attamen habitualis macula peccati originalis est omnino diversa rationis, & semper ultra aversionem à peccato superest debitum Deo satisfaciendi, pro qua satisfactione insufficiens est actus creaturæ, ut dictum fuit. Ad aliud dis. mi. sed hæc forma non est nisi actus dilectionis post acceptam gratiam conc. sine gratia ne. mi. si enim sumatur actio creaturæ, quæcumque sit, nisi per gratiam reddatur digna, nunquam Deo satisfaciet, & ideo satisfactio non est sine actione creaturæ, non utcumque, sed per gratiam formata. Ad ultimum, transeat ant. quod negari posset, nam etiam pro eo statu admitti posset habitus gratiæ in solo ordine naturali, & hoc videtur juxta doctrinam S. Thomæ qu. 28. de verit. art. 2. ad 5. ubi ait; *Si à solo statu naturæ decidisset homo, nihilominus tamen ad expiationem inisset offensæ donum Divinæ gratiæ requireretur*. Ne. cons. etenim quod in linea naturali optimum est, non est hujusmodi in linea supernaturali; ratio est, quia in ordine naturali actus sunt causa habituum, proinde habitibus perfectiores, in ordine vero supernaturali actus non sunt causa habituum, sed isti à Deo infunduntur, actibus se habentibus ut dispositionibus & causis dumtaxat moralibus.

59. Hæc dicta sunt de actu contritionis, prout præsentis providentiæ postulat ordo, sed quid dicendum de possibili? Quamvis quæstiones istas instituire supervacaneum censeri possit & debeat, nihi-

nihilominus ut Thomistarum & Scotistarum principia magis innotescant, ab ipsis abstinere non possum. Quapropter.

Dicendum secundo. In alia providentia actum contritionis posse formaliter justificare. Punctum hoc pendet à duobus fundamentis, quæ in Scotistarum Schola certo tenentur. Unum est, remissionem peccati fieri posse per condonationem extrinsecam, quo dato, si potest peccatum habituale remitti sine infusione gratiæ, poterit id magis fieri medio actu contritionis & dilectionis Dei super omnia. Alterum est, gratiam justificare non ex natura propria & intrinseca, sed solum ex Divina ordinatione, poterit ergo justificare etiam actus charitatis, cum ordinatio Divina non sit potius uni alligata quam alteri, nisi quia Deus ita voluit. In hac re attendenda sunt etiam argumenta nobis opposita in præcedenti resolutione, quæ licet vim non habeant in præsentem rerum ordine, in alia tamen rerum dispositione plurimum probant; Ex his erquirendum à nobis tantum pro Thomistis & Scotistis. Primo. An gratia habitualis ex natura propria sit forma justificans. Secundo. An justificatio possit haberi per solam extrinsecam condonationem. Ideo.

## ARTICULUS V.

*Utrum gratia habitualis ex natura propria sit forma justificans.*

60. **J**ustificacionem haberi per aliquam formam intrinsecè inhærentem, jam articulo tertio hujus quæstionis à nobis demonstratum fuit; Hanc formam intrinsecè inhærentem esse gratiam habitualement & sanctificantem tanquam dogma fidei censendum est, ut habetur ex Innocent. 3. cap. *Majores* & ex Concilio Tridentin. sess. 6. cap. 4. definiente *justificationem esse translationem ab eo statu, in quo homo nascitur filius primi Adæ, in statum gratiæ & adoptionis filiorum Dei per secundum Adam Jesum Christum Sal-*

Tom. II.

*vatorem nostrum.* In quo sensu legitur in Catechis. Pii V. tract. de baptis. *Est autem gratia non solum per quam peccatorum sit remissio, sed Divina qualitas in anima inhærens, quæ animarum nostrarum maculas omnes delet.* Atque hæc doctrina tradita fuit à Scoto in 1. dist. 17. q. 1. §. *Ad solutionem.*

61. Nulla igitur inter Catholicos controversia esse potest, an gratia habitualis sit forma justificans, sed tantummodo movetur quæstio, an sit hujusmodi ex propria sui natura & physice, an vero solum moraliter & ex Divina ordinatione, ita ut si hæc excluderetur, gratia non amplius justificaret, idest non redderet amicum & filium adoptivum Dei cum jure ad æternam hæreditatem. Prima sententia, quæ est omnium Thomistarum, & ferme omnium Recentiorum, hoc ex natura propria & physice gratiæ convenire defendit. Altera vero, quæ est Scotistarum & Nominalium oppositum sustinet.

62. Ego quidem Nominalium systema prorsus præterirem, cum ad me non pertineat, sed, ne quid lateat, statim subdo. Eorum aliqui ita statuunt, ut dixerint, habendam justificationem solam gratiam inhærentem & infusam non sufficere, sed necessariam ulterius esse aliam, acceptionem seu favorem Dei extrinsecum, qui ipsius gratiæ infusionem subsequatur. Aliqui vero, etsi concesserint, gratiam ex se perfectam justitiam conferre, attamen ad delenda peccata vim non habere, nisi alia Dei extrinseca condonatio accedat, eo pacto quo licet in moneta sit metallum in se tanti valens, attamen non nisi per extrinsecam Principis impositionem valorem non habet.

63. Alius etiam modus asseri potest, quo aliqui recentiores, ut Scoticam sententiam defendant, utuntur. Talis est, ut asserant, hanc extrinsecam Dei acceptionem ipsi gratiæ debitam esse, ac connaturalem, quamvis attenta sua virtute absoluta possit à gratia sepe- rari; Hinc per gratiam expellitur pec-

D d

ca-

catur, sicut per calorem expellitur frigus, ita exigente natura caloris, potest tamen Deus utrumque simul conservare. Hoc videtur Suarez innuere hic; Cachéran. Ovied. Arriaga, Tanner. aliique asserentes gratiam & peccatum simul existere posse. His tamen pro aliis expostitis.

64. Sentendum. Etsi gratia habitualis sit forma nos justos, idest amicos & filios Dei cum jure ad hæreditatem; constituens, attamen si sumatur secundum se absque Divino decreto & ordinatione, non est hujusmodi; sive postea hoc Divinum decretum & ordinatio se habeant ad instar conditionis, sive causæ formalis, parum nostra interest. Hæc est Scoti doctrina in 1. dis. 17. quæst. 2. §. *De secundo* in 4. dis. 16. q. 2. & alibi.

Plura quidem sunt fundamenta, quibus apud Scotistas assertionem hanc probatam invenies. Ego tamen illa seligam, quæ non tot instantiis ac responsionibus viam facilem aperiunt; inde demonstraturus alia non valere.

Primum ita propono. Forma, quæ in præsentī rerum ordine reddit hominem sanctum, amicum, & filium Dei, posset, & potuisset in alio rerum ordine ita non reddere, ergo quia ex propria natura ita non reddit; Consequenter patet, quia quod rei convenit intrinsecus & ex natura propria, semper illi convenit, sicut v. g. albedini communicatæ parieti semper convenit reddere parietem album. Prob. ant. Ultima dispositio, quæ in præsentī rerum ordine reddit hominem dispositum ad recipiendam formam sanctificantem, qualis est gratia, posset, & potuisset in alio rerum ordine ipsum non reddere ita dispositum, ergo etiam forma, quæ in præsentī rerum ordine &c. Consequentia ostenditur vi paritatis, quia, sicut ad dispositionem pertinet aptare subjectum ad recipiendam formam sanctificantem, ita ad formam sanctificantem spectat sanctum constituere. Ant. autem declaratur; etenim in præsentī rerum ordine hujusmodi dispositio

est actus dilectionis & contritionis, quis autem dicit dilectionem & contritionem esse dispositionem ex natura sua, connexam cum forma sanctificante? Nisi Deus promississet dilectionem suam se diligenti, & conversionem suam ad se convertenti, profecto diligeret homo Deum, & se ad Deum converteret, quin tamen Deus hominem diligeret, atque ad hominem converteretur, aliter tanti ex suis intrinsecis valeret dilectio hominis ergo Deum, quanti dilectio Dei erga hominem, quod rationali lumini contrarium videtur.

65. Immo, ut verum fatear, si Divinam ordinationem & decretum secludamus; potius ex natura sua deberet homo fieri justus, amicus, & filius Dei per actualem dilectionem, quam per gratiam, quam nos jure merito nunc sanctificantem appellamus. Hoc ostendo. Plus virtutis habet amor actualis erga Deum, quam habeat amor solummodo habitualis, ut patet loquendo in humanis, plus enim nos diligimus eos, qui actu nos amant, quam eos, qui nos diligunt habitu, ergo potius per dilectionem actualem deberet homo ex natura sua fieri justus, amicus, & filius Dei, quam per gratiam, quam sanctificantem dicimus. Hæc enim aliud non est, nisi qualitas nobis à Deo infusa, quæ in semetipsa est quid mortuum, constituens tantum hominem in virtute non in actu Deum amantem in linea supernaturali & meritoria; Hæc igitur ideo sanctum reddit, quia Deus ita decrevit, non quia ex suis propriis tantum valeat.

66. Quidquid autem contra hoc adversarii dicunt, semper ab ipsis principium petetur, nec unquam probabitur. Quid enim dicunt? Jam illos audio; Esse qualitatem in re quidem finitam, moraliter tamen dignitatem quamdam habere infinitam, propter quam opponitur infinitæ offensæ, quæ est in peccato, & per quam nos Deo reconciliamur. Ita Aversa cum pluribus. Illos effectus sanctitatis, amicitiae, & filiationis adoptivæ correspon-

pondere entitati physice gratie, cum hæc juxta scripturas & Patres dicatur participatio Divinæ naturæ, ita ut homines dicantur in ordine Divino constituti; Quod si res ita non esset nulla posset afferri ratio, cur Deus potius hanc, quam aliam qualitatem ad hujusmodi effectus producidos determinasset, sed hæc omnia à nobis negantur, si Divinam dispositionem & voluntatem ab hac gratiæ qualitate sejungamus; Ideo enim habet hanc dignitatem, ideo participatio est Divinæ naturæ, ideo peccata remittit, ideo nos Deo reconciliat, quia Deus ita determinavit & voluit, & quod nunc gratiæ concedimus, alteri qualitati concederemus, si Deus per aliam nos Sanctos, suisque filios & amicos efficere voluisset. Si vero ego ab adversariis peterem, quare & quomodo gratia sit participatio quædam Divinæ naturæ, quo pacto hoc mihi declararent? Plura quidem respondent, & ideo plura, quia ipsimet non conveniunt, quod adversantis sententiæ infirmitatis est argumentum. An quia per gratiam habitualem habeat homo promptitudinem & inclinationem ad opera sancta & honesta? Hoc dicit Oviedus tract. 3. controvers. 1. puncto 3. An quia gratia habitualis exigit, ut ipsam habenti concedatur visio intuitiva Dei, per quam homo maxime Deo assimilatur? Hoc dicit Ariaga dis. 44. sect. 1. An quia gradus intellectualis in gratia relucens sit altioris ordinis, quam quilibet substantia intellectualis creata, atque adeo esse Divino quodam ac supernaturali modo Dei participationem? Ita dicit Suarez in hac quæstione. Sed si contra primum nos respondeamus, hanc promptitudinem & inclinationem ad opera sancta & honesta convenire gratiæ tantum ex ordinatione Divina; Contra secundum; gratiam habitualem exigere visionem Dei intuitivam tantum ex Divino decreto; Nec Oviedus, nec Ariaga, nec alius quispiam probabit oppositum; & ideo semper erimus in quæstionis initio; & potius actuali operi sancto

& honesto, quam promptitudini & inclinationi ad tale opus connaturalia hæcerunt, ut dictum fuit num. 65. Quod vero Suarez ait, non probat, & idem dici posset de quolibet, alio dono supernaturali. Ut vero rationem aliquam afferant Doctores sententiæ nostræ, cur potius Deus hanc, quam aliam qualitatem ad hujusmodi effectus producidos determinaverit, plura dicunt; paucis ego me expediam reddendo pro ratione ipsam Divinam voluntatem, quæ per aliam qualitatem idem præstare potuisset.

67. Quam in re adnotandum est; gratiam considerari posse vel ut qualitas est, vel ut gratiæ denominationem sortitur. Conclusio nostra procedit tantum in primo sensu, ita ut qualitas hæc, quæ gratia denominatur, ab intrinseco & ex natura gratia non sit, sed solum prout involvit Divinam ordinationem, quæ voluit, subiectum hujusmodi qualitate affectum esse justum, sui amicum & filium; Quare si dicatur, gratia habitualis intrinsece & ex se est forma justificans, propositio est vera ut gratia est, non tamen ut natura & qualitas est; ut autem gratia est, jam explicat Divinam ordinationem & voluntatem, quæ ita disposuit; potuisset tamen, & adhuc posset aliam qualitatem stabilire, per quam homo formaliter justus fieret Deoque gratus, & tunc hæc ipsa alia qualitas gratia denominaretur.

68. Cum vero adversantes Doctores adeo initantur Scripturis, Patribus, & Conciliis, præsertim Tridentino, placeat nunc etiam ostendere, sententiam nostram magis adhærere Scripturis, Patribus, & Conciliis, præsertim Tridentino. In omnibus Scripturis, Patribus, & Conciliis habemus peccatorum remissionem gratis nobis à Deo fieri, nostramque justificationem esse opus à Deo gratuito descendens, hoc autem, quamvis etiam in opposita opinione satis fervetur, cum gratia sanctificans gratis à Deo concedatur, magis tamen proprie strictèque servatur, si dicamus, Deum ho-



minem iustum reddere, non quia id ex natura sua postulet gratia, sed quia Deus ex suo beneplacito valorem istum gratiæ contulerit, atque ita iustificatio statuitur magis independens à qualibet re creata, quæ natura sua sit illius exigitiva, & magis dependens à voluntate Divina, proinde magis gratuita. Si vero Concilium Tridentinum perpendamus, plura ad rem nostram ab ipso suppeditantur. Sed illud præcipuum est, quod ses. 7. can. 11. dicit: *Gratiam, qua iustificamur, non esse tantum favorem Dei extrinsecum*, quo loquendi modo, esse etiam favorem Dei extrinsecum satis manifestè significat, sicut si diceremus, hominem non esse tantum animal, etiam animal esse indicaremus.

69. Placet nunc plurium Scotistarum fundamenta proponere, quibus parum aptè Scoticam sententiam propugnant. Primum est illud quo innituntur Vulpes & Coninch. quia, si gratia habitualis ab intrinseco & ex natura sua hominem redderet Sanctum, amicum, & filium Dei adoptivum, Deus necessario amaret hominem huiusmodi gratia præditum & exornatum, sed hoc dici non potest, cum ad extra nihil Deus necessario agat, ergo. Rursus. Si gratia habitualis ab intrinseco &c. Deus necessario conservaret hominem habentem gratiam, quia necessario Deus veller, huiusmodi hominem bene esse, sed hoc non, ergo. Præterea; Nequit esse aliqua creatura cui Deus necessario concedat visionem beatam & fruitionem, ergo nulla, quam Deus necessario amet.

70. Sed hæc omnia valde infirma esse quisque perspiciet; etenim Deum amare hominem habentem gratiam habituale necessario, est necessitas tantum ex suppositione, quæ Deo nequaquam repugnat, ut pluribus potest exemplis ostendi; Sic producto homine necessario debet illi conferre aliquam durationem & ubicationem. Ad secundum negatur maior quia simpliciter & absolute potest destruere etiam

beatum existentem in patria. Ad tertium nullus ex adversariis asserit habenti gratiam negari non posse visionem, sed inquirunt, ipsi declarationem connaturaliter esse debitam, quamvis possit Deo absolute volente impediri, ut patet exemplis.

71. Aliud fundamentum est, quia nulla qualitas accidentalis habere potest naturalem connexionem cum Deo & physicam commensurationem, sed gratia habitualis est qualitas accidentalis, ergo. Maj. declaratur, quia quacumque qualitas accidentalis physice loquendo deterior est quacumque creata substantia, sed nulla creata substantia habere potest physicam connexionem & naturalem commensurationem cum Deo, ergo.

72. Argumentum hoc sibi proponit Ariaga, & æquè facile ac bene solvit; nec enim necesse est, qualitatem aliquam, per quam subjectum redditur amore dignum, esse in quacumque linea digniorem subjecto; ita se habent etiam omnes qualitates naturales propter quas aliquem hominem diligimus, quæ certè ipso homine sunt inferiores; ratio autem est, quia adveniente hac qualitate non destruitur, sed perficitur subjectum, unde ex complexo subjecti, & advenientis perfectionis habetur aliquid perfectius, quam prius esset.

Quamquam quid in hisce afferendis, & rejiciendis immoror? nobis satis est nostra tueri. Quod ut amplius fiat.

## ARTICULUS VI.

### *Refelluntur Argumenta in oppositum.*

73. **S**I attentè perpendantur illa, quæ in præcedente exposuimus, omnia adversariorum argumenta corrui, affirmare non erubescio; attamen, ut clarius omnia ad examen revocentur & rejiciantur, illa afferre operæ pretium sum arbitratus.

Primo itaque sic argumentantur. Si potest dari forma, cui connaturale sit red-



reddere hominem justum, amicum, & filium Dei. adoptivum, hæc esse debet gratia habitualis, atqui dari potest forma, cui sit connaturale reddere hominem justum &c. ergo. Prob. mi. dari potest forma, cui sit connaturale reddere hominem beatum, & clare intuitive Deum videntem, sicut de facto est lumen gloriæ, ergo etiam dari potest forma, cui sit connaturale &c.

Resp. conc. maj. ne. mi. ad prob. plerique negant ant. Deus enim intellectui lumine gloriæ perfuso liberè se communicat, cum nulli creaturæ aliquid debeat; admissio tamen antec. negatur consequentia, etenim lumen gloriæ respectu Dei in visione beatifica. representati est sicut lux respectu objecti visi, nec aliquis alius effectus ipsi assignari potest; at gratia nihil aliud convenit, nisi esse qualitatem, ex se mortuam, per quam homo fit aptus ad cognoscendum & diligendum Deum supernaturaliter, quæ cognitio & dilectio Dei supernaturalis non sibi vindicat ex natura sua constituere hominem justum, amicum, & filium Dei, nisi quia in ipsa includitur Dei dispositio & ordinatio; quod quidem videmus etiam in aliis qualitatibus, quamvis sint permanentes; Sic character in baptismo reddit hominem formaliter Christianum, nec tamen reddit nisi ex institutione Christi, & Divina ordinatione. Quod si argumentum præpositum intimius consideremus, nihil concludetur, nisi, quod sicut lumen gloriæ reddit hominem Deum clarè videntem, ita gratia reddat hominem Deum amantem, quod jam est falsum; & quamvis esset verum, quod de dilectione actuali magis dicendum esset, non ex hoc sequeretur, hominem ex natura gratiæ amari à Deo, sed ex sui voluntate hujusmodi qualitati affixa. Tandem. Argumentum non valet ab habitibus in patria ad habitus in via.

74. Ob. secundo. Gratia secundum naturam suam est peculiaris Divinæ na-

turæ participatio, sed quod est ex natura sua participatio Divinæ naturæ reddit ex natura sua hominem justum, amicum, & filium Dei, ergo. Prob. mi. Quod ex natura sua est participatio Divinæ naturæ est etiam participatio ejusdem naturæ proprietatum, sed esse justum, amicum, & filium Dei sunt proprietates Divinæ naturæ, ergo. Præterea. Peccatum suapte natura reddit hominem injustum, & inimicum Deo, ergo gratia suapte natura reddit hominem justum, & Dei amicum.

75. Resp. male ab adversariis probari minorem, cum debuisset probari major, hoc enim est in questione, & à nobis negatur, est enim gratia participatio Divinæ naturæ, quia hanc qualitatem hujusmodi esse à Divina voluntate. & institutione descendit, & æquali modo potuisset esse quæcumque alia qualitas; Ad Confirm. nullo pacto approbanda est responsio Mastrii dicentis, quod si nulla lex fuisset à Deo præscripta, nullum fuisset peccatum mortale, quia ideo dicitur peccatum, quia est prohibitum, & seclusa Divina lege, & transgressionem nullus diceretur indignus amicitia Dei, & injustus; ex quo laudatus Doctor adversariorum argumentum retorquet, nimirum, quod sicut peccatum solum ex Divinæ legis transgressionem reddit injustum, sic gratia solum ex Divina dispositione reddit justum; nullo pacto inquam approbanda est, quia ex terminis solum admittit malum ab extrinseco, id est, quia prohibitum, non vero prohibitum quia malum, scilicet tale ab intrinseco, quod falsum omnino est. Mihi igitur magis placet illud antecedens concedere, & negare consequentiam, primo quia ex eo sequeretur, quod sicut peccatum actuale reddit formaliter hominem injustum, & inimicum Deo, ita etiam gratia actualis, & actualis dilectio reddet hominem formaliter justum, & Dei amicum, quod tamen omnes Thomistæ negant, & alii præter Vasquez, contra quem jam actum est art. anteced-

dente. Secundo quia, ut ibi dictum fuit, homo habet ex propriis, per quod sit injustus & inimicus, non habet autem ex aliqua creata qualitate, per quam fiat justus & amicus, & ideo requiritur institutio & voluntas Divina, per quam huiusmodi fiat.

Ob. tertio. Si gratia secundum se solam non est forma justificans, vel erit solus favor Dei extrinsecus causa formalis justificationis nostræ, vel gratia ipsa una simul cum Divina condonatione, quæ se habeat extrinsecè tamquam conditio, vel utraque simul tamquam duo principia constituenta unum perfectum principium per quod justificemur, sed neutrum dici potest, ergo. Non equidem primum, cum manifestis verbis à Concil. Trident. damnatum sit; non secundum; quia si non desunt formæ naturales expellentes formam sibi contrariam sine aliqua extrinseca Dei dispositione, quare id negabitur gratiæ, quæ omnium formarum etiam supernaturalium præstantissima dicitur? non tertium; alioquin non unica tantum esset causa nostræ justificationis, ut statuit Concilium, sed duæ, gratia scilicet ac Divina ordinatio seu Divinus favor extrinsecus.

76. Resp. hoc ultimum esse asserendum; nec aliquid non dicendum sequitur, si ex duabus causis partialibus unicam causam perfectam & integram fieri affirmemus, quod pluribus posset exemplis ostendi; si vero quæras, quo pacto se habeat Divina ordinatio & favor extrinsecus, respondeo, se habere ad instar principii elevantis illam qualitatem, ut gratia sit, quæ cum ex se esset dumtaxat principium remotum justificationis, per ipsam sit proximum; non quidem tali pacto, ut intrinsecus in esse physico immutetur, sed solum in esse morali; atque hoc novum non est etiam naturalia perpendendo, nam extrinseca v. g. populi electio alicujus in Principem, hunc physicè non immutat, immutat tamen moraliter; quamquam nec opus est

hoc dicamus, quo pacto enim per auxilium Dei extrinsecum elevari possit facultas ad nobiliores effectus præstandos, in Scotica sententia notum est.

77. Ob. quarto. Si gratia ex natura sua non redderet hominem justum, non esset causa formalis nostræ justificationis, sed solummodo signum, sed hoc est contra Patres & Concilia, præsertim Tridentinum, ergo. Præterea. Si esset purum signum, justificatio nostra esset per solam extrinsecam justitiæ Christi imputationem, nec justus esset revera, & intrinsecè justus, sicut habens signum nobilitatis, quia Rex ita voluit, non est revera nobilis, sed solum extrinsecè & per nobilitatem ipsi à Rege imputatam, atqui hoc est prorsus Hæreticum, ergo.

78. Resp. gratiam revera esse causam formalem justificationis non purum signum, hoc tamen ipsi non convenire nisi ex antecedenti Divina ordinatione, qua voluit, habentem eam qualitatem, esse Deo gratum tanquam ipsius filium & amicum, ideo non est purum signum sanctitatis, sed est ipsa sanctitas non quidem in esse physico sed morali, & prout includit Divinam ordinationem, quare non se habet v. g. sicut insula Pontificis, quæ est purum signum Pontificatus, sed sicut Pontificalis dignitas, propter quam tanquam causam formalem ut Pontifex existimatur & colitur.

## ARTICULUS VII.

*Utrum in eodem subjecto componi possint gratia & peccatum.*

79. **E**X propositæ difficultatis resolutione magis manifestum fiet, quod in antecedente declaratum fuit, si enim gratiam cum peccato componi posset demonstrabimus, gratiam ex propria natura non justificare quisque percipiet; quamvis non defuerint aliqui Doctores, ut Suarez, Cacheran. Ovied. Ariaga, qui gratiæ physicam vim justificandi concesserint, & tamen cum peccato esse posse

posse affirmaverint; Non est autem quæstio juxta præsentem providentiam, in qua certe nemo gratia præditus est & peccato fœdatus, sed juxta extraordinariam & absolutam Dei voluntatem. Negant Thomistæ omnes quos sequuntur plures Neoterici, Vasquez, Amicus, Esparza, Madernus, Averfa &c. Affirmant vero omnes Scotistæ cum Scoto in 1. dis. 17. & in 2. dis. 28. & 35. qu. 1. & in 4. dis. 16. qu. 1. S. Bonavent. Gabr. Ocham. & prælaudari Recentiores.

80. Sicut vero plures extra Doctores subtilissimi Scholam sententiam hanc, ut fuit dictum propugnant, ita non unum est momentum, quo ejusdem veritatem demonstrare contendunt. Ineluctabile certe juxta principia propria est illud Scoticum, quod superius statutum est, gratiam nimirum solummodo ex Divina institutione hominem reddere justum, amicum & filium Dei, auferatur igitur hujusmodi institutio; sicut auferri posse nullus inficiabitur, jam nulla relinquitur ratio, qua dicamus, gratiam cum peccato componi non posse. Sed hic est etiam advertendum, quod supra monuimus, gratiam hic non sumi sub duplicatione gratiæ, sic enim considerata jam explicat Divinam institutionem & voluntatem, qua Deus voluit, hominem habentem hujusmodi qualitatem, esse sibi gratum, proinde non esse peccatorem, sed sumi sub notione qualitatis propriæ & inspectæ in sui natura, seu, ut loquitur Mastrius, inspectæ materialiter, non formaliter.

81. Neque dici potest, hoc pacto loquentes omnem difficultatem effugere, nec quæstionem instituere, prout institui debet, nam ut locum habeat difficultas, inquirendum est de gratia ut gratia est; Immo enim dicam ego, si gratia ita sumeretur nulla controversia moveri posset, propter rationem superius expositam, alioquin sequeretur, idem subjectum esse Dei amicum & inimicum, dignum æternæ gloria, & poenæ æternæ reum, mundum & immu-

dum, quod tamen ab omnibus negatur, præter Pontium paucosque alios, potius rem subtiliter quam veraciter investigantes.

82. Utcumque tamen res se habeat, & etiam admisso, doctrinam hanc esse prætermittendam, alia momenta subjiciam, quibus idem assertum amplius declaratur, & ostendatur. Atque, ut rem strictius persolvam, argumento negativo procedo, quod, ubi sermo est de iis, quæ per virtutem Divinam fieri possunt, efficacissimum est, ut enim sapissime Thomistæ inquirunt, quidquid contradictione non impeditur, id potestate Dei fieri posse concedendum est. Si quid obstat, dicamus peccatum esse posse cum gratia, esse debet aliqua ex illis oppositionibus, quæ à Summulistis dicuntur contraria, contradictoria, relativa & privativa, sed nulla ex istis, ergo. Si de contraria sermo sit, constat Deum conservare posse in eodem subiecto duas formas, quæ hoc pacto opponantur, sicut sunt frigus & calor; & ratio vera est, quia licet calor ex natura sua, sibi vindicat frigus expellere, & è contrario, attamen hujusmodi expulsio pertinet dumtaxat ad effectum, qui dicitur secundarius, quem præpotenti Divina, virtute impediri posse nullus ibit inficias, si quod Philosophia tradit, & ex historiis colligitur non pernegetur; Si vero de contradictoria; hæc inter gratiam & peccatum non reperitur, vel enim esset secundum se, vel propter effectus suos; non secundum se, cum, vera contradictio versetur tantum inter esse & non esse, quod de gratia & peccato dici non potest, cum de peccato nihil esse affirmari non possit, est enim dictum, factum, vel concupitum contra legem, æternam Dei, & ad summum est nihil in esse morali consideratum, non in esse physico, vel ut alii inquirunt in esse formali non materiali; non vero propter effectus suos, quod in argumentorum solutione declarabitur. De relativa oppositione non est, cur aliquem sermonem

nem instituamus; certum namque est, neque gratiam ad peccatum, neque hoc ad illam referri; Quod vero de privativa dici posset, satis constat ex dictis de contradictoria.

83. Totum hoc clarius demonstratur ea afferendo, quæ in oppositum Thomistæ eorumque sectatores producunt. Primo itaque sic argumentantur. Ea, quæ præstant effectus contradictorios, simul esse non possunt, sed gratia & peccatum præstant effectus contradictorios, ergo. Prob. mi. Esse justum & injustum, amicum Dei & inimicum, jus habere, ad æternam hereditatem cum debito subeundi poenam æternam, & tandem esse conversum ad Deum & à Deo aversum, sunt effectus contradictorii, sed primum præstat gratia, secundum præstat peccatum, ergo.

84. Hoc primum argumentum, quod tamen inter præcipua recensendum est, facillime corrui, si attendamus plura, quæ juxta sustinentes assertionem nostram stabiliuntur. Quid enim si dicamus, hæc omnia præstari à gratia, ut substat Divinæ dispositioni, non vero ex natura ipsius intrinseca? Quid si dicamus, omnes istos effectus esse gratiæ secundarios, qui per Divinam virtutem, impediri possunt, ut pluribus aliis constet exemplis? Quid si dicamus, idem subjectum omnes hujusmodi denominationes recipere posse? Quid si dicamus hominem in hac hypothese non esse appellandum justum & injustum, amicum Dei & inimicum &c. & tamen hæc omnia dicere non prohibemur. Prima duo dici posse constat ex traditis. Tertium vero defendunt plurimi, & quidem magnæ notæ Doctores. Defendit Suarez lib. 7. de sanctific. hominis cap. 20. n. 21. inquires, denominationes illas non esse contradictorias, sed solum contrarias & ex diversis rationibus & fundamentis, quod quidem declarat hoc exemplo. Anima rationalis in propria natura considerata naturali digna est beatitudine, si tamen peccat, eadem beatitudine se

reddit indignam, erit igitur digna & indigna, cum peccatum non destruat naturalem animæ conditionem; Qua de re infert eximius Doctor, cum hic sermo sit in materia morali, nequaquam hoc dicemus, quia malum desumitur ex quocumque defectu, & ideo, si habeatur id, per quod subjectum dicatur dignum, si tamen habeat aliud, per quod dicatur indignum, absolute indignum existimabitur; & ita declaratur quod quarto loco proponebatur, attamen sistendo in tertia responsione paritas à Suarez adducta probat, idem esse posse justum & injustum, amicum Dei & inimicum, cum hæc omnia secundum diversos actus & respectus affirmantur; & revera si Ovied. hic punct. 3. non negat, posse in eodem subjecto componi assensum & dissensum, amorem & odium respectu ejusdem objecti, cur negabitur, posse etiam componi gratiam & peccatum, idest conversionem ad Deum & aversionem à Deo, præsertim quia essent pro diverso tempore, ita ut una præsupponeret aliam, nec quidpiam requireretur, nisi unam non expelli per aliam? Vera tamen & germana responsio illa, est, quam primo loco attulimus, quæque à Scoti principiis & doctrina desumitur.

85. Ob. 2. Si per infusionem gratiæ non expelleretur peccatum, hoc solummodo per miraculum una simul cum gratia conservaretur, sed hoc non est dicendum, ergo. Prob. mi. Si peccatum per miraculum conservaretur, Deus esset causa ejusdem conservativa, sicut quia per miraculum calor non expellitur à frigore, Deus est causa conservativa caloris, atqui Deus nequit esse causa conservativa peccati, sicut nequit esse productiva, ergo. Præterea; In Scripturis Sanctis gratia comparatur luci, peccatum tenebris, *eratis*, enim Paulus ait ad Ephes. 5. *aliquando tenebræ, nunc autem lux in Domino*. Atqui necessario tenebræ expelluntur per lucem, ergo & peccatum per gratiam. Rursus. Gratia ex Concilio Tridentino dicitur perfecta



## ARTICULUS VIII.

*An sine gratia infusione remitti possit peccatum.*

fecta sanctitas ac animæ iustitia, sed non esset huiusmodi, si esset cum peccato, ergo. Neque etiam servari posset, quod ait Christus 1. Joan. 3. *Omnis, qui in eo manet, non peccat, & omnis qui natus est ex Deo peccatum non facit, quia semen ipsius in eo manet* quibus verbis gratiam, per quam quis manet in Deo, nequaquam cum peccato esse posse declaratur.

86. Resp. posse ac debere juxta principia Scotica negari majorem, quæ tunc tantummodo esset vera, quando expulsio peccati concederetur gratiæ ex propria ipsius natura, sicut convenit frigori calorem ab eodem propellere, subjecto; attamen negatur minor; ad prob. ne. maj. conservaretur enim peccatum à Deo solum permissive; quod non repugnat, & à creatura proprie, quia ab ipsa peccatum non retractaretur, ad quam non retractationem certum est, Deum nullum positivum influxum adhibere; Contrarium contingit, dum de frigore & calore sermonem habemus, nam sicut utrumque Deus positivè producit, ita utrumque positivè conservat. Ad secundum. Illa comparatio tantum metaphorica est, & ad majorem explicationem instituta, certum namque est, peccatum non consistere in sola privatione, & ad summum est privatio reititudinis debita, non vero gratiæ; Quod etsi transmitteretur, hoc esset de facto juxta præsentem Dei providentiam, non sic de possibili & in alio rerum ordine, in quo Deus aliter statueret. Idem dicimus ad tertium, nisi dicamus, quod quemadmodum frigus remanet perfectè frigus, quamvis ab eodem subjecto non expellatur calor, ita gratia est perfectæ sanctitas, quamvis ab eadem anima non expellatur peccatum. Juxta superius dicta explicandum Scripturæ testimonium. Hæc omnia sive in hoc sive in antecedente dicta magis confirmabuntur, si difficultatem sequentem resolvemus.

87. **I**N hac tam celebri apud veteres Theologos pluresque etiam recentiores difficultate tres sententiæ recenseri possunt. Una docet, nullo pacto remitti posse peccatum sine infusione gratiæ, aut saltem sine aliqua physica, qualitate intrinsecus recepta atque inharrente; Hæc est omnium Thomistarum, Cajetani hic qu. 113. art. 2. Richar. in 4. dif. 17. art. 4. qu. 2. ad 1. Gonet. disput. 1. de justific. art. 4. §. 2. quibus adherent Valentia disp. 8. qu. 5. punct. 5. Vasquez disp. 206. cap. 2. Amic. disp. 33. ser. 1. Madern. qu. 7. art. 3. Hanc vero fuisse mentem S. Th. ex iis colligunt, quæ habet S. Doct. hic qu. 113. art. 2. ubi dicit. *Idea non posset intelligi remissio culpæ si non adesset infusio gratiæ.* Et ex qu. 28. de veritate art. 2. ubi ait. *Ad sanandam prædictam aversionem requiritur gratia & charitatis infusio, sicut ad sanationem cecitatis requiritur restitutio potentiæ visivæ.* Secunda sententiæ defendit, fieri posse remissionem peccati absque infusione gratiæ, & qualibet alia physica qualitate inharrente, vel hominem ita reddendo qualis esset in statu puræ naturæ, vel etiam alio modo justificando per solam Dei voluntatem atque extrinsecam condonationem; dixi, aliquo modo justificando quia etsi absque gratiæ vel alterius qualitatis infusione non evaderet gratus & amicus Dei, sicut evadit per gratiam, attamen evaderet non inimicus idest negativè amicus, nec esset objectum odii, quamvis specialiter non esset acceptus, quod aliis terminis explicari potest dicendo, haberi sine gratiæ infusione justificationem negativam, non positivam. Hoc tradunt omnes Scotistæ cum Subtilissimo in primum dif. 17. qu. 2. §. de secundo articulo; in 2. dif. 20. qu. 1. & ubique, cum S. Bonavent. in 4. dif. 17. cum Alenf. dif. 17. n. 4.



art. 6. quos sequuntur omnes Nominalesque Recent. Suarez lib. 7. de sanctific. hominis cap. 22. Arriaga disp. 46. sect. 3. Ovied. Cacharan. Aversa, Lezana. Tertia tandem distinguit hominem in statu naturæ puræ, & in statu naturæ elevatæ; Si in primo consideretur, asserit remitti posse peccatum absque gratiæ infusione; Si in secundo, negat. Ita præsertim Bellarminus, Martínez, Zumel.

88. Dicendum cum secunda sententia: Ad quam probandam plura momenta producantur à Suarez, Cacharano, Arriaga, aliisque quæ tamen omnia decerpta sunt à Scoto. Primum, quod habetur in 4. disp. 1. qu. 6. ita proponitur. Quidquid in peccato reperitur, auferri potest per solam Dei voluntatem, sine aliqua physica peccatoris mutatione, & absque infusione alicujus qualitatis, ergo. Prob. ant. In peccato tria reperiuntur, idest, injuria seu offensæ Deo facta, inimicitia ipsius Dei, & aversio ab ipso Deo, sed hæc omnia auferri possunt per solam Dei voluntatem sine aliqua physica &c. ergo. Prob. mi. & primo auferri posse injuriam seu offensam Deo factam, si quod in humanis contingit consideremus, quis non intelligit? An non apud nos per puram extrinsecam condonationem remittitur quæcumque fuerit injuria illata? Hoc idem probat, auferri posse inimicitiam, satis enim percipitur inimicitia ablata, si qui injuriam recepit cedat juri suo, neque postulet vulcisci; Quod vero spectat ad aversionem à Deo bifariam ostendo; Primo sic. Potest à Deo auferri hujusmodi aversio per condonationem positam ad exigentiam gratiæ, ergo etiam potest per condonationem positam ex solo sui beneplacito absque exigentia gratiæ, aut alterius qualitatis inhærentis. Prob. conf. Quidquid Deus facit juxta alterius exigentiam potest etiam facere nullo exigente, sicut Princeps, qui si det veniam alicui propter alterius preces, dare etiam potest nulla posita aliena de-

precatione, ergo. Secundo. Hujusmodi aversio aufertur de facto per gratiam, ergo etiam potest auferri per actum Divinæ dilectionis & condonationis, consequentia ostenditur, quia quæcumque gratiæ perfectio continetur in actu Divinæ dilectionis, tanquam effectus in causa eminenti & perfectiori.

89. Hæc omnia magis probant si loquamur de debito subeundi indignationem Divinam, in quo præcipue consistit esse physicum peccati, hoc enim remitti posse per solam extrinsecam Dei condonationem, non video cur negatur, si inspiciamus, ad extinguendam aliquam passivam obligationem satis esse, voluntatem extrinsecam obligatorii absque aliqua physica mutatione personæ cui obligatio inest; Sic voluntas extrinseca Legislatoris sufficit ad auferendam in subditis obligationem passivam faciendi id quod lege præcipitur, voluntas extrinseca promissarii ad auferendam in promissore obligationem passivam adimplendi quod promissum est, & ideo etiam Deus, cui per votum sit promissio, relaxare potest obligationem voti absque physica voventis mutatione.

90. Dices, paritatem desumptam à creatura ad Deum non tenere, etenim dum sermo est de creatura relaxante alteri debitum contingit mutatio in ipsa, quod cum dici nequeat de Deo, mutatio debet contingere in ipso peccatore cui remittitur peccatum, & ideo nunquam remitti potest nisi per aliquod intrinsecè receptum per quod mutetur. Rursus. Voluntas creata condonando injuriam remittit quidem debitum satisfaciendi pro culpa, non tamen remittit culpam, è contra Deus remittendo poenam etiam culpam remittit, quod sine peccatoris mutatione intelligi nequaquam potest. Tandem non valet id quod dicebatur de aliis poenis & de voti obligatione, siquidem obligatio poenæ & voti dependet à Deo in esse & conservari, at non ita loquendum de macula peccati,

ti; quæ nec in esse nec in conservari dependet à Deo.

91. Sed contra. Ad primum; Respondet Cacheranus in huiusmodi relaxationibus contingere quidem aliquam mutationem; non tamen in creatura cui fiat relaxatio, sed in alia distincta re creata; Si autem ab ipso quaras, quantum erit hæc alia res distincta, illam indeterminatè assignat, cum in aliis rerum providentia liberum sit Deo decernere, hæc vel illam mutationem physicam, propter quam sequeretur moralis mutatio peccatoris in non peccatorem, vel determinando aliquod opus ab alia persona præstitum nomine peccatoris etiam incipio ipso peccatore, vel novam aliquam qualitatem Angelò tutelari imprimendo, vel aliquod ens physicum destruendo, cuius destructioni peccati condonationem conjungeret. Quidquid tamen sit de hac doctrina per quam æque servatur moralis mutationem sine physica esse non posse, aliam asserre non prohibemur, quin nec in peccatore nec in Deo, nec in aliquo alio mutatio contingat; Quis enim aliquid à Deo fieri posse absque ulla intrinseca mutatione Duce vel Imperatorem ibit inficias? Cur igitur non poterit etiam à Deo fieri non inimicus Dei, in quo potissimum consistit peccati remissio & negativa iustificatio, & quemadmodum intelligi potest ille novus actus volitionis sine mutatione nec in Deo nec in homine, ita poterit intelligi hæc nova volitio in re nostra. Hoc autem optimè explicatur à Scoto in 4. dis. 16. quaest. 2. Ubi enim fiat transitus de contradictorio in contradictorium absque mutatione vel in Deo vel in objecto, sufficiens est sola temporis variatio, ita ut Deus volens pro hoc instanti peccatum remittere & non in præcedentibus, habuerit ab æterno actum quo voluerit pro illo remittere non pro istis; non igitur pro hoc instanti incipit Deus velle carentiam peccati, quam prius non vellet cum ab æterno illam pro hoc instanti voluerit non pro.

Tom. II.

aliis; Ad secundum negatur antecedens disparitatis, statim enim hac remittitur obligatio satisfaciendi pro culpa, etiam ipsa culpa remissa intelligitur, aliter post remissionem poenæ adhuc in remittente esset jus ad infligendam poenam, quod est falsum. Quid est enim in re nostra peccatum habituale nisi actus peccaminosus præteritus moraliter perseverans in obligatione satisfaciendi, seu in debito poenam subeundi; hoc igitur ablato aufertur & illa moralis perseverantia, igitur aufertur & culpa. Ad tertium nihil refert, maculam peccati à Deo neque fieri neque conservari, etenim negari non potest ab ipso permitti, poterit ergo illam destruere, illam non amplius permittendo.

92. Prob. ulterius assertum sic. Potest auferri gratia sine peccato, ergo etiam peccatum sine gratia. Prob. ant. Potest Deus alicui per infusionem gratiæ peccatum remittere, & postea sine illius culpa infusam gratiam auferre sed in hac hypothesi potest auferri gratia sine, ergo. Prima autem consequentia tenet, nam sicut per adversarios non potest peccatum propter oppositionem privativam auferri nisi per formam oppositam, ita forma non poterit auferri nisi per privationem oppositam, ergo si hoc non obstante auferri potest gratia sine peccato, poterit etiam sine gratia auferri peccatum, sicut si lux potest auferri sine tenebris, possent etiam tenebrae auferri sine luce.

93. Dices. Hominem in hac hypothesi nec esse justum nec peccatorem, non justum, quia sine gratia; non peccatorem, quia sine peccato, erit igitur in statu naturæ puræ. Sed contra. Hoc etiam dumtaxat admissio adhuc corrueret Thomistarum sententia; Sed revera adhuc dicimus non futurum hominem in statu naturæ puræ; Prob. quia remanente illo statu peccatum non posset remitti per gratiæ infusionem, econtra posset in nostro casu. Secundo, quia in eo statu fieret remissio peccati sine gratia

in infusione etiam loquendo de via ordinaria, in re autem nostra fieret tantummodo per extraordinariam Dei virtutem; proinde &c.

94. Hucusque dicta valere saltem de pura peccati remissione seu de justificatione negativa placet asserere, ita ut per solam extrinsecam condonationem auferatur quidquid culpæ & offensæ est in peccato, nec amplius remaneat homo objectum Divini odii, quamvis dignus non fiat, ut speciali dilectione eum Deus prosequatur, & hoc aperte colligitur ex Scot. in 4. dis. 1. qu. 6. immo ex Concilio Tridentino, quod sess. 6. cap. 7. distinguit remissionem peccatorum ab animæ splendore & pulchritudine, cujus testimonium & definitionem nos attulimus ubi de gratia habituali tamquam physica qualitate animæ nostræ inhærente pertractavimus. Dixi *saltem* nam etiam dici posset, per solam extrinsecam condonationem, & actum dilectionis Dei extrinsecum posset homo fieri amicus & filius Dei adoptivus, sicut inter homines extrinsecus adoptantis actus filium efficit adoptivum. Rationes in oppositum non adduco, cum vel probent tantum de facto non de possibili, aut juxta principia Scotica & alia dicta in antecedentibus resolvantur.

## ARTICULUS IX.

*An homo possit perfecte justificari, seu possit infundi gratia sine aliquo actu peccatoris.*

95. **H**IC non loquimur de infusione gratiæ ut conjungendæ cum peccato, quod divinitus fieri posse supra stabilivimus, certum enim est in hoc sensu nullum actum peccatoris, per quem peccatum retractetur, requiri; Rursus de justificatione parvulorum, nulla potest esse controversia, cum in istis nullum actum præcedere, jam suo loco fuerit declaratum; Queritur igitur de peccatore adulto, & quidem in alia

providentia, nam loquendo in præsentium ordine peccatorum retractationem necessariam esse alibi ostendimus & probavimus. In hoc puncto aliquem actum necessarium esse ex parte peccatoris defendunt plures ex Thomistis signanter Corrad. & Sot. quibus totis viribus adherent Morand. Becan. Amic. Oppositum vero docent Alens. Bonavent. & Scot. in 4. dis. 14. qu. 1. §. ex his, quos sequuntur omnes pœne recentiores Suarez, Lugus, Valquez, Cacheran. Coninch. &c.

96. Horum sententiam amplectimur, & sic probamus, omisissis illis, quæ ex antecedentibus proponi possunt; Nullus actus creaturæ connexus est essentialiter cum gratiæ infusione, ergo sine aliquo actu peccatoris potest infundi gratia. Prob. ant. nullus actus, qui possit excogitari in creatura, est per se forma expulsi peccati, sed dumtaxat se habet vel ad instar dispositionis materialis, idest ex parte subjecti, vel satisfactionis ex parte hominis, vel conditionis juxta Divinam legem prærequisita, ergo. Primam partem antecedentis quis refutabitur, nisi dicat, hominem se ipsum posse justificare, & in semetipso gratiam habitualemente producere, quod quàm falsum sit, jam demonstratum est, ubi de præcipua causâ gratiæ habitualis; Si vero se habet ad instar dispositionis, quis neget, Deum producere posse formam in subjecto absque ulla prævia dispositione? Si ad instar satisfactionis, hanc Deus potest relaxare, sicut dictum fuit de voto, si ad instar conditionis, hæc fuit ex Divino beneplacito præscripta, proinde Dei voluntate potest auferri. Quod si totum hoc contingit in infusione gratiæ, quæ fit in parvulis, quare Deo ita disponente fieri non posset in adultis?

97. Dices. Peccatum personale contractum esse per propriam voluntatem, ideo etiam propria debet voluntate retractari, quandiu enim manet irremissibile, remittetur nunquam, quandiu autem remanet voluntarium, irremissibile

bile censendum est. Sed contra; hujusmodi evasio multifariam rejicitur. Primo. Peccatum remissibile esse à sola Dei voluntate dependet, non vero ab hominis retractatione, constat hoc, quia, etiamsi peccator suum præteritum actum malum retractet, adhuc tamen veniam non consequitur, ut patet in actu attritionis extra Sacramentum, & si per actum contritionis justus evadit, hoc non est ex ejusdem actus merito & natura, sed solum ex Divina promissione & liberalitate; Secundo. Peccatum habituale dici voluntarium non in alio sensu concedi potest nisi in actu præterito & in sui causa, scilicet non in sensu physico sed solum morali, sicut dicuntur voluntarii alii contractus humani, ut sunt v. g. matrimonium & votum, sed quod tali pacto voluntarium est, remitti & dissolvi potest sine aliquo actu contrahentis retractativo, si Deus remittere ac dissolvere velit, immo per actum contrahentis retractativum dissolvi non potest, ut manifestum est in matrimonio & voto, ergo.

98. Opp. 1. Peccatum habituale nihil est aliud, quam hominem peccatum comisisse, & commissum non retractasse, ergo quandiu remanent hæc duo, semper remanet peccatum habituale; primum auferri non potest; nec enim quod præteritum est fieri potest non præteritum, ergo debet auferri secundum, sed hoc esse nequit sine aliquo actu peccatoris, ergo peccatum habituale nequit remitti sine &c. Item. Peccatum habituale est libera aversio à Deo & conversio ad creaturam, ergo tolli non potest nisi per liberam aversionem à creatura & conversionem ad Deum.

99. Resp. Idem argumentum fieri posse de quocumque humano contractu, in quo tamen retractatio non requiritur, ut relaxetur, sicut dictum fuit; nego itaque antec. quoad secundam partem, quæ licet sit vera juxta præsentem rerum ordinem, est tamen falsa juxta aliam providentiam, in qua Deus hujusmodi

retractationem non præcepisset, aut instituisset; Potius dici debet, peccatum habituale nihil aliud esse, quam peccatum commissum esse, & à Deo non esse remissum, proinde remanere debitum, subeundi poenam & indignationem Divinam; Hoc sane pacto illud explicavit S. August. de concupisc. & nupt. cap. 26. dices; *Eorum peccatorum, quæ dum fiunt, prætereunt, reatus manet, & nisi remittatur, in æternum manet.* Quapropter si remittitur peccatum, tollitur, esto non retractetur, si non remittitur, etiamsi retractetur, manet; Hinc aliud argumentum bene pro mea sententia sic expono. Potest Deus non remittere peccatum etiamsi peccator se retractet, quod quidem verum est si loquamur de retractatione habita per attritionem, si per contritionem, nihil enim eorum, quæ justificationem præcedunt, justificationis gratiam promerentur, & contritio est ad impetrandam peccatorum veniam, non ad infallibiliter consequendam, nisi ex Divina promissione, ergo etiam Deus potest remittere peccatum, per consequens gratiam infundere, etiamsi peccator se non retractet.

100. Dices. Si peccatum non consistet in actu præterito non retractato, sed in actu præterito non remisso, peccatum habituale conservaretur per non remissionem, sed hoc est falsum; Prob. Si peccatum habituale conservaretur per non remissionem, conservaretur à Deo non remittente, sed hoc non, ergo. Sed contra; argumentum hoc in quacumque sententia potest retorqueri; Afferis, consistere in actu præterito non retractato, & non remisso? Hoc certe debes asserere juxta principia recentiorum assertum meo oppositum defendentium, ergo saltem inæquatè conservaretur à Deo. Afferis consistere in habituali privatione gratiæ? Hoc certe debes fateri juxta principia Thomistica, ergo à Deo conservatur, qui non vult dare gratiam, & posset nolle dare, etiam si illud retractares. Itaque in forma dico, suppositi-



posito peccato posse Deum indirectè peccatum conservare, quia potest veniam peccatori negare, hoc autem Deum non dedecet, immo ad ejus justitiam pertinere potest.

101. Opp. 2. Quod pendet solum ab hominis voluntate nequit auferri à solo Deo, etenim effectus à quo pendet inesse, pendet etiam in conservari, sed peccatum habituale pendet solum ab hominis voluntate, ergo nequit auferri à solo Deo; quod si aliter fieret, remissio illa peccati non esset vera ejusdem destructio, sed sola non imputatio seu tentio, ut inquit Sectarii. Præterea. Aliquem esse peccatorem est realis denominatio, ergo auferri non potest, quin in aliquo extremo contingat mutatio, cum fiat transitus à contradictorio in contradictorium, cum ex alia parte nequeat in Deo esse mutatio, esse debet in creatura, quæ sine aliquo ipsius actu fingi non potest. Rursus, in peccato duo adveniunt, offensâ seu injuria facta Deo, & deordinatio à lege & recta ratione, quamvis vero per extrinsecam Dei conditionem auferri possit illa, hæc tamen, nisi à creatura retractetur, semper eadem manebit, quapropter &c.

102. Resp. ne. maj. cujus falsitas patet ex dictis, nam licet peccatum habituale ab homine retractaretur, adhuc non intelligeretur ablatum; pendet igitur ab hominis voluntate sola peccatum dum committitur, at ut commissum remittatur, & prorsus deleatur, nec solum tegatur, pendet à Divina voluntate remittente, nulla præexigita conditione, vel dispositione nisi juxta presentem providentiam, in qua Deus ita statuit. Ad secundum responsio data est in ant. n. 92. ad tertium conc. illa duo reperiri in peccato, sed dico, ablata offensâ & injuria facta Deo auferri etiam illam deordinationem, immo peccatum lethale in ea ita consistit, ut si actus esset solum deordinatus, & non esset offensâ Dei, nequam esset peccatum mortale, quod quidem colligo ex Sancto Thoma 2.2. q. 20.

art. 3. dicente. *Si posset esse conversio ad bonum commutabile sine averfione à Deo, quamvis esset inordinata, non esset peccatum mortale.* Reatus igitur culpæ consistit in averfione à Deo & in facta ipsi injuria, proinde hac ablata, etiam illam auferri censendum est, & ad summum remaneret aliqua temporanea poena luenda, non autem Divina indignatio vel odium; Verum quod dixi etiam ratione demonstro; nam si remissa injuria facta Deo remaneret aliquid culpæ, jam remissio culpæ non solum dispositive, sed etiam formaliter ab actu creaturæ dependeret, sed hoc omnino falsum & erroneum est; ergo. Tandem, ut quamplura præteream, nec enim in hisce speculationibus calamus nostrum fas est diutius immorari, scias, in gratia habituali contineri ea omnia eminenti quodam modo; quæ peccato habituali contraria sunt, proinde per istius infusionem Deo sic disponente auferri posset quidquid per peccatum homo contraxit. Pro hac re vide Suarez lib. 7. de sanctific. hominis cap. 23. Maltrium disp. 7. de justificatione. qu. 5. Car. de Lugo, disp. 7. sec. 8. Cacheran. tract. 5. de grat. §. 8. &c. &c.

## ARTICULUS X.

*Utrum aliquis possit esse certus sine speciali Dei revelatione se esse justificatum.*

103. **E**X titulo compertum habes, quæstionem fieri de propria, non de aliena justificatione, nam si de ista loquamur, potest quis infallibilem certitudinem dubio procul habere; si enim fiat hic Sylogismus. Omnis infans rite baptizatus est in gratia, sed hic infans est à me rite baptizatus, ergo est in gratia; conclusio sequitur ex una præmissa, quam fides docet, ex alia, quæ à me ipso dependet, proinde certissimam assequitur veritatem quamvis & in hoc casu revelationem Divinam contingere necesse sit, ut constat ex majori propositione.



tionem. Procedit igitur quæstio per exclusionem etiam Divinæ revelationis, nam cum isti nullo pacto falsum subesse possint, nec Deus mentiri, si Deus alicui propriam justificationem revelaret, jam pro certo se justum esse credere teneretur, alioquin à fide deficeret, & ita evenit Beatissimæ Virgini Luc. 1. Magdalene 7. Zach. 19. Fit tandem quæstio de certitudine infallibili; quæ sit vel Theologica, vel moralis summa, ita ut ex motivis quæcumque formidinem sive actu sive potestate excludentibus progrediat; Possit liquidem plures homines virtutibus deditos ex aliquibus argumentis, ut ex contemptu mundi, ex cœlestium rerum desiderio ex proposito perseverante Deo placendi certitudinem aliquam habere, experientia docemur, posse tamen formidare, & quandoque actu timere, si accuratè peccata præterita cogitent, ipsi fateantur.

104. Calvinus, Lutherus, alique, quos sub initio quæstionis recensuimus, quemadmodum docent, justificationem non esse donum aliquod infusum, & nobis inherens, sed justitiam Christi fide apprehensam, nobisque imputatam, docent etiam, posse omnes ac debere credere, se certo esse justos, immo non tantum justos, sed etiam electos ac prædestinatos; Catharinus vero, quamvis non asserat cum Hæreticis, certitudinem fidei circa propriam justificationem ad salutem necessariam esse, neque sola fide hominem justum fieri, attamen, hominem fidelem habere propriæ gratiæ certitudinem fidei, affirmare non trepidavit. Oppositum tenent omnes Doctores cum S. Th. 1. 2. qu. 112. art. 5. Scoto, Sanct. Bonavent. Durando &c. Horum sententiam amplector.

115. Prob. primo ex Divinis Scripturis Job 9. *Etiamsi simplex fuerit, hoc ipsum ignorabit anima mea*; Eccles. 9. *Sunt iusti atque sapientes, & opera eorum in manu Dei, & tamen nescit homo, utrum odio & amore dignus sit*. Prov. 20. *Quis potest dicere mundum esse cor meum,*

*mundus sum à peccato?* 1. ad Corint. 4. *Nihil mihi conficius sum, sed non in hoc justificatus sum*. Ergo seclusa Divina revelatione non potest quispiam propriæ justificationis firmam certitudinem habere.

106. Hisce Scripturæ textibus Sanctorum Patrum explicantium præsertim postremum textum Apostoli nequaquam desunt testimonia. En primus S. Ambros. serm. 5. in ps. 118. in illa verba, *amputa opprobrium meum, quod suspicatus sum*. Ideo, ait, *Deum precatur, ut illud auferat, quia solus novit, quod nescire potest etiam ille, qui fecit*. En secundus S. Chrysost. qui hom. 11. in primam ad Corint. *Multis, inquit, de causis incertum est iudicium nostrum, una, quod multa opera nostra nos latent*. En tertius & ultimus, ut præteream Theodoret. in Comment. ad cap. 4. primæ ad Corint. Bedam in cap. 20. proverb. Bernar. ser. 3. de adven. & singillatim Gregor. lib. 6. ep. 23. ad Gregoriam Augustæ cubiculariam, quæ postulans, utrum peccata sua dimissa essent, responsum hoc habuit. *Rem difficilem & inutilem etiam, postulasti; difficilem quidem, quia ego indignus sum, cui revelatio fieri debeat, inutilem vero, quia de peccatis tuis securus fieri non debes*. En inquam ultimus Sanctus Augustin., qui serm. 23. de verbis Domini hæc habet; *Fortasse tu nihil invenis in conscientia tua, invenis ille, qui omnia videt*. Et profecto teste David ps. 18. *Delicta quis intelligit?*

107. Ad hoc confirmandum plures rationes asserunt Doctores, præsertim Suarez & Bellarmin. omnes tamen ad unam revocari possunt, ita argumentum conficiendo; Si certitudo infallibilis propriæ justificationis haberi potest absque Divina revelatione, vel hoc erit ex opere operato, vel ex opere operantis, sed neutrum dici potest, ergo. Prob. prima pars min. quia nemo potest esse certus certitudine infallibili, an seriam & requisitam Minister habuerit intentionem, cum ex Jerem. 17. *pravum sit cor homi-*

hominis & inscrutabile, quis cognoscet illud? Prob. secunda quia ut certo quis sciat &c. debet certo scire, se credere, sperare, diligere, & panitere, ut oportet, sed nemo hoc infallibiliter scit, ergo. Prob. mi. primo quia ly *ut oportet* variis intelligitur modis; Hæreticus credit hoc rectè agere, & fallitur; secundo quia supernaturalitas actuum, quæ ex vi nominis percipi per naturæ vires non potest, ad hoc requiritur, ergo. Totum hoc infertur ex doctrina S. Thomæ, qui loco citato in corpore hæc tradit. *Certitudo non potest haberi de aliquo, nisi possit dijudicari per proprium principium, principium autem gratiæ & objectum, ejus est ipse Deus, qui propter sui excellentiam est nobis ignotus, secundum illud Job 36. Ecce Deus magnus vincens scientiam nostram. Unde habetur aliud Job 9. Si venerit ad me non videbo eum, si autem abjerit, non intelligam.*

108. Hinc tantummodo aliqui ex speciali privilegio hanc certam notitiam habuerunt, ut de S. Antonio narrat S. Athanas. de vita ejusdem, de Sancta Galla S. Greg. Magnus lib. 4. dialog. dial. 13. de Sancto Francisco, S. Bonavent. in ejus vita cap. 3. quod verum non esset, si hujusmodi certitudo sine peculiari revelatione posset obtineri. Cur insuper tot viri sanctitate conspicui circa justitiam propriam trepidassent, ut de pluribus refert Joan. Climac. & de Sancto Hilarione testatur S. Hieronymus?

109. Adde modo Concilium Tridentinum, quod sess. 6. cap. 9. ita decernit: *Quilibet, dum se ipsum suamque infirmitatem & indispositionem respicit, de sua gratia formidare ac timere potest, cum nullus scire valeat certitudine fidei, cui non potest subesse falsum, se gratiam Dei esse consequutum.* Et cap. 16. hæc habet: *Neque se ipsum aliquis, etiam si nihil conscius fuerit, judicare debet, quoniam omnis hominum vita non humano judicio examinanda & judicanda est, sed Dei.* Quam merito vero hoc definitum fuerit ex antecedentibus collige.

110. Plures primo loco Scripturas opponunt. Ad Rom. 8. *Accepistis spiritum adoptionis filiorum Dei, in quo clamamus Abba Pater, ipse enim spiritus testimonium reddit spiritui nostro, quod sumus filii Dei;* Atqui testimonium Spiritus Sancti facit certitudinem fidei, & esse filium Dei est gratiam habere, ergo. Item eodem cap. *Certus sum, quia neque mors, neque vita, neque &c. poterit nos separare à charitate Dei.* Sed non separari à charitate est, non separari à gratia, ergo. Rursus 1. ad Corint. 2. *Nos autem non spiritum hujus mundi accepimus, sed spiritum, qui ex Deo est, ut sciamus quæ donata sunt nobis.* Ergo ut sciamus, & gratiam, quæ nobis donata est.

111. Resp. has omnes, similesque autoritates, quæ fermè innumeræ afferri possent, vel referri ad totam Ecclesiam, quæ certitudine fidei credit, se habere indeterminate in membris suis spiritum adoptionis, & gratiam remissivam peccati, non autem ad omnes justos in particulari; vel in ipsi sermonem esse de certitudine habita per conjecturas quasdam, ut sub initio dixi, vel tandem de notitia habita ex privilegio, nimirum ex revelatione, unde subdit idem Apostolus: *Nobis autem revelavit Deus per Spiritum Sanctum.* Ita Sancti Thom. loc. cit. ad 4. sic explica Sanctos Patres qui in oppositum afferri possent, quos omnes apud Bellar. lib. 3. de justific. cap. 10.

112. Opp. 2. Ita gratia est donum Dei sicuti donum Dei est scientia, sed qui accipit à Deo scientiam potest certissime scire, se scientiam habere, ergo etiam qui accipit à Deo gratiam. Præterea. Gratia est in anima, sed anima potest certissime cognoscere quæ sunt in se, ut docet S. August. 12. super Genes. ad lit. ergo. Rursus. Potest homo scire se esse in peccato, ergo etiam potest scire se esse in gratia, consequentia valet à fortiori, nam lumen magis cognosci potest, quam possint tenebræ, quia ex Apost. ad Eph. 5. *Omne, quod manifestatur lumen est.*

113. Resp. disparem rationem asferri à S. Th. inter scientiam datam à Deo, & inter gratiam, quod illa sit evidens certitudo pertinens ad perfectionem intellectus, in quo residet ipsa scientia, & ideo quicumque scientiam habet, certus est se habere, gratia vero sit occulta perfectio virtutis appetitivæ. Ad secundum negatur mi. quæ tantum vera est de cognitione experimental. Ad tertium disparitas est, quia peccatum habet pro principio & objecto bonum, commutabile, quod est omnibus notum; Objectum autem & finis gratiæ est bonum incommutabile nobis ignotum propter sui luminis immensitatem, juxta illud ad Timot. ultimo: *Lucem habitat inaccessibilem*. Denique peccatum à nobis est, justificatio autem à Deo.

114. Opp. 3. Debemus credere peccatorum remissionem, Sacramentorum ad delenda peccata efficacitatem, tum etiam tenemur accedere ad Sacramenta vivorum cum gratia, ergo nullum dubium justitiæ nostræ esse debet in nobis. Præterea; Sumus omnino certi, CLEMENTEM XII. esse verum Pontificem & Christi Vicarium, ergo etiam possumus esse certi de nostra conversione, & potiori jure, nam, quod ille sit legitimè electus, pendet à voluntate aliena, conversio autem nostra pendet à voluntate propria. Tandem; Saltem, qui martyrium subeunt, nequeunt de propria justitia formidare; ergo.

115. Respon. dari peccatorum remissionem est Dogma Fidei, huic tamen remissa esse peccata, nequaquam; Sacramenta esse efficacia ad delenda peccata in rectè dispositis nobis revelatum est, hominem tamen esse rectè dispositum, ignoramus; teneri nos accedere ad Sacramenta vivorum sine dubio actuali nostræ justitiæ, non tamen sine potestate prudenter formidandi, ad licitam enim Sacramentorum susceptionem sufficit moralis illa certitudo, quæ requiritur in rebus humanis prudenter peragendis. Ad secundum di-

Tom. II.

spar est ratio, quia hunc hominem esse legitimè electum in Pontificem proponitur ab Ecclesia, hunc autem esse bene dispositum, & ut oportet, conversum non proponitur. Ad ultimum; id verum est de illis, qui martyrium subeunt ex motivo charitatis, an tamen sit revera hoc motivum, vel solum putatum, ipse Martyr certus omnino esse non potest; Item, ipse Martyr ignorat, an gratia conferatur in martyrio ante mortem, vel tantum in solo mortis instanti, proinde &c.

## ARTICULUS XI.

*Utrum justificatio conveniat tantum electis, & semel habita possit amitti.*

116. **E**ST alius error, qui proprie Calvinò tribuendus est, quem ultimo loco in hac quaestione refellendum esse existimamus. Docuit itaque Calvin. lib. 3. Instit. cap. 2. §. 11. justificationem solis electis ac prædestinatis convenire, atque eam, si verè semel accepta fuerit, nequaquam amitti posse, & ideo qui eam videntur amittere, nunquam habuerunt. Verba illius proferam; *Solos electos, sunt ista, semine incorruptibili Deus in perpetuum regenerat, ut nunquam dispercat semen vitæ in eorum cordibus infusum*. Plures ex Lutheranis, præsertim Petrus Martyr in com. ad cap. 8. ad Rom. & kennon. in examine Concilii à Calvini mente recedunt, contendunt tamen, etsi justus possit à justitia recedere, futurum tamen infallibiliter ad justitiam reversurum ante mortem, atque ideo concludunt, omnem justum esse prædestinatum.

117. Plura sunt testimonia, quæ ad sui errorem confirmandum, ex scriptura profert Calvinus. Ex Apost. 1. ad Corint. 13. *Charitas nunquam excidit*. Ad Rom. 8. *Quis nos separabit à charitate Christi?* deinde *Certus sum, quia neque mors, neque vita &c. poterit nos separare*.

F f

à cha-

*à charitate Dei*. Unde & Cantic. 8. legitur. *Aqua multa non potuerunt extinguere charitatem, nec flumina obruent illam*. Ex Joan. 4. *Qui biberit ex hac aqua, quam ego dabo ei, non sitiet in æternum, sed fiet in eos fons aque salientis in vitam æternam*. Et 1. Joan. 3. *Qui natus est ex Deo, peccatum non facit, quoniam semen illius in eo manet, & non potest peccare, quoniam ex Deo natus est*.

118. Oppositum tamen omnino tenendum est; Quia in re tot sunt ac perspicua dicta Scripturæ Sanctæ, ut quo pacto id Calvinus excogitaverit non intelligam; Sed quid mirum? In hoc ejusdem ingenii pervicacia, ut ipso dicat, quod veritas negat. Fateor tot mihi exhibeti testimonia, ut si omnia asserere placeret, quod paucis ego soleo, innumeris demonstrare daretur. Incipiam tamen à testamento veteri, immo ab ipso mundi exordio. An non vere ipsi primi parentes, eos tamen à justitia excidisse, ipsos Sæctarios fateri necesse est. An non justus Saul quando in Regem electus & unctus est? Si mihi hoc neget Calvinus, neget prius Cyprian. lib. 1. ep. 5. Augustinum lib. 2. ad Simplician. qu. 1. immo neget scripturam ipsam 1. Reg. cap. 9. dicentem. *Erat Saul electus & bonus, & non erat vir de filiis Israël melior illo; ab humero & sursum eminebat super omnem populum*, quibus verbis non solum corporis præstantia sed etiam animi excellentia virtusque describitur, & tamen non solum à justitia decidit, sed etiam inter reprobos recensendum esse existimamus. Quid vero dicam de Salomone, & David ejusdem Genitore? Hic certe justus revera fuit, de quo legitur: *Inveni David secundum cor meum peccavit tamen, atque poenitentia sua magnitudo peccati sui magnitudinem significavit; Ipse factus est, inquit, peccavi Domino & Nathan respondens. Dominus quoque transulit peccatum tuum*. Salomon vero fuit à Deo dilectus, ideo 2. Reg. cap. 12. habetur. *Vocavit nomen ejus Salomon, & Dominus dilexit eum &c.* Eum

autem in senectute sua à gratia excidisse scriptura testatur, immo etiam fuisse damnatum censent S. Cyprian. lib. 1. epist. 5. & Sanct. August. lib. 22. contra Faustum cap. 88. tandem Ezech. 28. legitur. *Cum averterit se justus à justitia sua, & fecerit iniquitatem, morietur in illa*. Quod dici non posset, si non posset amitti justitia.

119. Idem amplius demonstraturus prosequar ea asserendo, quæ nobis testamentum exhibet novum. *Quoniam abundabit iniquitas, rursusque charitas multorum, qui autem perseveraverit usque in finem, hic salvus erit* Mat. 24. In hoc autem textu charitatem refrigerare, significat charitatem prorsus deficere, alioquin nihil finali perseverantiæ contrarium eveniret. *Nam quod supra petram, qui cum gaudio suscipiunt verbum, & hi radices non habent, sed ad tempus credunt, & in tempore tentationis recedunt*. Luc. 8. Fides igitur & justitia semel habita deperdi potest, Rem totam peragat Apostolus Paulus. *Evacuati estis à Christo, à gratia excidistis* inquit ad Galat. 5. *Quidam circa fidem naufragaverunt* 1. ad Timot. 1. *In novissimis diebus discedent quidam à fide* 1. ad Timot. 4. Fuerunt igitur isti aliquando in Christo, veram itaque fidem & justitiam habuerunt, & tamen &c.

120. Accedant modo Sancti Patres, sed cur istos quam plurimos proferam? Legatur S. Augustinus de bono perseverantiæ, & cum hanc dicat gratiam specialem, & maximum donum distinctum à gratia justificationis satis superque est pro re nostra. Rationes tamen omnino præterire non possum. Prima sit; Vel fides Romana dicitur vera fides, vel illa Lutheranorum & Calvinistarum; Quidquid dicatur homines à fide deficiunt, ergo. Prob. mi. Plures, qui prius profitebantur Romanam fidem, hanc deseruerunt, ut constat in ipso Calvino & Luthero, & plures qui prius Lutheri & Calvinii assēclas se declaraverant fidem Romanam amplexi sunt, ergo quidquid dicatur,



catur, à fide deficiunt, proinde etiam à iustitia. Hoc argumentum, quod nemo promovet, arbitrato meo convincit. Secunda sit. Omnes infantes in baptisimi lavacro justificationem consequuntur, quod fatetur ipse Lutherus, immo ex mente Calvinii & Petri Martyris etiam extra baptismum filii fidelium Sancti iustique sunt; At quis unquam adeo de mentis juvenii ac sententiæ est, qui istos ab ea gratia & Sanctitate non recedere, omnesque prædestinatos esse arbitretur & asserat? Tertia sit. Si iusti propriam nequeunt iustitiam perdere, ut quid tot consilia, exhortationes, preces? Ut quid in oratione Dominica dicetur, *dimitte nobis debita nostra*, & *ne nos inducas in tentationem*? Attendantur omnia, quæ dicta sunt, & quamvis plura alia dici possent, non est cur plura dicamus.

121. Ea tantummodo rejiciemus, quæ videbantur veritati nostræ contraria proferri. Charitatem nunquam excidere verum est, nos tamen à charitate nunquam excidere, est falsum; Unde Apoc. cap. 2. dicitur. *Habeo adversum te pauca, quia primam charitatem reliquisti. Memor esto unde excideris.* Fatemur hanc esse charitatis peculiarem dotem, ut juxta propriam naturam semper manere possit, quod de aliis virtutibus fide & spe affirmari non potest, in patria enim, ubi visio, nulla fides, ubi perfecta bonorum omnium possessio, nulla spes. In hoc sensu loquitur Paulus. Quis etiam nos separabit à charitate Christi? Tanta est charitatis efficacitas & robur, ut apta sit ad omnia quantumvis ardua, & periculis plena valeat superare, si maneat; Quod autem manere debeat, nemo sibi fidat ac præsumat; Mansit in pluribus, qui fortes constantique in tribulationibus, in angustiis, in carceribus per quæ omnia significantur flumina & aquæ, in charitate & gratia perstitierunt, in pluribus tamen non mansit, in quibus, usque ad animam, intraverunt aquæ, ac naufragi demersi sunt. Hinc Paulus ipse 1. ad Corint. 9. de se ipso dicebat. *Castigo corpus meum,*

*& in servitutem redigo, ne cum aliis prædicavero ipse reprobus efficiar.* Hoc nolunt intelligere sectarii, ne corporis castigationem exerceant, sed omnem nefariamque vivendi rationem prædicant, ut sic facilius homines ad sui diabolique sequellam pertrahant, ac alliciunt. Eodem pacto intelligimus & explicamus primum textum Joannis 4. Donec enim quis bibat ex illa aqua, quam nobis præbet Christus, nunquam sitiet, sed quia quilibet potest se à bibendo retrahere, potest sitire, dereliquerunt enim fontem aquæ vivæ, & foderunt sibi cisternas, cisternas dissipatas, quæ continere non valent aquas. Magis probare videtur ultimus textus. Quid tamen si dicerem, hunc locum intelligendum esse de statu futuræ gloriæ, cum in regeneratione sederit filius hominis, & sedebunt etiam Sancti judicantes duodecim tribus Israel, & tamen ita responderet Ambrosius in comment. Isaiæ. Quid si dicerem, intelligendum esse de gratia prædestinationis, ac finalis perseverantiæ, ita ut quantumvis pro vitæ decursu multoties iusti peccent, attamen in vitæ termino poenitentiam agunt, ac in gratia & charitate decedunt, immo ipsa peccata ipsis coopeantur in bonum? & tamen ita responderet Bernard. ser. 23. in Cant. Quid si dicerem, dictum illud esse verum in sensu reduplicativo, idest hominem, quatenus filium Dei & ex Deo natum, non posse peccare, non tamen ut hominem, & ut in carne corruptionis viventem, qui sentit aliam legem repugnantem legi mentis suæ? & tamen ita responderet Augustin. lib. 2. de pecc. merit. & remis. c. 7. & de gratia Christi c. 21. Omnibus tamen hisce explicationibus debita veneratione accipitis, ne à priori doctrina discedamus, dicimus, textum verum esse, quoadusque aliquis perseverat in nativitate ex Deo habita, & donec semen Dei manet in illo. Hominem autem semel iustum non posse non perseverare, hoc est, quod Hæretici probabunt nunquam, nos vero contrarium ostendimus.




## QUÆSTIO ULTIMA.

## De Merito.

## ARTICULUS I.

*Quia, quoadplex sit meritum, & an in hominum operibus detur.*

1.  I Scripturam, si Sanctos Patres perlegamus, nomen hoc meriti ita usurpatum invenimus, ut non solum bonis operibus tribuatur; sed etiam malis. Notum hoc omnibus esse arbitror, qui vel illas vel istos viderit, quapropter nihil ex utriusque proferam. Hac de re Calvinus & Lutherus videntes meriti nomenclaturam indifferenter tribui, siue bona essent opera, siue mala, penitus ipsum delere contenderunt. Idcirco actum est, ut modo Theologi & Catholici omnem ambiguitatem in voce auferentes, bonis operibus meriti nomen tribuerent, malis vero nomen demeriti, vel mali meriti, ut jam fecit S. August. lib. de grat. & lib. arbit. cap. 5. & 6.

2. Multifariam meritum definire, seu potius describere studuerunt Doctores. Est, juxta Scotum in 3. dis. 18. qu. unica, *aliquid acceptandum, vel acceptum in alio, pro quo est ab acceptante aliquid retribuendum illi.* Est, juxta S. Th. 1. 2. qu. 21. art. 3. in corp. *Opus remuneratione dignum*, quod ab aliis authoribus diversimodè explicatum est secundum verba, sed non secundum sensum.

3. Duæ præcipue divisiones ipsi conveniunt. Prima meriti naturalis & supernaturalis; secunda congrui & condigni. Justissime prima divisio data est, siue loquamur ex parte Dei, siue ex parte creaturæ; & ratio est, quia Deus non tantum est author naturalis, qui naturalia bona largitur, sed etiam supernatura-

lis, qui supernaturalia. Homo etiam non solum habet naturalia principia & objecta, per quæ & ad quæ operetur, verum & supernaturalia, debet igitur dari meritum, cui correspondeat retributio Divina in ordine naturali, & insuper in ordine supernaturali.

4. Justissime etiam data est secunda divisio, siquidem aliquando reperitur æqualitas inter præmium & opus juxta veram existimationem, unde præmium ex valore ipsius meriti obtinetur, & veluti merces correspondet operanti, & sicut stipendium militanti, ut loquitur August. ep. 105. aliquando non invenitur hujusmodi æqualitas, habetur tamen quedam proportio, & obtinetur præmium ex liberalitate remuneratoris suppletis id, quod deficit æqualitati. In primo sensu dicitur meritum condignum, in secundo meritum congruum.

5. Dari meritum hoc in homine apud Deum tanquam dogma fidei tenendum est, & colligitur ex veteri, & novo testamento. Ex illo; nam Ecclesiast. 16. habetur. *Omnis misericordia faciet locum unicuique secundum meritum operum suorum* cap. 8. *Ne reverearis usque ad mortem justificari, quoniam merces Dei manet in æternum.* Sap. 5. *Iusti autem in perpetuum vivent, & apud Dominum est merces eorum.* Ex isto; nam Mat. 5. legitur: *Merces vestra copiosa est in Cælis.* 20. *Voca operarios, & redde illis mercedem.* Ad Hebr. 13. *Beneficentia, & communionis nolite oblivisci, talibus enim hostiis promeretur Deus.* Sanctorum non deest testimonium. Celebre est dictum illud S. Ignatii Martyris in ep. ad Rom. *Sinite aiebat, ut bestiarum esca sim, per quam possim Deum promereri.* Irenæ. lib. 4. adversus Hæres. cap. 72. *Pretiosam, inquit, arbitramur*

*coronam, quæ per agonem nobis acquiritur, sed non ultro coalitam, & quanto per ugonem nobis aduenit, tanto est præstiosior.* Omittamus tamen quoscumque alios, qui pœne innumeri sunt, & rem totam dirimat Augustinus. *Nulla ne sunt merita iustorum?* interrogat in epist. 105. ad Six., *sunt plane respondet quia iusti sunt, sed ut iusti fierent merita non fuerunt;* & post pauca, *sicut merito peccati tanquam stipendium redditur mors, ita merito iustitiæ tanquam stipendium vita æterna.*

6. Ex his infertur, huiusmodi meritum non solum congruum, sed etiam condignum esse existimandum, non quidem secundum æqualitatem strictæ iustitiæ, quam vocant arithmeticam, sed illam, quam geometricam appellant, ut infra dicam. Ad hujus vero meriti condigni veritatem statuendam, ea non sunt prætermittenda, in quibus proponitur gloria tanquam merces, bravium, & corona; Merces autem non datur nisi operanti; bravium nisi in stadio currenti, corona nisi in prælio militanti, & hoc quidem totum ex iustitia, ait enim Apostolus 2. ad Timot. 4. *Bonum certamen certavi, cursum consummavi, fidem servavi, in reliquo reposita est mihi corona iustitiæ, quam reddet mihi Dominus in illa die iustus iudex.*

7. Si vero horum omnium rationem quæras, tibi satisfacio. Eam autem desumo primo si Deum inspicimus, quia cum Deus sit princeps & caput humanæ Reipublicæ non solum in ordine naturali, sed etiam supernaturali, & in qualibet bene instituta Republica debeat Princeps iis præmia largiri, qui bene in ea se gerunt, iustum erat, ut Deus præmium & mercedem bene operantibus largiretur, quemadmodum male operantes punit supplicio, alioquin iustitia Divina solummodo in vindictiva collocaretur, quod tyrannidem indicaret; desumo secundo si hominem consideremus; & quia maxime conveniens est naturæ rationali & liberæ per propria ope-

ra libera ad suum finem promoveri, & quia valde ipsi honorificum est ex merito suo supernaturalia bona sibi comparare, cum nobiliter censeatur quod per meritum, quàm quod sine merito obtinetur.

8. Opp. 1. Ad id non datur meritum de condigno, quod soli gratiæ tribuendum est, sed vita æterna soli gratiæ tribuenda est, ergo. Prob. mi. Ad Rom. 6. *Stipendium peccati mors, gratia autem Dei vita æterna.* Juxta hoc legitur in psal. *qui coronat te in misericordia & miserationibus.* Et in Evang. *Beati misericordes, quoniam ipsi misericordiam consequentur.* Est igitur corona gloriæ misericordia Dei, non ergo meritum Creaturæ; Quod etiam innuit Concil. Trident. sess. 6. cap. 16. inquit. *Bene operantibus proponenda est vita æterna, tanquam gratia misericorditer promissa.* Hinc Sanctus Augustinus pluribus in locis ait; *Cum præmium venerit, sua dona coronabit Deus, non merita tua.*

9. Resp. vitam æternam in aliquo sensu esse gratiam, in aliquo mercedem, est gratia in radice, quia videlicet confertur meritis, quæ nulla essent, nisi præcessisset gratia & misericordia, atque in hoc sensu dicit Augustinus, Deum dona sua coronare, quia si Deus ea dona non dedisset, nulla fuissent merita nostra, agebat enim tunc contra Pelagium, Unde ait de grat. & lib. arb. cap. 6. *Cui redderet coronam iustus iudex, si non donasset gratiam misericors Pater?* Cœterum Augustini nientem jam supra exposuimus num. 5. in fine; Quæ de re potuisset jure dicere Apostolus, stipendium peccati mors, stipendium iustitiæ vita æterna, ut asserit idem August. de grat. & lib. arb. cap. 8. sed ita non dixit, ne existimarent homines, ita merita nostra à nobis esse, sicut à nobis sunt peccata. Quod attinet ad Tridentinum, ne omittas alia duo verba sequentia, *& tanquam merces.*

10. Opponit. 2. Omnia opera creaturæ omnibus aliis titulis sunt debita, Deo,

Deo, ergo in ipsis non potest relucere meritum de condigno. Prob. conf. quia per meritum de condigno Deus obligaretur, obligari autem non potest per id, quod sibi debitum est. Preterea. Luc. 17. *Cum feceritis hæc omnia, dicite, servi inutiles sumus, quod debuimus facere, fecimus.* Sed si daretur meritum de condigno, dici non possemus inutiles servi, ergo. Rursus; Meritum de condigno non debet esse ex iis, quæ accepimus, sed ex propriis, sed nihil in nobis est, quod acceptum non sit, quid enim habes, quod non accepisti? Ergo.

11. Resp. primum argumentum probare, opera creaturæ non esse meritoria de condigno ex natura sua, non autem ex Divina acceptatione, & promissione præmii reddendi sub talium operum conditione, quæ posita obligatur Deus non secundum iustitiæ rigorem, sed secundum iustitiam natam ex ejusdem voluntate & promissione; Quamobrem dixit August. in ps. 83. *Debitorem Deus ipse se fecit, non accipiendo sed promittendo, non ei dicitur, redde quod accepisti, sed quod promissisti.* Quo pacto autem requiratur Divina acceptatio & promissio, infra dicam. Aliter argumentum solvitur, si sustineas inter Deum & creaturam iustitiam perfectam, & commutativam.

12. Ad secundum. Textus allatus multifariam à Sanctis Patribus exponitur. Eum exponit S. Ambros. lib. 8. in Luc. de operibus factis per vires naturæ, & ut cognoscamus id, quod ex nobis sumus & possumus, inquit enim, *agnoscenda est gratia, sed non ignoranda natura.* Idcirco per naturæ facultates inutiles sumus, utiles tamen per gratiæ virtutem; Novit hoc Apostolus Paulus & 2. ad Timot. 2. dixit; *Qui mundaverit se ab his, erit vas in honorem sanctificatum, & utile Domino ad omne opus bonum paratum.* Expendit Beda in idem caput, & nos servos inutiles appellat Deo, bonorum enim nostrorum Deus non eget, non tamen inutiles nobis. Exponit August. serm. 3. de ver. Dom. & juxta ex-

plicationem à nobis superius expositam, inquit, opera nostra inutilia esse, nisi Deus liberaliter nobiscum pactum iniisset; Sumus enim mancipia Dei, & si voluisset, potuisset à nobis quodcumque opus absque aliquo præmio exigere. Expendunt tandem Thologi, nos esse inutiles servos, quia Deus nullam utilitatem à nostris operibus accipit, non quia non accipiat obsequia, quibus Deus debitorem se fecit; Unde ait August. in ea verba; *Nonne ex denario convenisti mecum? tolle quod tuum est, & vade.* O magna bonitas Dei, cui cum pro conditione reddere debeamus obsequia, utpote servi Domino, amicitiarum nobis præmia re-promittit, ut à nobis obsequia debita servitutis extorqueat. Præterivi expositionem Chrysost. hom. in illa verba; *Eratum est cor Ozia dicentis, non esse dictum, servi inutiles estis, sed dicite, quia servi inutiles sumus, ut videlicet, etiam post opera bona à nobis facta servetur humilitas, & ea non corrumpat superbia, si enim nos servos inutiles dicemus, dicet ipse, Euge serve bone & fidelis, quia super pauca fuisti fidelis, super multa te constituam.* Ex hisce omnibus habes quid tertio respondeas, id est, meritum de condigno debere esse ex propriis, non tamen excludendo accepta, bonum enim, quod agimus, Dei est & nostrum. Cæterum argumentum nimis probaret, quia sequeretur, quod per unionem hypostaticam gratis Christo collatam Christus de condigno non satisfecisset.

13. Opponit. 3. Apost. ad Rom. 8. ait. *Non sunt condignæ passionibus hujus temporis ad futuram gloriam, quæ revelabitur in nobis.* Preterea; est Theologicum illud; *Deus præmiat ultra condignum, punit citra.* Insuper damnata est hæc propositio Baii; *Opera bona iustorum non accipiunt ampliore mercedem, quam iusto Dei iudicio mereantur accipere.* Hæc autem omnino vera non essent, si meritum de condigno admitteretur.

14. Resp. Apostoli testimonio contra-

trarias esse alias Scripturas. Luc. 10. *di-  
gnus est operarius mercede sua.* Apoc. 3. *Ambulabunt mecum in albis quia digni  
sunt.* Sap. 3. *Deus tentavit eos, & in-  
venit eos dignos se.* Quid plura? Ipse  
Paulus 2. ad Thessal. 1. inquit. *Ut digni  
habeamini Regno Dei, pro quo & patimini.* In eo igitur textu sermo est de pas-  
sionibus nostris sumptis secundum enti-  
tatem physicam, & præcisè ut sunt ope-  
ra facta ex naturæ viribus & ex motivo  
naturali, non vero secundum entitatem  
mōralem, & prout procedunt à gratia,  
atque ex fine supernaturali; Quamvis  
etiam dici posset, id verum esse de con-  
dignitate juxta durationem, quia passio-  
nes illæ sunt dumtaxat pro finito tempo-  
re, è contra gloria futura æternum per-  
manebit, atque hic videtur fuisse sensus  
Pauli, cum dicat, *hujus temporis.* Quod  
est consonum iis, quæ habet 2. ad Co-  
rint. 4. ubi ait. *Momentaneum hoc &  
leve tribulationis nostræ æternum gloriæ  
pondus operatur in nobis.* Ad 2. Quan-  
vis ab aliquibus Theologis, ut à Vega,  
negetur dictum illud, nihilominus ad-  
mittendum est præsertim post damna-  
tam illam propositionem, quare varie  
fuit à Doctoribus explicatum. Si Scoti-  
starum & Nominalium expositionem ac-  
cipiamus, juxta istos cum merita nostra  
condigna fiant ex præcedenti Dei ordi-  
natione, dicitur Deus præmia largiri  
ultra condignum, si considerentur juxta  
condignitatem, quam ante hujusmodi  
ordinationem haberent, vel quam ha-  
buissent, si à Deo diversimode fuissent  
ordinata; Si aliorum, dicunt, servata  
æqualitate geometrica tam præmii quam  
meriti, tam pœnæ quam demeriti, excedi  
aritmētice meritum à præmio, quia plus  
est boni in beatitudine, quam in nostris  
operibus meritoriis, excedi vero pœnam  
à demerito, quia plus est mali in culpa,  
quam in pœnā, & ideo præmium est arit-  
mētice ultra condignum, pœna vero ci-  
tra condignum; Vel tandem explica eo  
modo quo fuit explicatus textus Aposto-  
li, atque ex his omnibus habes quo pacto

intelligenda sit illa proposito damnata.

15. Opp. 4. ex testimoniis Sancto-  
rum Patrum. Basil. in ps. 114. ait: *Manet  
sempiterna requies illos, qui in hac vita le-  
gitime certaverunt, non ob eorum merita  
factorum, sed de munificentissimi Dei gra-  
tia, in qua sperarunt.* August. in ps. 70.  
con. 2. *Tua peccata sunt, merita Dei sunt,  
supplicium tibi debetur, & cum præmium  
venerit, sua dona coronabit non merita  
tua, & ser. 15. de verb. Apost. Pronibilo  
salvos facies illos, nihil invenis unde salves,  
& multum invenis unde damnes.* Prosper.  
lib. 1. de vocat. gent. cap. 17. feli. ut aliis  
placet, 5. hæc habet. *Ideo in parabola de  
his, qui laborant in vinea, dari idem præ-  
mium eandemque mercedem omnibus ope-  
rariis, sive multum sive parum laborave-  
rint, ut ii, qui multo labore sudarunt, nec  
amplius, quam novissimi acceperunt, intel-  
ligant, donum se gratia non operum acce-  
pisse mercedem.* Tandem S. Bernard. in  
ser. 1. de annunt. sic effatur. *Neque talia  
sunt hominum merita, ut propter ea vita  
eterna debeatur ex jure, aut Deus inju-  
riam aliquam faceret, nisi eam donaret:*  
Et ser. 15. in ps. *Qui habitat.* Ait. *Totum  
hominis meritum est, si totam spem suam  
ponat in eo, qui totum hominem salvum fa-  
cit.* Tandem in pugna cum Diabolo, quam  
refert Kemnit. sic dixisse fertur. *Non sum  
dignus ego nec propriis possum meritis re-  
gnum obtinere Cælorum, cæterum Domi-  
nus meus duplici jure illud possidens, hæ-  
reditate Patris & merito passionis altero  
ipse contentus, alterum mihi donat.*

16. Resp. testimonia Basilii & Au-  
gustini explicanda esse ut supra, ibi sci-  
licet sermonem esse de operibus factis  
ex viribus propriis, non ex gratiæ vir-  
tute. Si enim Basilii inquit, manere  
sempiternam requiem illos, qui legiti-  
me certaverunt, jam legitimum certa-  
men fatetur, sed legitimum certamen,  
sine merito non potest intelligi, ergo  
fatetur meritum; Quanquam vero men-  
tem Augustini satis exposuerimus, li-  
ceat tamen & alia subdere, quæ ex ejus-  
dem libris colliguntur. Primum est in  
epij



epist. 105. ad Six. ubi ait. *Ipsa vita æterna, quæ in fine sine fine habebitur, & ideo meritis præcedentibus redditur, tamen quia eadem merita, quibus redditur, non à nobis parata sunt per nostram sufficientiam, sed in nobis facta per gratiam, etiam ipsa gratia nuncupatur, non ob aliud, nisi quia gratia gratis datur, nec ideo quia meritis non datur, sed quia data sunt ipsa merita, quibus datur.* Secundum est in lib. de grat. & lib. arbit. ubi inquit: *Quid habes, quod non acceperis? Si autem accepisti, quid gloriaris, quasi non acceperis? Prorsus talia cogitanti verissime dicitur dona sua coronat Deus non merita tua, si tibi à te ipso, non ab illo sunt merita tua; Hæc enim, sita lia sunt, mala sunt, quæ mala sunt non coronat Deus, si autem bona sunt, Dei dona sunt.* Nihil igitur invenit Deus unde hominem salvet si solum hominem consideras, multum invenit si hominem & gratiam expendas. In eodem sensu intelligendus est etiam Sanctus Prosper, qui voluit innuere idem præmium quantum ad rem & durationem omnibus laborantibus futurum esse, ne quis de propriis operibus gloriaretur; Illum autem merita non excludere, patet ex eodem loco, ubi asserit; *Bona merita sequi in homine post adeptam gratiam, non præcedere.* Quomodo autem intelligenda sit illa parabola, constat ex illius exppositoribus, quos consule, Sancti Bernardi mens est, vitam æternam non esse debitam ex jure strictè tali, non tamen ex suppositione gratiæ & promissionis Divinæ; alioquin contradiceret Paulo à nobis adducto. In reliquis vero, vel ita loquutus est, quia quæcumque merita habentur ex gratia & misericordia Dei, vel quia homo incertus de ipsis est, vel quia, utrum usque in finem perseveraturus sit, prorsus ignorat. Quo pacto autem liceat homini etiam in meritis suis spem collocare, pauca in fine producam.

17. Oppones ultimo, quia si daretur meritum hujusmodi in hominibus,

derogaretur meritis Christi, hæc enim non sufficerent obtinendo præmio, quod nobis confertur.

Sed contra; non derogavit Apostolus meritis Passionis Christi, cum dixit; *Adimpleo ea, quæ defuncti Passioni Christi;* Cur ergo derogabimus nos? Sicuti causam secundam operari non infert insufficientiam virtutis in causa prima; sed virtutem ejus, qui præbet alteri facultatem ad operandum, ita magis extolluntur merita Christi, si dicamus meruisse nobis vim merendi, & esse veluti causam universalem, quæ influit in merita nostra per gratiam, quæ Christi est. Verum de hac re alibi.

18. Nunc breviter ostendo, hominem posse ac debere in meritis suis spem collocare, non quidem ea agnoscendo ex propriis, sed ex gratia Dei, quæ dat illi virtutem. Manifestum hoc est in Apostolo Paulo, qui de se ipso dicebat, bonum certamen certasse, fidem servasse &c. sed ulterius veritas hæc contra Sectarios ex aliis Scripturæ locis, & Patrum monumentis declaratur. *Fiducia magna erit coram Summo Deo elemosyna omnibus facientibus eam.* Tob. 4. *Tribulatio patientiam operatur, patientia vero probationem, probatio vero spem.* Ad Rom. 5. *Si cor nostrum non reprehenderit nos, fiduciam habemus ad Deum.* 1. Joan. 3. Ex Sanctis Patribus afferam Cyprianum in ser. de elem. dicentem. *Præclara & Divina res est Fratres charissimi, salutaris operatio, solatium grande credentium, securitatis nostræ salubre præsidium, munimentum spei &c.* Chryst. hom. 2. in 2. ad Corinth. *Optamus, ut ex benefactis habens fiduciam.* Ambr. in cap. 3. 2. ad Corinth. *Nunc opus est, ut crescat in nobis fiducia bonis actibus comparata.* Adde August. in præf. in ps. 1. *Ut ergo speret Regnum Dei, habeat conscientiam bonam, credat, & operetur.* Ita profecto Sanctis Viris evenit ac Mulieribus. Sic dicebat David ps. 17. *Retribuet mihi Dominus secundum justitiam meam.* Sic Ezech. Isaia 38. *Ob-*  
secre



*secro Domine, memento quæso, quomodo ambulaverim coram te in veritate, & in corde p-recto.* S. Hilar., referente Sancto Hieronym. *Egredere anima mea, quid times? Septuaginta prope annis servisti Christo, & mortem times?* Ratio autem horum omnium est, quia salutis æternæ consequutio nec à sola gratia & Dei misericordia provenit, nec à sola creaturæ operatione; In utraque itaque causa fiduciam collocare licet. Sine illa creaturæ operatio non est, sine ista gratia non prodest. Ad labores in vinea vocari non sufficit, nemo vero ad vineam, nisi vocatus, laboraturus veniret. In gratia sola confidere otiositatis esset atque torporis, confidere in sola creaturæ operatione foret superbiæ. Hinc semper timendum, semper sperandum; Time, ne tu gratiæ deficias, spera, quia Deus neminem deserit, nisi prius deseratur.

## ARTICULUS II.

*Plures conditiones ad meritum requisitæ examinantur.*

19. **P**Lura ad unum revocare placet, de quibus singillatim à pluribus Doctoribus pertractatum esse reperimus, qui plura in hac re velit, ipsos consulat, si tamen plura reperiet, quamvis plura leget.

Quæritur 1. Utrum ad meritum requiratur status viæ.

Responsio est affirmativa cum Scotto in 3. dis. 8. qu. unica; S. Thom. 1. par. qu. 62. art. 9. & 2. qu. 13. art. 4. ad 1. Colligitur autem hoc ex pluribus Scripturæ locis, Sanctorumque Patrum testimoniis. Eccles. 9. *Mortui nihil noverunt amplius, nec habent ultra mercedem.* Ad Galat. 6. *Dum tempus habemus, operemur bonum.* Joan. 9. *Venit nox, quando nemo potest operari.* Hinc Sanctus Augustinus ista perpendens ait: *Frustra sibi homo post hoc corpus promittit, quod in corpore comparare neglexerit.* Ut legitur Tom. II.

apud S. Prosperum sententia 172. Hieronym. vero in illa verba Eccl. 9. *Melior est canis vivens leone mortuo, ita exponit, Donec vivunt homines possunt fieri iusti, per mortem vero nulli boni operis datur occasio.*

20. Videtur in oppositum esse, quia beati extra viam in felicitate illa crescunt, quam appellant accidentariam; pro nobis orant, quod etiam de animabus existentibus in purgatorio nos credimus. Sed contra primum est quod ait Hieronymus loco superius adducto. *Mortui nihil valent adjicere, quod semel secum tulere de via; unde nihil sibi addere merendo possunt.* Quamobrem argumentum beatitudinis accidentariæ est proprietas beatitudinem consequens, nec ad novum meritum referri debet; Contra secundum est, Sanctos pro nobis preces effundere, atque beneficia à Deo impetrare, sed hujusmodi impetratio in novo merito sita non est, sed in merito viæ, immo in Dei gratuita & extrinseca acceptance; Hoc docet Angelic. 2. 2. qu. 81. art. 11, ubi ait. *Eorum orationes efficaciam habent impetrandi ex præcedentibus eorum meritis, & Divina acceptance.*

21. Videtur, aliquam promoveri posse difficultatem de Enoch & Elia, qui adhuc vitam degunt mortalem, eorumque anime sunt corpori conjuncte; immo tempore Antichristi vivent, sicut ceteri homines, & pro Christo morientur, proinde adhuc reperiuntur in statu viæ ac meriti; Ex alia parte, cum in hujusmodi statu usque ad illud tempus sint permansuri, eorum meritum tam diuturno tempore longe excederet illud aliorum omnium Sanctorum.

22. In hoc puncto diversa protulerunt Doctores: Suarez, Vasquez, Espärza, alique pro vita præsentis meriti nihil ipsis concedunt, cum dicant, ad merendum requiri vitam mortalem sub communi lege & mortalitatis conditione, subjectam videlicet incommodis corporis corruptibilis, quæ subjectio

G g cum

cum sit in ipsis suspensa, suspensus etiam censetur status viæ statutus ad meritum. Gabriel à S. Vincentio, Vega, Henriquez, & Abulensis meriti dignitatem ipsis non negant, sed per actus parum intensos, unde etiam pro tam longo tempore meriti vel Joannis Baptiste, vel Apostolorum nequaquam æquarent, vel etiam si hoc non negarent, nihil esset incongrui, nam futuri sunt postremi adventus Christi præcursores & Apostoli, nec non gloriosi Martyres, de quibus dicit Tertullianus, Antichristum sanguine suo extinguunt. Nunquid in hac re contentiosè agendum? Sentiat unusquisque pro arbitrio, & abundet in sensu suo, cum nihil definitum sit ab Ecclesia, aut à Sanctis Patribus traditum.

23. Hujusmodi autem statum viæ ad meritum prærequiri nequaquam ex intrinseca meriti ratione colligitur, sed solum ex Divino Decreto potest ostendi. Hoc clarum fit ex hac mea peculiari ratione; nam, sicut Deus potuisset ita decernere, ut nullus in statu viæ meritum haberet, ita potuisset velle, ut quilibet extra statum viæ mereri posset, dummodo quid aliud non deesset; hæc addo particulas; aliter pari modo fieri posset hoc argumentum; Deus potuisset ita decernere ut homo justus nullum meritum habeat, ergo potuisset velle, ut homo peccator meritum habeat; Neque dicat Vasquez requiri ad meritum liberum & arduum contemptum rerum temporalium, quem solum pro statu viæ dari posse, compertum est; atque hoc quidem dicendum superest; etenim dari hujusmodi meritum apud Deum nobis tantummodo constat ex sacris litteris, at ubicumque reperitur in istis, meritum non esse absque violentia, labore, & certamine; *Regnum enim Celorum vim patitur*. Matt. 11. *Non coronabitur nisi qui legitime certaverit*. 2. ad Timot. 2. *Unusquisque mercedem accipiet secundum suum laborem*. 1. ad Corint. 3. atqui violentia labor & certamen non sunt nisi pro statu viæ, ergo status viæ necessario ex

intima ratione meriti ad merendum requiritur; Etenim hæc omnia, quæ dicta sunt tanquam ad meritum necessaria, sunt dumtaxat ex Divina dispositione; & verum est, reperiri solummodo pro statu viæ, in quo labor, non pro statu Patriæ, in quo requies. Si enim res se haberet juxta sensum Vasquez, qui bene operaretur sine aliquo incommodo & difficultate, ut contingit sanctioribus viris, omni prorsus merito defraudaretur. Da aliquod opus in se dignum estimatione, & illi placens, cujus est præmia largiri, satis meritum inesse percipisti.

24. Quæritur 2. an requiratur ad meritum condignum status gratiæ; & responsio est affirmativa; Dominus enim Joan. 15. ait. *Sicut palmæ non potest ferre fructum in semetipso nisi manserit invite, sic nec vos nisi in me manseritis*. Quod tantum per gratiam habetur; atque huc spectat illud Tridentini toties adductum; nihil eorum, quæ justificationem præcedunt, justificationis gratiam promereri, proinde neque gloriam. Hoc apertè colligitur etiam ex duabus propositionibus Baii damnatis à Pio V. Prima erat ista; *Sentiunt: cum Pelagia qui dicunt, esse necessarium ad rationem meriti, ut homo per gratiam adoptionis sublimetur ad esse deificum*. Secunda hæc alia. *Opera non accipiunt rationem meriti ex eo quod fiant per spiritum adoptionis. Sed ex eo tantum quod sint conformia legi*.

25. Quæritur 3. an requiratur libertas indifferentiæ. Et responsio est affirmativa; Veritas hujus assertionis evincitur ex Scripturis & Patribus. Eccl. 31. *Qui potuit transgredi & non est transgressus &c. ideo stabilita sunt bona illius in Domino*. Apost. 1. ad Corint. 9. *Si volens hoc ago, mercedem habeo*. Et 2. ad Corint. 9. *Non ex tristitia aut ex necessitate, bilarem enim datorem diligit Deus*. S. Hieronym. 2. contra Jovini. *Ubinecessitas nec corona, nec damnatio est*. August. lib. 2. de lib. arbit. cap. 1. *Non re-*  
Et

*Est factum aut peccatum esset, nisi fieret voluntate.* Bernard. ferm. 81. in Cantico. *Ubi non est libertas nec meritum.* Juste propterea damnata fuit ab Innoc. X. hæc propositio Janfen. *Ad merendum vel demerendum in statu naturæ lapsæ non requiritur in homine libertas à necessitate, sed sufficit à coactione.*

26. Contra hoc duo videntur esse. Unum, quod in Martyrio relucet dignitas meriti, quamvis liberum non esset; Hoc venit in Sanctis Innocentibus, quos Herodis impii sustulit gladius. Secundum; quod per actum dilectionis Christus meruit, nec tamen libere Deum diligebat.

27. Sed contra primum est, quod innocentibus pueris data fuit æterna gloria non proprie sub notione præmii & mercedis, sed solummodo hæreditatis, vel ipsis ex privilegio specialis, tamquam primis pro Christo victimis, collatam esse gloriam martyribus debitam, ut ait S. Bernard. in ferm. de Natal. Innoc. *Sisunt, inquit, Martyres tui Deus, ut in quibus nec Angelus nec homo meritum invenit, singularis tua prærogativa gratiæ evidentius commendatur.* Contra secundum; in primis non est certum, Christum per actum dilectionis erga Deum meruisse, sed hoc admissio, duplex in ipso erat dilectio, una progrediens à visione beata, erat enim comprehensor, alia à scientia infusa, erat enim viator, & actus hujus dilectionis liber erat & voluntarius, sicut libera fuit & voluntaria electio passionis, de qua dictum fuit Isaiæ 53. *Oblatus est, quia ipse voluit.* Et ipse Dominus Joan. 10. *Nemo tollit animam meam à me, sed ego pono eam, & rursus, potestatem habeo ponendi animam meam.* Verum de Christi libertate agendum erit in questionibus de Verbi Divini Incarnatione.

28. Immo ita censeo necessariam esse ad meritum hujusmodi indifferentionem, ut neque per aliam Divinam providentiam aliter possit evenire. Per quam enim operationem aliquid mereri

Tom. II.

possimus, nisi per eam, quæ sub dominio nostro continetur, & potest fieri vel non fieri, & hoc vel illo modo? Certe meremur per ea, quæ alteri subijcimus; at quid alteri subijcere possumus, quam id, quod in nostra est potestate? Hinc est etiam vulgatum illud Arist. 3. Ethic. c. 5. *Naturalibus nec meremur nec demeremur.* Quapropter si Deus aliquod nostrum naturale, idest necessarium opus acceptaret, atque illud remuneratione prosequi vellet eam ipsi promittendo, tunc res promissa præmium non esset, sed donum, atque opus nostrum sola conditio esset, non meritum.

29. Quæritur 4. An ad meritum requiratur promissio Dei gratuita.

In hac re varia sunt opinati Doctores, quorum nos sententiam referemus, eas tamen utpote inutiles non examinabimus. Prima sententia est Cajetani in 1. 2. qu. 114. art. 3. Dominici à Soto lib. 3. de nat. & gr. cap. 7. quibus adherere videtur Cacher. tract. 5. de grat. §. 3. docet ista, opera bona iustorum esse meritoria de condigno æternæ gloriæ, etiamsi nullum foret Divinum pactum & promissio. Secunda quam plures recentiores tribuunt Scoto in 1. dif. 17. qu. 2. & aliis pluribus ex antiquis Scholasticis, innuere videtur, opera bona ex se meritoria de condigno nequaquam esse, sed totum meritum à Divina promissione proficisci. Tertia tandem, quæ magis communis est apud Doctores, asserit nec à solo opere bono, nec à sola Divina promissione meritum derivare. Utcumque res ista sit.

30. Existimandum est ad meritum, saltem prout de facto, requiri gratuitam Dei promissionem, & quamvis hæc inferri possit ex dictis in antec. attamen amplius insinuat, primo ratione, quia, si opera nostra quæcumque sint, considerentur juxta naturam suam, remotaque promissione, cum æterna gloria proportionem non servant juxta illud Apostoli, *Non sunt condignæ passionibus &c.* præsertim quod illa debita sunt Deo

quoecumque alio titulo, & potuissent exigi, esto nullum primum conferendum esset. Secundo ex testimoniis Sanctorum Patrum, inter quos clarius loquitur Euseb. Emisen. in hom. 3. ad Monac. ubi ait. *Totus licet anima & corporis laboribus defudemus, totis obediuntia viribus exerceamur, nihil tamen condignum merito pro celestibus bonis compensare & offerre valebimus.* 3. ex proposito. 2. damnata à Pio V. quæ erat ista. *Sicut opus malum ex natura sua est mortis æternæ meritorium, sic opus bonum ex natura sua est vitæ æternæ meritorium.* Quanquam quid plura? aperta in hac re est Concilii Tridentini definitio; audiamus quid dicat sess. 6. cap. ult. *Bene operantibus, inquit, proponenda est vitæ æternæ tanquam gratia misericorditer promissa, & tanquam merces ex ipsius Dei promissione reddenda.* Quod multo ante jam statutum fuerat à Concil. Mogunt. dicente, *Opera iustorum sunt dignæ remuneratione vitæ æternæ, quia (notetur casualis) Deus bene operantis misericorditer mercedem promittit.*

31. Querit. 3. utrum ad meritum requiratur charitas, seu ordinatio charitatis à qua procedat. Responsio est affirmativa; & adverto, aliquod opus procedere posse à charitate vel actu, vel virtute, seu interpretativè, vel habitu, quæ explicanda sunt juxta ea, quæ traduntur de intentione, de qua hic à nobis agendum non est; Responsio nostra est de ordine habito à charitate secundo modo. Suadeo autem primo ex scripturis asserentibus, virtutem charitatis necessariam esse, ut opus sit Deo gratum præmioque dignum. Sic 1. ad Corint. 13. *Si Charitatem non habuerit &c. rursus; Nec auris audit &c. quæ preparavit Deus diligentibus se.* Ad Galat. 5. *In Christo Jesu neque circumcisio valet, neque præputium, sed fides, quæ per dilectionem operatur.* Neque ad servandam harum auctoritatem veritatem; satis est, charitatem habitu tantum & de concomitanti se habere; etenim hoc da-

to non plus requireretur charitas, quam quælibet ex aliis virtutibus infusus, quæ simul reperiuntur in homine gratiam habente, debet autem charitati munus aliquod convenire, quod cæteris virtutibus commune non sit.

32. Querit. 6. an major gratia & charitas majoris sit meriti causa. Aliqui parum rem perpendentes ita argumentum proponerent; gratia & charitas est causa meriti, ergo major gratia & charitas causa majoris meriti, atque ad probandam illationem, uterentur cum illi, *Ita se habet magis ad magis sicut simpliciter ad simpliciter.* Attamen responsio nostra est; Majorem gratiam & charitatem solummodo habitualem meritum non augere. Ratio est, quia gratia & charitas habitualis operi meritorio dignitatem non præbet, nisi influant in illud auxilii actualis virtute, & ideo dignos non reddunt actus naturales quamvis progredientes ab homine iusto, atque maior gratia & charitas habitualis semper magis non influunt in opus meritorium, quia non semper ipsis annexum est majus atque intensius auxilium actuale, ergo. Præterea. Præmium æternæ vitæ promittitur actibus non habitibus, qui si influunt, vel magis influunt, de materiali dumtaxat & de concomitanti, ut ajunt, se habent in subiecto, nisi applicentur per auxilium actuale, sunt enim qualitates mortuæ, ut alibi dictum est, ergo. Non inficior tamen, quod, cum gratia habitualis soleat sibi postulare uberiora auxilia actualia, solet etiam ipsum meritum augere.

33. Querit. 7. an major arduitas operis conferat ad majus meritum. Arduitas ista oriri potest vel ab operante ex quo non prompta ferventique voluntate operetur, & tunc major arduitas non solum non infert majus meritum, sed minuit, vel ex magnitudine operis, & tunc inquiri; Vel agrediens opus minus difficile habet animum paratum ad illud aggrediendum etiam si difficillimum foret, ita ut amor in operante



te aliquid facile sit idem apretiativè cum eo, qui est in operante aliquid difficile; vel non habet; si hoc dicatur, arduitas infert majus meritum, non quidem ex parte objecti, sed ex parte actus; Si habet, resolutio stabilienda est juxta ea, quæ traduntur de actibus humanis dum sermo est de actu interno & externo, an scilicet actus externus addat bonitatem actui interno, ideo ad sua principia unumquemque dimitto.

34. *Quærit.* 8. an major intensio & continuatio actus sit majoris meriti causa. Responsio est affirmativa, actus enim intensior æquivaleret pluribus minus intensis, & continuatus per horam pluribus minus continuatis, sed quo plures sunt actus eo majus est meritum; ergo etiam quo diuturnior & intensior est actus, est majus meritum, & sicuti si quis habet affectum malum intensiorem & diuturniorem magis peccat, ita qui habet intensiorem & diuturniorem actum bonum, magis meretur.

35. *Quærit.* ultimo. Utrum ad meritum requiratur opus super erogationis. In hac sententia fuit Dionys. Cisterciensis. in 3. qu. 2. art. 3. ut diceret, opera, quæ sunt ex præcepto nequaquam meritoria esse, sed illa dumtaxat quæ sunt super erogationis & consilii. Hoc falso dici & erronee ex tota scriptura colligitur. Si vis ad vitam ingredi serva mandata, ait Christus Matt. 19. Diligite inimicos vestros, & erit merces vestra multa nimis inquit Luc. 6. præter alia plurima; Hinc est, quod si adultus mandata Dei custodiret, & nihil ex eis faceret, quæ præcepta non sunt, vitam æternam consequeretur. Immo, ut verum fatear, opus præceptum cæteris paribus magis meritorium est, quam non præceptum, illud siquidem addit circumstantiam obedientia, quæ procul dubio meritoria est; & quemadmodum opus factum ex voto, proinde ex debito, magis meritorium est, quam opus non ita factum, ut ostendunt Theologi cum S. Thoma ubi de Religione pertractant, ita opus factum

ex præcepto magis meritorium erit, quam quodcumque aliud, quod sit super erogationis vel consilii. Dixi cæteris paribus, etenim hujusmodi opera ad majus meritum conferre posse non reluctor, ut si quis v. g. opus præceptum, adimpleret tristi animo & vecordi, alius vero operi non præcepto magna fortitudine & hilaritate vacaret; si opus non præceptum esset ex genere suo nobilius alio præcepto, v. g. actus charitatis erga Deum non præceptus jejunio præcepto; Si opera ad consilium spectantia super addantur operibus ad præceptum pertinentibus &c.

### ARTICULUS III.

*Quid possit homo mereri sibi & aliis.*

36. **E**TIAM in hoc articulo ea pertracto, de quibus effuso calamo agunt Doctores, cum ad plenariam omnium resolutionem plura forent exponenda, quæ in aliis quæstionibus Deo dante proferemus.

Dico primo. Hominem non posse sibi mereri de condigno primam gratiam habitualement, non de congruo primam gratiam actualement; rursus non posse mereri de condigno reparationem post lapsum, neque perseverantiam finalem.

Ratio primæ & secundæ partis est, quia principium meriti in ea ratione, quæ est principium meriti nequit esse, præmium meriti, atqui gratia habitualis est principium meriti condigni, gratia actualis est principium meriti tum condigni, tum congrui, ergo. Major fundamentum desumit ex repugnantia mutæ causalitatis, & ex quo idem nequit esse prius & posterius, causa & effectus sui ipsius.

37. Ratio tertiæ desumitur primo, quia si homo posset sibi mereri reparationem post lapsum, posset per opus habitum ante justificationem sibi mereri justificationem, sed hoc est contra Tridentinum, ut dictum fuit, ergo. Secundod



do si posset &c. vel per opera antecedentia peccatum, vel per subsequencia, sed neutro modo, ergo. Prob. mi. Opera antecedentia nequeunt firmare jus in creatura, per quod ametur à Deo, siquidem homo peccando fit obiectum odii Dei, & voluntariè contrahit debitum ininicitia, opera subsequencia facta sunt in statu peccati, proinde sine forma, per quam reddantur digna, ergo.

38. Ratio quarta est; quia mereri perseverantiam finalem est mereri conjunctionem mortis cum gratia & jus ad gloriam inammissibile, atqui non potest homo mereri &c. ergo. Minor ostenditur, quia auxilium hoc, quo habetur conjunctio gratia cum &c. est magnum donum ex Concil. Trident. & licet non esset, adhuc infallibiliter non datur, ut requiritur ad meritum de condigno. Præterea; Utquid diceret Paulus 1. ad Corint. 1. *Qui se existimat stare, videat ne cadat*. Et ad Philip. 2. *Cum metu & tremore vestram salutem operamini*? Non me fatet, plures Doctores, inter quos Gab. à S. Vinc. Lorca, Gonet. Arriaga, arbitrari oppositum esse ut contra dogma fidei, aut saltem erroneum, attamen in hoc puncto nihil stabili, & quando quidpiam dicerem, contrarium sustinerem. Interim lectorem admoneo, ut ea videat, quæ de hac re dixi in quaestione de prædestinatione, & de finali perseverantia.

39. Ostendo modo, quare oppositum sustinerem, nec alio modo id ostendere possum, quam declarando contraria sententia momenta nihil probare. Primum momentum est, quod asserri posset ex Concil. Vien. in Clement. *Ad Nosstrum* de Hæretic. ubi damnantur Beguardæ asserentes, hominem in hac vita ad eum perfectionis gradum pervenire posse, in quo impeccabilis fiat, quod sequi videretur, si perseverantiam finalem posset de condigno promereri. Sed plane hoc consecrarium recte non inferitur; Nam perseverantia finalis reddit quidem hominem pro ultimo vitæ instanti

non peccantem, immò, si prius peccaverit, ad Deum conversum, non tamen ipsi confert impeccabilitatem, quod patet ex eo, quod esto pluribus hanc gratia Deus largiatur, adhuc tamen peccare possunt, nec beatis comparandi sunt, ut Beguardæ affirmabant, de quo errore alibi firmum tamen existimo, quod superiori numero demonstravi.

40. Secundum momentum est, quod asserre videtur Concil. Tridentin. scilicet 6. cap. 13. ubi ait: *donum illud, id est perseverantiam, aliunde haberi non posse, nisi ab eo, qui potens est eum, qui stat, statuere, ut perseveranter stet, & cum, qui cadit, restituere*. Et rursus, *nemo sibi certi aliquid absoluta certitudine pollicetur*. Sed quis non videt, ex neutro capite nihil concludi? Etiam augmentum gratia à solo Deo dari potest, cum non habeatur nisi per gratiam actualem, quam Dei donum esse nullus ibit inficias, & tamen augmentum gratia hominibus de condigno promereri potest; & quamvis hujusmodi meritum concederetur, adhuc nemo certus esset, sicut nemo certus est de rebus aliis, quas esse sub merito nemo dubitat.

41. Dices contra primam partem. Deus conferre potest primam gratiam, habitalem tanquam præmium eorum operum, quæ gratiam subsequenter, eo pacto quo Princeps conferre potest militi arma & equum, tanquam præmium victoria, quam per arma & equum obtinebit. Sed contra. Vel equus & arma, sunt principium merendi in milite, vel non. Si hoc dicatur, habetur disparitas, si illud, antecedens est falsum. Verum hoc argumentum promovebitur, ubi de merito Christi per respectum ad unionem hypostaticam.

42. Dices contra tertiam. Homo justus potest facere opus meritorium, propria reparationis, si peccabit, potest enim orare pro reparatione propria; ergo. Sed contra. Ratio hæc habebit meritum utcumque, nequaquam condignum; Sicut enim homo justus, si pec-

eabit, non potest condigne mereri, ne odio habeatur à Deo, ita nec potest mereri sui reparationem post lapsum. Adde, nos orare, & ea etiam consequi quorum tamen meritum non habemus, ut contingit in peccatoribus veniam petentibus & impetrantibus, nec tamen merentibus, ut constat ex publicano dicente, *Domine propitius esto mihi peccatori.*

43. Dices contra quartam. Augmentum gratiæ habitualis est majus præmium, quàm aliquod auxilium efficax ad finaliter perseverandum, & perpetuitas gloriæ plus est quam perpetuitas gratiæ, sed homo iustus potest tum illud tum illam de condigno promereri, ergo. Sed contra. Argumento huic pluribus responsionibus occurrere possumus; & primo negaret S. Bonavent. 2. dif. 27. art. 2. qu. 2. iustum de condigno mereri posse gratiæ habitualis augmentum, & rationem præcipuam affert in tertio argumento, quia gratia, quæ præsupponitur, minor est quam futura, nequit ergo esse principium meriti de condigno sui augmenti; Admittam nihilominus minorem illam, cum augmentum gratiæ in Scripturis Sacris propositum sit tanquam præmium bene operantibus, ut infra ostendam, asseratur vero mihi aliquis Scripturæ textus, in quo proposita sit tanquam premium finalis perseverantia. Præterea. Augmentum gratiæ comparatum auxilio efficaci seorsim majus præmium est, quam auxilium efficax; Si hoc tamen sumatur una simul cum augmento est procul dubio majus, & quia iustus mereri non potest hoc auxilium sine augmento gratiæ, ideo nullo modo mereri potest auxilium efficax in ea ratione, in qua est præmium minus augmento gratiæ. Tandem. Retinendo doctrinam à me & aliis Theologis traditam de finali perseverantia, falsa est major argumenti; auxilium enim efficax ad finaliter perseverandum non est auxilium efficax solum, sed quod amitti non potest, hoc autem majus est quocumque gratiæ habitualis augmento.

44. Si vero perpetuitatem gloriæ perpendamus, ut argumentum propositum postulat, concedo, hanc hominem promereri, sed nego, perpetuitatem gloriæ esse præmium distinctum ab ipsa gloria, siquidem hæc ex natura sua & propter statum est perpetua; perpetuitas contra gratiæ distincta est ab ipsa gratia: & ratio est, quia gloria non relinquit potestatem saltem proximam ad peccatum, relinquit tamen gratia; Illa perpetuitatem non potest amittere, potest ista. Præterea. Argumentum nimis probat; nam sequeretur, quod sicut perpetuitas gloriæ plus est, quam perpetuitas gratiæ, ita gloria plus est quam gratia, ergo si homo potest de condigno promereri gloriam poterit etiam gratiam, quod est falsum, aliter gratia non esset gratia ut pluries ex Apostolo dictum fuit. Aliam disparem rationem affert S. Thom. 1. 2. quæst. 114. art. 9. dicens, *perpetuitatem gloriæ comparari ad motum liberi arbitrii tanquam terminum, perpetuitatem vero gratiæ, sed perseverantiam finalem comparari tanquam principium omnino dependens à speciali Dei motione; & ideo illam sub merito esse, non istam.*

45. Declarandum nunc est quod superius dixi, augmentum gratiæ propositum esse tanquam præmium bene operantibus, seu esse promissum; Quamvis vero hoc aliis momentis demonstrare possem; attamen mihi sufficient scripturæ testimonia ex quibus tantum solidius argumentum possumus haurire. Aptissimum est quod legitur 2. ad Corint. 9. ubi postquam Apostolus dixerit. *Potens est Deus omnem gratiam abundare facere in vobis, ut in omnibus semper omnem, sufficientiam habentes, abundetis in omne opus bonum, sicut scriptum est, dispersit, dedit pauperibus, iustitia ejus manet in sæculum sæculi.* Addit, *Qui autem administrat semen seminanti* (ecce administratio primæ gratiæ, quæ aliorum operum, quæ bona sunt, semen est,) *multiplicabit semen vestrum & auget incrementum*

*mentum frugum iustitiæ vestrae*. Vides, hic fidelium iustitiæ locum esse, ergo & merito. Secundo illud produco, quod habetur Joan. 14. *Si quis diligit me, mandata mea servabit, & ego rogabo Patrem, & aliam Paracletum dabit vobis*. Videntur hæc verba parum ad rem nostram conferre, attamen si rectè perpendantur, satis convincunt. Promittitur Spiritus Sanctus diligenti & servanti mandata; quo pacto promittitur, si nec diligi Deus, nec mandata servari possunt sine Spiritu Sancto? Respondet Augustin. tract. 74. in Joan. dicens. *Restat, ut intelligamus, Spiritum Sanctum habere qui diligit, & habendo mereri, ut plus habeat, ut plus habendo plus diligat*. Hæc Augustini autoritas controversiæ locum non relinquit. Hinc Concil. Trident. sess. 6. can. 32. hæc definit. *Si quis dixerit, hominis iustificati bona opera &c. non vere mereri augmentum gratiæ &c. anathema sit*.

46. Dicendum secundo. Hominem non posse mereri de condigno alteri primam gratiam sanctificantem, vel remissionem peccatorum. Hoc enim soli Christo reservatum est; ratio non deest, quia meritum de condigno debet esse ex Divinæ gratiæ motione, ac præsupponere Divinam ordinationem. Deus autem, nec movet, nec dirigit opera iustorum ad aliorum justificationem de condigno obtinendam, cum pro hac re nullum fundamentum ex Scripturis & Patribus afferri possit; atque eorum opera à gratia adoptionis progrediantur, non vero à gratia capitis, quæ reperitur in solo Christo, qui constitutus est caput vivorum & mortuorum, sicut Iudex; Datur vero hoc discrimen inter gratiam adoptionis & capitis, quod illa conceditur ad reddendum Sanctum tantummodo subiectum, in quo est, hæc vero influxum saltem moralem habet etiam in alios, ut traditur in tract. de Incarnat. Docuit hoc S. Leo ep. 92. cap. 2. ubi ait: *Quamvis multorum Sanctorum in conspectu Domini pretiosa mors fuerit, nullius*

*tamen infantis occiso redemptio fuit mundi, acceperunt iusti non dedere coronas, & de fortitudine fidelium nata sunt exempla patientiæ, non dona iustitiæ*.

47. Si vero sermo instituitur de merito congruo, censeo, hominem posse mereri alteri primam gratiam, cum enim homo in gratia constitutus Dei voluntatem adimpleat, congruum videtur juxta amicitia leges, à Deo adimpleri voluntatem illius, & hoc pacto dicunt Sancti Patres per orationes Stephani tantam gratiam & miram adeo conversionem Saulum obtinuisse, in quo sensu explicatur id, quod legitur Jacobi 5. *Orate pro invicem, ut salvemini, multum enim valet deprecatio iusti assidua*.

43. Quod dixi ante num. 47. tenet in præsentem rerum ordine; Quid enim in alio vel fieri potuisset, vel posset investigare superfluum existimo.

## ARTICULUS ULTIMUS.

*An & quomodo in iustificatis merita reviviscant.*

49. **P**ER peccatum deperdi merita omnia, quæ peccatum præcesserunt, ita certum est, sicut non posse juxta præsentem providentiam gratiam si nul esse cum peccato in dubium revocari non potest. Revertatur inde homo contritus ad Deum, de quo dictum est, *cor contritum & humiliatum Deus non despicies*, quaritur, an prior gratia, & priora merita homini restituantur, seu, ut loquuntur Theologi, in ipso reviviscant.

Plures in hac re Doctorum afferunt sententiæ. Voluerunt aliqui suppreffo nomine relati, merita priora reviviscere per ordinem ad præmium accidentale explicatum per gaudium de bonis operibus factis ante peccatum, quo beatorum animæ perfundentur. Aliqui, præsertim Bannez 2. 2. qu. 24. art. 6. reviviscere etiam ad præmium essentiale tum gratiæ tum gloriæ, attamen

men præmium hoc in sui entitate non esse majus, quam si non reviviscerent. Primum dicendi modum temerarium appellat Suarez, secundum vero falsissimum & erroneum censet Ledesma, & à nobis sententiam nostram infra probantibus declarabitur. Docuerunt alii, inter quos Ledesma & Sotus, dari meritum reviviscientiam etiam ad præmium essentiale, ita ut quo majora fuerint, majus etiam sit istud, non tamen semper quo ad totum, sed juxta mensuram dispositionis, per quam homo justificationem obtinuit, ita ut, si contritio fuerit summa, merita summè reviviscunt, si media, tantum dimidiata, & sic loquendo, vel aliis terminis, quatuor gradibus contritionis correspondant quatuor gradus gratiæ novæ & quatuor gradus gratiæ antiquæ, ut explicat Joan. à S. Thom. & Granad. cum pluribus aliis Thomistis. Alii tandem, senserunt, in hominis justificatione, quomodocumque habita fuerit, sive per dispositionem summam, sive non, merita reviviscere ad præmium essentiale totum & integrum; Ita Scot. in 4. dif. 23. qu. unica art. 2. cum suis, Nomin. Durand. Henric. Suarez, Lugus, Esparza, Cacheran. nec non S. Th. in 4. dif. 14. qu. 2.

50. Dicendum 1. Merita per peccatum deperdita in justificatione reviviscere. Punctum hoc aliqui Theologi censent esse dogma fidei; esse tamen saltem certum certitudine Theologica refragabitur nemo. Colligitur autem ex Divina Scriptura; Ad Galat. 3. scribit Apost. *Tanta passis estis sine causa? sita-men sine causa?* Ubi exprobat illorum lapsum post gratiam baptismatis & opera facta, & correctio illa, *si tamen sine causa* indicat, futura ipsis utilia præterita opera, si penitentiam egerint Joel. 2. *Reddam vobis annos, quos comedit locusta*, ubi habet Glossa, *non patiar perire ubertatem, quam perturbationibus animi perdidistis*. Textus istos ita exposuit Concil. Trident. quod sess. 6. cap. 16. in

Tom. II.

quit: *Non modo conservantibus primam gratiam, sed etiam aliis, qui amissam recuperaverunt proponenda esse verba Apostoli ad Hebr. 6. abundate in omni opere bono, scientes, quod non est inanis labor vester in Domino, non enim injustus est Dominus, ut obliviscatur &c.* quod etiam ex mente Sanctorum Patrum licet colligere, præsertim Sancti Hieronymi dicentis: *Qui ob Christi fidem laboraverit, & postea lapsus fuerit, priora opera non perdet, si ad pristinam fidem revertatur.* Ergo.

51. Dicendum 2. reviviscere ex integro. Ita Scot. loc. cit. cum suis & communiori parte Neotericorum.

Prob. Si nulla sit necessitas oppositum asserendi, debemus dicere, merita propriè reviviscere; sed si ex integro non reviviscerent, impropriè reviviscerent, & nulla est necessitas hoc asserendi, ergo. Maj. pat. tum ex communi principio, tum ex quo Scripturæ & Patres absolute loquentes de peccatorum reviviscencia, non sunt absque necessitate intelligenda cum limitatione. Prob. prima pars min. reviviscere ex vi nominis est priorem vitam recuperare, & pars vitæ prioris non est propriè prima vita, ergo. Prob. secunda. Si aliqua est necessitas præsertim ob dispositionem quæ justificationem antecedit, ita ut meritum reviviscencia debeat illi commensurari, sed hoc est falsum, ergo. Prob. mi. primo quia hæc dispositio non est physica sed moralis, ergo dari potest intensior gratia, quàm fuerit dispositio. Secundo existente eadem contritione & dispositione contritus plus gratiæ recipet cum Sacramento, quàm extra Sacramentum, ergo gratia non commensuratur dispositioni. Tertio; ratio illa nimis probaret, quia sequeretur, nec quidem partialiter gratiam antecedentem & merita reviviscere, nam quanta est dispositio præsens, qua quis justificatur, tanta est gratia nova, quæ infunditur, addatur ergo quantumvis minima gratia antiqua recuperata, semper comple-

H h

ple-



plexum hoc ex gratia antiqua & nova illam dispositionem excedet, ergo.

52. Dices, doctrinam hanc esse contra Tridentinum, quod sess. 6. cap. 7. asserit, gratiam recipi secundum uniuscujusque dispositionem, neque argumentum nostrum desumptum ex contritione in Sacramento, & contritione extra Sacramentum, quidpiam probare, siquidem in Sacramento reciperetur major gratia ex opere operato, non ex merito proprio, & opere operantis. Sed contra. Tridentinum loquitur de gratia, quæ novo infunditur, non quæ recuperatur, aut etiam si de hac loquatur, uniuscujusque dispositio accipienda est non tantum de præsentī, sed etiam de præterito, unde reviviscencia non solum correspondet merito præsentī, verum etiam præterito, aliter nec partialiter merita reviviscerent, ut probavi. Quare sicuti gratia ex merito alieno potest excedere mensuram meriti proprii, ita gratia ex merito præterito potest excedere mensuram dispositionis & meriti præsentis, & sic excluditur quod secundo loco addebatur.

53. Ob. contra primam. Dum homo post justificationem peccat, non reviviscunt priora demerita, ergo neque dum homo post lapsum justificatur, reviviscunt priora merita. Consequentia tenet, nam sicut demeritum se habet ad poenam, ita meritum se habet ad præmiū. Præterea. Ezechiel. 18. *Si autem averterit se justus à justitia sua, & fecerit iniquitatem, omnes justitie illius non recordabuntur*, sed si merita reviviscerent, Deus earum recordaretur, ergo.

Resp. conc. ant. ne. cons. etenim, ut ait Scotus loco cit. prætermisiss aliis responsonibus, quas asserit Vasquez disp. 221. demerita prorsus tolluntur, atque delentur omnino, ut contra Sectariorum dictum est, nec ullo pacto Deus remanet creditor, & ideo non tantum suspenduntur; è contra post lapsum hominum præteritum suspenditur tantum &

mortificatur, ut ex Trident. doctrina colligitur. Quodnam autem sit discrimen inter opera mortua, mortifera, & mortificata, superfluum existimo tradere, nec enim tyronibus in omnibus scribo, sed jam in Theologia non mediocriter versatis; Ratio autem Theologica esse potest, quia peccator per poenitentiam, dedit etiam solutionem Deo, quantum exigit culpa & commutatio poenæ æternæ in temporaneam; è contra Deus nihil dedit illius meritis, quæ erant ante peccatum, quare ablato obice peccati habet homo adhuc jus ad petenda pro antecedentibus meritis mercedem, ad quam ex Divina dispositione jus prius habebat.

54. Ob. 2. Paucis complectendo, quæ diffusis verbis ab aliis exponitur. Primo; data sententia nostra sequeretur ex peccato emolumentum, quia gratia antiquæ adderetur nova. Secundo; daretur occasio peccandi, quia auferetur timor quidquam amittendi. Tertio; idem numero effectus reproduceretur. Quarto; si damnato Deus gratiam infunderet, illius merita reviviscerent, & ita non essent prorsus extincta.

Resp. ne. ant. gratia enim antiqua rediret ex vi operum præcedentium posita reconciliatione tanquam conditione removente prohibens, quæ, si non fuisset peccatum, multo magis crevisset, quam sit emolumentum habitum ex nova gratiæ infusione: Quis tamen ibit inficias, maximum per peccatum allatum esse detrimentum, per quod factum est, ut toto illo tempore opera hominis fuerint mortua, cum tamen fuissent viva & meritoria? Rursus relinquitur in homine etiam post justificationem quædam prava inclinatio ex actu peccaminoso progrediens, & tandem superest debitum poenam temporalem subeundi. En igitur emolumentum ex peccato progrediens, en major peccandi licentia, quod si etiam auferretur timor, haberetur aliunde compensatio multo major & utilior, augetur videlicet



licet animus ad poenitentiam cum spe recuperandi meriti præteriti, ex quo fieret, hominem poenitere non posset, si prius in actibus meritorii se exercuerit. Tertium non repugnat, præsertim loquendo in linea morali. Quartum non est ad rem, nam si esset absolute damnatus, haberetur decretum efficax illi gratiam non dandi, quod si hoc non haberetur, non esset absolute damnatus, &

nihil mirum si merita reviviscerent. Atque hæc dicta pro hoc tractatu sint satis ad laudem Dei, qui gratiam largitur, Christi, qui gratiam promeruit, Virginis, quæ Divinæ gratiæ Mater est, Pauli, qui gratiam prædicavit, Sanctorum omnium, qui gratiæ fructum perceperunt. Omnia autem Sanctæ Romanæ Ecclesiæ, in qua solummodo gratia inveniri potest, subjecta volo censuræ,



212

1. The first part of the paper discusses the importance of the study of the history of the United States. It is argued that a knowledge of the past is essential for a full understanding of the present and for the development of a sound policy for the future. The author points out that the study of history is not only a means of acquiring knowledge, but also a means of developing the ability to think critically and to make sound judgments.

2. The second part of the paper discusses the importance of the study of the history of the United States. It is argued that a knowledge of the past is essential for a full understanding of the present and for the development of a sound policy for the future. The author points out that the study of history is not only a means of acquiring knowledge, but also a means of developing the ability to think critically and to make sound judgments.


3. The third part of the paper discusses the importance of the study of the history of the United States. It is argued that a knowledge of the past is essential for a full understanding of the present and for the development of a sound policy for the future. The author points out that the study of history is not only a means of acquiring knowledge, but also a means of developing the ability to think critically and to make sound judgments.

4. The fourth part of the paper discusses the importance of the study of the history of the United States. It is argued that a knowledge of the past is essential for a full understanding of the present and for the development of a sound policy for the future. The author points out that the study of history is not only a means of acquiring knowledge, but also a means of developing the ability to think critically and to make sound judgments.

5. The fifth part of the paper discusses the importance of the study of the history of the United States. It is argued that a knowledge of the past is essential for a full understanding of the present and for the development of a sound policy for the future. The author points out that the study of history is not only a means of acquiring knowledge, but also a means of developing the ability to think critically and to make sound judgments.



## QUÆSTIONES ALIQUÆ DE PECCATIS.

1.  Uemadmodum, dum de virtute Theologica Fidei ejusdem opposita in medium afferre, operæ pretium existimavi-

mus, ita in præsentiarum; dum de gratia sermonem instituiamus, & quæ ad ejus tractatum præcipue spectare videntur fuerint resoluta, ejus contrarium exponere non inconsulto judicamus. Hoc peccatum esse inficiabitur nemo, qui vel gratiæ sanctificantis venustatem, vel peccati turpitudinem non ignorat. De hoc igitur pertractandum à nobis erit; atque ut plenius Pelagianorum error, cœterorumque novatorum refellatur, ab originali peccato ducemus exordium, aliqua prius generatim profere-

2. Et si peccati nomine vitium designari soleat, vel è contrario; attamen hoc discrimen inter utrumque à Theologis assertur, quod vitium illud appellari debet, quod ad instar habitus in aliquod malum inclinat, peccatum vero illud dicitur, quod ad operationem aliquam malam alicui virtuti oppositam pertinet. Explicari hoc potest exemplo; qui enim ex causâ in ebrietatem frequenter incidit, ebrietatis vitio addictus existimatur, qui vero casu ebrius fit, in ebrietate peccasse judicatur, quapropter S. August. in lib. de perfect. justitiæ cap. 4. cur-

vitatem tibiæ & claudicationem distinguens, illam comparat vitio, istam peccato, quod & fecit Arist. lib. 7. de morib. cap. 8. dicens, vitium esse quamdam hydropisim, quam sitim esse permanentem cuilibet compertum est.

3. Pluribus descriptionibus apud Doctores definitum reperitur peccatum, quibus omnibus prætermisissis illa communissime jam nota recipitur, quam tradidit Sanctus Augustinus lib. 22. contra Faustum cap. 27. nimirum, *dictum, factum, vel concupitum contra legem æternam Dei*. Cum in peccato duo reperiantur, jam vides per hanc definitionem utrumque explicari, nimirum quod ad materiam spectat, & quod ad formam, dum audis *dictum, factum, vel concupitum*, intellige materiale, est enim actio vel oris, vel operis, vel mentis & cordis, dum audis *contra legem æternam Dei* intellige formale, est enim deordinatio ab ea lege, cui quilibet debet parere creatura.

4. Videtur hujusmodi definitio non satis cujuscumque peccati naturam explicare. Primo; quia plura sunt peccata, quæ non sunt contra legem æternam Dei, sed contra legem humanam & Ecclesiasticam. Secundo; quia plura sunt, quæ, etiam præcisâ quacumque lege, peccata forent, ut sunt omnes actus intrinsecè mali, v. g. odium Dei & mendacium. Tertio; quia peccatum omissionis neque est dictum, nec factum, nec

nec concupitum. **Quartò;** quia peccatum originale, utpote nobis congenitum, huiusmodi non est, sicut & peccatum habituale, quod ab actu distingui debet.

5. Hæc omnia tamen falsa sunt. Falsum primum, etenim quicumque actus, qui sit contra legem humanam & Ecclesiasticam, est etiam contra legem æternam Dei, quæ præcipit sublimioribus potestatibus præstandam esse obedientiam, & ut ait Paulus ad Rom. 13. *Non est potestas nisi à Deo, & qui potestati resistit Dei ordinationi resistit.* Falsum secundum etenim quodcumque peccatum est malum quia prohibitum, & divisio illa vulgaris in malam quia prohibitum, & in prohibitum quia malum, aliud non significat, nisi aliqua ab optimo & sapientissimo Legislatore libere prohiberi, aliqua vero necessario, ita ut Divina perfectissima ratio ea non prohibere non possit. Hinc omne peccatum contra legem Dei est; Unde S. August. lib. 3. de liber. arbit. cap. 3. & 4. quærens, quare adulterium malum sit, respondet, ideo malum esse, quia libidine fit, libidinem autem malum esse, quia ab æterna lege recedit. Falsum est tertium, cum enim quælibet negatio cognoscatur per formam oppositam, in dicto, facto, vel concupito satis intelligimus omissionem, & ita v. g. de omittente Sacrum die Festo dicimus male ac irreligiose operari. Falsum est quartum, quamvis enim peccatum originale non sit dictum, vel factum, vel concupitum voluntate propria, est tamen voluntate aliena, in qua tanquam in voluntate capitis omnium hominum voluntas continebatur, ita sentit August. qui in lib. retract. hæc habet. *Ulad, quod in parvulis dicitur originale peccatum, cum adhuc non utantur arbitrio voluntatis, non absurde vocatur etiam voluntarium, quia ex prima hominis voluntate contractum & factum est quodammodo hereditarium.* Quod tandem dicitur de peccato habituali non est ad rem, primo quia hic sermo est de peccato actuali. Secundo quia etiam ha-

bituale moraliter est dictum, factum, vel concupitum, quia est macula progrediens ex actu voluntario non retractato. Sed de hac re alibi.

6. Porro peccatum ita definitum, multifariam dividitur. Primo si partitionem ab objectis desumamus, peccata alia sunt carnalia, alia spiritualia, quare dixit Apost. 1. ad Corint. 7. *Emundemus nos ab omni inquinamento carnis & spiritus.* Ratio est, quia peccatum fit per deordinatam conversionem ad creaturas, istæ autem vel apprehenduntur sensibus carnis, ut cibis potus, concubitus, vel intelligentia mentis, ut honor, potestas &c. prior deordinatio peccati carnis est causa secunda peccati spiritus. In illa homines jumentis assimulantur, in ista Dæmonibus. Secundo dividitur peccatum propter sui originem in actuale & originale. Illum committitur propria uniuscujusque voluntate, hoc vero per naturalem propagationem à primo Parente contrahitur. Tertio dividitur propter legem in peccatum commissionis, & omissionis. Primum opponitur legi vel aliquid præcipienti, vel aliquid prohibenti; Secundum vero leges positivas & imperantes violat, illud propriè peccatum dicitur, istud delictum, ut adnotat August. qu. 20. in Levit. ubi cap. 7. alia Sacrificia decernuntur pro peccatis, alia pro delictis. Quarto dividitur propter varias personas, quæ peccato lædi possunt, in peccatum contra Deum, contra proximum, contra nos, ideo admonebat Paulus ad Timot. cap. 2. ut sobrie, justè, ac pie in hoc sæculo viveremus, sobriè ne peccemus in nos, justè, ne peccemus in proximum, pie, ne peccemus in Deum. Quinto addi potest alia divisio peccati in Patrem, in Filium, in Spiritum Sanctum, quamvis enim per peccatum omnibus tribus personis injuria fiat, attamen peccat in Patrem, qui peccat ex infirmitate, cum Patri tribuatur omnipotentia, peccat in Filium qui peccat ex ignorantia, vincibili utique, quia Filio tribuitur sapien-

tia,

tia, peccat in Spiritum Sanctum, qui peccat ex malitia, quia Spiritui Sancto tribuitur bonitas. Tandem aliud est peccatum lethale, aliud veniale, primum nos omnino avertit à Deo, & ipsi æterna poena debita est; Secundum vero nos

retardat in motu ad Deum, à Deo tamen non avertit, nec ejus amicitiam dissolvit. De quo suo loco dicemus. Hic, etsi omnibus notis, breviter expositis.

## QUÆSTIO I.

### De Peccato Originali.

#### §. I.

*An peccatum originale ex Adamo in posteros derivaverit.*

7. **P**UNCTUM hoc tanti ponderis est existimandum, ut peccati originalis notitia sit primus nostræ Religionis cardo, ex hoc enim pendet fides redemptionis nostræ factæ per Christum, cum nec indigeat Medico qui sanus est, nec Redemptore qui captivitatis vincula nequâquam sentit. Primus, qui ex instituto peccatum originale negaverit in Adæ posteris, fuit Pelagius ineunte Sæculo 5. ut scribit Sanctus Augustinus in lib. de pec. orig. & de pec. mer. & remis. cap. 2. & alibi. Ita ut voluerit, peccatum primi parentis illi soli detrimentum attulisse, morbos vero, concupiscentiam, mortem ex illo peccato non progredi, sed esse naturales humanæ naturæ defectus. Mitius decursu temporis Catholicorum momentis convicti alii Pelagii Sectatores se gesserunt, atque in eam devenere sententiam, ut primum hominem non moriturum, si non peccasset, asseruerint, docuerint tamen, mortem corporis per generationem in posteros profuisse, non vero mortem animæ, proinde neque peccatum, quod indicat S. August. lib. 4. contra duas epist. Pelagian. cap. 2.

8. Error iste non fuit suis contentus authoribus, sed pluribus sectatoribus atque propagatoribus gloriatur. In priori sensu acceptus fuit Anabaptistis, cum negarent isti infantes esse baptizandos, eo quia peccato originali carerent; acceptus & Albigenis, ut asserit S. Antoninus in sum. Theolog. par. 4. tit. 11. cap. 7. §. 5. immo prius Petro Abailardo, ut colligitur ex S. Bernard. ep. 188. In posteriori vero sensu traditur à Zuiniglio, Jacobo Fabro, eorumque fautoribus. Sed utcumque res se habeat.

9. Sentiendum, in omnes posteros naturali modo propagatos peccatum, Adæ transfusum esse, & ideo omnes nasci peccatores morti cæterisque miseriis obnoxios. Est dogma fidei.

Prob. primo ex Scripturis veteris testamenti; duas autem tantummodo proferam; Prima legitur Job. 14. *Quis potest facere mundum de immundo conceptum, semine? nonne tu qui solus es?* quem locum apud 70. interpretes sic habemus expositum; *Nemo mundum à sorde, nec infans, cujus est unius diei vita.* At immundities ista nequit esse nisi peccatum originale, ergo. Prob. mi. non potest esse ab ipsa natura, quæ per se sit sordida & immunda, cuncta enim quæ fecerat Deus visa sunt à Deo valde bona Gen. 1. propter quod nec potest esse à Deo, qui nequit esse author peccati, ut suo loco probabo; non potest esse peccatum actuale, cujus infantes incapaces omnino sunt, ergo nequit esse nisi peccatum originale.



Secunda habetur in pl. 50. *Ecce enim in iniquitatibus conceptus sum, & in peccatis concepit me mater mea.*

10. Hisce Scripturæ testimoniis Hæretici se non convinci gloriantur; atque ut primo textui respondeant, dicunt, illum intelligendum esse de sordibus corporis, quibus certissime nemo caret; ut experimento compertum est.

Secundum vero, textum pro nobis non probare contempdunt, quia in eo sermo est de iniquitatibus & peccatis, ita ut numerus pluralis usurpetur; potius ergo innuit iniquitates & peccata à parentibus commissa in uniuscujusque generatione.

11. Convincantur tamen necesse est, si velint ex æquo Scripturam accipere, atque perpendere. Ex primo textu ita in ipsos argumentum expono. In eo sermo est de illa sorde ac immunditia, quam Deus solus potest abstergere, sed hujusmodi est immunditia spiritus non corporis, ergo. Magis hoc declaratur, si in Scripturis Sacris sordes & immunditiæ iniquitates & peccata significant; Res autem ita se habet, lege caput 4. Zachar. & invenes, *Auferte vestimenta sordida ab eo, & dixit ad eum, ecce abstuli à te iniquitatem tuam.* Lege Hierem. in lament. cap. 1. & invenes, *sordes ejus in pedibus ejus, nec est recordata finis sui* non recordari autem finis sui peccatum est. Lege Isaiam in cap. 64. & invenes, justitias nostras menstruatae panno comparari. Neque secundi textus explicatio admitti potest, etenim quod vulgata nostra legit in plurali Hieronym. Pagninus alique in singulari declararunt ac reddiderunt, & hoc quidem juxta Hæbraicam lectionem; sed et si in plurali loquamur, loquutio satis propria & vera est; Fuit quidem peccatum Adæ unum numero, specie tamèn multiplex fuit; An non fuit superbia? suam potius quam Dei potestatem dilexit. An non furtum? cibum vetitum usurpavit. An non sacrilegium? Deo non credidit. An non homicidium? seipsum interemit.

An non fornicatio? mentis integritatem amisit. Ita sensit S. Augustin. in Enchir. cap. 44. & 45. Quid vero mihi proferunt in eo psalmo sermonem esse de parentum iniquitatibus? David non ex fornicaria vel adulterina copula conceptus erat, sed ex sancto legitimoque conjugio. Neque ultimum tenet, legatur enim totus psalmus, & in eo peccata proprie dicta Prophetam deplorare, veniamque humiliter petere intelliget unusquisque.

12. Prob. secundo ex Scripturis novi testamenti; mitto illud Joan. 1. *Ecce agnus Dei ecce qui tollit peccata mundi* in textu Græco legitur *peccatum*. Aliud Joan. 3. *Qui non credit in filium, ira Dei manet super eum* non dicitur ira Dei veniet, sed manet, ergo prius erat; adnotavit Sanct. Augustin. lib. 6. in Julian. cap. 12. aliud ad Rom. 3. *Omnes peccaverunt, & egent gloria Dei* si omnes, ergo etiam parvuli, sed isti non peccaverunt peccato proprio, ergo peccato Adæ; aliud ad Ephes. 2. *Eramus & nos natura filii iræ, sicut & cæteri.* Atque duo potissimum dicta Apostoli Pauli, quibus Catholica veritas traditur, in medium afferre contendo. Primum est in 2. epis. ad Corinth. cap. 5. *Si unus pro omnibus mortuus est, ergo omnes mortui sunt* conditionalem vero propositam affirmat ibidem Paulus absolute esse veram, cum addat, Christum pro omnibus mortuum esse, de qua re nihil hic subdam, cum alibi fuerit à nobis probata. Secundum est in epis. ad Rom. cap. 5. *Propterea sicut per unum hominem peccatum intravit in mundum, & per peccatum mors, & ita in omnes homines mors pertransiit, in quo omnes peccaverunt.* Hæc verba clarissima sunt, nec indigent aliqua explicatione, aut illatione.

13. Nihilo tamen minus hujusmodi dicti vim infirmare nituntur. Primo peccatum dici in mundum pertransisse non propagatione sed solum imitatione, quatenus omnes in peccando imitati sunt Adamum. Ita post Pelagium Erasmus. Secun-

Secundo peccatum in hunc mundum per unum hominem intrasse non proprie & secundum se, sed duntaxat in sui effectu, quatenus ex ipso prodierunt ærumnæ, ægrotudines, & mortalitas. Tertio ibi sermonem esse de peccato actuali Adæ, per quem certe peccatum intravit in mundum, quia ipse primus fuit, qui legem Domini violando, peccavit. Ita Zuñglius in digres: de peccato originali.

14. Verum omnes istæ expositiones vanæ sunt & omnino falsæ. Quod de imitatione dicitur optime novit ac confutavit S. Augustinus lib. de pecc. meritis ac remis. cap. 9. & epist. 89. ad Hilar. nosque ejusdem sequemur doctrinam. In primis juxta Pelagianorum hypothesim peccatum non intrasset in mundum per unum hominem, sed per Angelum, hic enim per sui inobedientiam & elationem pravo fuit hominibus exemplo, & primus fuit qui peccavit juxta illud Jo. 3. *Ab initio Diabolus peccat*. Quod si res in eorum sensu concedenda esset, cur dixit Apostolus omnes in Adamo peccasse, non sic in Eva, nonne ipsa fuit prima, quæ peccavit? *Nunquid*, (sunt verba præclarissimi Doctoris lib. contra Julian. num. 56.) *Evam non imitatur peccantes, aut peccatum generis humani non magis ex ipsa sumit initium? A muliere initium factum est peccati, & propter illam sic scriptum est Ecclesi. 23. morimur omnes; Cur ergo non vis attendere propterea potius Apostolum unum dixisse hominem per quem peccatum intravit in mundum; quia non imitationem sed generationem volebat intelligi, sicut enim a muliere initium peccati fuit, sic initium generationis a viro est*. Quanquam quid plura ex Augustino afferemus, cum ex ipso contextu quod intendimus clarissime colligatur? In eodem capite inquit Paulus præter multa. *Igitur sicut per unius delictum in omnes homines in condemnationem, sic & per unius justitiam in omnes homines in justificationem vitæ; sicut enim per inobedientiam unius homi-*

Tom. II.

*nis peccatores constituti sunt multi, ita & per unius obedientiam iusti constituentur multi*. Modo sic. Justitia Christi non per solam imitationem, sed per veram in Christo regenerationem derivatur in homines, ut manifestum est in parvulis, qui Christum imitari non valent, ergo etiam peccatum Adæ non per imitationem, sed per generationem in ipsos derivatur; concludat hoc Augustinus dicens lib. 6. contra Julian. cap. 24. *Sicut non imitantur Christum parvuli, quia nondum possunt, & tamen ad ejus gratiam Spiritualem pervenire possunt, ita sine imitatione primi hominis, contagione tamen ex ipso carnalis generatio obstricti sunt &c.* Hæc quod ad primam adversantium responsionem pertinet rejiciendum, sufficere posse videntur.

15. Jam vero ad rejiciendam secundam devenio, quam si admitteremus, Apostolus reprehendus esset tanquam ignarus, dicens enim, *peccatum in hunc mundum intravit, & per peccatum mors*, dixisset, mors in hunc mundum intravit, & per mortem mors, quod nihil minus congruum; ibi igitur & causa allata est, nimirum peccatum, & præcipuus peccati effectus, videlicet mors. Quod si diceretur, per peccatum intelligendam esse inclinationem, seu proximitatem ad peccatum, male diceretur, etenim non inclinatio seu proximitas ad peccatum est causa mortis, sed ipsum peccatum, nec dictum fuit Adamo, *quacumque die pronus eris ad comedendum, sed quacumque die comederis, morte morieris*. Constat hoc etiam apud nos, non enim proni ad occidendum vel furandum puniuntur, sed qui occidunt & furantur. Ex dictis contra primam Erasmi expositionem refellitur, quod tertio afferebatur. Peccatum enim actuale intravit in mundum per Angelum, aut si de mundo visibili velint esse sermonem, intravit per Evam. Quod si verba illa *per unum hominem* velles explicare per Evam, ut videtur innuere Ambros. in comment. dico pri-

mo illa commentaria huic Sancto Doctori tribuenda non esse; secundo hujusmodi explicationem ab omnibus rejici tanquam Apostoli verbis oppositam nota particulas illas, *in quo omnes peccaverunt* & ad virum, non ad foeminam, pertinere satis inspicies.

16. Prob. tertio ex Patribus, qui ante Hæresim Pelagianam scripserunt, quid enim fenserint posteriores Patres omnibus notum est. Occurrunt primo sæculo Dionys. Areopagit. & S. Ignat. Ille in lib. de Eccles. Hierarch. cap. 3. omnem humanam naturam donis omnibus gratuitis spoliata ac infectam esse testatur. Iste vero in epist. ad Tralian. hæc habet. *Imitatores estote passionum Christi, & dilectionis ejus, qua dilexit nos datus semetipsum pro nobis, ut nos sanguine suo mundaret ab antiqua impietate.* Quid est impietas antiqua nisi originale peccatum? Secundo sæculo Justin. in dial. cum Triphone inquit. *Christum natum & crucifixum esse humani generis causa quod per Adam in mortem, & fraudem, seductionemque serpentis conciderat.* Et Irenæus lib. 5. cap. 17. ait: *Delevit chirographum, debita nostra, affigens illud cruci, ut quemadmodum per lignum facti sumus debitores Deo, per lignum accipiamus debiti remissionem.* Tertio sæculo Cyprian. lib. 3. ep. 8. ad Fidum dicit. *Infans recens natus nil peccavit, nisi quod secundum Adam carnaliter natus contagium mortis antiquæ, prima natiuitate contraxit.* Origen. hom. 8. in Levit. scribit. *Quaecumque anima in carne nascitur, iniquitatis & peccati sordibus polluitur* & lib. 4. contra Cels. *In Adamo omnes moriuntur, & damnati sunt in similitudinem prævaricationis Adam, nec tam de uno quopiam, quam de toto humano genere Scriptura Divina loquitur.* Sæculo 4. Ambrosium, Hieronym. Augustinum in medium adducimus. Primus in apol. David cap. 11. ait: *Antequam nascamur, maculamur contagio, ante usuram lucis originis ipsius excipimus injuriam, in iniquitate concipimur.*

Secundus in comment. cap. 2. Micheæ inquit. *Unusquisque nostrum cum Adam de Paradiso cecidit, & in hujus mundi captivitate versatur.* Tertium vero legere quisque potest lib. 1. ad Simplic. qu. 1. & 2. quem scriptum esse ante Pelagianæ Hæresis ortum colligitur ex lib. retractat.

17. Hinc mirum non est, si Patrum sententiis accesserunt etiam Conciliorum definitiones, quibus assertum nostrum catholicum quarto probatur. Quid in hac re exoptatur? Quid in Concilio Palestino definitum fuerit ita manifestum est, ut ipse Pelagius errorem suum vel ad detestandum, vel ad involvendum fuerit compulsus. Historiam legat, qui velit, hoc tamen obiecit S. August. Juliano lib. 1. cap. 2. Quid in Concil. Milevit. ita conspiciatur, ut qui legerit Canonem secundum, hæc statuta esse reperiet. *Placuit, ut quicumque parvulos recentes ab uteris matrum baptizandos negat, aut dicit, in remissionem peccatorum eos quidem baptizari, sed nihil ex Adamo trahere originalis peccati, quod lavacro generationis expietur, anathema sit.* Quid in Concil. Arausic. can. 2. ita apparet, sicut clara sunt ista verba. *Si quis soli Adæ prævaricationem suam, & non ejus propagini asserit nocuisse; aut certe mortem tantum corporis, quæ pœna est peccati, non autem & peccatum, quod est mors animæ, per unum hominem in omne genus humanum transisse testatur, injustitiam Deo dabit contradicens Apostolo dicenti per unum hominem &c.* Idem decernitur in Carthag. à Zosimo confirmato, in Tolet. 6. & 12. in Mogunt. & tandem in Florent. & Trident. Idem definitur à Summis Pontificibus. Innoc. 1. Zosimo, Celestino, Leone, Gregorio &c.

18. Rem totam rationibus Theologicis superest demonstrare. Prima desumi potest ex remedio, quod pro omni statu naturæ fuit pro peccato originali, & in lege Moysæ fuit circumcisio, quæ aut fuit in sententia mea ad ipsum de-

len-

lendum; aut saltem juxta alios ad significandam ejusdem purgationem. Secunda & potissima colligitur ex necessitate baptismatis, *nisi enim quis renatus fuerit ex aqua & Spiritu Sancto non potest introire in Regnum Dei*. Joan. 3. confertur autem baptismus hisce verbis, *ego te baptizo*, idest lavo & mundo, *In nomine Patris, & Filii, & Spiritus Sancti*. Quæ vera non essent, nisi quid esset lavandum ac mundandum, nihil autem esset, nisi foret originale peccatum, cum actuale in parvulis esse non possit; notetur etiam verbum illud, *renatus*. Quomodo namque renasci quis potest per gratiam, nisi prius esset mortuus per peccatum? Perpendamus insuper caeremonias antiquissimas, quæ in baptismate adhibentur, videlicet exorcismum, & exsufflationem, quibus immundus spiritus ab infantibus baptizandis abjicitur, non posset autem abjici si non esset, nec esset, si per peccatum eos non teneret captivos. Hoc argumento usus est S. August. lib. 1. de pec. mer. & remis. cap. 34. & 6. contra Julian. cap. 2. Tertia ratio proponitur ex morte aliisque miseriis, quibus subjiuntur parvuli antequam propria voluntate mali aliquid egerint; non enim moriuntur homines nisi propter peccatum, ut verum sit quod tradit Apostolus ad Rom. 6. *stipendium peccati mors* & jam dixerat Deus Gen. 2. *quacumque die comederis, morte morieris*.

19. Dices. Mortem, aliasque ærumnas Adamo fuisse poenam, posteris vero non poenam, sed calamitatem atque infortunium; eo pacto quo si Pater culpa sua substantias dissipet, ipsi inopia poena est, filiis autem quos gignit non poena, sed calamitas est. Sed contra est quod legitur Ezechiel. 18. *Ecce omnes anime meæ sunt, ut anima patris, ita anima filii mea est; Anima quæ peccaverit ipsa morietur, filius non portabit iniquitatem patris nec pater portabit iniquitatem filii*. Si ergo moriuntur infantes, eorum anima peccaverunt. Quod si Exodi c. 20. dicitur *Deus visitans peccata patrum in* Tom. II.

*filios in tertiam & quartam generationem*; sensus est, per peccata patrum aliquando tantum aditum seu scandalum parari filiis, ut malos patres imitentur mali filii, & ideo à Deo visitantur, ita explicant S. Hieronymus in comment. ad idem caput S. Augustinus in illa verba, psal. 108. *in memoriam redeat iniquitas patrum ejus*. Nec non S. Joan. Chrysost. hom. 29. in Genes. explicatio autem est conformis contextui, adduntur enim hæc alia verba, *eorum, qui oderunt me*.

20. Dices contra rationem desumptam à Sacramento Baptismatis. Hoc conferri, non ut deleatur aliquod peccatum, sed ut homines consequantur Regnum Cælorum, ut patet ex verbis Christi; *Nisi quis renatus fuerit &c. non potest introire in Regnum Dei* cæterum etiam sine baptismate vitam æternam habent.

21. Responsonem hanc pluribus in locis Sanctus Augustinus confutavit; & primo serm. 14. de verbis Apost. docuit, si parvuli innocentes sunt, à Regno Cælorum excludi non posse, cum nullam poenam innocentibus Deus infligit, esset autem hujusmodi exclusio maxima poena, vel enim innocentes parvuli illud desiderarent, vel non, si primum, illo carere non sine maxima poena concipi potest, si secundum, non essent innocentes, quia magna foret in eorum corde perversitas. Præterea, quamnam est hujusmodi distinctio inter vitam æternam & Regnum Cælorum? Hoc prorsus inauditum est; Qui enim vitam æternam habet, Cælorum Regno potitur, qui hoc caret vitam æternam non habet; Si vis ad vitam ingredi, serva mandata, sed qui servat mandata Regnum Cælorum ingreditur, ergo vita æterna & Cælorum Regnum idem significant, & quemadmodum non habere æternam vitam est Regno Cælorum privari, ita vitam æternam habere est Regnum Cælorum consequi.

22. Alia ratio & quidem validissima ex eo habetur, quod Christus mortuus



fit pro impiis juxta illud ad Roman. 5. *Christus secundum tempus pro impiis mortuus est* & 1. Pet. 3. *Christus semel pro peccatis nostris mortuus est, justus pro injustis*. Atqui mortuus est pro omnibus & singulis, ut à nobis suo loco probatum fuit, ergo omnes & singuli sumus impii, non iniquitate propria, ut sunt parvuli, ergo iniquitate Adami proinde &c.

## §. I I.

*Afferuntur argumenta contraria, & refelluntur.*

23. **Q**uemadmodum nos à Scripturarum testimoniis assertionem nostram demonstraturi exorditi sumus, ita Pelagiani aliique à Scripturis Sanctis oppositum probaturi sumunt initium.

Primo ex veteri testamento argumentatur Julianus, & postea Zuinglius de baptismo in digressionem de pecc. origin. Ezech. 18. *Anima, quæ peccaverit, ipsa morietur, filius non portabit iniquitatem Patris*. Sed hoc dici non posset, si admittendum esset peccatum originale, quia omnes posterius portarent iniquitatem Adami, ergo.

24. Resp. primo. Id dictum esse prophetice respiciendo beneficium illud, quod per Incarnationem Domini Nostri Jesu Christi peragendum erat; Hujus adventu, & ante adventum, ejus fide delendum erat Chiographum decreti, ut peccatum Adæ nemini amplius noceret, dummodo quis vellet expoliare se veteri homine, qui fuit Adami, & induere novum hominem, qui est Christus. Hæc est responsio S. August. lib. 6. contra Julian. cap. 12. Mihi tamen magis arridet dicere, peccatum patris nostri Adami non fuisse solummodo Patris, sed uniuscujusque, verbis utar ejusdem Augustini lib. 6. contra Julian. cap. 10. quæ sunt ista. *Parentum peccata modo quodam dicuntur aliena, & rursus modo quo-*

*dam reperiuntur & nostra. Aliena quippe sunt proprietate actionis, & nostra sunt contagione propaginis.* Verum ex hoc textu argumentum pro nobis protulimus num. 19. sensus igitur verus est, filium non portare iniquitatem Patris, si agatur de iniquitate, quæ in filios non pertranseat, ut contingit in aliis patribus præter Adam, in quo omnes peccaverunt, ut probavimus.

25. Opp. secundo ex pluribus Sancti Pauli testimoniis, 2. ad Rom. 3. *non cognovi peccatum nisi per legem* & ut ait: c. 4. *ubi non est lex nec prævaricatio*, ergo in iis, in quibus non est cognitio legis nulla esse potest prævaricatio, nullum peccatum, sed in parvulis nulla est cognitio, ergo. Ad Rom. 5. *regnavit mors ab Adam usque ad Moysen in eos quoque qui non peccaverunt in similitudinem prævaricationis Adami* mors igitur non peccatum ad nos ab Adamo descendit. Ad Corint. 5. *Omnes vos manifestari oportet ante Tribunal Christi, ut referat unusquisque propria corporis, sicut gessit, sive bonum, sive malum*. Sed parvuli nihil boni vel mali gesserunt in corpore, ergo.

26. Resp. ex primo textu Apostoli probari solummodo ad summum non esse peccatum æquale sine cognitione, non vero originale, de quo est questio, ideo Zuinglius ita argumentando in illud incidit vitium, quod Logici vocant principii petitionem; dixi *ad summum*. Etenim etiam sine lege ejusdemque cognitione, si ignorantia voluntaria sit, est peccatum & prævaricatio; qui enim *sine lege peccaverunt sine lege peribunt*, ait Paulus ad Rom. 2. Rectius tamen dici potest, parvulos non cognovisse legem cognitione propria, cognovisse vero cognitione Adami in quo continebantur, & in quo audierunt, *quocumque die comederis, morte morieris*. Unde ait August. lib. 3. de peccat. meritis & remis. cap. 7. *In Adam omnes tunc peccaverunt, quia omnes ille unus fuerunt, & quidquid erat in futura propagine vita unius homi-*



*nis continebat.* Ad 2. intelligendum ly non peccaverunt propria voluntate, non voluntate Adami. Mors enim illa, ut declarat Augustinus lib.6. contra Julian. cap.4. est poena iusta, ergo ipsam culpa præcessit, quare eodem contextu ait Apost. per unum hominem &c. & per peccatum mors. Ad 3. Videtur textus ille ad adultos dumtaxat referri. Sed peto ab adversariis, manifestantur ne parvuli ante Tribunal Christi! Si negant, ergo nullum est argumentum; si affirmant, referet unusquisque opus suum non patratum voluntate propria sed aliena; Neque in hoc aliqua ipsis fiet injuria, sicut enim non baptizati referunt opus suum malum aliena mala voluntate, ita baptizati referunt suum opus bonum aliena bona voluntate credendi; Si ergo illis prodest credidisse per alios, mirum non sit, si eis noceat peccasse per alium. Augustinus hoc sibi jam opposuit; & ita respondit lib.6. contra Julian. cap.10. & ita responsionem concludit. *Quam importune nolis, parvulum de alieno peccato reportare malum, ut velis eum de alieno recte facto reportare bonum, non qualecumque, sed Dei Regnum, alienum quippe opus fuit, cum credidit per alterum, sicut alienum opus fuit, dum peccavit in altero.*

27. Alia plura opponunt ex sacris litteris; sed nihili habenda sunt. Hujusmodi est illud ad Rom.5. *Sicut per unius inobedientiam peccatores constituti sunt multi &c.* Et aliud ibidem. *Usque ad legem peccatum erat in mundo, peccatum autem non imputabatur, cum lex non esset.* Etenim in primo textu pro multis significantur omnes, Scriptura enim utrumque adhibet pro eodem, ut præter testimonia à nobis adducta legitur in Genes. cap. 17. ubi de Abrahamo dicitur. *Patrem multarum gentium constitui te.* Et postea cap.22. *In semine tuo benedicentur omnes gentes.* Congruum autem fuit, Scripturam tali pacto se explicare, etenim aliquando sunt multi, licet non omnes, & aliquando sunt om-

nes licet non sint multi. Si quis enim diceret, Apostolos Christi fuisse duodecim, omnes diceret, non tamen multos & si quis diceret; Multi homines diligunt Deum, multos diceret, non tamen omnes. In secundo vero textu non negatur fuisse peccatum, sed solum non imputari, eo quia ab hominibus non erat habitum & cognitum ut peccatum, imputabatur tamen à Deo, ut constat ex poena, qua illud punivit.

28. Ob. 3. ex SS. Patribus. Primo occurrunt Tertullianus & Justinus. Primus in lib. de carnis resur. mortem asserit esse poenam prævaricationis Adæ, at de peccati macula silet omnino, & c.18. de baptis. parvulos baptizandi reprehendit consuetudinem, cur, ait, *festinat innocens ætas ad remissionem peccatorum?* Secundus vero in resp. ad Orthodox. qu.88. illud Jobi, *nemo mundus à forde* ad infantes docet non pertinere. Præterea Clem. Alexand. lib. 3. Strom. in fine inquit: *Dicant ergo nobis, ubi fornicatus est infans natus, vel quomodo in Adæ cecidit execrationem, qui nihil est operatus?* Et advertendum, Clementem tunc scripsisse contra Tatianos, qui ut refert Epiphan. hæresi 46. nuptias damna- bant fornicationibus, pares illas existimando, & peccatum originale tanquam hujus erroris fundamentum stabili- bant; hoc ergo negavit Clemens.

29. Resp. Tertullianum Ecclesie consuetudinem parvulos baptizandi reprobasse, sed hoc perperam ab ipso factum est, non negasse tamen maculam peccati, etenim in lib. de anima cap.40. inquit: *Anima eo usque in Adam censetur, donec in Christo recensatur, peccatrix autem quia immunda.* Innocentes igitur appellavit infantes, si de peccatis propriis sermo sit, censuit autem differendum esse baptismum, usque dum ad ætatem adultam pervenirent, ut inde maculæ etiam actualium peccatorum baptismate diluerentur; In priori autem libro necesse non erat peccati macula mentionem faceret, agebat enim  
tunc

tunc contra Marcionem, qui carnis resurrectionem negabat, ideo ipsi satis erat de sola corporis morte disserere, argumentum Tertulliani erat hoc. Primus Adam mortem intulit corpori, ergo secundus Adam, Christus, corpori vitam est allaturus. Quod ad Justinum spectat; Si laudatus liber ejusdem est, ex eo nihil probatur, etenim in illa quaestione agitur de peccato actuali, & verum est hoc infantes coinquinatos non esse; dixi, si ejusdem est, arbitror enim oppositum, ad hoc moveor, quia in eo sermo est de Origene, & Manichæis, qui Justino fuerunt posteriores. Quantum ad Clementem Alexandr. falsum est Tatianos, seu Excratitas tanquam proprii erroris basem peccatum originale supposuisse, sed peccatum actuale juxta Platonis doctrinam, qui asserēbat animam ante unionem corporis peccasse, & propterea hanc ipsi poenam infligam esse, ut vinculis corporeis teneretur, atque hoc indicant illa verba, *dicant ergo nobis; ubi fornicatus est infans natus?* ideo posteriora, *quomodo Ade cecidit execrationem?* explicanda sunt de execratione, progrediente à peccato actuali, quod ab infante nondum nato commissum, supponebatur. Non incior tamen, hunc Sanctum Doctorem Scripturas illas, quibus à nobis peccatum originale probatur, aliquantulum detorquere, ita ut Pelagiano errori favere videatur; nihilominus ut illum benigne excipiamus & interpretemur, aliqua non desunt. Primo quia, ut apparet ex libris S. Augustini, nunquam Pelagiani eum tanquam sui Patronum adduxerunt. Secundo quia cum Tatiani textibus illis, *nemo mundus à sorde*. Et. *Ecce in iniquitatibus conceptus sum* abuterentur ad probandum assertum Platicum, satis erat Justino illos sic explicare, ut declararetur, ex illis non probari aliquod peccatum commissum esse, antequam corporibus animæ unirentur.

30. Maxime vero gloriantur professe S. Joan. Chrysost. & quidem pluri-

bus in locis; Primo hom. ad Neopl. hæc habet. *Infantulos baptizamus, quamvis non sint inquinati peccato, nempe ut eis addatur sanctitas, justitia, adoptio, hæreditas & fraternitas Christi*. Nota illa verba, *non sint inquinati*. Eis addatur. Supponuntur ergo sancti & justii. 2. hom. 17. in epist. ad Corint. *Quid igitur faciam, inquis, propter illum, videlicet Adamum, pecco?* Minime propter illum. *Neque enim tu sine peccato permansisti: quod si non idem peccatum, tamen aliud commisisti*. 3. hom. 39. in eandem epist. *Quid igitur, dic mihi, num omnes in Adam morte peccati mortui sunt? Quomodo ergo Noe vir justus sæculo suo fuit &c. Itaque si hoc de corpore dictum esse velimus, constabit oratio, si autem de justitia & peccato, nequaquam*. Contra ita itaque est mortalitas corporis, minime mors animæ, proinde neque peccatum, quod certe manifestissime declaratur amplius idem Doctor hom. 10. in ep. ad Roman. ubi ait: *Videtur quaestionem non parvum habere quod dictum est, videlicet multos ob unius inobedientiam peccatores extitisse*. Illo enim peccante ac mortali effekte, & qui ex eo orti sunt, eos tales esse, nihil absurdum; At ex illius inobedientia alterum peccatorem extitisse, quam, obsecro, congruentiam & consequentiam habet? *Quid igitur hoc loco verbum hoc peccatores significat? mihi videtur tantundem significare, quantum illud, supplicio obnoxii, ac mortis rei, quod Adam mortuo, omnes mortales effeti*.

31. Toto tamen Cœlo aberrant, qui Chrysostomum Pelagiano errori favisse arbitrantur. Eum defendit S. August. lib. 1. contra Julian. cap. 2. & 6. ubi sic effatur. *Inane verba S. Joannis Episcopi audes opponere, absit absit hoc malum de tanto viro credere, aut dicere, absit inquam, ut Constantinopolitanus Joannes tot ac tantis Cœpiscopis suis, maximeque Romano Innocentio, Carthaginensi Cypriano, Cappadoci Basilio, Nazianzeno Gregorio; Gallo Hilario, Mediolanensi refi-*

refstat Ambrosio. Atque ut magis ostenderet quod dicebat inter plura, quæ ex Chrysostomi libris colliguntur, duo affert ejusdem loca. Primus est in homi. ad Neophyt. ubi inquit: *Venit semel Christus, invenit nostrum Chirographum patrum, quod scripsit Adam. Ille initium induxit debiti, nos sanus auximus posterioribus peccatis.* Nota Chirographum Paternum appellari nostrum, nota initium debiti distingui ab aliis peccatis, quæ propria voluntate committimus. Secundus est in hom. 10. in ep. ad Rom. ubi ait: *Quod Christo crux & sepulcrum, hoc nobis baptisma fuit, quamvis non iisdem in rebus. Ille enim carni & mortuus, & sepultus est, nos autem peccato utrumque.* Id est etiam in anima. Hisce adde quæ leguntur in ejusdem hom. 40. in ep. 1. ad Corint. nimirum. *Deus in regenerationis lavacro mentem gratia tangit, radicale peccatum coellit, & ut tu aurum, ferrumque recoquendo, purum, novumque facis, sic spiritus ille sanctus in baptismo, velut in fornace recoquit ipsam, & peccatum confumendo quolibet auro purius splendentem reddit.* Perpende ly radicale peccatum, & si non asseris peccatum originale, quid aliud affirmabis?

32. Hisce expositis facillime opposita refutabis. Primum textum intellige, parvulos non esse inquinatos peccato actuali, & simul advertas oportet, Chrysostomum disputationem instituisse contra eos, qui existimabant in baptismo non infundi gratiam & dona supernaturalia, sed solum remitti peccata per extrinsecam condonationem eo modo quo fieri inter homines solet, & ideo dixit eis addi sanctitatem, justitiam, adoptionem &c. omnia hæc videlicet ultra peccatorum remissionem; Quod si non addidit *peccato proprio* hoc ab eo factum est, quia disputans in Ecclesia Catholica se non aliter intelligendum esse arbitrabatur, nondum enim tunc erant Pelagiani, & hæc responsio est August. loco citato.

33. Ad secundum tunc Chrysost. Prædicatorem agebat, atque eos alloquebatur, qui jam baptismatis gratiam receperant, & cum multa atque gravia peccata patrarent, damnationis suæ causam Adamo tribuebant; ideo tertio loco opponit Noe, Jobum, aliosque viros sanctos & justos, qui etsi peccatum Adæ contraxerint, tamen justè sancteque vixerunt; Verum autem est, in regeneratis peccatum non remanere, sed solummodo corporis mortem, quod si dixit, *num omnes in Adam morte peccati mortui sunt?* loquitur de morte peccati irreparabili, ita ut non sit mors animæ, cui remedium præstitum est, sicut mors corporis, quæ ineluctabiliter omnibus est statuta, & sic explicata tertium.

34. Ad postremum. Etsi ibi corporeæ mortis mentionem fecerit, spiritualementamen non exclusit aut negavit, immo cum eam dixerit esse supplicium, hanc præsupposuit, aliter injusta fuisset poena. Absurdum, quod visum est Chrysostomo hujusmodi erat, quod Adamo peccante actu proprio, omnes etiam actu proprio, constituti essent peccatores, ita ut peccatum actuale unius foret etiam peccatum actuale alterius, quod nequaquam dici potest. Fuerunt itaque & sunt omnes, qui nascuntur, peccatores, qualis fuit Adam post peccatum, fuit autem peccator non actu sed habitu, proinde morti obnoxius, ac supplicii reus.

Juxta expositam doctrinam uno vel altero modo explicandi sunt alii Patres, si qui opponantur.

35. Opp. 5. rationibus. Prima ea est, quam promovet Julian. apud S. August. lib. 2. de nuptiis & concupis. cap. 28. *Non peccat, inquit, qui nascitur, non peccat qui genuit, non peccat ille qui condidit, per quas igitur rimas inter tot præsidia innocentie, peccatum fingis ingressum?* Et certè quodlibet peccatum voluntarium esse debet, at in parvulis nihil quod voluntarium sit, esse potest, ergo nec ullum peccatum.

36. Resp. conc. ant. ne. conf. esto enim

enim non peccet; qui nascitur, nec qui genuit, nec qui condidit, peccati tamen causa alia non deest, nimirum Adam. *Quid queris*, respondet S. August. Juliano in laudato loco, *latentem rimam, cum habeas apertissimam januam? Per unum hominem*, ait Apostolus, *peccatum in hunc mundum intravit, quid queris amplius, quid queris apertius, quid queris inculcatius?* Debet, fateor, quodlibet peccatum esse voluntarium, sed vel physice vel moraliter, non solum physice, vel voluntate propria vel aliena, in qua continetur propria, non sic semper propria; Porro voluntas uniuscujusque hominis continebatur in voluntate Adæ tanquam in capite & principio totius humanæ speciei, unde dicit S. August. pluribus in locis, Adamum, cum peccavit totius humani generis gessisse personam, & ideo præceptum illud non comedendi de ligno impositum ipsi fuit non ut soli homini privato & singulari, sed ut omnium capiti à quo tam conservatio quàm amissio originalis justitiæ dependebat ita ordinante ac disponente Deo tanquam supremo omnium Domino habente magis in potestate sua voluntates hominum, quàm ipsi suas. Si enim humana Respublica etiam inconsultis pupillis horum voluntatem transfert in voluntatem tutoris, ita ut quidquid facit tutor, censeatur factum à pupillis, quanto magis hoc fieri potuit à Deo? præsertim quia si nos, quod fortasse durum videtur, præcepto suo obligavit in Adamo, ad nos etiam transferre volebat omnia dona, quæ erant in Adamo, si præceptum servasset, quod erat pactum, prorsus æquale. Quare autem ita Deus voluerit ac decreverit, justissimum judicium Dei fateamur, quamvis nobis occultum. *Nostra est*, ait Bernard. serm. 1. de Dom. 1. post oct. Epiphan. *Adam culpa, quia etsi in alio, nos tamen peccavimus, & nobis justo Dei judicio imputatur, licet occulto.* Atque hæc prius fuit responsio S. August. lib. 5. contra Julianum cap. 3. Certum est quod ait Oseas

cap. 6. *Ipsi, sicut Adam transgressi sunt pactum, ibi pravaricati sunt in me.*

37. Secunda ratio in oppositum defumi potest à pari. Sicut enim justitia Christi non prodest nisi iis, qui credunt, ita injustitia Adæ nocere non potest nisi peccantibus; parvuli non peccant, ergo. Sed contra; eodem pacto de utraque nos loquimur, sed sicuti justitia Christi prodest, vel per actum proprium vel alienum, ut constat in parvulis qui baptizantur, ita injustitia Adæ nocuit per actum alienum. Ita S. August. lib. 6. ubi concludit. *Vide, quam importune nolis parvulum de alieno peccato reportare malum, & velis, cum de alieno recte factio reportare bonum, non qualemque, sed Dei Regnum, alienum quippe opus fuit, cum credidit per alterum; sicut alienum opus fuit, cum peccavit in altero.*

Plura alia opponi possent, sed suis locis adducenda & rejicienda reservantur. Hæc de peccati originalis existentia generatim dicta sint satis, quomodo vero ad posteros traducatur, & utrum ad omnes omnino inferius declarabimus.

### §. III.

#### De Peccati Originali essentia..

38. **M**ulta sunt, quæ ad quæsitum nostrum plenarie resolvendum, declaranda nobis proponuntur, quemadmodum plura sunt, quæ in hac re examinarunt tam Hæretici, quàm Doctores Catholici; neque mirum esse debet, cum, ut ait Augustin. in op. de moribus Eccl. *Hoc peccato antiquo nihil sit ad prædicandum tutius, nihil ad intelligendum secretius;* Quare, si prorsus omnis difficultas non auferatur in iis, quæ vel dicta, vel dicenda sunt, nemo me reprehendat, nisi reprehendat quotquot scripserint, vel scripturi sunt, nam si nulla difficultas superesset, fide non indigeremus ad peccatum originale credendum.

39. Ut in hac re ordo servetur & claritas,



ritas; afferendæ sunt omnium tam Hæreticorum, quam Catholicorum sententiæ, ut inde, quantum Deus dederit, nostram firmitus stabiliamus. Referamus primo quid Hæretici sentiant.

Lutheranorum & Calvinistarum communis opinio est, peccatum originale nihil esse, quam concupiscentiam, seu naturæ humanæ corruptionem ac pravitatem in anima residentem, per quam evadit homo sub ira Dei, & in carnis operibus se exercet, quæve pluries à S. Paulo peccatum vocatur. Huic errori subscribit etiam Malebranchius th. 4. de inquisitione verit. asserens privationem gratiæ sanctificantis esse effectum concupiscentiæ, quæ est peccatum originale quo ad ejus formam.

40. Est vero adnotandum, non in quacumque concupiscentia originale peccatum ab ipsis formaliter collocari; Alia enim est concupiscentia actualis, quæ explicatur per motus appetitus sensitivi excitatos ab ipsa voluntate, aut per motus indeliberatos, qui contra rationem, vel præter exurgunt. Alia est habitualis, & consistit in propensione ad bonum proprium & sensibile. Trifariam autem hoc contingere potest, vel prout est propensio ad bonum sensibile ut conveniens naturæ humanæ, quæ cum sensu & ratione prædita sit, naturaliter tendit & in bonum honestum & in bonum sensibile; vel prout est animæ inordinatio omnes animæ potentias pervadens, vel prout est inordinatio animæ corporisque membrorum; per quam vitiata remanet, & propensa ad illicitas voluptates. Non asserunt Hæretici peccatum originale consistere in concupiscentia actuali, asserunt enim, si explicetur per motus appetitus sensitivi excitatos à voluntate & ratione, fuisse etiam in statu justitiæ originalis, si vero per motus indeliberatos, qui contra vel præter rationem exurgant, posteriorem esse peccato originali tanquam hujus effectum; neque dicunt, consistere in concupiscentia habituali priori modo declarata, asserunt enim hanc naturaliter homini convenire, & fuisse etiam in Adamo gratiæ & donorum supernaturalium privilegiis exornato. De concupiscentia igitur in secundo & tertio sensu ipsi loquuntur, hancque tanquam formam originalis peccati stabiliunt.

41. Matthias vero Illyricus ex Lutheranis aliud quidpiam excogitavit, ita ut dixerit, esse quandam substantiam malam à Diabolo genitam, in quam Adam, peccando transformatus factus fuerit substantialis Diaboli imago, in posteros deinde generatione transfusa, quemadmodum enim in gratia constitutus erat imago Dei, ita peccato coinquinatus evasit imago Dæmonis. Est igitur per Illyricum anima, per peccatum tota substantialiter corrupta & mutata, non quidem tali mutatione, quæ sit vel generatio vel creatio, sed proprie transformatio, eo modo quo vinum vertitur in acetum.

42. Afferendum est primo concupiscentiam non esse formaliter peccatum originale.

Hanc veritatem apertis disertisque verbis definivit Concilium Tridentinum sess. 5. in decreto de peccato originali; Concilii verba liceat proferre. *Si quis per Jesu Christi Domini Nostri gratiam, quæ in baptismo confertur, reatum peccati originalis remitti negat, aut etiam asserit non tolli totum id, quod veram & propriam peccati rationem habet, sed illud dicit tantum radi aut non imputari, anathema sit, in renatis enim nihil odit Deus, quia nihil damnationis est eis, qui vere sepulti sunt cum Christo per baptismum in mortem, qui non secundum carnem ambulant, sed veterem hominem exeuntes, & novum, qui secundum Deum creatus est, induentes, innocentes, immaculati, puri, innoxii, ac Deo dilecti effecti sunt, hæredes quidem Dei, coheredes autem Christi, ita ut nihil prorsus eos ab ingressu Cæli remouetur: Manere autem in baptizatis concupiscentiam, vel fomitem hæc Sancta Synodus statuit, &c.*



*sentit, quæ cum ad agonem relicta sit nocere non consentientibus, sed viriliter per Christi Jesu gratiam repugnantibus non valet, quinimmo qui legitime certaverit, coronabitur. Hanc concupiscentiam, quam aliquando Apostolus peccatum appellat, Sancta Synodus declarat, Ecclesiam Catholicam nunquam intellexisse peccatum appellari; quod verè & propriè in venia peccatum sit, sed quia ex peccato est, & ad peccatum inclinat; Si quis autem contrarium senserit, anathema sit. Vides in hoc decreto quidquid à Lutheranis & Calvinistis dicitur omnino esse rejectum & condemnatum,*

43. Ne vero vanum esse existiment Hæretici quod est à Concilio definitum, operæ prærium est ea asserere momenta, quibus ad id definiendum permotum fuit, & hoc pacto assertionem nostram, ut par est, contra ipsos demonstrabimus. Fateor tamen punctum hoc jam satis demonstratum esse in tractatu de gratia, ubi declaratum fuit peccata in justificatione non solum tegi & non imputari, sed revera remitti, ac prorsus deleri, ex quibus sequitur per generationis lavacrum auferri prorsus peccatum originale, non auferri autem concupiscentia, non est ergo concupiscentia peccatum originale. Sed amplius sic. Asserere, concupiscentiam esse peccatum originale formaliter est contra Scripturas, Patres, & rationem, ergo,

44. Hujus argumenti antecedens singillatim probandum est. Itaque à Scripturis incipiam. Jacobus Apostolus c. 1, inquit. *Unusquisque tentatur à concupiscentia sua abstractus & illeceus, deinde concupiscentia cum conceperit, parit peccatum, peccatum vero cum consummatum fuerit, generat mortem.* Jam perspicis hic plura dici, & primo, hominem, qui tentatur, à concupiscentia sua tentari, secundo concupiscentiam concipere & peccatum parere; tertio peccatum perfici & consummari. Primus concupiscentiæ motus, in tentatione positus, est abstrahere & illicere, quod per suggestio-

nem fit. Secundus motus concupiscentiæ est concipere, quod fit per delectationem, tertius motus concupiscentiæ est parere peccatum, quod fit per consensum, ut explicant Gregor. homil. 16. in Evang. & Beda in comment. hujusce loci. Primus motus nullo pacto potest appellari peccatum, immo si ipsi resistentia fiat, nostram vertitur in coronam, ait enim idem Jacobus ibidem. *Beatus vir qui suffert tentationem, quoniam cum probatus fuerit, accipiet coronam vitæ.* Secundus motus, si sit cum delectatione sine consensu neque peccatum est, è contra si accedat consensus, peccatum paritur, & habetur tertius motus. Aliud est igitur concupiscere, & aliud concupiscentiæ obedire. Illud in hominibus remanet saltem in pronitate & inclinatione, hoc nequaquam, nisi ipsi velint; illud peccatum non est, hoc sine peccato non fit. Hinc Ecclesiast. 16. *legitur, post concupiscentias tuas ne eas, & ad Rom. 6. Non regnet peccatum in corpore vestro mortali ad obediendum concupiscentiis vestris.* Quod si fomiti & concupiscentiæ tribuendus esset reatus peccati, quo pacto dixisset Paulus 1. ad Corinth. 7. *Si acceperis uxorem non peccasti, si nupserit Virgo non peccavit?* Peccatum ergo est aliquid à fomite & concupiscentia distinctum,

45. Plura respondet Calvinus, quæ tamen ad hoc revocantur; quod ibi probetur, concupiscentiam non esse peccatum actuale, non vero non esse peccatum originale. Sed effugium hoc evanescit ex dictis supra num. 53. & amplius sic. Hæc concupiscentia, quam dicunt esse peccatum, vel est pronitas potentiæ concupiscibilis ad malum, vel est primus ejusdem motus, videlicet suggestio, sed neutra dici potest peccatum originale, ergo, Prob. mi, non potest esse suggestio, quia cum ista sit actus, potius deberet esse peccatum actuale, non potest esse pronitas, quia primo hæc indifferens est ad bonum & malum, & relinquitur nobis ad agonem, quo etiam in bono

exerceri possimus. Secundo quia, ideo esset peccatum, quia opponi videtur legi Dei, at si hoc esset, multo magis censendum foret peccatum ejusdem actus, idest suggestio, cum magis opponatur legi Dei actus, quam pronitas seu inclinatio ad actum, ergo.

Alia momenta, quæ colliguntur ex Epistolis Pauli, non recenseo, cum enim plura dicant in iis explicandis novatores, melius rependerentur, dum eorum argumenta refellemus.

46. Aptius rem prætrahimus; si Sanctos Patres, quibus proculdubio subscribendum est, in medium afferemus. Hoc autem præstabimus, si aliquos tam ex Græcis, quam ex Latinis producamus, aliquos dixi, ne nimium sermonem nostrum alienis laboribus, protraheremus; antequam vero id à me agatur, hoc argumentum proponam. Quod hominis naturæ tribui debet, peccatum dici non potest, atqui per Sanctos Patres concupiscentia hominis naturæ tribuitur, ergo peccatum dici non potest. Majorem suppono ex iis, quæ dicta sunt, ubi de puræ naturæ statu præstatum est; minorem vero suadeo; S. Basil. in lib. de Virginit. *Naturalis appetitus ad gulositatem, aut scortationem corpus titillat* explicat autem se amplius S. Doct. in lib. constit. Monastic. cap. 2. atque sic immoderatos concupiscentiæ motus naturales appellat, non ut fuerint natura nostra ante peccatum, vel non sint poena peccati, sed quia in natura nostra fuissent, nisi Deus supernaturali dono justitiæ originalis ditasset. S. Joan. Chrysost. hom. 19. ad populum. Antioch. *Nisi consuetudinem vincamus, quomodo concupiscentiam vincamus, cujus radix habet à natura principium? concupiscere enim naturale, at male concupiscere jam est voluntatis.* Et hom. 13. in epist. ad Rom. *Ipsæ passiones in se peccatum non sunt, affrænata vero ipsarum immoderantia peccatum operata est, concupiscentia quidem peccatum non est, quando vero egressa modum foras eruperit, tunc de-*

Tom. II.

*num adulterium fit non à concupiscentia, sed à nimio & illicito luxu.* Habes ex hisce, ut quamplurima prætereamus, concupiscentiam à natura esse, nec peccatum esse.

47. Ex Latinis Patribus, qui hoc idem confirment, tres eligam, Ambrosium, Hieronymum, & Augustinum; inquit porro Ambros. lib. 1. de offic. c. 21. *Non mediocriter est mitigare iracundiam, non inferius, quam omnino non commoveri. Hoc nostrum est, naturæ illud; Illæ denique commotiones in pueris innoxie sunt.* At quomodo innoxie essent, si concupiscentia peccatum esset? Hieronym. in ep. ad Oceanum ait. *Quomodo iustificati sumus, & sanctificati, si peccatum aliud in nobis relinquitur?* atqui relinquitur concupiscentia, ergo concupiscentia non est peccatum. Si vero Sanctum Augustinum ex integro asserere daretur, voluminem integrum pro hac solummodo re protul dubio impleveremus. Pauca igitur accipe, ampliora dicemus in argumentorum confutationibus. lib. 5. de civit. Dei cap. 25. hæc habet. *Ille concupiscentialis inobedientia quanto magis absque culpa est in corpore non consentientis, si absque culpa est in corpore dormientis?* & lib. 20. cap. 26. *Excepto uno mediatore, & post lavacrum generationis quibusque adhuc parvulis, nemo mundus à sorde, sicut scriptum est. Sentit ergo parvulus post lavacrum generationis mundos esse à qualibet sorde.* In lib. de continent. cap. 7. *languiorem istum culpa meruit, natura non habuit, quam sane culpam per lavacrum generationis Dei gratia fidelibus jam remisit, sed sub ejusdem medicamentis adhuc natura cum suo languore consistit.* Nota, culpam dici causam languoris, idest concupiscentiæ, non est ergo ipsa concupiscentia, secus idem esset causa sui ipsius, culpam esse remissam, adhuc tamen permanere languorem, ergo; quod & clarius expressit S. Doctor ser. 6. de ver. Apost. dicens, *Restat ergo cum carne consuetus, quia deleta est iniquitas, sed manet infirmitas.*

K k 2

48. Ex

48. Ex his possunt etiam colligi rationes aliquæ ad assertionem nostram ostendendam, sufficiens tamen illa sit, quæ probamus, possibilem fuisse statum puræ naturæ, in quo homo habuisset eandem concupiscentiam, quam nunc patitur, nec tamen fuisset peccatum ab Adamo derivatum; pro quo etiam recolendum quod diximus, ubi demonstratum est, hominem lapsum nequaquam debiliorem esse homine puro.

49. Asserendum secundo. Peccatum originale non esse quandam substantiam malam in sensu ab Illyrico explicato.

Hæc substantia mala rejici debet tanquam contraria Scripturis & Patribus; clamat Joan in Evang. cap. 1. *Omnia per ipsum facta sunt, & sine ipso factum est nihil*, aut ergo hæc substantia mala nihil est, vel aliquid, si nihil, quomodo substantia? Si aliquid, ergo à Deo facta est, & ita non erit, mala sed bona, dicente Paulo 1. ad Timot. 4. *Omnis creatura Dei bona est*. Si vero Sanctorum Patrum dicta perpendamus, occurrat statim Basil. orat. Quod Deus non sit author malorum, ubi ait. *Non inagineris aliquam propriam esse substantiam mali, nam malitia non est aliquid subsistens*. Occurrit Ambros. lib. 1. Hexameron cap. 8. ubi inquit: *Utique non substantialis, sed accidens est malitia*. Tandem August. lib. 7. confes. cap. 12. ubi habet; *Malum illud, quod querebam ubi esset, non est substantia, quia si substantia esset, bonum esset*. Tandem rationem aliquam asserere possum; etenim sicut nulla creatura esse potest substantialiter bona, hoc enim convenit soli Deo, ita nulla creatura esse potest substantialiter mala ergo; nisi velis asserere cum Manichæis, duos esse Deos, bonum unum, alterum malum.

## §. IV.

*Refelluntur argumenta Hereticorum.*

50. **O**B.I. pro Lutheranis & Calvin. plura Sancti Pauli testimonia. Ad Rom. 7. *Peccatum non cognovi nisi per legem, nam concupiscentiam nesciebam, nisi lex diceret, non concupisces*. Hic Apostolum concupiscentiam appellare peccatum, manifestum est; Rursus. *Si autem quod nolo illud facio, jam non ego operor illud, sed quod habitat in me peccatum, & iterum; Video aliam legem in membris meis repugnantem legi mentis meæ & captivantem me in lege peccati, quæ est in membris meis*. Porro hec aperte loqui de concupiscentia, nullus inficias ibit, est igitur concupiscentia peccatum. Tandem. *Infelix ego homo, quis me liberabit de corpore mortis hujus?* concupiscentia ergo est, quæ miserum hominem facit, ergo est peccatum.

51. Respondemus his, aliisque similibus, quæ asserri possent, concupiscentiam vocari peccatum improprie, vel quia ex peccato est, vel quia, si ipsi consensus præbeatur, est causa peccati. Totum autem hoc explicet S. August. qui lib. 3. de nuptiis & concupis. cap. 23. hæc habet. *Ipsa quidem concupiscentia jam non est peccatum in regeneratis, quando illi ad illicita opera non consentiunt, sed modo quodam peccatum vocatur quod & peccato facta est, & peccatum, si viceris, facit*. Et post pauca subdit. *Concupiscentia reatum Christi gratia per remissionem omnium peccatorum in regenerato, si ad mala opera ei quodammodo juberetur non obediat, valere non finit, sic autem vocatur peccatum, quia peccato facta est, cum in regeneratis non sit ipsa peccatum, sicut vocatur lingua loquutio, quam facit lingua, & manus vocatur Scriptura, quam facit manus, itemque sic vocatur peccatum, quia peccatum, si vincit, facit, sicut vocatur frigus pigrum, non quod à pigris fiat, sed quod pigros faciat*. Videant Hæretici, quomodo doctrina

Tri-

Tridentini à nobis superius laudata sit doctrina Augustini.

52. Dices. In regeneratis non esse peccatum, quia ad peccatum non imputatur; sed si Augustinus vult in regeneratis peccatum non esse, plane supponit, esse peccatum in non regeneratis, ergo saltem in istis peccatum originale in concupiscentia consistet. Hoc autem magis dici debet, si perpendantur ea, quæ habet August. lib. 5. contra Jul. cap. 3. ait enim. *Cæcitas cordis & peccatum est, quo in Deum non creditur, pœna peccati, qua cor superbia digna animadversione, punitur, & causa peccati, cum aliquid mali cordis errore committitur, ita carnis concupiscentia, adversus, quam bonus spiritus concupiscit, & peccatum est, inest illi inobedientia, pœna peccati est, quia reddita est meritis inobedientis, & causa peccati desolatio consentientis, vel contagine nascentis.* Concupiscentia ergo juxta mentem Augustini & est causa peccati subsequentis, & pœna præcedentis, & per se ipsam est peccatum.

53. Resp. primum punctum aliquod evincimus, nempe, saltem in baptizatis concupiscentiam non esse peccatum; dicimus autem hoc esse discrimen inter baptizatos, quod in illis nec peccatum est, nec cum peccato, è contra in istis esto peccatum non sit, tamen cum peccato est. Quod vero dicitur de non imputatione, jam rejectum fuit in quaest. de justificatione. Neque mihi opponant eundem August. dicentem lib. 1. de nuptiis & concupis. cap. 25. peccatum in baptismo remitti, *non ut non sit, sed ut non imputetur*, aut cap. 27. *reatu transire, actu manere.* Etenim nunquam dixit egregius iste Doctor peccatum in aliquo esse, sed non imputari, vel actu manere, & reatu transire, dixit enim in eodem libro cap. 26. *Hoc est non habere peccatum, reum non esse peccati.* Sensit igitur in adductis locis, concupiscentiam non esse peccatum, ad peccatum non imputari nec reum hominem facere, manere tamen, quia adhuc ab ea ho-

mines tentari non cessant; sed in hoc quid mirum? idem fuisset etiam in statu puræ naturæ, quapropter si alicubi peccatum ab ipso dicitur, hoc dicitur non propter concupiscentiam in se ipsa, sed propter annexum peccatum originale, seu culpabilem aversionem à Deo. Hoc aperte significat lib. 1. de nupt. & concupis. cap. 32. ubi habet. *Hec itaque remissio peccatorum quandiu non sit in prole, si ibi est lex ista peccati, ut etiam in peccatum imputetur, id est, ut etiam reatus ejus cum illa sit, qui cum teneat æterni supplicii debitorem.* Pro explicatione oppositæ nobis Augustini autoritatis, sciendum est, ab Augustino concupiscentiam aliquando non appellari peccatum, aliquando vero peccatum appellari; quando vero ipsam appellat peccatum improprie loquitur, cum velit tantum innuere vulnus & infirmitatem à peccato in humana natura relictam. Perpendas quid dicat lib. 2. contra Jul. cap. 3. asserit, in baptismo peccatorum omnium fieri remissionem, remanere tamen vitia & passionis, seu concupiscentiam, & cap. 5. docet, concupiscentiæ reatum perire in baptismo, manere tamen infirmitatem, atque hinc est, quod etiam in lib. 6. contra Julian. cap. 16. ait: *Tu autem, qui putas, quod finalum esset concupiscentia, careret ea qui baptizatur, multum erras, omni enim peccato caret, sed non omni malo; quod planius ita dicitur, omni reatu majorum, nunquid caret corruptione corporis? nunquid caret ignorantia malo &c.* Quod si diceret Kemnitius, S. Augustinum se retractasse, doceat ubi, aut se tanto Doctori injuriam facere fateatur.

54. Cur ergo inquires comparat concupiscentiam cordis cæcitati, qua in Deum non creditur? Hæc profecto peccatum est, ergo etiam peccatum est concupiscentia. Respon. comparari cordis cæcitati quantum ad aliqua, minime vero quantum ad omnia; comparatur in hoc, quia sicut cæcitati cordis debet resistere scientia, ita concupiscentiæ ac libidini



bidini debet resistere continentia, illam fide repellere debemus, hanc spiritu; in hoc vero differt, quod cæcitas cordis, qua in Deum credimus, & est poena peccati, & peccatum proprie dictum, quia sine voluntatis consensu non est; concupiscentia autem in motibus suis poena peccati est, & peccatum improprie dictum, quia est languor, vulnus, & infirmitas, non tamen peccatum, nisi quando consensus accesserit, aliter, ut idem Augustinus ibi subdit, frustra dictum esset, post concupiscentias tuas ne eas.

55. Ob. 2. plura. Primo. Deus odit etiam concupiscentiam illam, quæ remanet in regeneratis, sed Deus non odit nisi peccatum, ergo concupiscentia est peccatum. Major est S. August. in ps. 35. Secundo. Nos ipsi odio debemus habere concupiscentiam, ejusdemque motus tamquam illicitos cohibere, etiam si nobis nolentibus fiant. Tertio. Concupiscentia non est à Deo, sed quod solum poena est, & non culpa, est à Deo, ergo concupiscentia non solum poena peccati est, sed etiam culpa, seu peccatum. Quarto. Concupiscentia eadem lege prohibetur, qua peccatum, ergo est peccatum; Prob. ant. Id quod per se trahit ad malum eadem lege prohibetur, qua malum, sicut patet in osculis impudicis, atqui concupiscentia per se trahit ad peccatum, unusquisque enim tentatur à concupiscentia sua &c. ergo. Quinto. Quidquid ad solam poenam revocatur assumptum fuit à Christo Domino, sed non fuit assumpta concupiscentia, ergo quia non est sola poena. Sexto. Nulla est poena hujus vitæ, quæ ad finem bonum exoptari non possit, sed non potest exoptari concupiscentia, ergo.

56. Resp. A' Deo odio haberi concupiscentiam, & etiam à nobis odio habendam esse, quanvis enim peccatum non sit, attamen ad peccatum excitat & delectat, quare sicuti nos odio habemus, & Deus odio habet Dæmonem quatenus nos ad peccandum promovet, nec tamen

Dæmon est peccatum, ita &c. Falsum est etiam concupiscentiam à Deo factam esse, sed hæc oritur ex intrinseca imperfectione ipsius creaturæ, ut dictum fuit, ubi de statu naturæ puræ pertractatum est; Quod si Concilium Tridentinum asserit, Deum in renatis nihil odio habere, intelligitur de odio, quod ad personam referatur; quale non est odium, quod habet in concupiscentiam; neque enim Deus propter concupiscentiam vult Deus renatos damnare, sed illam paulatim consumere, ut tandem aliquando sanentur, & liberentur. Ad secundum jam dictum est. Ad tertium; si argumentum probaret, etiam mors non esset solummodo poena sed culpa, cum mors à Deo non sit, Deus enim, ut legitur Sap. 1. *mortem non fecit*. Concupiscentia non est à Deo, & est à Deo, non est à Deo, ut mala est, & ab ipso ut auctore, est tamen à Deo, ut bona est, & à Deo ut ultore, qui in poenam peccati originalis abstulit donum integritatis, quo caro spiritui subdita erat, & quo ablato, tanquam quodam freno, continuo sensit homo carnis pugnam & rebellionem, atque idem dicendum de morte, de qua S. August. lib. 5. contra Julian. cap. 7. *Deceptor hominis causa mortis est Diabolus, quam non ut primus auctor ejus, sed ut peccati ultor intulit Deus*. Ad quartum; ne. ant. nulla enim lex lata est in concupiscentiam, sed prohibetur solummodo consensus noster ad obediendum concupiscentiæ; ad prob. maj. est vera, quando aliquid trahit ad malum, quia nos volumus ad malum trahi, & ita prohibentur oscula impudica, si voluntaria sint, sicut & quæcumque alia, quæ peccata non sunt, nisi noster consensus accedat. Ad quintum; major est falsa, etenim ignorantia non est peccatum, sed poena peccati, nec tamen à Christo Domino assumpta fuit; Illas igitur poenas assumpsit, quæ ad redemptionis opus conferre poterant, ut tradit S. Th. 3. par. quæst. 15. art. 2. quare cum concupiscentia non esset hujusmodi



modi, ab ipso non fuit assumpta quamvis peccatum non sit. Præterea; licet concupiscentia peccatum non sit, attamen primum reddit hominem ad peccatum, quod in Christo esse non debebat, qui nec peccavit, nec peccare poterat. Ad ultimum. Ne. maj. liquidem ignorantia est poena hujus vitæ, sicut & Dæmonum tentationes, nec tamen exoptari possunt; & generatim de hujus vitæ poenis loquitur S. August. lib. 10. Confess. cap. 28. eas esse solvendas, non expetendas, de concupiscentia vero sic loquitur. *Concupiscentia expeti non debet, non quod peccatum sit, si ei non consentiamur, sed quia ad peccatum inducat, & ideo non amanda sed toleranda.*

57. Ob. 3. pro Illyrico ex sacris litteris; In istis peccatum originale appellatur corpus, cor, & principium operans, sed hæc omnia sunt substantia, ergo. Ad probandam maiorem opus est textus asserre. Apost. ad Rom. 6. inquit: *Vetus homo noster crucifixus est, ut destruat corpus peccati.* Peccatum igitur corpus est. De peccato originali ait idem ad Rom. 7. esse principium, originem, & radicem omnium peccatorum, hujusmodi autem principium &c. esse, cor, testatur Christus Matt. 15. *De corde exeunt cogitationes male, adulteria, furta, homicidia &c.* Peccatum igitur cor est. De eodem peccato dicit Paulus ibidem. *Peccatum operatum est in me omnem concupiscentiam.* Est igitur peccatum principium operans. Hinc Gen. 8. legitur; *Figmentum cordis humani malum est ab adolescentia sua.* Figmentum autem cordis est massa cordis, & ad Roman. 6. jubemur expoliare veterem hominem, idest peccatum, sed vetus homo, Adam scilicet, substantia est, ergo peccatum substantia est.

58. Resp. hæc omnia figurate non proprie dicta esse, quod sere semper usurpat Scriptura dum aliquid nobis inveniendum describit; sic dicitur ps. 68. *Operuit confusio faciem meam.* Et tamen quis dicat confusionem esse vestimen-

tum, quo facies operiatur? sed si velit Illyricus, ideo peccatum dicendum esse substantiam, quia per substantiæ nomen explicatur, cur non dicitur potius esse, privationem, cum plerumque explicetur per tenebras, & cecitatem? exempla non exhibeo, cum sint notissima. Nihilominus præfatos textus explicabo. In primo; corporis nomen aptatur peccato ad indicandam omnium peccatorum multitudinem ac collectionem, quæ destruitur per gratiam collatam ex meritis Christi; quare ait Tertullian. lib. de carnis resurrectione cap. 47. *Ut evacuatur corpus delinquentiæ per emendationem vitæ non per interitum substantiæ.* Sed rogo, dum dicitur, *Vetus homo crucifixus est*, est ne crucifixus Adam? Quis hoc dicit? Ad 2. falsum in primis est, peccatum originale esse principium & omnium peccatorum originem, liquidem primi parentes & Angeli peccato originali carentes in actuale peccatum inducerunt, & si Adam non peccasset adhuc plures ex posteris peccassent, ut tradidi in op. sex dierum. Præterea, quamvis concederemus, peccatum originale hujusmodi esse, adhuc non probaretur esse cor hominis, siquidem humanum cor est fons peccatorum adinstar principii effectivi, (melius tamen diceretur humana voluntas) è contra peccatum originale vel est peccatorum origo adinstar principii removens prohibens, idest removens iustitiam originalem, quæ erat fructum quodam concupiscentiæ, aut adinstar causæ proponens objectum & allicientis, in quo sensu etiam Dæmon dici potest fons peccatorum. Ad 3. operationem peccati explicamus ut supra, quia, deperdita per ipsum originali integritate, laxatis habenis dominatur concupiscentia, & quidem omnis, cum ad omnes peccatorum species homines distrahat, & alliciat. Neque pro cordis figmento massa, seu substantia cordis potest intelligi, sed pro cordis cognitione, quæ a corde fingitur & formatur, debet usurpari, hanc autem non substantiam esse, sed

sed accidens, vel substantiæ modificationem quisque sapiens fatetur. Tandem pro vetere homine Adami substantiam significari omnino ridiculum est; exposulare quidem debemus veterem hominem, idest deponere malas actiones & vitia, induere vero novum, idest bene agere & amplecti virtutem, *sicut enim*, ait Apost. 1. ad Corint. 15. *portavimus imaginem terrenti, ita portemus imaginem celestis* unde ad Rom. 13. *Induimini Dominum Jesum Christum* quod est Christum imitari, deponimus ergo veterem hominem, si quod monet Paulus ad Colossens. 3. *peragamus, Deponite*, inquit, *iram, indignationem, malitiam, blasphemiam &c.*

59. Ob. 4. Quod pugnat in legem Dei substantia est, sed peccatum originale pugnat in legem Dei, ergo substantia est; Totum argumentum ostenditur, quia *caro*, quæ certe substantia est, *concupiscit adversus Spiritum*. Præterea, Per peccatum destruitur imago Dei, & producitur imago Diaboli, illa substantia est, quia ut dicitur Gen. 1. *Creavit Deus hominem ad imaginem suam*, ergo & ista substantia est, præsertim quod homo per peccatum fit filius Diaboli juxta illud Joan. 8. *Vos ex Patre Diabolo estis* sed esse filium alicujus, est assimilari non in accidente sed in substantia, ergo imago Diaboli est substantia, adeoque etiam peccatum.

60. Resp. majorem esse veram, si loquamur de subjecto, in quo est forma, per quam quis pugnat in legem Dei, non ita si loquamur de ipsa forma; Peccatum autem, quodcumque illud sit, nequaquam est subjectum pugnans in Dei legem, hoc siquidem est ipse homo, sed est ipsamet contrarietas, repugnantia, & aversio à Deo, per quam à Divina lege homo declinat ac recedit, contrarietas autem, repugnantia, & aversio non est substantia, ergo peccatum substantia non est. Hinc S. Augustinus definiens peccatum non dixit, Peccatum est anima vel homo, sed dictum, factum, vel

concupitum contra legem æternam Dei. Hinc nomine carnis, non intelligitur caro ipsa materialiter, sed intelliguntur opera carnis. Ad 2. creavit Deus hominem ad imaginem suam; cum ipsum mente ac voluntate spiritali ditaverit, at quis unquam dicet, diabolum vel aliquid genuisse vel creasse, ut suam posset imaginem proferre? Gerunt quidem homines peccatores imaginem Diaboli non natura, sed imitatione, in quo sensu dicuntur etiam ejus filii, sicuti Paulus 1. ad Corint. 4. fatetur, se eos per Evangelium genuisse, atque fideles hortabatur, ut essent sui imitatores tanquam filii charissimi, sicut & ipse erat Christi; optime propterea Sanctus Augustinus adversus Adimantum cap. 5. alios distinguit filios per naturam, sicut Abel dicitur filius Adæ, alios per doctrinam, sicut erant Corinthii filii Pauli, alios per imitationem, eo modo quo idem Paulus vocat nos filios Abraham ad Rom. 4. quia ejus fidem imitamur. Porro peccatum nequaquam destruxit substantialem imaginem Dei, sed solum istius imaginis ornamenta, quæ per gratiam conferebantur, ita ut per peccatum obscurata fuerit ac deformis effecta.

61. Ob. 5. Peccatum originale præcipuam hominis partem corrumpit & transformavit, aliter falsa fuisset comminatio illa Gen. 2. *Quacumque die comederis, morte morieris*. Ergo est substantia. Præterea. Homines per peccatum dicuntur natura filii iræ ad Ephes. 2., ergo peccatum pertinet ad hominis naturam, proinde substantia est.

62. Resp. revera peccatum animæ mortem inferre, sed moralem & metaphoricam, non physicam & veram, quemadmodum enim gratia appellatur vita animæ per metaphoram, ita peccatum animæ mors dicitur; quod si etiam per ipsum destrueretur revera pars præcipua substantialis, non perinde substantia dici posset, sicut certe mors vera corporis aliquod substantiale non est. Explicat tamen S. Thom. 4. contra gen. cap. 50. comi-

comminationem illam non esse referendam ad interitum naturæ humanæ pro eadem die, qua Adam peccaret, sed tantum ad aliquam futuram diem, qua Adam reddendus esset obnoxius morti, ac reapse moriturus. Ad 2. Pluribus modis aliquid dici potest naturale, vel ex quo sit ipsa natura, vel quia per naturalem propagationem habeatur, vel quia aliquid naturæ sit consentaneum, tantum in secundo sensu nos dicimur filii iræ.

63. Plures alias ineptias Illyricus profert, quas asserre dedignamur, sed ad tantum temeritatis devenit, ut pro se citare Magistrum Sententiarum, & Sanctum Thomam non vereatur. Quam audacter & impie hoc dicat, viderit, qui istos legerit eximios Doctores.

## §. V.

*Referuntur & expenduntur alig in hac re Catholicorum sententia.*

64. **R** ejectis Hæreticorum erroribus, superest, ut alias Catholicorum sententias in medium producamus, atque declaremus. Non est itaque in hac re una Catholicorum assertio. Petrus Lombard. in 2. sent. dis. 31. §. 2. & 3. Henric. quodl. 2. q. 11. Greg. Arimin., in 2. dis. 30. q. 1. quamvis cum aliquo discrimine, peccatum originale statuant in quadam morbida qualitate ad desideria prava omnino excitante; differt autem in hoc horum opinio ab Hæreticorum errore, quod isti velint hanc esse peccatum, illi nequaquam.

65. Si per hanc morbidam qualitatem intelligant inclinationem ad objecta delectabilia etiam rationi contraria, nihil contra Doctores istos dici potest, sic enim non differt à concupiscentia, quam admittendam esse experientia nobis satis declarat; Si autem diversum sensum habere contendant, jam morbidam huiusmodi qualitatem in quæst. 3. de gratia art. 2. rejecimus, quanquam

Tom. II.

nec ipsa concupiscentia dici potest morbida qualitas, si hæc in positivo consistere stabiliatur, sed est solus defectus naturæ, qui, etiam remoto peccato fuisset, nisi gratia impedimentum apposuisset, ut enim ait August. lib. 4. contra Julian. cap. ult. *Quid est gustato cibo nuditas indicata, nisi peccato nudatum quod gratia contegebat, gratia quippe Dei magna erat, ubi terrenum & animale corpus bestialem libidinem non habebat.*

66. Videtur tamen hæc morbida qualitas Augustini testimoniis non carere. Primo ait lib. 1. de nuptiis & concupisc. cap. 25. *Non substantialiter manet, sicut aliquod corpus, aut spiritus, sed affectio est quædam malæ qualitatis, sicut languor.* Et cap. 31. *Carnem nunc appellavit, ubi est morbidus quidam carnis affectus.* Et denique lib. 5. contra Julian. cap. 3. dicit, animam in corpore tanquam in vase vitio corrupti, cum ex mala corporis qualitate mala qualitas redundet in animam.

67. Verum hisce jam respondimus supra; perpendantur tamen Doctoris præclarissimi verba, & primus Textus satis declarabitur, inquit, manere affectionem quamdam malæ qualitatis, sicut languorem, quid est autem languor, non nisi in humoribus corporis debita proportionis ac armoniæ privatio, sed hæc non consistit in aliqua positiva qualitate, ergo; innuitur itaque per illam malam qualitatem ipsa naturalis inclinatio ex sola justitiæ originalis carentia naturaliter in homine permanens, atque eodem pacto intellige morbidum carnis affectum in secundo testimonio affirmatum; corrumpitur etiam in corpore anima, idest inficitur, tanquam invase vitio, quia in eo priori naturæ, pro quo intelligitur creari à Deo, nullum peccatum illi inest, quia nihil habet, quod sit ex Adamo; cum vero incipit esse corporis forma, tunc peccatum originis contrahit, & sic corrumpi censetur, cum recipiatur in vase corrupto, cui propter generationem ex Adamo convenit esse

L 1

pac-

pœnis obnoxium & morti; sed de hac re in sequenti.

68. Est secunda sententia docens, peccatum originale aliud non esse, quam ipsum ab Adamo commissum, deinde posteris imputatum, & ideo esse meram denominationem extrinsecam derivatam ab actuali Adami prævaricatione ejus posteris imputata. Ita Albertus Pighius, Ambros. Catharin. Salmeron., paucique alii quamvis veteres, ut videri potest apud Magistrum sententiarum in 2. dif. 30.

69. Nullo tamen pacto hac admitti potest, etenim tanquam certum admitendum est, peccatum Adami ad nos pertinere, ita tamen ut non solum nobis imputetur, sed rêvera in nobis sit per earentiam justitiæ originalis & per maculam unicuique propriam; Hoc manifestissimis verbis traditur à Concilio Tridentino sess. 5. primo enim docet Adæ prævaricationem non soli Adæ nocuisse per amissionem Sanctitatis & justitiæ, & non solum per inobedienciæ peccatum mortem & pœnas corporis in omne genus humanum transfudisse, verum etiam peccatum, quod est mors animæ; Secundo docet, Adæ peccatum propagatione in omnes transfusum esse, & inesse unicuique proprium; Tertio docet, per gratiam baptismi reatum peccati originalis remitti, & auferri totum id, quod veram & propriam peccati rationem habet, & non solum radi, seu non imputari, quæ omnia vera non essent si prior sententia foret approbanda, ergo. Præterea in hac re validissimum argumentum facit, quod ait Apostolus ad Rom. 5. ubi comparat peccatum primi parentis per generationem à nobis contractum, justitiæ Christi, quam per regenerationem consequimur, sed justitiæ Christi ita se habet, ut illa nobis non tantum imputetur, sed per eam rêvera nobis justitiæ donetur, ergo etiam peccatum originis nobis non imputatur, sed per illud rêvera peccatores sumus, non quidem per actum peccati, qui fuit Adæ, hic

enim jam pertransiit, sed per reatum & maculam ex tali actu relictam. Hinc Adæ peccatum fuit unum, & multiplex, unum, si sumatur pro actione transeunte, multiplex vero, si sumatur pro eo, quod in anima remanet post actionem.

70. Ne tamen alias sententias in medium proferamus, nostra potius superest stabilienda, pro qua dicimus, quod si peccatum originale accipiat pro eo, quod remanet post actum, & propter quod homo dicitur & est proprie ac formaliter peccator, consistit in privatione justitiæ originalis debitæ, & in habituali aversione mentis à Deo inducitur per inobedienciam Adami, in quo omnes, ut ait Apost. ad Rom. 5. peccaverunt. Hæc procul dubio fuit opinio Sancti Thom. p. 2. qu. 82. art. 3. dicentis, *privatio justitiæ originalis, per quam voluntas subdebatur Deo, est formale in peccato originale*. Hæc Scoti querentis in 2. dif. 30. quæst. 2. quid formaliter sit peccatum originale, & respondentis dif. 32. quæst. unic. §. *Quoad primum*. Per peccatum, quod originale dico aliud intelligere nequeo in ipsis infantibus, nisi factum per inobedienciam Adæ justitiæ debitæ nuditatem per quam omnes sunt filii iræ; atque pro hac re assert testimonium S. Anselmi de concept. Virgin. cap. 27. Hæc tandem communis apud sapientiores Theologos, ut videri potest apud auctores.

71. Hanc autem melius suadere ac declarare non possum, quam primo loco ostendendo nihil esse, in quo peccati originalis essentia possit aptius collocari. Sic igitur argumentum instituo. In hominis peccatoris anima transeunte actu plura remanent, primo quidem ordo ad præcedentem actum, idest privatio gratiæ, quæ in eo consistit, ut aliquis nullum peccatum commiserit; secundo, reatus culpæ, per quam odio peccator habendus est, & quo se reddidit indignum amore; tertio, reatus pœnæ, idest obligatio ad pœnam subeundam; quarto, habi-



habitus acquisitus, seu dispositio & inclinatio ad iterum peccandum; quinto, offensa, & inimicitia ejus, qui per peccatum læsus est; sexto, averſio voluntatis à Deo adinſtar habitus, ut contingit in eo, qui, faciem avertens à ſole, manet ab eo averſus, donec faciem ad ſolam convertat; ſeptimo, gratia ſanctificantis à Deo inſuſa privatio; octavo, macula seu nuditas, quæ oritur ex privatione gratiæ per peccatum inducta; Si primum conſideremus, non poteſt eſſe, nec appellari peccatum, ſed tantum indicat peccatum habuiſſe, nec fieri poteſt non habuiſſe, ideo ordo iſte manet etiam in baptizatis poſt originalis peccati remiſſionem; Si ſecundum, non eſt propriè peccatum, ſed peccatum conſequitur tanquam aliquid manens in anima poſt actualem prævaricationem, (quamvis de hac re variè ſenſerint Scholaſtici, præſertim Scotiſtæ, de qua nolo diſputationem inſtituere.) Si tertium adeo diſtat à peccato, ut ſit aliquid boni à Deo inſtitutum ad reſtituendum juſtitia ordinem, eſt vitium & infirmitas, non vero peccatum, cum remaneat etiam poſt peccati remiſſionem; Si quintum, peccatum dici non poteſt, cum potius ſit in eo, in quem peccatum eſt, quam in eo qui peccavit. Alia poſtrema non diſſerunt inter ſe, quod enim dicimus privationem gratiæ & maculam, id intelligimus averſionem habituales, nam quemadmodum gratia Dei eſt forma animam convertens ad Deum illamque reddens gratam ac venuſtam, ita ejus privatio habitualiter à Deo avertit animam deformem conſtituens; Super eſt igitur, dicamus quod ſuperius à nobis fuit ſtabilitum.

72. Hanc porro doctrinam noſtram inter plura Concilia & Sanctos Patres confirmant Arauſicanum 2. & Anſelmus. Ut enim mors corporis intelligitur per carentiam animæ, quam prius habebat, ita mors animæ conſiſtit in privatione gratiæ ſanctificantis oriſta ex pec-

cato, cum igitur peccatum originale ſumptum non pro actione, ſed pro habitu, mors ſit animæ, ut deſignavit Arauſicanum, ſequitur, in privatione gratiæ ſanctificantis ſitum eſſe. Anſelmus vero, qui in libro de concep. Virg. cap. 26. præ aliis accuratius peccati originalis formalem rationem inquiri, expreſſe hæc habet. *Hoc peccatum, quod originale dico, aliud intelligere nequeo in ipſis infantibus, niſi factam per inobedientiam Adæ juſtitia debitæ nuditatem, per quam omnes filii ſunt iræ.*

73. Ob. plura. Primo; Juſtitia originalis privationem cauſam eſſe peccati originalis, & hæc eſt doctrina S. Thom. quæſt. 82. art. 2. nequit igitur eſſe peccatum originale, ne dicamus, idem eſſe cauſam ſui ipſius; Quod ſi cauſa non eſt, erit effectus, tanquam poena peccati, ut docet idem S. Thom. qu. 5. de malo art. 4. & 1. 2. qu. 87. art. 7. Secundo; Juſtitia originalis per baptiſma non reſtituitur, ergo ſi peccatum originale per baptiſma deletur nequit originale peccatum in originalis juſtitia privatione conſiſtere. Tertio; Peccatum originale eſt peccatum propriè dictum, hoc autem deſinitur ab Auguſt. ut à nobis dictum fuit, id eſt, *dictum, vel factum, vel concupiſcunt contra legem æternam Dei.* In hoc ergo conſiſtit, non in privatione juſtitia originalis; aut ſi quidpiam aliud dicendum foret, certe ejus forma conſtituendâ eſſet in reatu remanente poſt actionem, quod videtur colligi ex doctrina S. Auguſtini in locis pluribus tradita. Jam recenſeo ubi hoc egregius Doctor tradiderit; lib. 1. de nup. & concupiſ. cap. 26. inquit: *Hoc eſt non habere peccatum, reum non eſſe peccati. Nam ſiquiſquam verbi gratia fecerit adulterium, etiamſi nuſquam deinceps faciet, reus eſt adulterii, donec reatus ipſius indulgentia remittatur.* Et lib. 1. retract. cap. 15. ait: *Peccatum, quod nos ex Adam dicimus originaliter contrahere, id eſt reatu ejus implicatos, & ob hoc penæ obnoxios deſtineri.* Quare, ſi loquamur de reatu



pœnæ, negare non possumus, hunc peccatum formaliter non esse, sed pœnam à peccato progredientem. Si autem de reatu culpæ, fateamur necesse est, in hoc peccatum originale formaliter situm esse; quod amplius ex Augustino declaratur, quia nunquam originale peccatum nisi reatus nomine commemoravit. *Traxit ergo reatum, quia unus erat cum illo, & in illo, à quo traxit, quando quod traxit commissum est.* Ita episcopus 23. ad Bonifac. ubi isti perjerunt video reatum, quæro unde? audio Apostolum propter unum hominem. Ita ser. 36. in Luc. atque hoc jam dixerat serm. 4. ubi sic. *Ubi te invenit? venundatum sub peccato jacentem in morte primi hominis, habentem reatum, antequam haberes arbitrium.* Tandem, ut alia plurima prætreamus, lib. 2. de pec. orig. contra Cels. & Pelag. cap. 4. hæc habet: *Reatus ergo vitii, de quo loquimur, in regenerato prole carnali tandiu manebit, donec & illic lavacro regenerationis abluatur.* In hoc igitur culpæ reatu peccatum originale consistere dicendum est.

74. Resp. ad primum; dum dicitur, peccati originalis causam fuisse justitiæ originalis privationem, sermonem esse de causâ formali, sicut si quis diceret, privationem lucis causam esse tenebrarum, quare sicut privatio lucis formaliter non distinguitur à tenebris, ita privatio justitiæ originalis formaliter non distinguitur à peccato; neque etiam dici potest effectus originalis peccati, nisi sumatur peccatum pro actione, non vero pro macula permanente post actionem, quare in Adamo, qui voluntate propria peccavit, fuit quidem effectus peccati, quod in ipso actuale fuit, in nobis autem est ipsum peccatum. Ut autem refellatur quod de pœna dicitur, adnotandum est, in justitia originali duos effectus, seu duas partes distinguendas esse. Juxta unam subiciebat mentem Deo, secundam aliam subiciebat appetitum inferiori menti, seu rationi; Justitia originalis juxta posteriorem partem, quæ

secundaria dici debet, est pœna à Deo inflicta, etenim pars illa justitiæ originalis, quæ sensum rationi subdebat in peccati pœnam tollitur à Deo, si vero prior & primaria pars justitiæ originalis consideretur, hujus privatio non est à Deo, sed ab ipso homine, sicut enim qui oculos claudit soli, non ideo in tenebras incidit, quia sol non luceat, sed quia ipse prohibet, ut lumen recipiat, sic quod à Deo non conservetur in homine post Adami transgressionem gratia sanctificans à Deo non provenit, sed à tota natura humana, quæ in Adamo se avertit à Deo, & gratia fuit sanctificante privata; Aliter tamen dici posset, nec ipsam concupiscentiam esse à Deo in pœnam peccati originalis, nisi negative, cum ista fuisset etiam in statu naturæ puræ, ut toties dictum est, & suo loco probatum.

75. Ad secundum; esto justitia originalis quantum ad omnem sui effectum & partem in baptismo non restituatur, restituitur tamen quantum ad primariam, nimirum quantum ad gratiam sanctificantem, per quam ratio subditur Deo, in hujus autem privatione sita est forma peccati originalis, sicut in sanctificante gratia sita est de primario originalis justitiæ.

76. Ad tertium; illa definitio data, est à S. Augustino pro peccato actuale, ut significat actionem transcurrentem, non vero maculam relictam in anima, definitiones enim rei traduntur juxta significationem, quæ est magis nota, non juxta eam, quæ magis est occulta. Quod vero dicitur de reatu manente post actionem, aliqui ex Doctoribus negant, in eo formaliter peccatum originale consistere, sed solum esse aliquod consecrarium; aliqui vero asserunt, consistere etiam in hoc reatu propter adducta Sancti Augustini testimonia, sed ex hoc non probatur, non consistere etiam in justitiæ originalis privatione, quod satis est pro re nostra.

## §. VI.

*Utrum peccatum originale ad fidelium filios pertranseat.*

77. **D**ubium hoc promoveo, non quia in eo resolvendo pluribus argumentis immorari velim, sed ut magis constet, in quantum dementia Hæreticorum ingenia pertrahantur. Jam à nobis demonstratum fuit, Adæ peccatum in posteros derivasse. Plures nunc ex Hæreticis hoc negant, præsertim si loquamur de eorum filiis qui jam in Deum & Christum crediderunt, hoc expresse docet Zuinglius in lib. de baptismo, & in declarat. de peccato originis; Hoc Calvinus in antid. Concil. Trident. ad cap. 20. sess. 6. & lib. 4. instit. cap. 16. Hoc Bucerus in cap. 3. Matt. qui omnes cum aliis scismaticis fidelium filios etiam ante baptismum esse sanctos Ecclesiæque membra contendunt.

78. Hoc quam immerito dictum sit, ex eo solummodo manifestum fieri posset, quod nec unum quidem ex Sanctis Patribus pro se possunt novatores afferre, in quo certe eorum assertum omnino fictitium ac temerarium esse, quisque fatebitur, aut omnia propria mente dici posse nullus ibit inficias. Quid vero, si non tantum pro Hæreticorum assertionem nullum ex SS. Patribus afferri posse, sed omnes contrarium docuisse declarabo?

79. Et tamen rem ita se habere jam declaraturus aggredior; sed prius præstat ea Scripturæ testimonia non omittere, ex quibus veritatem hanc evinci, omnes Catholici profitentur; quamvis hic primo loco ea cogamur repetere, quæ jam in superioribus exposita sunt, etenim Scripturæ Sanctæ de peccato originali ita generatim loquuntur, ut nullus excipiat, ut patet illa perpendenti, ergo non solum à filiis infidelium contrahitur, sed etiam à filiis fidelium; Quis Davidem fidelis hominis filium fuisse refragabitur? & tamen de se ipso dicit ps. 50. *Eccè enim in iniquitatibus conce-*

*ptus sum; in quæ verba inquit Ruffin. David natus erat de Jesse viro justo & Conjuge ejus; Quid est ergo, quod de se dicit, in iniquitatibus conceptus sum, nisi quia detrahatur iniquitas ex Adam, nemo nascitur nisi trahens culpam, & culpæ penam.* Quod si sanctorum filii nascuntur sancti, cur Jacob & Esau geniti ex eodem Patre sancto quidem ac fideli, nempe Isaac, hujusmodi fuerunt, ut de illis dictum fuerit, Jacob dilexi Esau autem odio habui? numquid quia Jacob erat ex prædestinatis, minime Esau? ita respondet Petrus Martyr in Comment. ad 1. ad Corint. 7. inquires, filios sanctorum nasci sanctos, quando sunt prædestinati, sed insana prorsus responsio, nam ex hac sequeretur, quod cum plures fidelium filii reprobi sint, è contra plures filii infidelium sint prædestinati, eque ex fidelibus quam infidelibus justii nascerentur. Præterea. Apost. ad Ephes. 2. scribit: *Eramus & nos natura filii iræ, sicut & ceteri.* Porro Paulus cum esset de genere Israel de tribu Benjamin, jam erat ex Patre fideli, nec tamen se distinguit à cæteris, ergo. Hic ea prætereo, quæ dicuntur de necessitate baptismatis proprium enim sibi vindicant locum; Unum addo quod desumitur ex necessitate circumcisionis in veteri lege, circumcidebantur enim filii fidelium, & circumcisio vel erat ad tollendum peccatum; vel saltem peccati purgationem significabat, & si hoc etiam negaretur, semper aliquod remedium fuit pro peccato originali, ergo quia etiam à fidelium filiis trahebatur.

80. Hæc certe fuit constans ac perpetua Sanctorum Patrum sententia. *Antequam nascamur, maculamur contagio.* Ita Ambros. in apolog. David cap. 11. *Christiani non nascuntur, sed fiunt.* Ita Hieronym. in epist. ad Latam de filie institut. clarissime vero S. August. lib. 2. de pec. origin. cap. 40. ait: *Regeneratus non regenerat filios carnis sed generat, ac per hoc in eos non quod regeneratus, sed quod generatus est, trajicit.*

81. Quoniam vero omnia, quæ de baptisimi necessitate dicuntur, à nobis prætereunda esse promissimus, ideo aliud nostra non interest, nisi Hæreticorum argumenta refellere.

Primum desumunt ex verbis illis Genes. 17. *Ero Deus tuus & seminis tui post te*, quæ licet dicta sunt Abraham soli, attamen omnibus etiam ejus posteris dicta sunt, sequitur enim *statuam pactum meum inter me & te, & inter semen tuum post te in generationibus suis sedere sempiterno, ut sis Deus tuus & seminis tui post te*. Sicut ergo per Christum facti sunt omnes fideles filii Abraham, ita omnibus dictum est, *ero Deus tuus*, ergo omnes fidelium filii populo Dei sunt aggregati, proinde omnes iusti.

82. Secundum desumunt ex illis Apost. 1. ad Corinth. 7. *Siqua mulier fidelis habet virum infidelem, & hic consentit habitare cum illa, non dimittat virum, sanctificatus enim est vir infidelis per mulierem fidelem, & sanctificata est mulier infidelis per virum fidelem, aliqui filii vestri immundi essent, nunc autem sancti sunt*. Ad Rom. 11. *Si radix sancta, & rami*. Ad Hebr. 7. Levi in lumbis Abraham ita fuit decimatus, ut postea natus decimari non debuerit, igitur & filii fidelium ita in parentum lumbis sanctificantur, ut amplius non debeant, & ideo sancti nascuntur.

83. Tertium desumunt ex alio Apostoli textu ad Rom. 5. ubi ait peccatum Adæ ad omnes pertransisse, ly autem omnes intelligendum esse pro multis præter dicta §. 2. num. 37. ostendi potest ex eodem Paulo ad Corinth. 15. ubi ait: *Sicut in Adam omnes moriuntur, ita & in Christo omnes vivificabuntur*, constat autem non omnes in Christo vivificari; Sed hoc magis etiam confirmatur, si perpendantur ea, quæ in priori laudato loco ad Roman. 5. leguntur. Ait enim: *Si unius delicto multi mortui sunt, multo magis gratia Dei & donum in gratia unius hominis Jesu Christi in plures abundavit*; quod quidem falsum esset, si om-

nes in Adam periissent; Si autem omnes in Adam non perierunt, certe de fidelium filiis hoc dici debet, ergo.

84. Nullum tamen ex hisce argumentis juxta Hæreticorum mentem potest admitti; atque ut primo respondeamus, dicimus, promissionem illam factam Abraham ac posteris ejus, spiritualement fuisse, non factam secundum carnem sed secundum spiritum, idest secundum fidem, quod clarissime patet ex iis, quæ tradit Apost. ad Rom. 4. & 9. tum ad Galat. 3. & 4. tunc igitur filii fidelium secundum carnem, & idem dicendum de quovis alio, incipiunt esse filii Abraham, atque ex ipsius semine recenseri, quando Abraham vestigia & fidem incipiunt sectari, quod aliter non fit nisi credendo, fideique suscipiendo Sacramentum; *De ovibus ejus esse non incipiunt parvuli, nisi per baptismum, profecto, si hoc non accipiunt, peribunt*. Ita August. lib. 1. de peccat. merit. & remis. cap. 27.

85. Ad 2. plures sunt illius textus expositiones, & prima, quam tradunt Tertul. lib. 2. ad uxorem, S. Hieronym. epist. 153. ad Paulin. S. August. lib. 2. de peccat. mer. & remis. est, mulierem infidelem sanctificari per virum fidelem, & è contrario, non quia revera justitia unius fiat justitia alterius, quis enim hoc dicet? Sed quia, vel per fidelem infidelis convertitur, vel saltem quia, cum non evitet consuetudinem fidelis, datur aliquis accessus & quidem amor erga fidem, ita ut inde filii qui nascuntur hiant mundi & fideles, saltem aliqui, quod non sequeretur, si vel fidelis infidelem vel infidelis fidelem dimitteret. Secunda est Sancti Anselmi & Sancti Thomæ explicantium filiorum munditiam & sanctitatem per hoc quo filii geniti ex unius fidelis & alterius infidelis conjugio legitimi censendi sint, ideo liberi à civili ignominia, quamvis enim etiam ex civili contractu duorum infidelium filii nascuntur legitimi, attamen cum unus esset fidelis, alter infidelis, poterat in du-

dubium revocari, utrum propter religionis disparitatem conjugium illud censeri posset legitimum, ideo docet Apostolus Matrimonium illud legitimum esse, neque coquinari fidelem per infidelem, sed ab opposito, cum plus virtutis tribuendum sit fidei, quam infidelitati. Ego tamen censeo melius explicari non posse quam per Apostoli contextum, id est virum fidelem lucrari posse mulierem infidelem; & mulierem fidelem virum infidelem, & ita sanctificari; sequitur enim Paulus. *Unde scis mulier si virum salvum facies? & unde scis vir si mulierem salvam facies?* Aliud ad Roman. 11. ita debet intelligi, ut si radix sancta & rami sancti sint, sanctitate tamen habita vel habenda per fidem & baptismum, scopus enim Apostoli eo loci est, ut ostendat per fidem & baptismum Gentiles insertos fuisse in radicem Judaicam, à qua plures Judaei fuerant praecisi velut rami confracti, quia in Christum credere noluerunt, ideo subdit: *Si aliqui ex ramis fracti sunt, tu autem cum oleaster esses, insertus es in illis & socius radicis & pinguedinis olivae factus es, noli gloriari adversus ramos &c.* Ad ultimum; non minus alii, quam Levi continebantur in lumbis Abrahæ, & tamen alii decimati sunt; Hoc igitur factum est, quia Levi Sacerdotium tribuendum erat, ex speciali autem Dei privilegio debebat hic ordo à solvendis decimis immunis esse; adinvenias fidelium filiis datum esse privilegium non contrahendi peccatum, & tunc assentiar.

86. Ad tertium; jam explicatum est, quo pacto intelligendum sit. In hoc autem est comparatio inter Adam & Christum, quod sicut qui ex Adamo seminali actione generantur peccatum contrahunt & mortem, ita quotquot in Christo regenerantur iustitiam & vitam supernaturalem percipiunt, & si velint perseverare, aeternam felicitatem, è contrario, sicut qui ex Adamo non nascitur, sicut fuit Christus, in Adamo non mori-

tur, ita qui in Christo spiritualiter non renascitur, neque vivificatur. *Ex prima origine generis humani nemo ad mortem nisi per Adam, & nemo per Adam, nisi ad mortem, & nemo ad vitam nisi per Christum, & nemo per Christum nisi ad vitam,* ait August. lib. 6. contra Julian. cap. 24. Quo pacto autem ubi abundavit delictum superabundaverit gratia, explicat S. August. lib. 2. operis imperfect. num. 97. primo quia gratia Christi aufert peccati originalis reatum, secundo remittit etiam peccata actualia, tertio praestat, ut carnis concupiscentia spiritu vincatur, quarto si quis in tentatione vincatur, ei humiliorem poenitentiam confert, & tandem donat vitam aeternam; Quod si nobis iustitiae originalis privilegia non restituntur, ideo fit, ut magnitudo peccati intelligatur ab hominibus, & per exercitium patientiae ac laborum ampliorem mercedem consequantur, ut ibidem ait S. Doctor n. 94.

87. Opp. ultimo. Peccator generat peccatorem, ergo iustus generat iustum, sed parentes fideles sunt iusti id est sine peccato originali, ergo. Prima consequentia tenet, sicut valet hoc argumentum, peccatum facit Deo inimicum, ergo gratia facit Dei amicum. Præterea. Nemo dat quod non habet, sed fideles non habent peccatum originale, ergo.

Resp. si hoc argumentum valeret, sequeretur, quod omnia peccata & virtutes parentum transfirent ad filios, quod est falsum; non igitur peccatorem generat peccator, quia peccatum opponatur iustitiae, sed quia generare homines peccatores est aliquid commune tam peccatori quam iusto, convenit enim propter rationem feminalem quoad primam originem descendantem ab Adamo, in quo omnes peccaverunt, atque huc pertinet dictum Augustini num. 90. adductum, in quo adducit exemplum dicens, *quomodo non solum oleastri sed etiam olivae semina non olivae generant sed oleastros.* Ad aliud; dico axioma illud esse verum de causa effetrice præcipua, non de instru-



strumentali; parentes autem fideles communicant peccatum originale, quamvis illud non habeant; non quia sint illius origo, sed quia sunt instrumenta & canales quidam, per quos peccatum à primo parente transfunditur.

## §. VII.

*An peccatum originale etiam ad Beatam Virginem Mariam pertransierit.*

88. **T**AM luculenter ac pie pro Beatissimæ Virginis ab originalis peccati immunitate Subtilis Doctor in 3. sentent. quæst. 1. scripsit ac docuit, ut ferme quod à nobis scriberetur aliquid non reliquerit; sicut tamen ejus cultus & obsequium in dulcissimam Jesu Christi Matrem nostrum non minuit sed magis excitat, sic & ejus scripta pro ejusdem Immaculata Conceptione nos removere à scribendo non debent, sed magis inflammare.

89. In hac re aliqui omnino diversa sunt opinati, non desuerunt, qui dixerint, Beatam Virginem sine labe conceptam à Catholicis sustineri tanquam articulum fidei, ita præ aliis Joan. Pomeran. in Comment. cap. 1. & 44. Jerem. Alii vero sententiam defendentem Virginis Conceptionem omnino puram ac sanctam, tanquam erroneam & temerariam ausi sunt condemnare, ita Illyric. cent. 9. cap. 10. Kemnit. in exam. sels. 5. cum, ut inquirunt, pro hoc asserendo nulum habeatur fundamentum aut ex Scripturis, aut ex Patribus, sed solum afferantur aliquæ revelationes, & nonnulla miracula.

90. In utraque tamen parte valde decipiuntur, nunquam enim à Catholicis aliquid tanquam dogma fidei acceptum est nisi quod ita tenendum esse Ecclesia definierit; nondum autem definitum esse, Beatam Virginem à peccato originali immunem omnes nos profitemur, atque hoc manifestè docent tam Constitutio Sixti IV.

tum Concilium Tridentinum sess. 5. tum Pius V. in alia sui Constitutione. Quod si in Concilio Basileensi videtur decretum oppositum sess. 16. in primis Concilium hoc sententiam suam tanquam articulum fidei noluit haberi, sed dumtaxat tanquam magis piam & consonam Scripturis, Patribus ac rationi; deinde quanti habendæ sint hujus Concilii definitiones, ex iis constat quæ diximus in libro de Conciliis. Non esse, vero erroneum aut temerarium Conceptionis Virginis sanctitatem asserere, immo magis pium ac probabile, illud est, quod in præsentiarum à me ostendendum esse propono.

91. Atque in hac re plurima nobis momenta non desunt; incipiamus autem à Scripturis Sanctis, in quibus licet hoc expressè non habeatur, iuste tamen inferri posse videtur, prius autem suppono, posse Deum speciali privilegio aliquem à communi lege peccati originalis eximere, id tamen de aliquo dici non posse, nisi aliunde sufficiens fundamentum habeatur, atque ideo cum Scriptura dicat, omnem hominem in Adamo peccasse, id etiam de Virgine Sancta, dicendum foret, nisi ab hac lege liberatam esse plura nobis suppeditarentur; sed jam quod intendimus peragamus. Gen. 3. legitur. *Inimicitiam ponam inter te & mulierem, & semen tuum & semen illius, & ipsa conteret caput tuum.* Hanc mulierem fuisse beatissimam Virginem constans est Sanctorum Patrum sententia, præsertim S. Augustin. lib. 2. de Genes. ad lit. & S. Ambros. in lib. de fuga sæculi cap. 4. per caput autem Dæmonis seu serpentis ab ipsa contritum intelligitur peccatum originale quod fuit caput & omnium peccatorum origo, vel certe intelligitur Dæmonis potestas & vigor præcipuus; quamvis vero apud aliquos Patres legatur *ipse* non *ipsa* attamen in vulgata nostra legitur *ipsa* & ita legunt Augustin. 12. Gen. ad lit. cap. 39. Ambros. de fuga sæculi cap. 7. Gregor. 1. moral. cap. 19. Bernard. ser. 2. in *missus est*.



est. Et licet legi deberet *ipse* adhuc nihil probaretur, nam Virgini serpentis caput contere à Christo & per Christum datum esse; calcaneo itaque Virginis serpentis ille potuit insidiari, ut ibidem legitur, illud tamen attingere vel mordere non potuit. Cantic. 2. *Sicut lilium inter spinas sic amica mea* &c. & cap. 4. *Tota pulchra es amica mea, & macula non est in te*. Et infra, *hortus conclusus fons signatus*. Quæ verba licet aptentur Ecclesiæ triumphanti non habenti maculam neque rugam, tamen etiã dici de Beatissima Virgine consentit Ecclesiã, & communis tenet Patrum auctoritas, unde doctissimus author dictus Idiota in contempl. B. Virgin. cap. 2. inquit. *Tota pulchra Virgo gloriosissima, non in parte sed in tota, & macula peccati sive mortalis, sive venialis, sive originalis non est in te, nec unquam fuit, nec erit*. In hac re audiamus etiã Sedulium, qui lib. 2. pasch. de miraculis Christi postquam primi hominis totiusque humani generis lapsum descripsit, cecinit.

*Et velut in spinis mollis rosa surgit acutis*

*Nil, quod ledat, habens, matremque obscurat honore;*

*Sic Eva de stirpe Sacra veniente Maria*

*Virginis antiquæ facinus nova Virgo piaret.*

adde alias Scripturas, quas in Mariæ solemnitatibus Ecclesiã legere consuevit, ex quibus Immaculatæ ejusdem Conceptioni multum tribui nullus ibit inficias. Alias vero Scripturas, in quibus generalis loquutio videtur omnes sub Adæ peccato complexi, Mariam non includere in argumentorum solutionibus declarabitur.

92. Secundo loco accedit pro Immaculata Virginis conceptione Sanctorum Patrum Doctrina. Celebre illud est, quod ait S. August. de nat. & grat. cap. 36. *Excepta Virgine Matre, de qua cum de peccatis agimus, nullam prorsus*

Tom. II.

*habere volo questionem, inde enim scimus, quod plus gratiæ ei collatum est ad vincendum omni ex parte peccatum, quia eum concipere meruit & parere, quem scimus nullum habuisse peccatum*; Hic autem, non solum sermo est de peccato actuali, primo quia ibi agit eximius doctor contra Pelagianos volens ostendere, neminem, etiã infantes, esse sine peccato, ergo si Mariam excipit, ab originali excipit. Secundo adnotanda sunt illa verba, *omni ex parte viciisse peccatum*, ergo tam originale, quam actuale. Tertio quia proficitur, se ita sentire, *propter honorem Domini*. Sed honor Domini postulat, ejus matrem non tam caruisse peccato actuali, quam originali, immo magis, cum actuale esse possit veniale, originale vero mortale fuerit, ergo.

93. S. Ambrosius ser. 22. in p. 118. in illa verba, *quare servum tuum Domine, ait. Suscipe me non ex Eva, sed ex Maria, ut incorrupta sis Virgo, sed Virgo per gratiam ab omni integra labe peccati*. Hieronym. vero in illa verba ps. 77. *eduxit eos in nube diei*, affirmat per nubem allegorice intelligi Mariam, & addit; *Pulchre dixi diei, quia nubes illa non fuit in tenebris, sed semper in luce*.

94. Clarius tamen expressiusque in re nostra loquuntur S. Damascenus, & Laurentius Justinianus. Primus enim, orat. 1. de Nativit. Virg. sic de ejus loquitur conceptione; *Natura gratiam antevertere ausa non est, sed tantisper expectavit, dum gratia fructum suum produxisset*. Orat. vero 2. hæc habet; *Ad hunc Paradisum serpens aditus non habuit*. Habuisset autem, si peccati originalis labem contraxisset, quapropter Virginem sic filium alloquentem inducit; *Animam meam tibi claram accipe, quam à peccati labe tibi puram servasti*. Secundus vero serm. de annunt. sic inquit. *Ab ipsa Conceptione in benedictionibus est præventa dulcedinis, & à damnationis alienæ Chirographo prius est sanctificata, quam nata*. Fortasse notas verbum hoc ultimum, *nata*, sed potius per-

M m

pen-

pende verbum primum; *Ab ipsa Conceptione*. Tandem, prætermittis aliis de casto connub. Verbi & animæ cap. 7. & in fasciculo amoris cap. 7. de gradibus perfectæ. cap. 1. dicit; *Ab originali delicto nullus excipitur præter illam, quæ genuit mundi Salvatorem*; Præterire placuit Sanctum Vincentium Ferrerium, qui, etsi pluribus in locis non satis clare suam mentem aperiat, tamen serm. 2. de natiuit. Virg. ejusdem Conceptioni aptat illa verba, *Fiat lux & addit; non credatis, quia fuerit sicut in nobis, qui in peccatis concipimur, sed statim, ac anima fuit creata, fuit Sanctificata, & statim Angeli in Cælo celebraverunt Festum Conceptionis*. Præterire inquam placuit, ut inde possem aliud momentum, nec leve proponere.

95. Celebrarunt itaque juxta mentem Ferrerii Angeli Sancti festum Conceptionis, & hoc nobis occultum est, celebrat tamen & Ecclesia militans, quod nobis est manifestum; Porro ex hoc non mediocriter nobis argumentum affertur. Perpendit & hoc ipse S. Th. 3. p. qu. 27. art. 2. & num. 3. sibi opponit sic; *non celebratur festum nisi de aliquo Sancto, sed quidam celebrant festum Conceptionis B. Virginis, ergo videtur, quod in ipsa sua Conceptione fuerit Sancta*. Quid respondet Doctor Angelicus? illius verba liceat afferre; *Ad tertium dicendum, quod licet Romana Ecclesia Conceptionem Beatæ Virginis non celebret, tolerat tamen consuetudinem aliquarum Ecclesiarum illud festum celebrantium. Unde talis celebritas non est totaliter reprobanda*. Vide quæso, utrum hisce nostris temporibus responsio ista locum haberet; nunc jam Clementis XI. quem in se ipso, & in Nepotè Annibale S. Ecclesiæ Camerario viro certe omni laude digno, virtute, mente, & animo, doctrinâ nemini secundo, semper attollendum existimabo, nunc inquam Clementis XI. decreto Conceptionis celebritas non jam toleratur in aliquibus Ecclesiis, sed in omnibus præcipitur, pluribusque

indulgentiarum privilegiis exornatur, ita ut talis celebritas non sit amplius totaliter reprobanda, sed omnino seruanda. Celebratur itaque Festum Conceptionis, fuit ergo Sancta Conceptio; Quod dixi in antecedente in dubium ex dictis revocari non potest, sed prioribus etiam temporibus alibi factum est, siquidem, ut refert Gal. lib. 7. cap. 4. ante mille annos hoc fieri in Ecclesiâ Græca consuevit, in Latina vero colligitur ex S. Bernardo, & affertur quædam epist. S. Anselmi ad Episc. Angl. in qua scribit, non esse Virginis amatorem, qui Festum hoc negligit celebrare; Jam vero hisce præmissis sic aliqua liceat exponere; celebratur Natiuitas Virginis & ideo eam Sanctam veneramur, celebramus Natiuitatem Joannis Baptistæ & ideo illam sanctam dicimus, quid igitur in causâ est, ne celebrantes Mariæ Conceptionem illam Sanctam existimemus?

96. Jam vero quænam fuerit mens Summorum Pontificum, nec non Conciliorum intueamur, equidem si de istis agamus; sexta Synodus can. 32. affert & veneratur Jacobi liturgiam, in qua habentur hæc verba; *commemorantes Sanctissimam Immaculatam, & Gloriosissimam Dominam nostram Matrem Dei*; in septima Synodo act. 3. Maria dicitur; *Immaculata & omni sensibili ac intellectuali creatura purior*. Concilium Francford. in epist. ad Episc. Hisp. eam vocat: *Immaculatam prorsusque puram*. In Concilio Basileensi, quod etiam non acceptandum esse tanquam legitimum alibi dixerimus, attamen plura in eo contineri, quæ merito dicta sunt negari non potest, hæc leguntur sess. 36. *Doctrinam illam differentem Gloriosam Virginem Dei Genitricem Mariam præueniente & operante Divini numinis gratia singulari nunquam subiacuisse originali peccato, sed immunem semper fuisse ab omni originali & actuali culpa sanctamque atque Immaculatam, piam & consonam cultui Ecclesiastico, Fidei Catholicæ, venerationi & Sacræ Scripturæ ab omnibus Catho-*

*tholicis approbandam tenendam, & amplectendum definimus & declaramus, nulloque de cætero licitum esse in contrarium prædicare & docere.* Sed quod gravius est, Concilium Tridentinum sess. 5. *declarat non esse sue intentionis comprehendere in hoc decreto, ubi de peccato originali agitur, Beatam & Immaculatam Mariam Dei Genitricem &c.* Quod vero attinet ad Summos Pontifices, Sixtus IV. an. 1483. sub pœna excommunicationis sententiæ prohibuit, ne quis nomen Hæresis impingeret affirmantibus Immaculatam B. V. Conceptionem, facultatem tamen unicuique concessit etiam negandi; Inde Pius V. in Bulla edita ann. 1570. sub pœna suspensionis indixit, ne, ubi promiscue virorum ac mulierum multitudo convenire solet, sententia negans propugnaretur, esto in publicis academiis, disputationibus illam concesserit; sed cum hisce disputationibus pax turbaretur Gregor. XV. an. 1622. præscripsit, ne quispiam tam in publicis quam in privatis colloquiis auderet asserere, Beatam Virginem in peccato fuisse conceptam.

97. Hisce omnibus additur unanimis ferme Scholasticorum consensus, quorum primus fuit subtilissimus Doctor, cujus in Beatissimam Virginem studium ac obsequium insigne fuit ac singulare. Sequæ sunt celebriores Academicæ. Parisiensis enim propositionem hanc Joannis de Montenfono, *est expresse contra fidem B. V. M. non contraxisse peccatum originale* tanquam falsam, scandalosam, & piarum aurium offensivam revocandam esse decrevit, & an. 1497. statuit, ne quis deinceps ad doctoralem lauream promoveri posset, nisi se juramento obstringeret, Doctrinam pro Immaculata Virginis Conceptione se propugnaturum; Idem præceperunt in Germania Moguntina & Colonienfis, in Hispan. Salmanticens. Toletana, Compluten. Idem in Italia Patavina, Bononienfis, & ut cœteras

Tom. II.

præteream, Ticinenfis, ut egometipse expertus sum.

98. Et merito certe id actum est; cum præter ea quæ ex scripturis, & Patribus, Ecclesiæque consensu à nobis prolata sunt, plures etiam rationes non desunt. Aliquas tantummodo proferam; Prima sit; Beata Virgo immunis fuit ab omni peccato actuali etiam veniali, ut definit. Concil. Trident. sess. 6. can. 23. ergo etiam à peccato originali; Sic enim valet ratiocinium Augustini lib. 5. contra Dulcit. cap. 15. ubi agit de Christo; puritas ab omni peccato actuali infert immunitatem à peccato originali; sic autem loquitur laudatus Doctor. *Profecto peccatum etiam major fecisset, si parvulus habuisset, nam propterea nullus est hominum præter ipsum, qui peccatum non fecerit grandioris ætatis accessu, quia nullus est hominum præter ipsum, qui peccatum non habuerit infantilis ætatis exortu.* Videtur autem esse eadem ratio, ideo enim à peccato actuali immunem Virginem prædicamus, quia secus non fuisset idonea Mater Dei, at putas ne futuram esse idoneam, si peccato originali infecta aliquando fuisset? Utrumque certe peccatum filium dedecebat, igitur dedecebat & matrem, si enim gloria filiorum patres eorum ut legitur proverb. 17. ignominia matris redundat in filium. Secunda sit. Jeremias & Joannes Baptista fuerunt sanctificati priusquam nascerentur, & hoc, quia futuri erant speciali quodam modo ministri Dei, ergo Beata Virgo fuit præclariori gratia sanctificata, ita ut nullum instans fuerit, pro quo maxime sancta non fuerit. Tertiam & ultimam sumo etiam ex parte Christi, qui, ut adnotavit Scotus, fuit perfectissimus Redemptor; itaque debent ipsi convenire omnes gradus Redemptionis, quos quatuor esse declaramus. Primus est liberatio à peccatis actualibus; Secundus liberatio à peccato originali post nativitatem; Tertius liberatio à peccato originali ante nativitatem. Quartus præservatio à

M m 2

pec-

peccato originali in quod certe quis incidisset, si redemptionis gratia non precessisset. Primus pertinet ad adultos, secundus ad parvulos, tertius ad Jeremiam & Joannem Baptistam, quartus igitur spectabit ad Beatissimam Virginem; Possesse autem hujusmodi preservationem appellari veram & propriam Redemptionem ostendi potest ex verbis David in ps. 143. *Redemisti, inquit, David servum tuum de gladio maligno*. Id est de gladio Goliath, nec tamen fuit David eo gladio vulneratus, sed quia proculdubio vulneratus fuisset, nisi speciali Dei privilegio & adjutorio preservationis fuisset.

99. Mitto miracula, quæ in Maria Immaculatæ Conceptæ gloriam facta esse narrantur, mitto plurimas revelationes, inter quas celebris est illa facta Sanctæ Brigittæ, ubi eam Beata Virgo sic alloquitur. *Veritas est, quod ego concepta fui sine peccato originali*. Mitto denique, quod ferunt evenisse Scoto, cui Academiam Parisiensem ingredienti Immaculatam Virginis Conceptionem propugnaturus, dicentique Imagini Virginis lapideæ præ foribus affixæ, *dignare me laudare te Virgo Sacrata* simulacrum illud caput inclinavit.

### §. VIII.

*Refelluntur argumenta in oppositum.*

100. **P**rimo opponunt ex Scripturis. Ad Roman. 5. inquit Apostolus, *in quo omnes peccaverunt*. 1. ad Corinth. 15. *in Adam omnes moriuntur*. Ad Ephes. 2. *Eramus natura filii iræ, sicut & ceteri*.

Sed contra; hæc omnia vera sunt juxta communem legem, non autem si interveniat privilegium speciale, quod Beatissimæ Virgini collatum esse sufficienti fundamento à nobis asseritur. Hic tamen adnotandum censeo, tribus modis peccatum primi parentis dici posse ejus posteris afficere, primo ita ut in

Adamo peccaverint, quando ipse, in quo moraliter continebantur omnium voluntates nondum in se existentes, Divinum præceptum transgressus est; Secundo ita, ut in peccato dicantur concipi omnes, cum primo fatus in utero matris incipit esse inanimis ac informis, quamvis enim peccatum proprie non sit nisi in anima rationali, attamen etiam ante hujus receptionem quodam modo fatus dicitur vitiatus, quatenus ex vi suæ generationis ei debitum est, ut cum primum animæ rationali fuerit unitus, incipiat existere homo peccator, in quo sensu explicat Anselmus illud ps. 50. *Ecce in iniquitatibus conceptus sum*. Tercio tandem ita, ut dicantur homines peccatores, mortui, ac filii iræ proprie ac re ipsa, quando animæ suis inspirantur corporibus. Primo ac secundo modo non negamus Mariam Virginem in Adamo peccasse, negamus dumtaxat tertio, anima enim ejus primo suæ creationis momento tanta fuit sanctificante gratia exornata, ut preservata fuerit à macula originalis peccati, quod actu & re ipsa, non contraxit, contraxisset tamen, nisi gratia Dei ex Christi meritis fuisset præventa.

101. Ex hac doctrina solvitur argumentum aliud, quod desumunt ex eo quod Maria Virgo fuerit à Christo redempta, ait enim Paulus ad Rom. 5. *sicut per unius delictum in omnes homines in condemnationem, sic & per unius justitiam in omnes homines in justificationem*; atque hæc est communis Sanctorum Patrum sententia, unde inter alios inquit S. Bernard. serm. 4. de Concept. Virginis. *Primogenita Redemptoris sui, Jesu fuit Beata Virgo, & plus pro ipsa redimenda venit, quam pro omni alia creatura*, si autem peccatum originale non contraxisset, jam redimi non potuisset, nullus, enim, *nisi qui peccati servus est, liber efficitur, nec redemptus dici potest, nisi qui verè per peccatum fuerit ante captivus*: ait Zosimus Papa apud S. Augustin. ep. 157. solvitur inquam



quam ex superiori doctrina argumentum hoc, nam, ut dicamus Beatam Virginem à Christo redemptam esse, satis est si modo dicto peccatum contraxerit, & ulterius contraxisset, nisi Christi merito fuisset à Deo præservata. Totum autem hoc, quamvis à nobis fuerit superius expositum n. 108. explicat egregie S. August. in ps. 85. super illa verba, *Eruisti animam meam de inferno inferiori*. Inquiens. *Quemadmodum si medicus videat tibi imminentem egritudinem forte ex aliquo labore, & dicat, parce tibi, sic te tracta, requiesce, his cibis utere, nam si non feceris, egrotabis, tu autem si feceris, & saluus eris, recte dicis medico, liberaſti me ab egritudine, non in qua jam eras, sed in qua futurus eras. Nescio quis habens causam moleſtam, mittendus erat in carcerem, venit alius, defendit eum, gratias agens quid dicit? eruiſti animam meam de carcere; Suspendendus erat debitor, solum est pro eo, liberatus dicitur de suspendio. In his omnibus non erant, sed quia talibus meritis agebantur, ut nisi subvenum esset, ibi essent, inde se recte dicunt liberari, quo per liberatores suos non sunt permissi perducere.*

102. Dices. Nullum est fundamentum dicendi ita Virginem fuisse præservatam, ergo. Prob. ant. Beata Virgo mortua est, sed mors est poena peccati originalis, ergo contraxit peccatum originale, ergo nullum est fundamentum dicendi &c. Sed contra, aliud est loqui de præſervatione mortis animæ idest peccati originalis, aliud de præſervatione mortis corporis, quod etiam patet in nobis, quamvis enim per baptismum à peccato originali liberemur, tamen à morte corporis non liberamur, sed liberationem hanc expectamus; dum autem dicitur mors corporis poena peccati, intellige de poena peccati vel contracti, vel debito contrahendi, quod in Virgine fuisse non inficiamur, ut dictum fuit. Quamquam dici posset, mortem non esse necessario poenam peccati, nam in statu naturæ puræ fuisset mors, nec ta-

men fuisset originale peccatum; Quod si Adam non fuisset moriturus, nec morituri illius posterii, nisi fuisset peccatum, hæc fuit libera Dei dispositio, siquidem potuisset Deus dispoſere, etiam Adamum innocentem mori.

103. Attamen non desunt aliqui dicentes in Beatissima Virgine per Christi merita neque fuisse debitum contrahendi peccatum originale, cum quo tamen adhuc verum esset à Christo fuisse redemptam, etenim hoc ipsum non contrahere debitum à Christi gratia progrediebatur; Hæc tamen sententia, quam sustinet Salazarus, paucorum est, nec videtur aliquo inniti fundamento, immo difficulter explicari possent plures auctoritates Scripturæ & Sanctorum Patrum, ideo dimittenda judicatur, pro qua videantur Salmantic. hic disp. 15. num. 138. dub. 5.

104. Secundo opponunt ex PP. plura quidem videtur in hac re scribere S. August. in lib. de fide ad Pel. cap. 26. ait: *Firmissime tene, & nullatenus dubites, omnem hominem, qui per concubitum viri & mulieris concipitur, cum peccato originali nasci &c.* Atqui Beata Virgo per concubitum viri & mulieris concepta est, ergo. In lib. de perfect. justitiæ. *Quisquis esse, vel fuisse in hac vita aliquem hominem, vel aliquos homines putat, excepto uno mediatore Dei & hominum, quibus necessaria non fuerit remissio peccatorum, contrarius est Divine Scripturæ, ubi Apostolus ait: Per unum hominem peccatum intravit in mundum. In lib. 5. contra Julianum c. 9. Si sine dubio caro Christi non est caro peccati, sed similis carni peccati, quid restat, ut intelligamus, nisi ea excepta omnem reliquam humanam carnem esse peccati?*

105. In eadem sententia fuerunt alii Sancti Patres. Ambros. in comment. in Luc. cap. 2. *Solus per omnia ex natis de femina Sanctus Dominus Jesus, qui terrena contagia corruptelæ immaculati partus novitate non sensit.* Expressius



loquitur Euseb. Emis. hom. 2. de Natal. Domini dicens: *A peccati originalis nexu nullus immunis existit, nec ipsa Genitrix Redemptoris.* Assertur denique S. Bernardus qui in epist. 175. ad Canonicos Lugdunen. sic ait: *Excepto homine Christo universos respicit, quod unus humiliter confitetur, in iniquitatibus conceptus sum & in peccatis concepit me Mater mea.* Quid vero si asserrem Anselmum lib. 1. *cur Deus homo* cap. 16. ubi ait: *Virgo in iniquitatibus concepta, & in originali peccato nata est, quia & ipsa in Adam peccavit?* Quid, si Bernardin. Senen. ser. 51. ubi dicit, per Virginis sanctificationem remotum ab illa esse originale peccatum, & promptitudinem ad malum ablatum? Quid, si Vincent. Ferrer. serm. 1. de Virginis Nativit. ubi asserit, Christum pro primo instanti Conceptionis fuisse sanctum, Virginem vero eadem die vel hora? Nimum prolixus essem, si vellem omnes eos Patres asserre; qui sententiæ nostræ adversari videntur. Non desunt Nazianz. Maximus, Richard. de S. Vict. Rupertus, & Antonius Patavinus.

106. Hisce tamen omnibus responsum est, dum diversos modos; quibus peccatum originale contrahi posse, distinximus, ut compertum est, quare non esset, cur diutius in eorum Patrum explicanda mente immorarer; attamen quantum attinet ad Sanctum Augustinum, ipse jam satis se explicavit, cum dixit, dum de peccatis agitur, se de Maria Virgine nolle habere questionem, satis igitur dilectissima Mater mea ab ipso Doctore manet excepta, quamvis in laudatis testimoniis excipi non videatur. Ut vero detur discrimen inter Sanctitatem Christi & Virginis in utriusque Conceptione, satis fit tibi perpendere, carnem Christi non ex virili semine, sed ex Spiritus Sancti operante virtute fuisse conceptam, ideo nullo modo ad carnem Adami pertinuisse, & per se sanctam fuisse, non sic caro Virginis, quæ ex seminali virtute fuit pro-

pagata, nec aliter nisi per gratiam fuit à peccato liberata; Dum legis, solum Deum habere immortalitatem, & esse bonum; satis servas Scripturam, si dicas hæc Deo convenire à se, nec inde negas etiam aliis convenire per participationem, alioquin negare deberes, etiam Virginem nunquam voluntate propria peccasse, cum in pluribus dictis Sanctorum Patrum legatur, proprium esse uniuscujusque, præter Deum peccare, juxta illud, *in multis offendimus omnes* nota, hic dici omnes, sicut in illo Pauli textu, *omnes in Adam peccaverunt.* Ita sane intelligendus est Eusebius Emisenus, cuius testimonium non est juste relatum, cum enim verba sunt ista: *Per se neque ipsa Dei para immunis fuit.* Sanctum Bernardum nobis opposuit Kemnitius, sed revera in eo nihil contra nos, multum contra ipsum, si quis epistolam Sancti Abbatis perpendat; ad summum dubitavit nequaquam definivit; Remota esse demonstrat eadem epistola, quæ sic concluditur. *Quæ autem dixi absque præjudicio sane dicta sunt sanis sapientibus; Romana præsertim Ecclesiæ auctoritati, atque examini totum hoc, sicut & cetera, quæ ejusmodi sunt, universa referro: ipsius, si quid aliter sapio, paratus iudicio emendare.* Cum igitur nostris hisce temporibus Ecclesiæ auctoritas nostræ faveat sententiæ, nihil est, quod ex Bernardi testimoniis possit evinci, nec nobis opponi possit, quod ipse ibidem habet; idest, *novitas doctrina est Mater temeritatis, soror superfluitatis, filia levitatis:* Ut Sancti Anselmi mens clare nobis innotescat, satis est, si proferamus id, quod idem scribit de Concep. Virginis & pecc. origin. cap. 7. homines videlicet in peccato originali concipi ante infusionem animæ, non certe quia caro sine anima sit capax peccati, sed quia caro ex virili semine concepta trahat necessitatem, ut cum animam rationalem acceperit, hæc peccato non careat; loquitur igitur in eo sensu, in quo à nobis superius dictum fuit. Bernardum

num Senensem non attulissent, si quæ præmittit considerassent, inquit enim, aperte, se ab hac quæstione velle abstinere, idcirco generatim loquitur; & quo pacto remotum sit à Virgine originale peccatum, & promptitudo ad malum ablata, constat ex dictis. Videtur fortasse validius probare, quod ex Sancto Vincentio Ferrerio prolatum est; attamen advertendum, hunc obscure aliquando & dubio sensu loquutum esse ut diximus, alibi tamen se explicavit; ut hoc indicemus, vide quid dixerit serm. primo de Nativit. post allata verba; eccē; *Quando Corpus Beatæ Virginis fuit perfectè organizatum, & anima illi conjuncta per creationem, tunc altissimus sanctificavit tabernaculum suum.* Sed de hoc Doctore jam satis num. 104. in fine; atque ex istis explicis quoscumque alios Patres, qui si dicunt, Virginem fuisse mundatam, & purgatam, dixerunt etiam fuisse præpurgatam; Ita præ cæteris Nazianz. orat. 38. & 42.

107. Quod opponunt, per sententiam nostram derogari sanctitati Christi, nec memoro. Christus enim fuit origine sanctus per unionem hypostaticam, substantialiter, & tanquam per radicem exigentem gratiam habitualement, non ab alio sanctitatem tanquam à causa meritoria recipiens, non sic Beata Virgo; qua in re id dicere possumus, quod Ulpianus dixit in l. *Princeps ff. de legibus. Princeps legibus subditus non est. Augusta vero licet sit subdita, Princeps tamen cadem privilegia illi concedit, quæ ipse habet.*

108. Unum videtur adhuc in contrarium addi posse; nimirum, à Pio V. ablatum esse proprium Officium Conceptionis, quia in eo laudabatur Virgo ut immaculata, & præservata. Sed hoc parum urget; nec enim id factum esse credendum est, quia in illo Officio aliquid falsi contineretur, sed quia omnia voluit ad veterem usum revocare, & si præscripsit, Festum Conceptionis & Nativitatis eodem Officio celebrari, jam argumentum pro nobis esse, mani-

festum est. Ex hoc tamen argumento nihil evinci potest, nam etiam Sanctam Annam, & Sanctum Rochum à Calendario expunxit, nec tamen aliquid eorum sanctitati imminutum est, ut notat Suarez in 3. p. tom. 2. qu. 27. Tandem, si mihi opponeres Concilium Arauscanum, Milevitanum, & Florentinum, hoc dicerem intelligendum esse juxta decretum Tridentini, una enim est omnium fides, & pari ratione probaretur de Conceptione, & de Nativitate.

109. Dicit tamen Kemnitus per decretum Concilii Tridentini liberum esse unicuique affirmativam vel negativam sententiam sequi; Si de fidei dogmate hoc dicat, concedimus, si de majori probabilitate, hoc negamus. Primum quidem, quia neutra pars verbo Dei aperte repugnat; Secundum vero propter dicta.

110. Solent aliqui inquirere, quid sciendum sit de mente Sancti Thomæ. Si quis vellet ea dicta, quibus probat Doctor Angel. peccatum originale in Virgine, de peccatum contrahendi debito explicare, perperam non explicaret, constat hoc, quia præcipua ratio, qua utitur ad probandam in omnibus originalis peccati maculam, est, quia omnes fuerunt à Christo redempti, ostendimus autem supra, redemptionem à Christo servari, ex quo licet Virgo actu peccatum non contraxerit, habuerit tamen debitum contrahendi. Quidquid tamen sit de hac re, quam Thomistis ipsis dirimendam relinquo, si Salmanticensium expositioni adharendum est, ut adharendum existimo, omnes enim Doctoris apices attente sunt meditati, dicendum nobis superest, revera Sanctum Thomam præ nostræ sententiæ refragari. En verba, quæ habet disp. 15. num. 204. *Inquirentes viam, ut sine veritatis præjudicio enuntiare possemus, D. Th. præ sententiæ nostræ refragari, illam tamen, quod sine animi dolore non præferimus, usque modo invenire non potuimus.*

111. Inquiri etiam posset, quid futurum fuisset de anima Beatissimæ Virginis, si ante Christum decessisset. Questio hæc, ut perpendenti manifestum esse potest, fieri potest, sive dicatur Virgo à peccato præservata, sive statim post Conceptionem mundata; Respondent tamen S. Th. hic art. 1. ad 3. Alenf. 3. p. qu. 9. m. 3. art. 2. §. 3. Corduba, alique Doct. ejus animam non statim Deumvisuram esse, sed in sinum Abraham de-  
scensuram, per peccatum enim Adæ universo generi humano clausa fuit Janua Regni Cœlestis, nec decens erat, animam aliquam fieri beatam & impassibilem omnino, antequam Christus pateretur, & Cœlum conscenderet. Contrarium docere videntur Scot. dif. 3. q. 1. & Gerson. in serm. de Incarnat. & in Parisien. Academia existimatur hæc communis sententia. Factum tamen sapienter est à Divina providentia, ut non prius Virgo Mater moreretur, quam Christus Filius, & ideo nullus locus questioni relinquitur.

## §. IX.

*Quomodo peccatum originale traducatur.*

112. **D**iximus usque modo, ad omnes homines peccatum originale transfusum esse, quo pacto autem transfusum fuerit, non indicavimus. Res hæc adeo difficilis existimanda est, ut nisi velimus Sanctum Augustinum mente superare, nobis ignotam fateamur necesse est; Ex Scripturis enim omnem hominem in Adamo peccasse, ac mortuum esse mihi declaratur, sed qua ratione peccaverit, mihi non ostenditur. Hac de re idem August. in ep. 29. ad Hieronym. scribit; *Eleganter dictum esse narratur, quod huic rei satis apte convenit, cum quidam ruiisset in putrum, ubi aqua tanta erat &c. accessit allus, & eo viso admirans ait, quomodo hic cecidisti? & ille, obsecro, inquit, cogita, quomodo hinc me liberet, non quomodo hic*

*cecidirim, quæras. Ita, quoniam fate-mur, & Fide Catholica tenemus, de reata peccati, tanquam de puteo, etiam parvuli infantis animam Christi gratia liberandam, satis est ei, quod modum, quo salva fiat, novimus, etiamsi nunquam quomodo in malum illud devenerit, novimus.* Explicaturus autem præclarissimus Doctor sententiam suam hæc verba facit lib. 5. contra Julian. cap. 3. *Profecto aut utrumque vitium ex homine trahitur, aut alterum in altero tanquam in vase vitiato corrumpitur, ubi occulta justitia Divinæ Legis includitur; Quid autem horum sit verum, libentius discio, quam dico, ne audeam docere quod nescio.* Duobus igitur modis originalis peccati translationem explicare posse contendit, aut, quia utrumque vitium, idest anima & corpus ex homine trahatur, aut quia alterum in altero, idest anima in corpore, tanquam in vase vitiato corrumpatur; primum autem dici non potest, cum certum sit, animam ex homine non trahi, sed à Deo creari, ideo remanet dicendum secundum. Quod vero ita disjunctive loquutus sit Augustinus, ne mireris, adhuc enim circa animarum originem erat difficultas, atque eam sibi absconditam esse pluribus in locis, ut lib. 10. de Genes. ep. 28. ad Hieronym. 157. ad Optat. testatus est.

113. Hac de re communis Theologorum sententia est, quam verissimam arbitror, peccatum originale traduci per virtutem seminalem in omnes posteros, ita ut, omnes, nisi privilegium interit, qui per veram generationem ab Adamo descendunt, eo nascantur inquinati. Ita S. Th. 1. 2. qu. 81. art. 1. Scot. Durandus, alique in 2. sent. Hoc, quod dictum est, explicatur à S. Th. hisce verbis. *Peccatum originale à primo Parente traducitur in posteros, in quantum moventur ab ipso per generationem, sicut membra moventur ab anima ad peccatum actuale, non est autem motio ad generationem nisi per virtutem activam, unde illi soli peccatum originale contra-*  
*hant,*

hunt, qui ab Adam descendunt per virtutem activam in generatione originaliter ab Adam derivatam, quod est secundum seminalem rationem ab eo descendere, nam ratio seminalis nihil aliud est quam vis activa in generatione, si autem aliquis formaretur virtute Divina ex carne humana, manifestum est quod vis activa non derivaretur ab Adam, unde non contraheretur peccatum originale; sicut nec actus manus pertineret ad peccatum, si manus non moveretur à voluntate, sed ab aliquo extrinseco movente, quare si Eva ex costa Adæ post ejus peccatum formata fuisset, peccato originali non fuisset inquinata, quia non processisset secundum rationem seminalem. Porro

hanc Angelici doctrinam indicavit illud quod Jobi 14. legitur: *Quis potest facere mundum de immundo conceptum, semine.* Atque eam adhibuit Concilium Trident. sess. 6. cap. 3. dicens: *Homines, nisi ex semine Adæ propagati nascerentur, non nascerentur iniusti, cum ea propagatione, per ipsum, dum concipiuntur, propriam injustitiam contrahunt.* Neque vero in hoc aliquid, quod injustitiæ tribui debeat, inspicitur; nam quemadmodum, si Adam in originali justitia perseverasset, ex ejus semine omnes iusti nati fuissent, ita, quia justitiam deseruit, omnes iniusti nasci debuerunt; Hoc erat initium pactum, non est cur de Deo conqueramur. Quid demeruerunt, inquis, posterius in Adamo, ut eo peccante omnes peccarent? Quid, respondeo, meruerunt posterius in Adamo, ut eo remanente iusto, omnes iusti nascerentur? Ille caput erat non solum naturale, sed etiam morale, hoc unum sufficiat, ut ab illo justitia, vel injustitia in eos, qui in lumbis ejus continebantur, transfunderetur. Si vero quæras ulterius, quare hoc pactum initium sit, fueritque Adam hujusmodi caput, quare à Deo, qui omnium continet voluntates, & omnia, ut sibi magis placuerit, disponit; Non esset tamen, cur quæreres, cum hoc etiam in humana Republica fieri posse, non.

Tom. II.

negares; Quis vetat, eam à Principe legem condi posse, qua statuat; Do tibi hanc Provinciam ac successoribus tuis, dummodo tamen Urbem hanc fide custodias? Non custodivit; en ex illius incuria omnes posterius ea Provincia privati, & in Principis iram prolapsi. Ita in re nostra, & multo magis, quanto dominio hominis majus est Dei dominium.

114. Neque obstat, peccatum Adami jam ipsi per poenitentiam fuisse dimissum, antequam copulam haberet cum Eva, proinde fuisse mundatum, ne in posteros infectionem transfunderet; etenim licet dimissum fuerit ipsi, ut privata persona erat, non tamen ut omnium caput erat, seu, aliis terminis, dimissum ut peccatum erat personæ, non ut peccatum erat naturæ, eo pacto quo etsi furmentum sit mundatum à palcis, adhuc tamen paleas producit, ideo in Adami semine adhuc perseverat infectio illa & coninquinatio, seu defectus virtutis, quam habuisset à Deo traditam, si in justitia originali perseverasset; Manifestum est hoc etiam in nobis, in quibus per baptismum peccatum originale auferitur, nec tamen auferitur illa partium deordinatio, quæ ex peccato originali contrahitur; Docuit hoc S. Thom. quæst. cit. art. 3. ad 2. dicens. *Peccatum originale per baptismum auferitur reatu, in quantum anima recuperat gratiam quantum ad mentem, remanet tamen peccatum originale actû quantum ad fontem, qui est inordinatio partium inferiorum animæ & ipsius corporis, secundum quod homo generat, & non secundum mentem, & ideo baptizati tradunt peccatum originale, non enim parentes generant in quantum sunt renovati per baptismum, sed in quantum retinent aliquid de vetustate peccati.*

115. Ex dictis plura deduci possunt; Primo. Si aliquis homo immediate à Deo solo produceretur, ut fieri posset nemo negabit, hic nequaquam peccatum originale contraheret, quia nec per

N n

semi-



seminalē virtutē gigneretur, nec filius Adæ dici posset, & ideo etiam filii, qui ab eodem gignerentur, sine peccato suum ortum deducerent. Secundo. Si Adam contra alia præcepta naturalia peccasset, non comedisset tamen de ligno vetito, peccatum in posteros minime transfudisset, peccata enim alia fuissent in ipso tanquam in particulari persona, non tanquam in capite, & ideo amisisset justitiā pro se ipso non, tamen pro aliis, quod patet ex quo, si Adam non peccasset, peccasset vero filius ejus Cain, adhuc ex isto, amissa sibi justitia, filii innocentes procreati fuissent; ratio autem est, quia virtus transfundendi justitiā originalem non poterat deperdi nisi per transgressionem illius legis, ad quam tenebantur posteri in Adamo, & cujus transgressio erat transgressio posterorum in ipso, sed lex ista erat de non comedendo &c. Ergo; quod totum valet ex vi præsentis decreti. Tercio. Si Adam ante peccatum rem cum Eva habuisset, & peccasset ante fetus animationem, puer ille nequaquam peccatum originale contraxisset, quia fuisset in lumbis Adæ nondum per peccatum vitiat, & ideo fuisset ex semine habente virtutē transfundendi justitiā originalem, idem dico etiam de filiis, qui ex illo propagati fuissent, ut inter plures sunt inent Ferre, & Puteobonellus.

116. Oppones contra præcipuum, assertum primo. Peccatum est aliquid morale & est in anima, sed quod est morale & in anima non potest haberi per seminale propagationem, ergo. Probi. mi. seminalis propagatio est aliquid physicum & corporeum, ergo.

Huic argumento, quod erat potissimum Pelagianorum, respondet S. Th. dicens seminalē propagationem immediate attingere infectionem corporis, mediate vero & per resultantiam, propter unionem animæ cum corpore, quam quidem unionem semen instrumentaliter efficit, attingere etiam ipsam animam; ecce illius verba loco citato,

*Dicendum, quod anima non inficitur per infectionem corporis, tanquam corpore agente in animam, sed per quamdam collimationem unius ad alteram, quia forma recipitur in materia secundum conditionem ipsius materiae. In eandem responsionem venit etiam S. Bonaventura, sed actio illa, quam appellavit Angelicus collimationem, dicta fuit à Serafico colligentia; ait enim in 2. dis. 31. art. 1. ad 3. Cum dicimus, carnem inficere animam, hoc intelligitur propter colligentiam, quam habet ad animam, propter quod dum deorsum tendit, eam secum trahit, ut enim dicit Gregorius, qui labenti innititur, necesse est, ut cum labente labatur.*

117. Hinc nos dicimus fortasse clarius, peccatum esse in anima, & tamen moraliter haberi per seminis infectionem præsupposita actione physica in unionem animæ & corporis tanquam conditione, quamvis enim anima non traducatur per generationem ex Adamo, nihilo tamen minus per semen producit natura humana, & vere dicitur homo hominem generare, quia eas dispositiones producit, quibus productis fit humanum corpus, & corpori sic facto anima à Deo creata conjungitur, ex hoc autem natura humana contrahit peccatum, quia generatur per Adam in quo fuit infecta; Hoc autem dicimus in semine, esse quid morale, sicuti si status innocentiae permanisset, virtus transmittendi justitiā originalem moraliter fuisset in semine. Amplius tamen non quaras, aut damna pactum initum à Deo cum Adamo. Totum etiam explicat Scotus in 2. dis. 32. qu. unica §. De tertio articulo dicens. *In instanti creationis & infusionis animæ ipsa maculatur à carne infecta, ita quod licet infectio & maculatio carnis non fuerit culpa formaliter, sed sequela culpæ, est tamen occasio culpæ in anima carni unita, quia cum anima unitur in carne, infectio ejus talis est, qualis nata est in anima talis est culpa, exemplificatur de pomo dato mundo & sedato à*



*manu recipientis*. Ex qua doctrina habes quid respondeas ulterius formæ arguementi.

118. Dices. S. Anselmus de conceptu Virgin. cap. 7. inquit. *Non magis in semine culpa quam in sputo vel in sanguine, si quis mala voluntate expuit, aut de sanguine suo aliquid emmittit, non enim sputum, vel sanguis, sed mala voluntas arguitur*. Non igitur per seminalem viam peccatum traducitur.

Sed contra, verum est Anselmi dictum, si sermo sit de causa principali ac formali, non si loquamur de causa instrumentali ac universali; semen enim illud est, per quod tanquam per instrumentum communicatur natura humana infecta ex mala voluntate primi parentis. Duo igitur ibi tradit Anselmus; nimirum, traduci peccatum per aliquid corporeum, quamvis nec in se peccatum sit, nec in eo peccatum proprie resideat, sed in voluntate; ejus verba ibidem audiamus; *patet, inquit, quomodo in infantibus non statim ab ipsa Conceptione* (intellige inchoata & nondum perfecta) *sit peccatum, quia non habent, sine qua non inest peccatum voluntatem, & tamen dicitur inesse, quoniam in semine trahunt peccandi, cum homines jam erunt, necessitatem*. Tunc autem sunt homines, quando anima corpori ex semine genito unitur.

119. Op. 2. Peccatum Adæ dimissum est, ergo non potest ita semen inficere, ut illud peccatum originale traducatur. Neque dicas, dimissum esse ut erat peccatum personæ particularis, non ut peccatum capitis; contra enim, peccatum Adami ut capitis, fundamentum habuit in peccato Adami ut personæ particularis, ergo si dimissum fuit primo modo, etiam secundo. Præterea; Si peccatum ipsius ut capitis dimissum non esset, nunc denominaret Adamum tanquam caput naturæ peccatorem; quando enim peccatum non est gratia deletum semper denominat reum, qui peccavit, sed non potest dici, Adamum.

Tom. II.

ut caput naturæ nunc esse peccatorem, ergo.

120. Resp. approbando responsionem; ad prob. in oppositum, propositio est vera quantum ad primum esse peccati, quia si non fuisset peccatum Adami personale, nec fuisset capitale, falsa est quantum ad conservationem in tota natura sic præscribente pacto & lege statuta à Deo; Quod si res esset juxta intentum argumenti, peccatum Adæ dimissum nullo modo transfunderetur. Ad 2. dico peccatum Adami adhuc perseverare, non quidem in Adamo, sed in naturæ infectione, quæ fuit terminus ejusdem peccati, ut erat peccatum capitale.

121. Op. 3. Peccatum originale trahitur immediate ab Adamo in quo omnes peccaverunt, sed ita non potest haberi per seminalem propagationem, ergo. Prob. mi. seminalis propagatio non habetur ab Adamo immediate, nec enim homines immediate ab Adamo generantur, ergo.

Resp. ne. mi. ad prob. dis. ant. seminalis propagatio quantum ad naturam non habetur &c. conc. quantum ad infectionem & vitium naturæ ne. ant. & conf. Parentes enim communicant genito immediate propriam naturam, non tamen communicant proprium peccatum originale, sed peccatum Adæ, in cujus voluntate genitum peccavit, & singuli peccarunt, rursus; semen parentum est quidem ab ipsis immediate decisum, non est tamen nisi ab Adamo immediate vitiatum, & ideo infectio & vitium naturæ est ab Adamo, quamvis natura immediate ab ipso non sit.

122. Op. 4. Si res ita est, nuptiæ damnandæ sunt, fiunt enim causa peccati originalis, sed hoc non, ergo. Hoc est unum ex argumentis Juliani; cui tamen respondet S. Augustin. lib. 3. contra eundem cap. 24. inquit, *Sicut creanti Deo non imputatur, quod rationales animæ à bono deficiunt, sed quod bonum sunt, sic parentibus gignentibus &*

N n 2

*malo*

*malo concupiscentiæ bene utentibus non putandum est, quod cum eo malo filii nascuntur, sed quod bonum sunt.* Ratio autem est, quia Christo excepto omnium hominum voluntates in Adamo peccaverunt, si ergo dum generantur, peccatum contrahunt, ipsimet hominibus genitis proprie adscribendum est, quod vero naturam humanam accipiant, parentibustribuendum est, quorum opere generantur. Non igitur sunt damnanda nuptiæ, nec peccant parentes dum generant, quia nec conjugalis copula nec parentes sunt vera causa peccati originalis, sed sunt tantum occasio & conditio, sine qua peccatum originale non traducere tur, qua propter sunt quid malum per accidens, & occasionaliter, sunt vero quid bonum per se, sicut hominum generatio per se bona est.

123. Op. 5. argumentum desumptum ex S. Augustino, ex quo videtur non in actione feminali consistere peccati originalis transfusionem, sed in ardore libidinis, seu concupiscentia, inquit enim lib. 5. contra Julian. cap. 15. *Hinc appareat, concupiscentiam, per quam Christus concipi noluit, fecisse in genere humano propagationem mali.* Deinde addit de Christo; *Caro Christi contagium peccati originalis non traxit, quia concupiscentiam non invenit.*

Resp. falsum omnino esse id quod assumitur, quod quidem multifariam ostendo; Primo quia in statu naturæ puræ, si fuisset, propagatio generis humani habita esset cum æquali concupiscentia & libidine, nec tamen peccatum originale fuisset transfusum. Secundo. Si peccatum originale transfunderetur per ardorem libidinis, ubi fuisset in coitu major ardor libidinis, fuisset etiam majus peccatum originale, quod non, cum in omnibus æquale sit; Tertio. Quia, si ex speciali Dei privilegio mas & femina coirent sine concupiscentia, adhuc proles, quæ nasceretur, peccato originali esset infecta; contrahunt itaque parvuli peccatum, quia

voluntates ipsorum continebantur in voluntate Adami in quo natura humana vitata est, signum autem hujusce corruptionis & vitii est concupiscentia, sine qua neque à Sanctis viris habetur generatio, idcirco S. Augustinus ex concupiscentia parentum, qua quis generatur, colligit peccatum originale tanquam à posteriori, quia si Adam donum integritatis servasset, sine aliquo concupiscentiæ motu fuissent homines generati. Porro caro Christi contagium peccati originalis non traxit, quia voluntas ipsius non fuit in voluntate Adami, nec ejus caro per seminalem actionem habita est.

## §. X.

*De pœna peccati originalis post hanc vitam.*

124. **D**E pœnis quas originale peccatum etiam post baptismum regeneratis hominibus intulit, nihil hic dicendum arbitror, cum satis superque experimento nobis compertæ fiant; Instituitur itaque difficultas de ejusdem pœna post hanc vitam, seu aliis terminis, qua pœna mulcandi sint infantes illi, qui vel in utero Matrum interjerunt, vel jam nati ante rationis usum sine baptismo decesserunt.

125. Refellit S. August. lib. 1. de orig. animæ cap. 9. quemdam Vincenitium asserentem, parvulos conceptos quidem ac natos esse in peccato originali, attamen etiam sine baptismo Cœlorum Regnum ipsis non esse negandum, quod posterioribus temporibus tradidit Zuinglius etsi alio fundamento, docuit enim in declarat. de pecc. origin. universam naturam humanam ita fuisse per Christum restitutam, ut omnes parvuli absque regenerationis lavacro salutem consequerentur.

126. Pelagiani, teste S. Augustin. in lib. de hæresib. cap. 88. Regnum Cœlorum infantibus istis non concesserunt, ipso

ipsos tamen vitam æternam extra Regnum Dei & naturalem beatitudinem consequuturos esse affirmarunt, ideo quemdam locum tertium statuerunt, qui medius esset inter beatorum gloriam, & damnatorum poenas. Ab hac opinione videntur non recessisse Albert. Pighius in prima controversiæ & Ambros. Catharin. in lib. de statu puerorum sine baptismo decedentium, docuerunt enim, post iudicii diem in quodam veluti Paradiso terrestri perpetuo esse victuros.

127. Est tertia sententia, quam tradunt S. Th. in quæst. I. de malo art. 1. Scot. in 2. dis. 33. S. Bonavent. Suarez, Vasquez, Becan. Salas, Aversa, Lezana &c. docet ista, infantes huiusmodi puniendos esse quidem poena damni consistente in carentia visionis Dei, non autem poena aliqua sensus, præsertim ab ab igne infligenda. Aliqui vero etsi negent poenam ignis, attamen asserunt, passuros esse poenam sensibilem internæ tristitiæ ortæ ex visionis beatæ privatione.

128. Contrarium omnino docuerunt alii, ita ut voluerint, æterna poena damni & sensus in inferno esse cruciandos, ita Driedo lib. 1. de gratia ac liber. arbit. tract. 3. Pontius disp. 18. quæst. 6. Cardinalis Noris in vindiciis Augustiniani, ubi ex doctrina Sancti Augustini contendit hoc demonstrare. Ut distinctius omnia resolvantur.

Dicendum primo. Parvulos sine baptismo decedentes æterna poena esse damnandos.

129. Hoc inprimis contra dictum. 125. 126. probandum est ex Scripturæ Sanctæ testimoniis. Joan. 3. *Nisi quis renatus fuerit ex aqua & Spiritu Sancto non potest introire in Regnum Dei.* Et infra. *Qui credit in filium habet vitam æternam, qui autem incredulus est filio non videbit vitam, sed ira Dei manet super eum.* Ad Rom. 5. *Per unius delictum in omnes homines in condemnationem.* Apocal. 20. *Qui non est inventus in libro vitæ scriptus missus est in stagnum*

*ignis.* Atqui parvuli sine baptismo non sunt renati ex aqua & Spiritu Sancto, ergo non possunt introire in Regnum Dei, non crediderunt in filium, ergo non videbunt vitam, & ira Dei manet super eos, Adami delicto infecti sunt, ergo condemnabuntur, non sunt inventi in libro vitæ, ergo mittentur in stagnum ignis.

130. Secundo. Idem demonstrandum est ex Conciliorum definitionibus, & omittendo Carthagenen. in ep. apud August. 90. & Milevit. in ep. apud eundem 92. assero Florent. quod sess. ult. inquit: *Illorum animas, qui in actuali mortali peccato, vel solo originali decedunt, innox in infernum descendere, poenis tamen disparibus puniendas.* Trident. vero sess. 5. docet, parvulos sine baptismo ad vitam pervenire non posse. Si Conciliis addere vellem Summorum Pontificum decreta, plura non deessent, mihi tamen sufficiat Innoc. III. cap. *Majores* de baptis. §. *Sed adhuc* ubi asserit, *poenam peccati originali esse carentiam visionis beatæ.*

131. Tertio occurrit constans & perpetua Sanctorum Patrum traditio. Incipiat Augustinus, qui in hac re quam plurima scripsit, quamvis nos paucis contenti erimus. Lib. de orig. ani. c. 9. ait: *Non baptizatis parvulis nemo promittat inter damnationem Regnumque Cælorum quietis vel felicitatis cujuslibet atque ubilibet quasi medium locum, hoc enim eis hæresis Pelagiana promissit.* Epistol. 106. ad Paulin. *Aliquando fatebuntur, parvulos non baptizatos vitam habere non posse, ac per hoc quamlibet tolerabilius omnibus, qui etiam propria peccata committunt, tamen æterna poena multari.* S. Fulgent. lib. de fide ad Petrum cap. 3. inquit: *Parvulos, quibus nulla possunt vel bona vel mala inesse propria merita voluntatis, insolubili nexu æterna damnatio retinet.* Gregor. lib. 9. Moral. cap. 16. *Nonnulli prius ad præsentem lucem subtrahuntur, quam ad proferenda bona malæ merita activæ vitæ perv-*

veniant, quos quia à culpa originis Sacramenta salutis non liberant, & hic ex proprio nihil egerunt, & illuc ad tormenta perveniunt. Et paulo post; *perpetua quippe tormenta percipiunt, qui nihil ex propria voluntate peccaverunt.* Tandem S. Anselmus lib. de Concep. Virgin. cap. 7. sic loquitur. *Si peccatum originale est aliquod peccatum, necesse est omnem hominem in eo natum, illo non dimisso, damnari:* Damnandi igitur sunt parvuli sine baptisinate decedentes.

132. Quinam vero esse debeat locus eorum damnationis, non est cur à nobis aliqua quaestio promoveatur, nisi velimus contra omnes sapientes viros quidpiam proferre, esse enim carcerem inferni, & semper futurum esse, docent S. Th. Bonavent. Scot. Durand. Richar. Capreol. aliique in 2. sent. dif. 33. In hoc solummodo dividuntur, quod aliqui constituant infantes in parte inferni sublimiore, quam limbum vocant puerorum, aliqui vero in eodem loco collocant damnatorum, atque hoc videtur innuere Florentinum à nobis num. 130. adductum, qua in re nihil certi possumus definire. Hoc unum, si adherendum est Scripturarum, Sanctorumque Patrum testimonio, certum nobis est, locum medium pro infantibus non inveniri, aut saltem inveniendum non esse; *Ubicumque ceciderit lignum, sive ad austrum, sive ad aquilonem, ibi erit,* legitur Eccl. 11. atque in ultima iudicii die quisque apparebit vel ad dexteram vel ad sinistram, nec alia proferetur sententia, nisi vel maledictione, *ite maledicti* vel benedictione, *venite benedicti* immutabili Christi Domini vivorum ac mortuorum Iudicis à Deo constituti, voce firmata. Noverunt hoc Sancti Patres, atque concordi calamo id tradiderunt; Vide S. August. lib. 1. de peccat. meritis & remis. cap. 28. leges. *Non est ullus ulli medius locus, ut possit esse nisi cum Diabolo, qui non est cum Christo,* & ser. 14. de verb. Apost. *Nullus reliquus est medius locus, ubi ponere queas infantes:* De

vivis & mortuis iudicabitur; alii erunt ad dexteram, alii ad sinistram, non novi aliud. Vide Hieronym. Comment. in Eccles. cap. 11. Fulgent. in lib. de fide ad Pet. cap. 27. Bedam in cap. 14. Joan. Neque in hac re fas est immorari, aut alia via oppositum errorem refellere. Sic loqui debemus juxta ea, quae ex Scripturis, cœterisque monumentis habemus, quid vero à Deo fieri possit, vel faciendum sit, temerarium esset asserere; Ad rem arbitror illud, quod ait Sanctus Augustinus lib. 3. de lib. arbit. cap. 23. ubi sic. *Quis novit quid de parvulis, de quorum cruciatibus duritia majorum contenditur, aut exercetur fides, aut misericordia probatur, quis inquam novit, quid ipsis parvulis in secreto iudiciorum suorum bonae compensationis reservet Deus?* Si quis diceret, infantes istos ponendos esse pro aliquo brevi tempore in statu viæ, in quo proprio actu mereri, vel demereri possent, & sic vel gloriam Cœlestem sibi comparare, vel gehennæ ignis se teos efficere, Divinæ providentiæ suavitatem summopere commendaret, quamvis nullum, id asserendi sufficiens argumentum haberet, nisi fortasse illud, quod Catharinus adducit, & pro quo, ut ipse asserit, plures docti viri senserunt, nimirum, *terram, hanc mansuram in æternum, & quidem purgatorem ac venustiorum, sicut scriptum est; Vidi Cælum novum & Terram novam.* Sed de hac re nolo præter vel contra Sanctorum Patrum testimonia, aliquid proferre, etsi multa dici possent, quæ improbabilia sunt, & omnino ficta.

133. Major difficultas est in statuendo, utrum infantes isti, non solum poenæ damni obnoxii sint, sed etiam poenæ sensus ab igne provenientes. Qua in re.

Dicendum secundo. Parvulos decedentes sine baptisinate non esse puniendos poenæ sensus. Sententiam hanc dicit Scotus loco citat. §. *Hic videtur esse Magistrorum.*

Hanc probat Scotus ratione deducta ex Sacris Litteris, legitur enim Apostol. 18.



cal. 18. *Quantum se glorificavit & in deliciis fuit, tantum date illi tormentum, & luctum.* Unde sic. Poenæ quantitas debet correspondere quantitati delectationis, sed parvuli nullam habuerunt sensus delectationem, ergo nec ullam. luent poenam sensus. Præterea; parvuli fuerunt quidem per peccatum Adæ aver- si à Deo, non fuerunt tamen conversi ad creaturam, ergo debent quidem puniri poena progrediente à carentia Dei, non autem progrediente ab aliqua creatura.

Respondent, parvulos se glorificasse & in deliciis fuisse non in se, sed in alio, nimirum in Adamo, proinde adhuc servari textum Scripturæ. Sed contra; peccaverunt quidem in Adamo quia eorum voluntates fuerunt in ejusdem voluntate ex pacto inito, non tamen de ligno vetito comederunt cum Adamo, comedere enim est actio spectans ad sensum, sensus autem parvulorum non fuerunt in sensibus Adami, habuerunt in ipso quod in peccato est moralitatis, non quod est actionis, proinde &c. Præterea. Quod reponunt est verum originaliter, non actualiter, poena autem sensus correspondere debet actuali peccato & delectationi; Hoc ostendo ex Scripturis. Mat. 25. *ite maledicti in ignem æternum, esurivi & non dedistis mihi &c.* Ad Rom. 2. *Omnes nos manifestari oportet ante Tribunal Christi, ut referat unusquisque propria corporis, prout gessit sive bonum sive malum.* Apocal. 22. *Ecce venio cito reddere unicuique secundum opera sua.* Hæc certe fuit mens Innocentii III. viri doctissimi, qui in cit. cap. *Majores* de baptismo, distinguens poenam debitam peccato originali à poena debita actuali, illam statuit in carentia visionis Dei, hanc vero in æternæ gehennæ cruciatu. Rifu excipienda est responsio Pontii dicentis, quod si Innocentii textus probaret, plus poenæ tribueretur originali, quam actuali, debuisset enim animadvertere illam esse posse sine ista, non istam sine illa, ideo in textu præsupponitur.

134. Accedant modo in eandem rem Sanctorum Patrum testimonia, quæ non possunt melius conciliari cum aliis à nobis adductis num. 131. quam si asseramus, parvulis poenam non sensus, sed solius damni fore infligendam. Clarissimum est dictum Sancti Gregorii Nazianz. clarissimi viri, atque in fidei dogmatibus conservandis accurrimus, distinguit iste oratione in sanctum lavacrum triplicem hominum ordinem qui sine baptismo decedunt; Alios, inquit, ex iis esse, qui baptismum contempserunt, alios ex iis, qui negligentia propria neglexerunt, alios tandem ex iis, qui illo aliorum negligentia caruerunt, ut sunt infantes, deinde concludit; *Existimo futurum, ut primi quidem tum aliorum scelerum, tum etiam baptismi contempti penas luent, alii autem penas quidem, sed leviores pendant, postremi denique nec Cælesti gloria nec suppliciis à justo Judice afficiantur, utpote qui licet baptismi consignati non fuerint, improbitate tamen carcant, atque hanc jacturam passipotius fuerint, quam fecerint,* deinde addit; *Neque enim quisquis supplicio dignus non est, protinus honorem quoque meretur, quemadmodum nec quisquis honore indignus est, statim etiam poenam promeretur.* Vides Sanctum Doctorem fateri, parvulos indignos esse honore, proinde plecti poena damni, non tamen ex hoc sequi aliam poenam sensus ipsis infligi, aut debitam esse. Neque dici potest, verba illa, *nec suppliciis à justo Judice afficiantur* intelligenda esse comparative, etenim ipse absolute loquitur, & ubi comparative loquendum erat, ipse explicavit in secundo membro, quod non fecit in tertio. Sanctus Ambros. lib. 2. de Abrahamo, & in Comment. explicans cap. 5. ad Rom. (sive autem author fuerit Ambros. vel quispiam alius, disputationem non instituo, sua tamen auctoritate non carent) asserit, inter duas mortes unam esse, quam sibi quisque propriis malis operibus acquisivit, distinguit ergo poenam



nam debitam peccatis actualibus ac soli originali; nec servari potest hoc dictum confugiendo ad minorem poenam, siquidem etiam peccatis actualibus maior vel minor poena correspondet. Tandem celebre est illud Bernardi; *Sola propria voluntas ardet in inferno*; Dixi tandem, quia potuissem asserere S. Augustinum, sed de hoc infra. Hisce aliis permotus Angles. oppositam nostrae sententiam tenentes parvulorum tortores appellavit.

135. Id autem quod supradiximus juxta mentem S. Gregorii Nazianzeni aliquo potest exemplo declarari. Fiat enim hypothesis, Principem alicui eximio viro Provinciam aliquam concedere ejusdemque posteritati, ea tamen conditione, qua si ipse in Principem deliquerit, statim cum omnibus posteris Provincia privetur, ac à Principis aula exulet, si delinquat, potest quidem ille ultra amissionem Provinciae ac aulae exilium alia positiva ac sensibili poena puniri, non tamen ejusdem posteritatis, quare? quia propria voluntate Principi non fecerunt injuriam, & in illo delinquente redditi quidem sunt indigni aulae honore ac Provinciae, non tamen positivae poenae reatum contraxerunt, ita in re nostra. Ratio autem esse potest, quia caret virtute & habet habitualementem ad malum rejici potest ab aliqua dignitate tanquam indignus, non potest tamen positivo, ac sensibili supplicio damnari, nec enim suspenduntur qui habent inclinationem v. g. ad furtum, sed qui actu furati sunt, ergo cum peccatum originis consistat tantum in carentia habitualis justitiae, & inclinatione ad malum, sequitur &c.

136. Tandem prætereundum non est, quando adultus aliquis baptizatur, nulla ipsi ab Ecclesia satisfactio poenalis injungitur propter originale peccatum, neque renetur ad illud retractandum, vel ad dolorem de ipso concipiendum, nulla, igitur in hoc saeculo sensibilis poena ipsi correspondet, ergo neque in futuro.

137. Superest modo aliquid resolvendum, utrum parvuli esto non patiantur aliquam poenam sensibilem progredientem ab igne, aliquam tamen tristitiam animique dolorem experiantur. Partem negativam cum S. Thom. Bonavent. Scoto defendunt Vasq. Suarez, Lessius, Ariaga. Contrariam Aureolus, Bellarm. Pontius. Fundamenta utriusque sententiae ego proferam, & quisquis eligat quam voluerit.

Probat S. Thom. quia infantes debent solummodo in eo genere puniri, in quo peccarunt, poena enim debet correspondere culpae, immo juxta suavissimam Dei providentiam semper minor est culpa, peccarunt autem deficientes à fine supernaturali, ad quem elevati erant, non voluntate propria sed aliena, ergo debent solummodo puniri ejusdem finis privatione, sed si aliquam tristitiam animique dolorem paterentur, hæc poena esset positiva, ergo.

138. Hanc tamen rationem facillime evadere possunt adversantes Theologi dicendo, tristitiam hanc non infligi à Deo ad instar poenae, sed naturaliter progredi ab ipsa beatitudinis privatione, sicut si aliquis in Republica humana aliqua dignitate privaretur, ex hujusmodi privatione tristaretur, licet tristitia hæc non esset illi pro poena, sed solummodo ex dignitatis privatione sequeretur. Urgere tamen posset Sanctus Thomas negando exemplum, antecedens enim tantum est verum, si dignitatis privatio oriatur ex culpa propria, ex quo, concesso antecedente, in nostro casu ratio dispar affertur.

139. Probat Scotus, quia tristitia in nobis est tantum de illis, quae inviti patimur & resistentes, ita ut velimus oppositum, atqui infantes non patiuntur beatitudinis privationem inviti & resistentes, nec oppositum volunt, ergo. Prob. mi. Si paterentur &c. haberent inordinatum affectum & de Divina dispositione conquererentur, sed hoc non, ergo. Secunda ratio ipsius est, quia

quia si propter beatitudinis carentiam, tristarentur, maximam pœnam sustinerent, contra id quod dicunt omnes cum Augustino, videlicet parvulorum pœnam esse mitissimam; Prob. assumptum, quia cum nulla beatitudinis obtinendæ spes super sit, eorum tristitia oriretur ex desperatione, quæ inter omnes damnatorum pœnas est gravissima pœna. Tandem ex eodem argumentum ita confici potest; Infantes ex dictis nullam pœnam sensus ab extrinseco patiuntur, ergo neque ullam tristitiam. Conf. ostenditur, quia cum voluntas sit magis appetitus hominis in quantum est homo, quam appetitus sensitivus, ita quidquid agit vel patitur secundum voluntatem, magis agit vel patitur quam secundum appetitum sensitivum, & ideo tristitia interior major pœna est, quam quilibet dolor ab agente externo illatus, ergo si &c.

140. Alii vero oppositum tenentes id promovent quod superius indicatum est, nimirum ex privatione boni nasci tristitiam, eoque hanc crescere quo majus est bonum cuius est privatio, atque hæc quidem tristitia esset in infantibus absque aliqua inordinata dispositione, siquidem experimur, nos ipsos absque aliquo pravo motu tristiari de amissione parentum & amicorum &c.

141. Huic tamen momento varia Doctores respondent. Inquit S. Thom. privationem boni tristitiam causare, quando contingit, aliquem eo privari, qui ad illud consequendum proportionem habuerit, hanc autem parvuli sine baptismate nunquam habuerunt, cum nec præditi fuerint gratia, nec ad liberi arbitrii usum fuerint perducti, ideo &c. Dicit Richardus, fieri ex singulari Dei providentia, ut ab eorum animis tristitia de beatitudine amissa removeatur. Inquiunt alii inixi testimonio S. Thom. qu. 5. de malo art. 3. & in 4. dis. 47. ex privatione boni sequi tristitiam, quando cognoscitur bonum & causa, propter quam est privatio; parvuli autem neque

cognoscent beatitudinem quam amiserunt, nec peccatum originale propter quod amiserunt, proinde &c.

142. Absit, à me cuspisiam docti viri responsiones reprobari. Mihi tamen magis arridet Doctrina S. Bonaventuræ dicentis in 1. dis. 33. art. 3. q. 2. parvulos positos esse in quodam æquilibrio inter damnatos & beatos, vident damnatorum acerbissimas pœnas, quas ipsi evaserunt, & latantur, vident, seu cognoscunt beatorum felicitatem quam non obtinuerunt, & mærent, sic autem fit, ut tristitia sit mixta lætitia, lætitia tristitiæ, & ita nec gaudeant nec tristentur; immo cum facilius sit esse in numero reproborum quam electorum, multi enim sunt vocati pauci electi, videtur ex infernalium pœnarum evasione majus lætandi motivum proficisci, quam ex cœlestis gloriæ privatione causam mærendi.

143. Si tamen licet hanc Seraphici Doctoris explicationem aliquantulum, perpendere, videtur ex illa sequi, infantes neque pœnæ damni futuros obnoxios; Sic ostendo; Vident inferni pœnas quas evaserunt, hoc est lucrum, vident Paradisi gloriam, quam amiserunt, hoc est damnum, itaque constituti in quodam æquilibrio inter lucrum & damnum nullam sentient pœnam damni, sicuti quia ita constituti &c. nullam sentiunt pœnam tristitiæ.

144. Validius tamen fundamentum existimat asserre Bellarminus ex Sanctorum Patrum sententiis. Prima est illa Augustini à nobis adducta num. 131. *Parvulis non baptizatis nemo promittat quietis aut felicitatis cuiuslibet, atque ubilibet, inter damnationem Regnumque Cælorum, quasi locum medium.* Verum hæc auctoritas in primis intelligenda est de quiete & felicitate positiva, deinde est contra eos, qui dicebant dari vitam æternam & naturalem beatitudinem extra Regnum Cælorum, proinde excogitabant locum medium inter beatorum gloriam & damnatorum pœnas,

quare non est ad rem. Secunda est illa, quam idem præclarissimus Doctor habet lib. 6. contra Julian. *Si hoc, idest non intrare in Regnum Dei, eis non erit malum, non, ergo amabunt Regnum Dei tot innocentes Imagines Dei, si autem amabunt, & tantum amabunt, quantum innocentes amare debent Regnum ejus, à quo ad ipsius Imaginum creantur, nihil ne mali de hac separatione patientur?*

Sed, ut vides, agebatur hic contra Julianum asserentem parvulos etiam sine baptisinate innocentes esse, in qua certe hypothefi maxima foret tristitia ab illo Regno separari, quod ipsorum innocentie debitum esset, & ad quod proportionem haberent; Quare ex hac auctoritate nihil infertur contra nos juxta Doctrinam S. Thom. supra num. 141. Tertia desumitur ex eodem Augustino in ep. 18. ad Hieronym. & ser. 14. de verbis Apost. ubi asserit, parvulos in Inferno poenam vel supplicium esse passuros, idem tradit Fulgentius lib. de Fid. ad Pet. cap. 3. dicens, parvulos sine baptismo dedecentes intollerabilia gehennæ ferre supplicia; Idem Gregor. lib. 9. Moral. cap. 16. Verum istos jam nos attulimus ad probandum nostrum primum assertum num. 131. & in illis supplicii, tormenti, gehennæ nomine aliud non intelligitur præter damnationem æternam, perpetuamque Dei visionis carentiam, quæ poena est, non tamen sensibilis, ut à Bellarmino aliisque contenditur.

145. Ultimum, quod Bellarmini aliorumque videtur favere sententiæ, desumitur ex terribilio loco, in quo velut in carcere detinentur, si enim hic maximam poenam infert damnatis, cur non parvulis, qui facultatem naturalem locomotivam exercere non possunt?

Pluribus responsionibus occurrit Mastrius quaest. 6. de peccato originali art. 2. & 1. fatetur, difficulter evitari posse hanc carceris poenam non esse ab infantibus sustinendam, quo tamen ad-

missio non sequitur, inquit, aliam per se poenam originali culpæ debitam esse, quam poenam damni; Sed quo jure, hoc dicit? quia, ut ait Vulpes ab ipso citatus, si talem sustinent poenam, non evenit ex Divina Justitia punitiva, sed ex Diaboli tyrannide procedit, quam, permittente Deo, in universum genus humanum acquisivit, cum Divinum mandatum primi parentes sunt in Paradiso transgressi; Quia vero, subdit, potestatem hanc non justo possidet jure, ideo post judicii diem à Deo privabitur, ipsasque infantium animas vel ab illo carcere liberabit, eas ad terræ superficiem, quam habitent, transfereundo, vel eas ita in illo loco detinendo, ut possint tamen moveri, secum alloqui, & ea luce frui, quæ post mundi renovationem est futura, atque hoc postremum tenent Ariaga, Lessi. Salas. Horum autem ratio est, quia illa tantum poena infantibus infligi debet, quæ in carentia finis supernaturalis, ad quem elevati erant, consistit, si autem perpetuo detinendi essent in illo carcere illaque cæcitate, privarentur etiam bonis, quæ naturam consequuntur.

146. Verum hæc Doctrina nullo pacto satisfacit, primo quia ea etiam admissa, non probaretur, saltem ante diem judicii parvulos non puniri poena sensus interioris tristitiæ; deinde, locum tertium pro ipsis æternam duraturum admitti, quod sine aliquo fundamento affirmatur. Tandem, quod oppositum est sine tanto studio & novis adinventis juxta dicta refelli potest. Hic tamen iterum dico, utriusque sententiæ fundamenta à me producta esse, illa unusquisque perpendat.

## §. XI.

*Refelluntur argumenta, quæ producuntur contra secundum nostrum assertum.*

147. **O**ppones primo ex Scripturis.

Parvuli nullum fructum bonum fecerunt, ergo in ignem mittentur, juxta illud Matth. 3. *Omnis arbor, quæ non facit fructum, excidetur, & in ignem mittetur.* Parvuli sine baptismo justis non sunt, ergo separabuntur à justis, & mittentur in caminum ignis, juxta illud Matth. 13. *Sic erit in consummatione sæculi, exhibunt Angeli, & separabunt malos de medio justorum, & mittent illos in caminum ignis.* In judicio Universalis, cui certe parvuli intererunt, dux tantum sunt classes judicandorum, quorum aliqui à dextris, alii à sinistris, illis dicitur: *Venite benedicti &c.* istis vero: *Ite maledicti in ignem æternum* atqui parvuli non erunt à dextris, ergo à sinistris, ibunt itaque in ignem æternum. Idem innuitur in Apocal. etenim cap. 20. legitur. *Beatus & Sanctus qui habet partem in Resurrectione prima, in his secunda mors non habet potestatem;* hæc autem secunda mors cap. 21. dicitur stagnum ignis & sulphuris; atqui parvuli non habent partem in Resurrectione prima, ergo ipsi superest mors secunda ignis & sulphuris. Hinc eodem cap. 20. legitur. *Qui non est inventus in libro vite scriptus, missus est in stagnum ignis.*

148. Resp. Hæc omnia à nobis concedi, immo aliqua ex istis à nobis adducta esse ad probandum nostrum primum assertum; Singula tamen inspicimus, ut singulis responsum dare possimus, nec quidpiam effugere videamur. Quod ad primum attinet, quod etiam de aliis Textibus intelligendum est, ibi sermo habetur de adultis, qui, cum fructum facere possent ac deberent, non fecerunt; manifestum est hoc, ut sistamus in eodem exemplo, etiam in arboribus

*Tom. II.*

naturalibus, quæ licet post paucos dies à plantatione fructum non faciant, attamen igni non committuntur. Quantum ad secundum verum est, parvulos sine baptismo justos non esse, atque ideo separandos à justis, mittendos insuper in caminum ignis, attamen nequaquam lædendos ab igne, quod infra explicabo. Verba autem illa, quæ sunt conclusio parabolæ sigenæ missæ in mare bonos ac malos pisces congregantis, significant, ut explicat S. Augustin. lib. 6. contra Donatis: post collat. cap. 4. Ecclesiam, in qua boni cum malis & electi cum reprobis sunt commixti, atque illa die separandi sunt tanquam oves ab hædis, non pertinent igitur ad infantes, qui nunquam in hac sigena, idest Ecclesia fuerunt. Si tertium proponeretur Durando, responderet parvulos judicandos non esse, atque in suæ opinionis confirmationem afferret quod habetur Ap. 20. *Et libri aperti sunt, & judicati sunt mortui ex his, quæ scripta erant in libris, secundum opera ipsorum* quod certe de parvulis dici non potest; attamen admittimus etiam parvulos judicio ad futuros pusilli enim & magni stabunt ante Thronum, ut legitur in eodem capite, & hæc est communis Theologorum, Sæctorumque Patrum sententia, admittimus insuper ipsos à sinistris esse collocandos, non tamen subijciendos judicio discussivo, sed solum approbativo illius quod jam factum est, inquit enim Christus Joan. 3. *qui non credit jam judicatus est,* quid enim judicari potest in parvulis, qui nihil omnino egerunt? eadem etiam Judicis sententia tam ad peccatores adultos, quam ad parvulos pertinebit, sed diverso modo; dum audis, *discedite à me maledicti* utrosque intellige, sic enim explicatur damnatio, dum audis, *ite in ignem æternum*, intellige adultos, & sic explicatur poena sensus; Quamquam et si postrema ista verba parvulos afficerent, adhuc non probaretur, nomine enim ignis æterni significari potest etiam locus in quo est ignis æternus, quin

tamen ab illo igne torqueantur, sed solummodo detineantur, tantam enim ignis habebit comburendi virtutem, quantam ipsi tribuet Divina iustitia cuius erit instrumentum, & ideo alios magis, alios minus, alios vero nihil lædet, quod postremum in parvulis evenire à nobis jam fuit demonstratum; juxta hæc explica alios similesque Textus.

149. Op. secundo. Parvuli propter peccatum originale poenis sensibilibus, ut fame, siti, morbis, puniuntur, ergo etiam poenis sensibilibus puniuntur in altera vita, neque enim post iudicii diem eorum corpora erunt gloriosa sed passibilia. Præterea; Quale est gaudium parvulorum decedentium post baptismum, debet esse poena ipsorum decedentium, sine baptismo, sed illi assequuntur beatitudinem non solum essentialem animæ, sed etiam accidentalem & secundariam corporis, ergo & isti debent puniri non solum poena essentiali, sed etiam accidentali & secundaria, quæ est poena sensibilis; Hinc sicuti gaudium corporis non correspondet bono operi actuali, ita nec poena corporis malo operi actuali.

150. Resp. ex S. Bonavent. non sic loquendum de poenis sensibilibus hujus vitæ, sicut de æternis, istæ enim sunt tantummodo punitivæ, illæ vero sunt etiam purgativæ & ad meritum conducentes; Vera tamen responsio est, quia poenæ hujus vitæ sensibiles progrediuntur dumtaxat indirectè ex originalis iustitiæ privatione, etenim fuissent etiam in statu naturæ puræ, in qua originale peccatum non fuisset, è contrario poenæ sensibiles æternæ non à natura, sed à Deo vindice directè sunt propter peccata, quæ quisque patravit; Fatemur autem parvulorum corpora post iudicii diem non futura gloriosa, sed passibilia, attamen nihil patientur nisi juxta dispositionem Divinæ iustitiæ dicta num. 148. in fine, atque hoc est quod docet Scotus loco cit. §. *Et si quærat* ad 2. dicens, quod *sicut corpora damnatorum patientur*

*ab æterno igne, sed non dissolventur &c. ita corpora illa*, idest parvulorum, *ex dispositione Divina erunt impassibilia, licet non ex dote impassibilitatis*. Ad aliud; facilius responsio est, si dicamus, Deum pœnas infligere citra condignum, præmia vero largiri ultra condignum; Secundo plus profuisse merita & passionem Christi, quæ per baptismum parvulis applicantur, quam nocuisse Adæ peccatum, ubi enim abundavit delictum, superabundavit & gratia; deinde concedo paritatem, & dico, quod sicuti visionem Dei consequuntur bona, quæ ad beatitudinem accidentalem spectant, ita privationem visionis consequuntur mala, quæ ad penam accidentalem reducuntur, non tamen ex hoc inferas hanc esse penam sensibilem, ratio arbitrata meo est, quia visio Dei est quid positivum, potest igitur esse causa gaudii positivi, sicut est gaudium sensibile, privatio autem est quid negativum, nequit ergo esse causa pænæ positivæ, sicut est pœna sensibilis.

151. Opp. 3. Peccato, cujus punitiōi statuitur major poena, statuenda est etiam minor, sed peccato originali statuitur major poena, quam sit poena sensus, ergo. Maj. patet, nam si peccato debet correspondere poena, si durum non est non negare poenam majorem, neque durum erit, non negare minorem. Prob. mi. Peccato originali statuitur poena damni consistens in privatione visionis Dei, sed hujusmodi poena major est quacumque poena sensus, ergo. Prob. mi. Visio Dei est bonum majus quocumque bono, ergo privatio visionis Dei est poena major quacumque poena, malum enim privationis eo majus est, quo majus est bonum cujus est privatio; Hinc S. Joan. Chrysof. homil. 24. in Mat. dicit: *Tanta mihi videtur poena ab ea gloria cecidisse, ut gehennam nihil æstimem in comparatione illius*. Quomobrem ex statuto nostro principio sequi deberet, quod sicuti peccato originali non correspondet poena, sen-



sensus, ita neque deberet correspondere poena damni.

152. Resp. quidquid dixerint alii, qui certe ut huic argumento responderent, plura dixerunt; non esse statuendam peccato originali maiorem vel minorem poenam, aut ex quo statuatur major, statuendam esse etiam minorem; aliter sic contra argumentantes idem argumentum efformarem. Peccato, cujus punitioni statuitur major poena, statuenda est etiam minor, sed peccato originali statuitur major poena, quam sit quævis poena, quamvis intensissima sensus, ergo peccato originali statuenda est poena intensissima sensus. Consequentiam hanc negant adversarii, minorem autem probo iisdem terminis, quibus ipsi usi sunt, ut compertum est; attendenda est ergo poena debita, & indebita, si major est debita, illa est infligenda, si minor in diverso genere est indebita, hæc est arcenda; Hoc autem contingit in casu nostro; peccatum originale consistit in privatione iustitiæ, igitur etiam ejus poena consistere debet in privatione, peccatum originale non est peccatum actuale, ergo neque ipsi debita est poena positiva & sensus, quamvis hæc sit minor illa. Ad hæc; negari posset penam damni esse penam maiorem, cum ex S. Augustino & Theologis dicatur poena mitissima in parvulis, quamvis enim malum privationis in se desumatur à bono, cujus est privatio, non sic tamen comparative, cum considerandum sit etiam subiectum in quo est, si enim secum afferat maximam tristitiam & desperationem gravissima poena censenda est, si autem oppositum, ut superius non ostendimus, contrarium dicendum est. Ex hisce explicata Chrysost. loquebatur enim de privatione gloriæ in adultis, qui peccatis propriis ab illa ceciderunt. Hæbes pariter quid respondeas postremo.

153. Opp. 4. Peccato veniali correspondet poena sensus, ergo à fortiori peccato originali, quod procul dubio majus est. Præterea. Christus, ut satis-

faceret pro peccato originali penam sensus sustinuit, ergo quia ipsi debita est poena sensus. Tandem. Plus debent pati qui culpabiliter amisit iustitiam originalem, quam qui iustitiam originalem nunquam habuit, sed qui iustitiam originalem nunquam habuisset, passus esset penam damni, ut constat, si fuisset homo in statu puræ naturæ, ergo alius ultra penam damni debet etiam pati penam sensus.

154. Resp. conc. ant. ne. conf. non enim peccato veniali correspondet poena sensus, quia sit minus peccato originali, nec huic correspondere debet, quia sit majus, sed quia peccatum veniale, quamvis sit minus, commissum est voluntate propria & actu personali, è contra peccatum originale. Qua in re adnoto. Peccatum originale secundum aversionem à Deo majus esse peccato veniali; Peccatum autem veniale secundum voluntarietatem majus esse peccato originali. Hinc originali correspondet major poena quam veniali, quia huic non convenit poena damni nisi temporanea, peccato vero veniali ex alia parte convenit major poena, quam originali, quia huic non est debita poena sensus. Ad secundum; argumentum retorquetur. Christus, ut satisfaceret pro peccato originali penam damni non sustinuit, ergo peccato originali non est debita poena damni; Rursus Christus pro peccatis nostris non sustinuit penas damnatorum, ergo peccatis nostris non sunt debita penæ damnatorum. Illas ergo penas sustinuit Christus, quas voluit, & paucioribus immo nullis potuisset superabunde satisfacere si voluisset. Adde; Christum non solum satisfecisse pro peccato originali, sed etiam quocumque actu, unde mirum non sit, si penas etiam sensibiles supra dorsum suum à peccatoribus dignatus est fabricari. Ad tertium negatur, hominem in puris naturalibus penam damni fuisse passurum, carentia enim visionis in ipso fuisset mera negatio, & perducendus fuisset ad bea-

beatitudinem naturalem, ad quam fuisset à Deo, ut auctore naturæ ordinatus.

## §. XII.

*Quid de mente Sancti Augustini sentiendum sit.*

155. **R**es magna agenda est, quam dirimere non possumus, nisi Sancti Augustini dicta in medium proferamus. In hoc negotio meliori sorte conficiendo nihil addere Augustino possumus, nisi quod Cardinalis Noris ex ejusdem doctrina nobis opponit; tanti enim virum hunc ceteroquin eruditissimum facimus, ut ipsum perlustrasse Augustinum totum fateamur, quod tamen ipse non præstat erga alios viros procul dubio doctissimos, quos vel insipientes, vel in doctrina Augustini, Conciliorumque parum versatos affirmare non trepidat; ut videri potest in ipsius vindictis Augustinianis §. 5. ubi id ex Conciliis Africanis aliisque probare contendit.

156. Audiamus igitur quid ipse proferat, & quamvis à nobis in antecedentibus rejecta sint, tamen audiamus; Primum argumentum desumit S. Augustinus ex cap. 25. Mat. quod serm. 14. de ver. Apost. ita proposuit. *Venturus est Dominus, & judicaturus de vivis, & mortuis, sicut Evangelium loquitur, duas partes facturus est, dexteram, & sinistram; Sinistris dicturus: Ite in ignem æternum, qui paratus est Diabolo &c. Dextris dicturus: Venite benedicti Patris mei, percipite Regnum &c.* Hanc Regnum nominat: banc cum Diabolo damnationem. Nullus relictus est medius locus, ubi ponere queas infantes; De vivis & mortuis judicabitur; alii erunt ad dexteram, alii ad sinistram. Non novi allud; *Qui inducis medium recede de medio. Non te offendant, qui dextram quaerit, & te ipsum admonet: Recede de medio; Sed noli in sinistram. Si ergo dextera erit, & sinistra, & nullum medium lo-*

*cum in Evangelio novimus, ecce in dextera Regnum Cælorum est: Percipite, inquit, Regnum; Qui ibi non est, in sinistra est. Quid erit in sinistra? Ite in ignem æternum. In dextera quidem ad Regnum æternum, in sinistra in ignem æternum. Qui non in dextera, procul dubio in sinistra, ergo qui non in Regno, procul dubio in ignem æternum.* Hæc dixit egregius Doctor in concione publica habita Carthagine, & adducit in hac re Cypriani sententiam, unde opinio illa de pœna puerorum sensibili publice tunc temporis fidelibus proponebatur.

157. Secundum argumentum proposito simile habet in lib. de pecc. meritis & remiss. cap. 28. ubi sic. *Nec est ullus ulli medius locus, ut possit esse, nisi cum Diabolo, qui non est cum Christo. Hinc & ipse Dominus volens auferre de cordibus male credentium istam n. scio quam medietatem, quam conantur quidam parvulis non baptizatis tribuere, ut quasi merito innocentie sint in vita æterna, sed quia non sunt baptizati, non sent cum Christo in Regno ejus, definitivam protulit ad hæc ora obstruenda sententiam, ubi ait; Qui mecum non est, contra me est.* Adducit deinde Cardinalis de Noris aliud argumentum auctoris Hypognoston lib. 5. cap. 5. quod cum alteri simile ipse fateatur, à nobis omittitur, ne rebus omnino similibus paginam, ut eruditi videamur, impleamus, quod enim unica responsione refellitur, unica est proponendum. Verba plurima, ratio eadem.

158. Post hæc à se proposita asserti laudatus de Noris varias Scholasticorum responsiones. Illam Catharini in opus. de statu parvulorum, negantis, parvulos in judicio sisti debere; illam, qua utitur Moraines disp. 40. de gratia num. 11. negans esse dogma fidei indicatum Matt. 25. parvulos esse comparituros, atque ibi vel ad dextram, vel sinistram esse collocandos, cum revera citra errorem in fide oppositum doceant Durandus & Albertus, & plurimi celeberr-

berrimi Doctores, ut Toſtat. Carthuſian. & S. Thom. in 4. diſ. 47. qu. 1. art. 3. dicunt, parvulos in iudicio comparituros, non ut iudicentur, ſed ut gloriam iudicis videant; atque hoc probabile ſuſtinent plures alii Theologi. Hiſce relatis, totus eſt probaturus, revera ad iudicium etiam parvulos fore venturos, & pro hac re adducit Concilium Africanum, & Gelafium Papam, nec non S. Auguſtinum in epiſt. 107. ad Vitalem hoc diſertiſſimis verbis oſtendentem.

159. At bone Deus, cur in hiſce, probandis, quæ à nobis conceduntur, operam & tempus inſumit? Ultro fate-mur, parvulos ad iudicium eſſe adducendos, fate-mur ad ſiniſtram eſſe collocandos; Fate-mur cum Diabolo damnationem eſſe accepturos, fate-mur, locum medium inter Regnum Dei & Diaboli abyſſum non eſſe futurum, & tamen negamus, igne tartareo eſſe comburendos, ſed ſolummodo detinendos juxta dicta ſuperius. Quare perpendendum eſt, contra quos tunc ab Auguſtino res agebatur, certe contra Julianum & Pelagianos, ſtatuentes pro parvulis locum medium, qui nec eſſet tartarea mors, nec gloria Cœleſtis Regni, ſed æterna vita; Erunt igitur infantes illi cum Diabolo non cum Chriſto, quia æterna damnatione punientur, propter quod & erunt contra Chriſtum juxta ſententiam adductam; Qui mecum non eſt contra me, eſt, quia tamen non ſunt cum Diabolo per peccatum propria voluntate commiſſum, nec ſunt hoc pacto contra Chriſtum, ut igne tartareo torqueantur. Quod ſi toties dicitur, audituros ſententiam, *ite in ignem æternum*, jam in primis diximus, ſententiam iſtam duas partes continere, unam, *diſcedite à me maledicti*. Et hæc etiam ad parvulos pertinet, alteram, *ite in ignem æternum* & hæc ad Dæmones & peccatores adultos. Quod ſi etiam hæc poſtrema parvulis aptanda eſſet, nihil probaretur, nam, quis prohibet, per ignem æternum intelligi locum, in quo eſt ignis æternus,

etiam pueri in fornace Bâbylonica fuerunt in fornace ignis, nec tamen ibi læſi fuerunt Divina ſe protegente virtute, ita & pueri ſine baptiſmo erunt in ſtagno & camino ignis, nec tamen flammæ ſentient combuſtionem ita Divina diſponente juſtitia; cui omnino ignis obediet, tanquam ejuſdem instrumentum; ſed per-mitte; Sanctum Auguſtinum non ſolum pro igne intellexiſſe locum ignis, ſed revera ipſum ignem, à quo torqueantur, ut revera videtur innuere in Enchir. cap. 23. ubi ait: *Firmiſſime tene, & nulloatenus dubites, qui ſine Sacramento baptiſmatiſ de hoc ſæculo tranſeunt, æterni ignis ſupplicio puniendos*. An contemnendas putabimus explicationes S. Th. Bonaventuræ, Scoti, Richardi, Capreoli, Majoris, aliorumque, quos Theologorum Principes, pluſquam fuerit Cardin. de Noris & antiqua & noſtra tempora ſemper habuerunt? Omnes autem iſti uno ore fate-mur, ibi Auguſtinum per exceſſum eſſe loquutum, atque ut verbis utar Bonaventuræ, *plus dixit, minus volens intelligi*. Hoc non infrequenter legimus in Sancti Auguſtini operibus, qui ut magis ſe opponeret adverſariis ſuis, in extremam partem, eſſo falſam, declinabat, ut inde medium, aſſequeretur, quemadmodum in moribus, ut docet Philoſ. 2. Ethic. via deveniendi ad medium eſt aliquali-ter procedere ultra medium verſus extremum. An non Auguſt. contra Arrium videtur quaſi declinare ad Sabellium, & contra Pelagium videtur declinare ad Arrium? Quare cum Pelagiani cum Juliano negarent parvulos plectendos eſſe pœna damni; ipſe aſſerebat plectendos eſſe etiam pœna ignis, quemadmodum aliis in locis ut ageret contra Pelagianos negantes gratiam ut libertatem ſervarent, ipſe viſus eſt libertatem negare, ut gratiam attolleret, ut in tract. de gratia indicavi.

160. Quod ſi vellent Auguſtinum, in ſtriſto proprioque ſenſu accipiendum eſſe, plane ſibi ipſi, quod nefas eſſet, contradixiſſe fateantur, neceſſum erit.

Pau-

Pauca ex eiusdem libris producam; Accipe quod scribit lib. 3. de lib. arbit. c. 23. ubi postquam dixerit, superfluo quari de meritis ejus, qui nihil meruerit, concludit; *Non enim metuendum est, ne vita esse potuerit media, quadam inter recte factum, atque peccatum, & sententia Judicis media esse non possit inter premium atque supplicium.* Quibus verbis, cum ubique excludat locum medium, attamen non excludit sententiam Judicis mediam, ita ut parvuli plectendi sint supplicio communi tam peccato originali quam actuali, non vero supplicio proprio peccati actualis, & ita medii sint inter eos qui voluntate propria aliquid meruerunt, & inter illos, qui voluntate propria se ipsos condemnauerunt. Aliud testimonium non obscurum habet Sanctus Doctor lib. 5. in Julian. cap. 8. ubi sic. *Quis dubitabit, parvulos non baptizatos in damnatione omnium levissima futuros? quæ, qualis, & quanta erit, quamvis definire non possim, non tamen audeo dicere, quodeis, ut nulli essent, quàm ut ibi essent, potius expediret.* Ex hoc duo colligo; Unum, de parvulis istis non posse affirmari illud dictum de Juda, *melius illi esset, si natus non fuisset.* Si autem torquerentur poena etiam ignis, hoc profecto de ipsis dici posset; Aliud; Augustinum loquutum esse de poenis parvulorum in genere, nunquam autem in specie, ideo se definire, quæ, qualis, quanta futura sit, non posse confessus est. Ex Augustino igitur nihil evincitur. Quod si etiam quidpiam evinceretur, adhuc à sententia nostra recedere non deberemus, nec ipse Augustinus, si viveret, ad hoc nos impelleret; iterum enim nobis diceret quod scripsit ep. 3. loquens de Hieronymo, aliisque suorum temporum Doctoribus. *Hæc sunt verba. Neque enim quorumlibet disputationes, quamvis Catholicorum, & laudatorum hominum, tanquam Scripturas Canonicas habere debemus, ut nobis non liceat salva honorificentia, aliquid eorum scriptis improbare, atque*

*respuere; Talis ego sum in scriptis aliorum, tales esse volo intellectores meorum.* Rogo, qui in hoc se Augustinum sequi profitentur, quoties ab Augustino in aliis disputationibus non recesserunt? Ut cœtera omittam, fatentur, ex ejusdem mente circumcisionem fuisse causam gratiæ ex opere operato in veteri lege, & quidem etiam plures alios Patres in eadem fuisse sententia, & tamen absque aliquo scrupulo oppositum docent; Cur ergo & idem nobis prohiberetur? Sed ut distinctius res tota peragatur, alia distincte examinemus, oportet.

## §. XIII.

*Perpenduntur alia Argumenta in oppositum.*

161. **Q**uod postremo loco protulimus in aliis quæstionibus locum fortasse potest habere, at in hac disputatione nequaquam, aut Augustinum explicare, aut ab ejus mente recedere permittitur; Alia momenta perpendamus, & alia ejusdem præclarissimi Doctoris testimonia. Hæc igitur proferantur, ut inde, an sit contra assertum nostrum intueri possimus. Est, inquit toties laudatus Cardinalis de Noris, argumentum illud, quo fateri cogimur, parvulos propter peccatum originale esse sub Dæmonis potestate constitutos. Rem ita esse in dubium revocari non potest, sive Evangelium legamus, sive Sanctum Augustinum, qui ex ejusdem Evangelii textibus, quales sunt illi Mar. 3. *Nemo potest vasa fortis ingressus in domum diripere, nisi prius fortem alliget* &c. & Mat. 2. *Quomodo potest quisquam intrare in domum fortis, & vasa ejus diripere, nisi prius alligaverit fortem?* Inferit, poena sensibili ignis æterni esse torquendos, postquam enim dixerit ejici Dæmonem ab anima pueri in baptismo per exsufflationem & exorcismum lib. 3. oper. imperf. contra Julian.

lian. cap. 200. inquit de non baptizato. *Si autem non eruitur de potestate tenebrarum, & illic remanet parvulus, quid miraris, in igne æterno cum Diabolo futurum, qui in Dei Regnum intrare non finitur?* Amplius idem Doctor idem probat lib. 5. ejusdem operis cap. 6. inquires. *An forte homines non sunt, qui cruantur de potestate tenebrarum, quarum tenet Diabolus principatum? Aut vero ita desipis, ut affirmes, eos sibi Diabolum non vindicare, quos possidet, & sue potestati subditos tenet? Sed ut taceam de his, quos potestis dicere per suam malam voluntatem à Diabolo possideri: Quid disturges de illo, de quo Pater ipseus, Domino interrogante, respondit, quod ex infantia sua ab immundo spiritu vexaretur; Nonne membra ejus, & sensus, quæ omnia Deo auctore instituta sunt, & communia impiorum piorumque sunt munera, Diabolus sibi, ut affigeret vindicabat? Hoc postremum argumentum, inquit de Noris, nos valde torquere.*

162. Pergit Eminentissimus toties & nuper laudatus; & postquam adduxerit verba illa Pauli ad Rom. 9. *Sic autem Deus volens ostendere iram, & demonstrare potentiam suam, attulit in multa patientia vasa iræ, quæ perfecta sunt in perditionem, quæ vasa dicuntur etiam ab eodem Apostolo vasa contumeliæ, inquit, cum infantes sint hujusmodi vasa, quo loco illa Deus deputabit? Deus, inquit Fulgentius, æterno semper arsura deputabit incendio.* Et Patres Africani in epif. Synod. cap. 13. *Vasa contumeliæ sunt, quibus dicitur, ite maledicti in ignem æternum.* Quod antea docuerat Africanæ Ecclesiæ Magister lib. 1. oper. imperf. contra Julian. in fine dicens. *Nos vero Deum quidem parvulorum opificem prædicamus, sed ex eadem massa medium locum vasis, ubi nec in honorem fiant, nec in contumeliæ, quem non dedit Apostolus, non damus.* Sunt igitur parvuli contumeliæ vasa in domo Dæmonis, nec sunt à Christo erepta, proinde tenentur à forti armato custodiente atrium suum;

Tom. II.

at hanc captivitatis penam esse sensibilem quis inficiabitur? Pone, inquit, Principem alicujus subditi filios non solum exilio mulctare, & paterna etiam hæreditate privare, sed illos quoque tyranno cupiam in Mancipia dividere, haud sane exigua esset ista pœna captivitatis. At quæ pejor, quæ acerbior, quæ atrocior captivitas est, quam esse sub Dæmone? Hic Phalaride, Maxentio, Dionysio crudelior, tyrannorum omnium truculentissimus. Sequitur igitur &c.

163. Verum hæc ipsi non sufficiunt; notandum admonet quod docet S. Augustin. lib. 21. de civit. cap. 11. *Octo genera pœnarum ex legibus esse: damnum, vincula, verbera, taliones, ignominiam, exilium, mortem, servitutem.* Hæc omnia parvulis infligi conpertum est; Jam de aliquibus nos ipsi non negamus. De vinculis constat, cum sint captivi, de ignominia, cum sint ex dictis vasa contumeliæ, de verberibus, cum non sit putandus adeo mitis iste tyrannus, ut servos suos ne semel quidem flagris affligat, de talione affirmet S. August. qui enim cum suo primo parente noluerunt esse sub Deo, facti sunt servi sub Diabolo. *Iusta damnatio subsequuta est, ait lib. 14. de Civit. cap. 15. talis quidem damnatio, ut qui custodiendo mandatum fuerat etiam carne spiritualis, fieret etiam mente carnalis, & quia sua superbia sibi placuerat, Dei iustitia sibi donaretur; nec, sicut affectabat, in sua esset omnimoda potestate, sed à se ipso quoque dissentiens sub illo, qui peccando consensit, pro libertate, quam concupierat, duram, miseramque ageret servitutem; mortuus spiritu volens, & corpore moriturus invitatus; deservit æternæ vitæ, etiam æterna, nisi gratia liberaret, morte damnatus.*

164. Hæc omnia à nobis rejicienda sunt, & brevi quidem facillique negotio præstabitur; Quantum ad primum spectat, plura inutilia apposita sunt, ut probaretur. Neque enim nos in sententia

P p

il.



illius sumus, quem supresso nomine vocat celeberrimum Theologum, asserentem, pœnam captivitatis peccato originali nequaquam debitam esse; Fate-mur enim cum Concilio Trident. sess. 5. de peccato originali. *Adamum cum pos-seris incurrisse cum morte captivitatem sub ejus potestate; qui mortis deinde ha-buit imperium, hoc est Diaboli.* Quod jam antea traditum fuerat in cap. *Sacer-dotes* de Consecr. dis. 4. cap. *Parvuli* cap. *Sicut nostris* & cap. *De hinc*, nec non à S. Cœlestino in epis. ad Episc. Galliarum cap. 12. Rursus nec assentimur Cathari-no dicenti; *Neque sub Diaboli perpetuo potestate erunt, quia & pro illis ejectus erat Diabolus foras in die novissimo, ut nihil juris habeat ulterius in illos.* Tan-dem nihil eorum dicimus, quæ ipsæ ra-tiociniis suis, pluribusque testimoniis evellere contendit; Sed revera fate-mur, pueros sine baptismo esse sub Dæmonis potestate, & in igne æterno futuros, sed modo à nobis superius ex-plicato; Quod vero dicitur de exuffla-tione & exorcismo, utique hoc ab Ec-clesia fieri ad majorem expressionem concedimus, quamvis tamen nec exuf-flatio nec exorcismus fieret, adhuc per materiam & famam debitam id obtine-retur nempe puer à Dæmonis potestate liberaretur, ut patet in iis, qui ab ob-stetricibus baptizantur; Subditos igitur tenebrarum Princeps parvulos tenet, neque nos locum medium affirmamus, quem locum excludere semper & tan-tum voluit Augustinus. Quod in secun-do argumento, quod tanti existimatur, assertur, nullum omnino est, immo osten-ditur nostræ favere sententiæ. Audi. Puer ille ab infantia sua à Spiritu im-mundo vexabatur; Certe hic infans in-nocens erat, & tamen mittebatnr à Deo Diaboli potestas in illum, ergo ex Diaboli potestate nihil potest inferri pro pena peccati originalis; diversa tamen est potestas Diaboli in corpora, diversa in animas; corpora torquere sensibilibiter potest, animas non potest, nisi propria

voluntate se Diaboli potestati tradide-rint. Quod corpus torqueat, ad alios fines Divinæ ostendendæ virtutis atque aliorum fidei excitandæ referri potest. Quod vero semper animas infantium sensibili pœna persecuturus sit, ad quem finem dirigi potest? ad Divinam, in-quietas, justitiam; Sed hoc à te proban-dum superest, & oppositum à nobis de-monstratum est. Dedit Deus Diaboli potestati Jobi corpus, animam tamen servandam præcepit. Quod dederit cor-pus Jobi patientiæ, & Divinæ gratiæ vir-tus apparuit; Si animam dedisset, præ-ter suæ Clementiæ ac statutæ justitiæ fines actum esset.

165. Eodem pacto etiam concedi-mus, parvulos sine baptismo esse vasa iræ ac contumeliæ, omnis enim nasci-mur filii iræ, & perditionis, sed aliud est, esse hujusmodi filium voluntate, propria proprioque peccato, aliud vol-untate aliena, & peccato non personæ, sed naturæ. Ira ac perditio prima utrum-que sibi postulat pœnam, non secunda. De illa autem Apostolum loqui, ex ejus-dem verbis manifesto apparet; dicit enim, *attulit in multa patientia vasa iræ* quod de infantibus vere dici non potest; Utique vasa hæc non solum ori-ginali, sed etiam actuali peccato fada-ta quo loco deputabit Deus, nisi æterno arsura semper incendio? in quo sensu lo-quuntur tam Fulgentius, quam Patres Africani; præsertim cum verba illa, *ita in ignem æternum* ad parvulos non perti-nere jam dixerimus; distinguas igitur oportet iram, perditionem, contume-liam, maledictionem proprio reatu con-tractam ab illa, quæ tantum alieno. Ut-quid vero postremum Augustini testi-monium adducitur? nonne clarum est, ibi tantum excludi locum medium? per-pende verba; non est cur plura dica-mus. Sint igitur parvuli contumeliæ vasa in domo Dæmonis, teneantur à forti armato custodiente atrium suum; captivitas hæc non est pœna sensibilis propter rationes à nobis adductas, nec enim

enim Dæmoni, Tyranno illi, concessa est omnis facultas, sed ut iustitiæ Dei ministro illa tantum, quam Dei iustitia præscripsit ac definivit. Poena correfpondeat culpæ, immo sit mitior, dicit Clementissimus ac iustissimus Dominus meus, cui gloria in sæcula, nec quidpiam præter hoc agere potest Tyrannus ille, Phalaride, Maxentio, Dionysio truculentior. Quod si argumentum hoc probaret, quomodo sustineri posset poena illa mitissima, quam parvulis infligendam dicit Augustinus? Mitissimum dicant Dæmonem, necesse erit; non erit ergo Phalaride, Maxentio, Dionysio crudelior.

166. Hinc ad alia progredimur, & omnia à nobis conceduntur in sensu à nobis exposito, præter verbera & talionem, illa quidem propter dicta num. superi. talionem vero, quia si nihil aliud afferatur ad hoc probandum præter dictum illud Augustini, ibi sermonem esse de Adamo, nemo non videt, in quo nil mirum, cum ipse propria voluntate & actu peccaverit; non sunt, ergo tanti facienda illa verba, de quibus dicitur. *Tene aurea Sancti Doctoris verba* nisi velit, aurea esse omnia, quæ ipse dixit, quæ tamen huiusmodi præsertim in hac sua Dissertatione non reperio.

167. Plura in alio capite congerit Idem Eminentissimus ex Conciliis Africanis & literis Innocentii Papæ deprompta, quæ à me tamen consulto prætereunda sunt, cum in illis contra Pelagianos sententias ferri compertissimum sit; Urget vero præsertim, quod in Africana Ecclesia adeo certum fuerit, pueros sine baptismo defunctos poenis sensibilibus fore puniendos, ut id inter dogmata fidei sit relatum; Hoc autem ostendit ex libro Fulgentii Ruspensis Episcopi de Fide ad Petrum Diaconum, in quo quadraginta Dogmata ad Fidem pertinentia recitantur, & omnia incipiunt; *Firmissime tene & nullatenus dubites* &c. habentur autem in cap. 24. hæc verba. *Firmissime tene & nullatenus dubites, non*

*solum homines jam ratione utentes, verum etiam parvulos, qui sive in uteris matrum, sive cum de matribus nati sine Sacramento Sancti baptismatis, quod datur in nomine Patris, & Filii, & Spiritus Sancti, de hoc seculo transeunt, ignis æterni sempiterno supplicio puniendos, quia, etsi propria aditionis peccatum nullum habuerunt, originalis tamen peccati damnationem carnali Conceptione & Nativitate traxerunt.* Et cum inde omnia capitula recitasset hæc habet. *Hæc interim quadraginta capitula ad regulam veræ fidei firmissime pertinentia fideliter crede, fortiter tene, veraciter patienterque defende; & si quem contrarium dogmatizare cognoveris, tanquam pestem fuge, & tanquam Hæreticum abjice* &c. Tandem assertur Gelasius ex Africa ad Romanam Apostolicam Sedem evectus, qui in epist. ad Episc. per Picenum contra Senecam delirum Senem Pelagianum missa hæc scribit. *De parvulis autem quod asserit, sine baptismo pro solo originali peccato non posse damnari, satis impia, satis profana propositio est.* Nihil est, ergo quod dicant, quod non renati infantes tantummodo in Regnum Cælorum ire non valeant, non autem perpetua damnatione puniantur. Dicant igitur in morte, perpetua constituti, si non æstimantur esse damnati. Tollant, ergo, de medio nescio quem ipsi tertium, quem decipiendis parvulis faciunt, locum. Et quia non nisi dexteram partem legimus, & sinistram, non illos faciant in sinistra Regione sine baptismo permanere, sed baptizatos sinant ad dexteram salutarem sacra regeneratione transferri.

168. Optime quidem hæc dicta esse non inficiamur, immo approbamus, sicut Pelagianum errorem proscribendum esse profiteamur, aliud autem non probant præfata, & siquæ sint alia testimonia. Fulgentii mentem circa ignis supplicium ita exponimus, sicut Sanctum Augustinum exposuimus, & nota in ejusdem verbis hæc haberi, *originalis tamen peccati damnationem traxerunt.* Pro bent

igitur, originalis peccati damnationem poenas ignis sensibiles secum trahere; Hoc nunquam, nisi in sensu Pelagianorum, probabunt. Sed si ex Fulgentio id contendat, profecto invictum argumentum contra ipsos conficiam. Quod Fulgentius tradit tanquam Dogma Fidei recipiendum esse præscribit, hoc ex laudatis testimoniis eruitur, atqui parvulos torqueri poena ignis sensibili, non est Dogma Fidei, ergo nunquam Fulgentius hoc docuit. Voluit tantummodo docere parvulos damnandos esse, neque tertium locum inveniri inter damnationem & beatitudinem supernaturalem, & hoc quidem esse Dogma Fidei fateamur. At dicit, hoc apud Africanos Patres tanquam Dogma Fidei receptum esse. Verum, est ne diversa fides apud Africanos? hæc una est, & quod Dogma Fidei Ecclesia Romana non declarat, ne dicas Ecclesiam Africanam recipere. Argumentum Norisium nimis probaret, & falsum omnino probaret, unde miror, tantum virum sui ratiocinii errorem non cognovisse. Magis tamen desipit in asserenda Gelasii Papæ auctoritate. Perpendantur omnia verba; *Sine baptisate pro solo originali non posse damnari satis impia, satis profana propositio est.* At nos fateamur damnari. Nihil est ergo, quod dicant, quod non renati infantes tantummodo in Regnum Cælorum ire non valeant, non autem perpetua damnatione puniantur. Hoc à nobis nunquam asseritur. Tollant ergo de medio nescio quem ipsi tertium, quam decipiendis parvulis, faciunt locum. Vide totum hoc esse contra Pelagianos tertium statuentes locum; Utique ipsi parvulorum erant deceptores, nequaquam nos, qui eos condemnandos esse apud inferos profiteamur. Potius nos cum Scoto dicemus, adversarios nostros esse *puerorum tortores.*

## §. XIV.

*Nonnulla alia perpenduntur.*

169. **Q**uod usque modo arbitrato meo frustra protulerunt qui se Augustini Doctrinam sequi, ac in medium producere gloriantur, aliis argumentis ex Patrum ac Scholasticorum sententiis amplius confirmare contendunt. Ducem volunt Hieronymum, qui inter Pelagium sub nomine Critoboli, & virum Catholicum sub nomine Attici Dialogos contra illum instituit; Critobolus ita opponit. *Oro te, quod infantuli peccavere? Nec conscientia eis delicti imputari potest, nec ignorantia; qui juxta Jonam Prophetam manum dexteram nesciunt, & sinistram; Peccare non possunt, & possunt perire, balbutiens lingua videtur, & eterna miserie cruciatus miseris preparantur.* Atticus autem respondet, atque ex Apostolo peccatum originale probat, ut pueris tormenta injuste non infligi videantur. Verum huic, sicut superioribus respondemus. Iterum redit ad Fulgentium, qui lib. 1. de verit. prædestinationis & gratiæ cap. 14. ait. *Reddet unicuique secundum opera sua, ut non solum pro originali peccato æternis ignibus ardeant, (quibus arsi sunt sine baptisate morientes etiam parvuli, qui nihil boni aut mali egerunt) sed etiam &c.* Verum, non aliter intelligendum, quam Augustinum, sentimus.

170. Adducitur insuper S. Gregor. Magnus cum S. Isidoro Hispalensi; Illius testimonium 9. Moral. cap. 12. jam adduximus probaturi, infantes æterna morte esse plectendos, quare superfluo hic asserretur. Alter vero lib. 2. differ. spirit. num. 26. inquit. *Illud tamen tenendum est, parvulorum animas nexu peccati originalis esse adstrictas, quæ nisi præcipiant baptisatis Sacramentum, Regni Cælestis participes esse non possunt, sed cum carne, & commune habebunt peccatum, & pari judicio damnabuntur in-*

*igne.*

*ignem æternum*; & lib. i. sent. cap. 22. ait. *Pro solo originali reatu luunt in Inferno nuper nati infantuli pœnas*. Verum, hoc ultimo testimonio nihil probari, satis apparet; quomodo vero verba illa priora, *in ignem æternum* accipienda sint, jam explicavimus. Atque eodem pacto omnes alios Patres, ut Avitum Antistitem Viennensem, Prudentium Episcopum Tricassium, Anselmum &c. benigne interpretandos esse existimamus.

171. Dolet hic notus Cardinalis, quod post annum ducentesium supra millesimum Christianę epochę novę opinioniones à Scholasticis procussæ sint, eosque dicit, si in Patrum voluminibus tantum studii ac laboris posuissent, quanto Aristoteli explicando impenderunt, profecto Sancti Augustini sententiam obducturos non fuisse; Verum tanta, subdit, fuit vis veritatis, ac tantum Augustini auctoritas valuit; ut plerique etiam Scholasticorum pedibus in Augustini sententiam ierint. Hic assert Grego-

rium Ariminensem in Augustini lectione versatissimum, Augustinum Musæum, Michaellem Paludanum, Alphonsium à Castro, plures alios etiam ex Scotistis &c.


172. Melius & validius pro se dixisset, mente in Augustini sententiam ierint, quam pedibus, quos in disputationibus non timemus; Quod vero Scholasticos alios ita dilaniet, ut eos dixerit studia sua in Aristotelis lectione impendisse, nequaquam in Patrum voluminibus, non mediocrem assert, ut cœteros omittam, Sanctis Thomæ ac Bonaventuræ injuriam, hos in Sanctorum operibus fuisse quam maxime versatos, nemo, qui eos noverit, inficiabitur, & si quis fuit Sancti Augustini Doctrinæ verus Discipulus ac sectator, certe fuisse Sanctum Thomam sapientes omnes profitentur. Quamobrem plura alia prætereundo, quæ ex dictis rejecta sunt, nostram sententiam præferendam censemus.

## Q U Æ S T I O II.

### De Peccato Actuali.

#### §. I.

*An recte dividatur peccatum actuale in veniale & mortale.*

I.  Am peccati actualis definitionem juxta Augustini doctrinam attulimus sub hujus tractatus initio, videntum modo, utrum præter peccatum mortale admitti etiam debeat peccatum veniale. Hac in re divisionem hanc prorsus à medio sustulit primo Jovinianus, deinde Pelagius. Omnia peccata paria esse asserbat ille, ut colligitur ex S. Hieronym. lib. 20. ad-

versus eundem, & S. Augustino ep. 29. ad Hieronym. quem commendat, tanquam hujusmodi erroris egræguum destructorem. Pelagius vero per quodlibet peccatum gratiam Dei amitti docebat, & quia aliquos justos fateri debebat, aliquos sine omni prorsus peccato vivere posse affirmabat, ut pariter ex Hieron. in 1. & 2. dial. & S. August. lib. de hæresib. cap. 88. deducitur.

2. Errore isto proscripto non una fuit posteriorum Hæreticorum mens atque sententia. Aliqui docuerunt, omnia peccata mortalia esse; si per mortale intelligatur illud, quod mortem æternam inducere potest, si vero illud quod de facto æternam mortem inducit, si lo-

qua-



quamur de reprobis omnia mortalia, sunt, si de electis, omnia venialia; Ita Wicleffus, ut refert Thom. Waldens. tom. 2. de Sacram. cap. 155. Aliqui dixerunt, omnia opera hominum peccata esse, si in sui natura considerentur, venialia vero fieri ex sola Dei misericordia, quatenus à Deo non imputantur. Ita generatim loquendo omnes, quos Lutheranos Calvinianos appellamus, & tanquam universi pestem detestamur, & quamvis diversis modis terminisque se explicent, attamen ad idem collimant. Horum fundamenta à nobis evulsa sunt, dum hanc non imputationem peccatorum in tractatu de gratia rejecimus & à nobis demonstratum fuit, non omnia opera hominum esse peccata. Quare ad quaesiti resolutionem deveniendo.

3. Dicendum est; Dari præter peccata mortalia etiam venialia, proinde recte dividi peccatum actuale in mortale ac veniale. Hoc autem ostendimus primo ex Divinis Scripturis, quas quidem plurimas præterire debeo, cum de istis dicturus sim, ubi, si superi dabunt, de purgatorio sermo erit, eas tamen indicare hic possem, sed nolo paginam, ut cœteri solent, bis implere; quare brevioribus verbis sic, 1. Joan. 1. *Si dixerimus quia peccatum non habemus, ipsi nos seducimus, & veritas in nobis non est.* Jacobi 5. *In multis offendimus omnes: Proverb. 24. Septies cadet justus, & resurget; impij autem corruent in malum.*

Hicce positis, sic argumentor. In multis offendunt omnes, sed omnes mortaliter non peccant, ergo datur aliquod peccatum, quod mortale non est; & adverte, hoc à Jacobo dictum esse etiam de se ipso, qui tamen post acceptum Spiritum Sanctum erat in gratia confirmatus; proinde nunquam mortaliter peccavit. Idem argumentum fit ex textu Sancti Joannis. Ex ultimo vero inferitur, justum cadere, sed adhuc justum permanere, alioquin nullum esset discrimen inter justum, & impium, qui peccando lethali ter corruit in malum, quod est

ratiocinium Sanctorum Patrum, præsertim Ven. Bedæ in cap. 3. Jacobi.

4. Sed quia de Sanctorum Patrum. Ratiocinio loquuti sumus, liceat ipso- rum mentem, qualis fuerit in hac re, proferre, sed etiam istis paucis adducendis contenti erimus. S. Hieronym. in cap. 2. Jerem. inquit: *Qui levi peccatorum sorde maculatus est, levioribus purgatur monitis.* S. August. in Ench. c. 22. ait: *Non ideo mendacium poterit aliquando laudari, quia nonnunquam pro salute quorundam mentimur, peccatum ergo est, sed veniale.* Testimonio hoc nullum clarius afferri potest; nisi forte afferatur alius ejusdem Sancti Doctoris lib. de nat. & grat. cap. 38. ubi dicit; *Quia sepe in levissimis, & aliquando incautis obrepit peccatum, & justi fuerunt, & sine peccato non fuerunt.* Adnota, justitiam cum peccato componi, sed cum peccato mortali non componitur, ergo datur peccatum aliquod præter mortale, hoc aliud non est, nisi veniale, ergo datur peccatum veniale. Omitto Orig. homil. 35. in Luc. Tertul. in lib. de anima cap. 17. Chrysost. hom. 24. in Mat. &c.

5. Hinc non immerito Concilium Trident. sess. 144. cap. 5. duplicem distinguit poenitentiae materiam, unam necessariam, liberam alteram; illam dicit peccata mortalia, quæ in confessione necessario aperienda sunt, hanc vero peccata venialia, quæ utiliter aperiri fatetur. Hoc multo ante traditum fuit etiam in Concil. Milevitano cap. 7. & 8. ubi docemur, peccata quædam etiam in hominibus justis sine justitia proprio detrimento reperiri, quæ tamen indigeant remissione; & nota, ibi à Concilio afferri illas Scripturas, quas nos attulimus, illam præsertim Joannis. *Si dixerimus, quia peccatum non habemus &c.* Addo tandem in Bulla Pii V. renovata à Greg. XIII. inter alias propositiones hanc reperiri damnatam. *Nulla sunt peccata venialia ex natura sua.* Hoc pro Catholicis dico, non enim me latet ab Hæreticis risu accipi.



6. Neque vero pro sententiæ nostræ veritate rationes deesse arbitrentur, quarum plures affert Bellarm. lib. 1. de amiss. gr. cap. 11. mihi satis sit dicere, quod sicuti inter homines reperiuntur offensæ graves amicitiam dissolventes, & alia leves, quæ amicitia quidem fervorem minuunt, attamen amicitiam servant, ita in hominibus respectu Dei reperiuntur peccata gravia, quæ gratiam adimunt & justitiam, necnon peccata levia, quæ solum gratiæ fervorem impediunt; & quemadmodum non omnes corporis morbi graves sunt mortem inducentes, ita non omnes animi morbi graves sunt, & mortem inducunt, atque ideo non omnia sunt peccata lethalia.

7. Quoniam vero, ut supra dictum fuit, hoc inquit contingere in electis non sic in reprobis, ita ut omnia in reprobis sint mortalia, in electis nonnisi venialia, ideo placet quid amplius subdere. Mat. 5. nullo habito respectu ad prædestinationem vel Divinam misericordiam ab ipsa rei peccatorum mensura declaratur, dicitur enim. *Qui irascitur fratri suo, reus erit iudicio, qui dixerit raca, reus erit Concilio, qui dixerit fatue, reus erit gehennæ ignis.* Minus igitur per se loquendo, est tantummodo interne ita leviter irasci, ut quis in nullam vocem erumpat; Minus leve est in aliquam vocem erumpere, seu aliquod signum externum, quod tamen convicium non sit; Grave autem, dum proximi contemptum & injuriam parit. Præterea. Luc. 6. *Quid vides festucam in oculo fratris tui, trabem autem, quæ in oculo tuo est, non consideras.* Sunt igitur peccata, quæ comparantur festucæ, & quæ comparantur trabi; quod etiam explicatur aliis verbis Matt. 23. *Cæci sunt, excolantes culicem, camelum autem glutientes.* Tandem. Adamus, David, & Petrus Apostolus erant prædestinati, & tamen eorum peccata mortalia fuerunt. *Quicumque die comederis morte morieris* dictum fuit Adamo Gen. 2. quod non solum de morte corporis, sed animæ in-

telligendum esse monent Sanct. Ambros. lib. 2. de Parad. cap. 9. & Sanct. Augustin. lib. 13. de Civit. cap. 12. Davidis quoque peccatum lethale fuisse, nemo dubitat, qui ejus poenitentiam & lacrymas non ignorat; Unde S. August. in ps. 50. sic eum loquentem ac deprecantem inducit: *De meo tam lethali vulnere desperarem, nisi tantum medicum reperirem.* Suum quoque peccatum Petrus amare flevit, & de eo dixit idem S. Augustin. tract. 66. in Joan. *Mortuus est negando, & revixit plorando.* Itaque &c.

8. Opp. 1. ex Scripturis in quibus peccati venialis ac mortalis nulla habetur distinctio, absolute enim dicitur Deuter. 17. *Anima, quæ peccaverit, ipsa morietur.* Et ad Rom. 6. *Stipendium peccati mors. Qui solverit unum de mandatis istis minimis & docuerit sic homines, minimus vocabitur in Regno Cælorum.* Matt. 5. idest, ut explicat S. Th. non erit in Regno Cælorum.

Resp. in pluribus Scripturæ locis sermonem tantum fieri de peccato mortali, & ita res se habet in adductis, aliisque similibus, in pluribus vero sermonem esse etiam de veniali, quales sunt illæ, quas nos adduximus; Quod si illa mandata minima vocantur; hoc verum est tantum in sensu comparativo, sunt enim mandata pertinentia ad secundam tabulam, quæ minima sunt comparata ad primum mandatum, quo fides, spes, & charitas præcipiuntur, ut declarat S. August. in ep. de ferm. Dom. in monte. Præterea; nota verbum illud, & docuerit verbum autem Dei profanare, sive detorquere etiam in minimis grave peccatum est. Tandem adverte, apud Scribas adulterium & amicorum odium grave peccatum erat, concupiscere vero uxorem alienam, & inimicos odio habere leve existimabatur, ideo dixit, *qui solverit unum de mandatis istis minimis &c.*

9. Opp. 2. ex eo loco Joan. *Si non laveris tibi pedes, non habebis partem mecum* per pedum autem lotionem pecca-

torum venialium lotionem Sancti Patres intelligunt, præsertim S. August. in ejusdem loci comment. & S. Bernard. in ferm. de Coena Domini, ergo peccata venialia excludunt à parte habenda cum Christo, sed ita non distinguuntur à mortalibus, ergo. Præterea. Mat. 10. legitur. *Quicumque dederit uni ex minimis istis calicem aquæ frigide, non perdet mercedem suam.* Ex quo sic licet ratiocinari. Opera bona quantumvis minima merentur eternam mercedem, ergo opera mala, quantumvis minima supplicium æternum. Ratio autem esse potest, quia peccatum veniale est offensæ infinitæ majestatis Dei, ergo ipsi debita est privatio ipsius Dei, per consequens poena æterna.

Respon. Pedum lotionem considerare posse vel in se, vel ut affectam inobedientia obstinata ac resistente; In hoc secundo sensu est grave peccatum illam renuere, & ita Petrus non habuisset partem cum Christo, quia Christi voluntati obstinate resistisset; Quod si etiam absolute intelligenda essent illa verba, atque per pedum lotionem significari peccatorum venialium purgationem, non inde sequeretur quod Hæretici intendunt, nam non habere partem cum Christo vel potest intelligi ad tempus, vel pro semper; primum tantum est verum, siquidem peccata venialia licet non excludant ab hujusmodi parte, attamen retardant, donec purgentur. Ad 2. dictum illud Christi Domini libenter concedimus, sed dicimus etiam eum, qui venialiter peccat, sua poena fore puniendum. Præterea non eodem modo loqui debemus de mercede, quo de poena, mercedem enim tribuere spectat ad Dei liberalitatem, cujus est ultra condignum præmia largiri, penam autem infligere ad Divinam justitiam, ejus est punire citra condignum. Tandem. Opus bonum, etsi minimum meretur vitam æternam non ex se, sed propter charitatem à qua proficitur, ergo etiam opus malum minimum, &

ex objecto leve reatum habet mortis æternæ, nisi fiat ex Dei contemptu, & tum fieret grave; Ex quo respondeas argumento. Ad rationem. Fatemur peccatum veniale esse offensam Dei, sed levem, ideo etiam levi poena puniri debet.

10. ° Opp. 3. ex Patribus, vel asserentibus nullum esse peccatum existimandum ut parvum, ita S. Basil. in qu. compendio explicatis, quest. 4. hujus rei etiam rationem afferens, quia videlicet Sanctus Paulus de omni peccato generatim pronuntiaverit, stimulum mortis peccatum esse, & quest. 293. asserit, in novo testamento gravia & levia, peccata non differre, vel dicentibus, etiam hominibus justis pertinescendum esse, nisi super exaltaret misericordia judicium; Unde lib. 9. Confess. cap. ultimo dicit. *Væ etiam laudabili vitæ hominum, si remota misericordia discutias eam.* Ex quibus inferri potest, peccata venialia non esse hujusmodi ex natura sua, sed solum ex misericordia Divina.

11. Sed præterea omittenda non sunt plura alia Sancti Augustini testimonia, de quibus Sestarii non mediocriter gloriari possent; atque in primis in epif. 108. ad Seleucian. asserit, per plura peccata levia hominem in Infernum detrudi, de istis enim sic ait; *Si collecta contra nos fuerint, ita nos gravabunt, & oppriment, sicut unum grande peccatum. Quid enim interest ad naufragium, utrum uno grandi fluctu navis operiatur, & obruatur, an paulatim subrepens aqua in sentinam, & per negligentiam, derelicta atque contempta, impleat navim, atque submergat?* Idem fatetur conc. 3. in psal. 118. Idem tract. 12. Joan. Idem tandem tract. 1. in epif. Joan. ubi hæc habet. *Ista levia; quæ diximus, noli contemnere: si contemnis, quando appendis, expavesce, quando numeras. Levia multa faciunt unum grande. Multæ guttæ implent flumen. Multa grana faciunt massam.*

12. Respondemus tamen, etiam concessis omnino hisce dictis, nihil contra nos probari; nam sequeretur ad summum, plura venialia non distingui ab uno mortali, non tamen non distingui unum mortale ab uno veniali, quo dato adhuc veritas asserti nostri locum haberet. Sed, ut verus Augustini sensus habeatur, dicendum, ibi loqui non in sensu formali, sed dispositivo, qui enim contemnit venialia sensum incidit in lethalia juxta illud Eccles. 19. *Qui spernit modica paulatim decidet*. Et aliud Gregor. lib. 10. Moral. cap. 14. *Si curare parva negligimus, insensibiliter seducti, audacter etiam majora perpetramus*. Aptissimum in hac re exhibet exemplum S. Thom. 1. 2. qu. 88. art. 3. Vulnus enim leve si negligatur, paulatim gignit incurabile & letiferum apostema. Tandem ex laudatis verbis satis aperte colligitur, loqui Sanctum Doctorem de illis peccatis venialibus, quæ reducuntur ad unum moraliter, v. g. multa levia furta, facta uni personæ, faciunt unum furtum grande, perpende dicta, nec nostram reprehendentes explicationem.

13. Superest, respondeamus argumento proposito in object. 3. num. 10. & quantum attinet ad Basilii testimonium, incertum omnino est; questionum illarum ipsum fuisse authorem; Hoc colligimus ex Sozom. lib. 3. hist. cap. 13. & Niceph. lib. 9. cap. 16. Demum tamen, fuisse Basilium, certe in iis aliud non intendebat, quam suadere, non esse contemnenda peccata quamvis levia, omnia enim sunt stimulus mortis vel formaliter vel dispositive, sicut dictum fuit, in quo sensu etiam non differunt à gravibus; Hoc præsertim valet, si attendamus eos, quos ipse instituendos susceperat, erant enim Monachi, in quibus, cum ad perfectionem teneantur, etiam peccata levia gravia existimantur. Ad aliud Augustini; Illud Væ intelligendum esse de poenis purgatorii clare constat, etenim prius oraverat pro matre sua, quam piam & optimis mori-

Tom. II.

bus præditam commendavit, deinde addit. *Væ etiam laudabili &c.* Si autem hæc verba referrentur ad damnationem æternam, superfluum & illicitum fuisset orare.

## §. II.

*Per quid peccatum veniale differat à mortali.*

14. **E**TSI omnes Catholici peccatum, quod appellant veniale ab eo, quod dicunt mortale, sejungant, attamen in quo ipsorum differentiam collocent, non una est ipsorum opinio. Veniale hoc multifariam contingere posse, ita notum suppono, ut si dicerem, aliud esse hujusmodi ex suo genere & objecto, ut est ex. c. verbum otiosum, aliud ex parvitate materia v. c. furtum unius obuli factum diviti, & aliud ex imperfectione actus, ut subiti, ac inconsiderati motus superbiæ, vindictæ &c. Superflue omnino me dicturum existimarem. Aliam peccatorum venialium divisionem affert Eminentissimus Bellarmin. lib. 1. de amf. gr. & statu pecc. cap. 3. dicens, alia esse à causa, quod committitur ex ignorantia, vel ex infirmitate; & hoc non est veniale, ut prorsus à mortale distinctum, sed tantum opponitur mortali, quod committitur ex malitia, atque de illo loquitur Apost. 1. ad Timot. 1. cum dicit. *Fui blasphemus, contumeliosus, & persecutor, sed misericordiam consequutus sum, quia ignorans feci in incredulitate*: Alia esse ab eventu, illa nimirum, quæ per poenitentiam expiantur, & hoc etiam pacto non opponuntur absolute mortalibus, sed illis tantum, quæ reipsa non remittuntur, & ideo poenitentia defectu ad mortem perducunt æternam. Alia esse ex natura & ratione peccati, quæ non sunt contraria charitati Dei & proximi, atque hæc propria ea sunt, de quibus nostra fit controversia, & de quibus sub initio paragraphi loquuti sumus.

Q. 9

Por.

Porro non quaritur de utriusque differentia accidentaria, & à posteriori, qualis esset, si diceremus, veniale illud esse quod punitur temporaria poena, mortale vero illud, quod aeterna, sed de primaria, ac veluti, ut iniqui, essentiali.

15. Patres Thomistæ cum suo Doctore hic qu. 88. art. 1. & alibi docent, peccatum mortale illud esse, per quod creatura à fine recedit contra finem agendo, veniale vero illud, per quod recedit tantum à mediis, quæ sunt ad ultimum finem. Recentiores communiter dicunt, mortale à veniali distingui, quia illud ex natura sua sit grave malum, veniale sit leve. Ita Curiel, Hurtadus, Ovied. Aversa. Alii dicunt, mortale esse offensam Dei, minime autem veniale, in illo contineri contemptum Dei, quia ipsi creatura præfertur, nequaquam in isto. Ita Montefin. & Amic. Alii asserunt; Mortale esse contra legem Dei, veniale tantum præter. Pro hac sententia citantur S. Th. quæst. 88. art. 1. ad 1. Alens. Ricchar. Cajet. Medina, & plures antiquiores.

16. Fateor tamen nullum ex hisce Theologorum placitis satis quod intendimus explicare. Non primum; quod, ut breviter refellam, satis sit dicere, mortale peccatum dari posse etiam circa media conducentia ad finem, aliter violare castitatem, & justitiam non servare non esset hujusmodi; & certe aversio à Deo & conversio ad creaturam haberi potest non solum immediate, sed etiam mediate, aliter solummodo odium & blasphemia in Deum essent mortale peccatum, ergo. Præterquam quod, adhuc inquirendum superest, quare peccatum mortale sit hujusmodi aversio &c. proinde non explicatur prima ratio distinctiva ejusdem à peccato veniali. Non secundum, propter eandem rationem, quæro enim, quare unum sit grave malum, aliud leve. Respondet Aversa, quæst. 88. sefs. 6. quia per unum aufertur gratia Dei, nequaquam per aliud, sed

iterum inquiri, quare hoc contingat, & quidquid respondeant alii, semper idem reddit, nisi alia prior ratio afferatur. Hoc idem probat contra tertium, & falsum omnino est, peccatum veniale non esse in genere suo offensam Dei, aliter injuste Deus illud puniret; & quamvis etiam hoc concederetur, adhuc peccato, quare mortale sit offensam; & contemptus Dei, non sic veniale. Contra quartum est; etiam peccatum veniale esse contra legem, alioquin non esset actus malus, sed solum indifferens; omne enim quod à nobis geritur, vel præcipitur vel prohibetur, vel permittitur; Si præcipitur, vel prohibetur, illud servare, vel relinquere necesse est; Si vero permittitur, sive servetur, sive relinquatur, nec bonum, nec malum est; Sed hic advertendum cum Scoto in 2. dis. 41. legem Divinam bifariam accipi posse, primo ut præcipit aliquid necessarium omnino ad assequendam vitam aeternam, juxta illud Mat. 19. *Si vis ad vitam ingredi, serva mandata* & ut minus proprie obligat ad servandum aliquid non necessarium, sed utile ad eundem obtinendum. Esto peccatum veniale non sit contra primam Legem, est tamen contra secundam, etenim etiam non furari in parva quantitate, nec otiose mentiri, vel jurare, præceptum Dei est, & dissonum rectæ rationi.

17. Hac de re dixerunt aliqui, hanc arbitantes esse Scoti sententiam in 2. dis. 21. quæst. 1. peccatum mortale esse, contra præceptum, veniale contra consilium, atque, ut hoc rejiciant, afferunt, aliquid esse contra consilium, nec tamen esse peccatum etiam leve, dicit enim Apost. 1. ad Corint. 7. *De Virginitatis præceptum non habeo, consilium autem do, &c.* nec tamen nubere peccatum etiam leve est, ut idem, ait in eodem capite. Sed ita Scotum non respuerent, si ejus mentem in ejusdem scriptis perlegendis assequuti fuissent. Quemadmodum enim Scotus duplicem legem distinguit, unam præcipientem

necessaria ad obtinendum finem, aliam præscribentem utilia, ita duplex distinguit consilium; Unum pro monitione libera à debito ad aliquod necessarium, aliud pro monitione libera à debito ad aliquod utile; Dum in re nostra inquit veniale esse contra consilium, loquitur de consilio primo modo sumpto, non secundo, & ideo consilium, contra quod est peccatum veniale, est præceptum de re utili. Hoc manifestum est, si Doctor subtilis legatur in prælaudato loco, ubi docet, peccatum lethale esse deordinationem oppositam ordinationi, sine qua finis nullo modo haberi potest, veniale vero esse deordinationem oppositam ordinationi, quæ necessaria non est, sed utilis ad assequendum finem, idcirco non dicit absolute veniale esse contra consilium, sed quasi consilium, idest non esse contra præceptum strictè obligans, sed obligans aliquo modo.

18. Quamobrem est alia sententia, docens, peccatum mortale differre à veniali, quia illud est contra præceptum alicujus necessarii ad consequendum. Deum, hoc vero contra præceptum alicujus utilis ad eundem finem. Hæc est vera Scoti sententia, ut interpretantur celebriores ejusdem Discipuli, & cui adherent etiam præter plures recentiores, Salmant. quorum in mentem exponit Paulus à Conceptione.

Rem ita esse sic probò. Primo ex aliarum sententiarum confutatione. Secundo; Illam propriam, ac primariam differentiam inter peccatum mortale ac veniale recte statuimus, quæ advenit alicui communi utrique peccato, & per quod utrumque discriminatur, sed juxta sententiam nostram hoc præstamus, ergo. Major constat in omnium rerum speciebus, & hoc pacto defendimus cum Scoto in 4. dis. 21. quæst. unica, generice enim loquendo mortale & veniale univoce conveniunt. Prob. iii. per id unum ab altero discriminatur, à quo profluunt cætera utriusque peccati discrimina ut patet in ratio-

Tom. II.

nalitate, à qua dimanant alia, per quæ distinguitur homo à quocumque alio, sed ab eo, quod à nobis asseritur, dimanant omnia utriusque peccati discrimina, ergo. Prob. iii. Quod peccatum mortale avertat ab ultimo fine, auferat gratiam & amicitiam Dei, sit malum, grave inducens æternæ poenæ reatum ex alio non oritur, nisi quia est contra præceptum alicujus necessarii ad beatitudinem consequendam, contrarium vero dici de peccato veniali, oritur quia est contra præceptum alicujus tantum utilis ad eandem, ergo. Hinc nequaquam peccatum mortale desumendum est ex gravitate materiæ, veniale vero ex parvitate, sed à præcepti obligatione, & ideo etiam si ex parte materiæ levia præciperet Deus tanquam necessaria ad vitam æternam, adhuc transgressio peccatum mortale diceretur. Manifestum est hoc in primo præcepto primis parentibus imposito, erat enim de non comedendo de illo ligno. Non inficior tamen, etiam à gravitate materiæ desumi, sed nisi urgeat præceptum, hæc peccatum mortale non constituit, proinde de secundario se habet, non de primario. Ut igitur agnoscere possis, quodnam sit mortale, & quodnam veniale peccatum, attende, quomodo aliquid præceptum sit, non ex tua voluntate corrupta, non ex tua cupiditate, & consuetudine, quæ prævertunt regulam veritatis, sed ex Scriptura, ex traditione, & ex legibus sive civilibus, sive canonicis, nec non tandem ex poena alicui actui determinata.

19. Ex hisce plura resolvenda sunt; & primo; finem actualem peccantis venialiter esse proprium bonum, qui enim venialiter peccat, refert suum actum ad se ipsum, vel propter aliquam utilitatem, vel voluptatem, quam concipit & apprehendit in objecto. Secundo finem habitualem esse Deum, proprium namque bonum, propter quod operatur venialiter peccans, non est causa, ob quam contemnatur Deus, & destruatür chari-

Qq 2

tas,



tas, ergo adhuc retinetur finis habitualis charitatis, qui est Deus. Tertio ipsum finem actuale subjectum esse fini ultimo habituali, ut ostendit S. Th. hic qu. 88. art. 1. ad 3. ratio est, quia qui ob bonum proprium venialiter peccat, ab actione illa, in qua peccatum veniale consistit, abstinere, si charitati Divinae opponeretur, ergo bonum proprium subicitur Deo, quod in peccante mortaliter non contingit.

## §. III.

*An peccatum veniale conjunctum  
mortali puniatur pena  
aeterna.*

20. **N**Ullam quaestionem promoveo de poena debita peccato veniali, si repariatur in subiecto, in quo non sit mortale, etenim hoc puniri solum temporanea poena constans est omnium Theologorum & Catholicorum assertio, quare etiam si homo decederet, quin in hac vita remissum esset quo ad culpam, adhuc in purgatorio remitteretur propter actus dilectionis & patientiae, ut docet S. Thom. in 4. dis. 21. q. 1. art. 2. quamvis enim per actus istos non habeatur augmentum vel gratiae, vel gloriae, culpa tamen venialis obtinenda veniae sufficiunt; & ratio esse potest, quia actus, qui in purgatorio exercentur, nec sunt omnino in via, ideo augmentum gratiae mereri non possunt, nec sunt omnino in termino, ideo aliquid mereri possunt. Non defuerunt tamen, qui dicerent, peccata venialia, remitti in ipsa morte per gratiam finalem, quod utrum verum sit, nec ne, nolo ad disputationem deducere.

21. Suppono praeterea, peccatum mortale aeterna poena esse puniendum, quod infra declarabo, quapropter, cum peccatum veniale conjunctum cum mortali puniendum sit in Inferno, in quo nulla esse potest peccati remissio, quaeritur utrum illud etiam aeternam

poenam sit subiturum. Est Thomistarum opinio cum S. Thom. quaest. 87. art. 3. per accidens & propter conjunctionis circumstantiam aeterna poena esse puniendum, & idem dicendum etiam de peccato mortali, quod prius quoad culpam remissum fuerit. Hanc sequuntur plures ex recentioribus Vasq. Suarez, Salas Montefin. Lezana. Est alia opinio media distinguens peccatum veniale in remissum quoad culpam & in non remissum; Si de primo fiat sermo, inquit, ipsius poenam non futuram aeternam, secus vero si de secundo. Hanc exponit Durand. in 4. dis. 21. quaest. 2. & defendunt Lorca, Aversa, Amicus &c. Scotti: tandem cum suo Doct. in 4. dis. 21. quaest. 1. sustinent, peccatum veniale, si remissum quo ad culpam, si non remissum etiam cum mortali conjunctum solum temporanea poena mulctari, & idem dicunt de peccato lethali quoad culpam remisso. Hanc amplectuntur Nominales, & inter recentiores Vega, Navarrus, Arriaga.

22. Hae & mihi probabilior videntur, atque eam sic probabo. Peccato veniali, si remissum quo ad culpam, si non remissum, neque per se, neque per accidens debita est poena aeterna, ergo. Primam antecedentis partem concedunt adversantes Doctores; Prob. secunda, si per accidens ipsi debita est poena aeterna, est propter conjunctionem cum peccato lethali, sed hoc non, ergo. Prob. mi. Primo. Hae conjunctio non extrahit peccatum à linea peccati venialis, ergo neque illud extrahit à linea poenae debita peccato veniali, sed haec non est aeterna, ergo. Unde sic brevius; peccatum veniale neque per accidens, si per conjunctionem cum peccato lethali, sit lethale, ergo ipsi neque per accidens debita est poena statuta pro peccato lethali. Secundo. Peccatum veniale per conjunctionem cum peccato lethali, non puniatur poena intensius majore, ergo neque poena majore extensius; Rursus. Peccatum veniale per con-

jun-

junctionem cum lethali non recipit malitiam majorem, aut sit major offensâ Dei, ergo neque debet magis puniri; proinde &c.

23. Inter plura, quæ contra hæc dici possunt, unum afferam, & fortasse in uno omnia pertingam. Itaque dicunt, culpam conjunctam cum peccato lethali fieri irremissibilem, cum enim in hac vita retractata & deleta non fuerit, & ex alia parte retractari & deleri non possit in Inferno, semper habitualiter perseverat, atqui perseverante culpa debet perseverare & poena, ergo. Neque dicas, per hoc probari, etiam in purgatorio culpam venialem non posse remitti; quia post hujus vitæ cursum non datur amplius locus merendi, vel demerendi; etenim valde dispar est ratio, siquidem in purgatorio datur, ut inquirunt, satisfactio, quæ per habitum gratiæ & charitatis voluntarie suscipitur in præteritæ culpæ compensationem; at in Inferno patiuntur quidem damnati, nunquam tamen culpam retractantes, ac de ipsâ dolentes, immo in eo miseriæ & tenebrarum loco peccata commissa per odium contra Deum non solum habitu sed actu perseverant, debet igitur & perseverare supplicium, sicut, si quis ob verba turpia puniretur, si inter ipsa verbera turpia loqui non desineret, merito verbera nunquam cessarent.

24. Sed contra. In primis valeret hoc argumentum de peccato veniali non remisso in hac vita quo ad culpam; Sed quia revera idem dico etiam de eo nullo pacto remisso, ideo nego, culpam venialem etiam conjunctam cum lethali fieri apud inferos irremissibilem, quamvis enim ibi nequeat dari satisfactio, ad quam spectat patientia ac voluntarietas in tolerando, & quæ valet pro peccatis adinstar meriti moralis, pro quo Deus poenam dimittit, est tamen satisfactio, per quam solui potest quantum justitia exigit, etiam si involuntaria sit & invita. Ostendit hoc Doctor subtilis exemplo ab humanis desumpto; Si crimen com-

mittatur, cui ex vi legis debita sit manus abscissio, abscissa manu quamvis involuntarie & invite, post hanc satisfactioem nihil ulterius legislator potest exigere titulo illius criminis. Et profecto nihil proficit animabus in purgatorio existentibus patientia & tolerantia, & nihil nocet damnatis odium & impatientia; quamvis enim illæ patienter suas penas sustineant, adhuc luere debent pro culpæ demerito, & quamvis isti invitet & rabide patiantur, adhuc non patiuntur nisi juxta prioris culpæ reatum. Non est igitur post hanc vitam attendenda satisfactio, sed satisfactio, hæc culpæ consentanea esse debet; Quod si peccato veniali secundum se æterna poena non est debita, neque conjuncto cum mortali esse debet, uti probatum fuit.

25. Superest modo refellamus id, quod de retractione dictum fuit, ita, ut apud inferos non solum habitu, sed etiam actu perseveret culpa venialis; Si hoc postremum perpendo, nullo pacto concedere possum, etenim post hanc vitam nullus actus, qui vel peccato vel merito adscribi possit, affirmari debet, nec ulla poena vel præmium ipsi correspondet; Itaque ad perseverantiam peccati habitualemente sermonem convertamur; Fateor, in purgatorio culpam retractari, fateor in Inferno non retractari; sed nihil ad rem. Probo. Nihil ad rem, si quantitas poenæ non debet correspondere non retractioni culpæ, res ita se habet, ergo. Prob. mi. Demus peccatum veniale in duobus æquale, vnus statim retractet, ac confiteatur, alius post annum tantum, vel etiam plures, ex vi retractionis nihil plus meretur ille, ex vi non retractionis per plures annos nihil plus demeretur alius, ergo quantitas poenæ non debet correspondere non retractioni; Cui ergo correspondebit? gravitati culpæ, vel ejus physicæ durationi, quando peccatum commissum est; Idcirco, quamvis peccatum veniale habitualiter æternum perseveret, illi tamen alia poena non sta-

statuatur, nisi illa, quæ est ipsi statuta, dum commissum fuit in hac vita; Quod si admitteretur opposita sententia, recte infert Arriaga, gravius punienda esse plura venialia, quam unum tantum lethale; supponamus enim propter mille peccata venialia debitam esse per unicum diem poenam intensam ut sex, & uni peccato lethali poenam ut duo, qui peccasset venialiter, & decessisset cum lethali, æternum puniretur propter venialia poena ut sex, propter lethale ut duo, ergo. Hoc autem inauditum est, nam sicut venialia ad quemcumque numerum protracta nunquam in gravitate æquari possunt mortali secundum culpam, ita neque secundum poenam.

26. Tandem supponamus, aliquem decessisse cum culpa veniali non retractata sine aliquo lethali actu patrato, sed solum cum originali, hic propter originale jam damnabitur, & propter veniale poena sensus mulctandus erit, & quidem æterna, quia nunquam retractabitur, sed hoc non, ergo. Prob. mi. Pœna debita peccato originali est solum poena damni, uti nos probavimus, & concedunt Thomistæ alique Doctores præter illos, quos adduximus ubi hæc res ad examen vocata est; peccato veniali indebita est poena æterna sensus, nec illi potest hæc convenire propter peccatum originale, ergo. Quod huic argumento respondeant Thomistæ, hic omitto; Quod vero dicunt alii cum Salas, nimirum, decedentes cum originali, cui tantum conjunctum sit veniale, habituros esse amorem naturalem erga Deum, & æquo animo toleraturos esse illam poenam, proinde pro peccato veniali satisfacere posse, hoc sine aliquo fundamento affirmatur, nec aliquid certi afferri potest; & licet de amore naturali concederetur, hic tamen in hoc statu naturæ elevata insufficiens est. Tandem de illa tolerantia satis dictum est. Hisce omnibus adde, eam esse Divinæ Clementiæ magnitudinem, ut pœnas infligat citra condignum, præmia vero ultra condi-

gnum, quod axioma, alioquin Theologicum, licet à pluribus negetur, nec expresse in Patribus habeatur, attamen à nostris in hac re adversariis admittitur, nec enim contra aliquos contentiosis studiosos rem volo instituere pecuniarem.

27. Opp. 1. Si veniale conjunctum mortali æterna pœna non plecteretur, esset in Inferno aliquis locus consolationi, immo contra Scripturas & Patres daretur aliqua redemptio, sed hoc non est dicendum, ergo. Præterea; Satisfactio pro culpa & pro poena est aliquo modo satisfactoria, sed sine statu gratiæ nulla potest esse satisfactio, ergo. Rursus, possemus licite orare pro damnatis, ut nimirum eis dimitterentur pœnæ, quæ debitæ sunt peccatis venialibus, vel lethaliibus quo ad culpam remissis; sed hoc prorsus inauditum est, ergo.

28. Resp. revera in Inferno nullam esse redemptionem, quia inde nunquam evadent damnati, neque pro remissione pœnæ venialibus debitæ applicabitur aut aliqua fidelium deprecatio vel indulgentia, sicut applicatur pro animabus existentibus in purgatorio, sed totam poenam luere ac subire debebunt; neque ex termino hujusmodi pœnæ erit aliqua positiva consolatio aut quies in ipsis, cum poena correspondens peccato lethali nunquam remisso, aut remittendo omnes animæ facultates maximo in tormento detineat, & quemadmodum si nullum haberetur veniale aut mortale semel remissum, pro quo pati deberent, nullum solatium sentirent, ita etiam expleta satisfactio pro illis, nihil sentiunt refrigerii. Ad secundum jam dictum fuit, hanc satisfactionem nullo pacto ad satisfactionem meritoriam, ad quam requiritur status gratiæ pertinere. Ad tertium constat, orationes & suffragia nihil ipsis prodesse, cum ipsorum pœna solummodo per satisfactionem debeat finem accipere. Cætera, quæ opponi possunt, rejecta sunt in superioribus, si rectè perpendantur.

29. Quia vero dictum fuit num. 26. si aliquis decederet cum solo originali conjuncto cum veniali &c. & Thomistæ negant absolute, hoc fieri posse, ideo operæ pretium est, indagemus, utrum hoc dici possit necne. Duo pro sententia sua momenta proponit S. Th. qu. 89. art. 6. Primum est, quia si quis moreretur cum originali conjuncto soli veniali, nulli loco deputandus esset, non in Inferno, quia hic tantum statutus est pro peccato mortali actuali, non in Limbo, quia hic statutus est soli peccato originali, non in Purgatorio, quia hoc statutum est illis, qui in gratia & charitate decedunt cum debito subeundi aliquam poenam temporaneam, proinde &c. Huic suffragari videtur Concilium Florentinum, quod in litteris unionis supponit, omnes decedere vel in peccato mortali, vel cum solo originali, inquit enim. *Illorum animas, qui in actuali mortali peccato, vel in solo originali decedunt, mox in Infernum descendere, penis tamen disparibus puniendus.* Idem præterea, supponitur ab Innoc. III. cap. majores de baptis. ubi docet, adultis aut amenitis non posse dimitti peccatum originale, sicut parvulis, si secundum, jam lethali ter peccat; supponit autem hoc argumentum, hominem pro primo rationis usus instanti teneri ad hujusmodi conversionem; Ut vero præceptum hoc esse probetur, hæc afferri possunt. Si quis alterius curam gerit, statim ac hic potest male agere, debet hunc ad bonum promovere, ergo multo magis debet quis promovere se ipsum statim ac habet rationis usum, quia tunc potest bene, vel male operari. Secundo. Homo ad ra-

tionis usum perductus debet de se ipso cogitare, judicare, ac statuere ad quem finem conditus sit, & per quæ media possit ad hujusmodi finem pervenire, ergo in primo rationis usus instanti debet se ipsum ad ultimum finem dirigere, ac convertere. Hisce tamen aliisque, similibus non obstantibus.

30. Oppositum est sentiendum, quæ opinio communis est apud Doctores cum Scoto in 2. dif. 21. quæst. 1. in 4. dif. 17. quæst. unica art. 2. Idem docuit S. Bonavent. in 4. dif. 21. art. 1. qu. 1. Sequuntur Suarez, Vasqu. Valent. Avertor. &c. immo aliqui ex Thomistis fatentes hæc Sancti Thomæ opinionem esse nimis durum & creditu difficilem, eum deferuerunt, ut testatur Alvarez qu. 89. art. 6. disp. 191.

Porro multifariam assertum hoc probari potest, sed, si ostendatur fundamentum contrariæ assertionis infirmum esse, satis, quantum nostra interest, actum erit. Plura autem pro hac re observo. Primo usum rationis indivisibiliter non haberi, unde usus rationis imperfectus, qui sufficit ad peccandum venialiter, antecedit perfectum, qui requiritur ad peccandum lethali ter; Secundo. Pro primo illo instanti potest quis invincibiliter hujusmodi præceptum ignorare, præsertim si puer ethnicus sit, ergo illud, etiam si revera daretur, non observando, non peccaret, ex alia parte ab ipso proferri verbum otiosum aut quid simile, nihil est, quod prohibeat. Tertio præceptum diligendi Deum saltem pro primo instanti rationis non potest obligare sub lethali, ut patet in aliis gravibus præceptis, quæ in sui observatione aliquam dilationem patiuntur & permittunt, pro hac autem aliqua dilatione poterit quis peccare venialiter. Quarto. Ad delendum originale non sufficit quæcumque dilectio & conversio ad Deum, sed esse debet ad ipsum, ut authorem supernaturalem, esto autem puer pro primo rationis instanti diligeret Deum ut authorem naturalem, quod quidem postu-

postulat rationalis creaturæ conditio, non tamen diligere &c. proinde non iustificaretur, & ex alia parte cum illa dilectione posset componi aliquod veniale, ergo. Tandem. Data sententia opposita, deberet quis statim ac potest se mundare à peccato originali, sed hoc est falsum, ergo. Prob. mi. non debet quis, statim ac potest, mundare se à peccato actuali, ergo neque à peccato originali, ant. est omnium doctorum.

31. Hinc apparet, quam falsum sit quod num. 29. dicebatur, & quomodo refelli debeat id, quod ad probandum illud præceptum allatum est; rejiciamus oportet quod priori loco oppositum est; & ad primum non placet communis responsio dicentium, ad Divinam providentiam pertinere, ut non permittat hominem in tali statu è vita migrare, sed juxta principia à me statuta dico, propter originale poenam damni futuram, æternam, propter veniale vero conjunctum poenam sensus futuram esse temporaneam, donec per satisfactionem fuerit soluta, quare sic decedentis anima perpetuo in limbo futura erit, & parum refert, scire locum, dummodo poenam sciamus. Ad decretum Florentini; In eo neque statuitur locus pro illis, qui decedunt cum mortali & originali simul, quod tamen de pluribus infidelibus negari non potest; loquitur igitur Concilium juxta ordinarium modum, quo solent ex hac vita animæ migrare, quamvis enim originale pro aliquo brevi tempore, possit esse cum solo veniali attamen status iste diu haberi non potest, ad quam questionem, Scholasticam utique, mentem non habuit. Idem dicendum pro textu Innocentii; nisi velis dicere, adultis non esse baptismum conferendum, si dormiant, quia per proprium consensum habere non possunt propriam dispositionem ad gratiam per baptismum conferendam.

*Quenam sit causa peccati effectrix physica.*

32. **I** Terum contra Hæreticos agenda res est; sed prius plura explorata esse volo. Primo causam propriam & effectricem peccati non esse Dæmonem, vel hominem alium, etenim isti proponere possunt malum ac suadere, servata tamen libertate in hominis voluntate ad sui determinationem. Unde Augustinus, vel quisquis sit author, hom. 12. inter 50. ait: *Non Diabolus cogendo, sed suadendo nocet, nec extorquet à nobis consensum, sed petit, dat quidem ille consilium, sed Deo auxiliante nostrum est eligere, vel repudiare quod suggerit.* Secundo causam hujusmodi non esse concupiscentiam, hæc enim quamvis rationis usum aliquantulum perturbet, ac impediatur, rationem tamen ac libertatem penitus non adimit; aut vis concupiscentiam esse inordinationem radicalem etiam in parvulis baptizatis remanentem, aut motum inordinatum appetitus sentientis, quam S. Thom. sensualitatem appellat; at neutro modo considerata physice movet voluntatem, non primo, quia sic est merus habitus sine aliquo actu, qui etiam in parvulis & dormientibus reperitur, non secundo, nam vel illi motus ita rationem præveniunt, ut voluntas illos præcavere non potuerit, & tunc formaliter peccatum non committitur, vel rationis usum sublequantur, & tunc potest voluntas ipsis obistere, juxta illud Gen. 4. *Sub te erit appetitus tuus, & tu dominaberis illius.*

33. Neque contra hoc est quod scribit Jacobus in sua epist. cap. 1. *Unusquisque vero tentatur à concupiscentia abstractus, & illeclus, deinde concupiscentia cum conceperit, parit peccatum;* ad quod etiam revocari potest, quod tradit S. Th. qu. 74. ad 3. *Motus*, inquit, *sensualitatis rationem prævenientes esse peccata venialia*, & p. qu. 41. art. 1. a t.



*Tentatio, quæ est ab hoste, potest esse sine peccato, quia fit per solam suggestionem, tentatio autem, quæ est à carne, non potest esse sine peccato, quia hujusmodi tentatio fit per delectationem & concupiscentiam. Ideo etiam S. Augustinus dicit, non nullum peccatum esse, quando caro concupiscit adversus spiritum, & propterea Christus tentari voluit ab hoste, sed non à carne.*

34. Non inquam contra hoc est, nam à concupiscentia oriri tentationem & ab ipsa progredi peccatum, sunt duo valde diversa, hoc secundum non fit, nisi quando ipsa conceperit, concipit autem accedente voluntatis consensu, quod præclare indicavit S. August. lib. 6. contra Julian. cap. 15. hisce verbis. *Profecto parius à pariente discernitur, pariens enim est concupiscentia, partus est peccatum, sed concupiscentia non parit, nisi conceperit; hoc est ad malum perpetrandum obtinuerit voluntatis assensum, quod ergo adversus eam dimicatur, hoc agitur, ne concipiat, pariatque peccatum.* Quod spectat ad S. Thom., in priori loco intelligendus est de motibus sensualitatis prævenientibus plenam & perfectam non omnem prorsus rationis advertentiam, subdit enim, motus illos esse imperfecte humanos actus, non est autem aliquis actus humanus etiam imperfectus sine aliqua rationis advertentia, in posteriori vero distinguit tentationes illas, quæ sunt à Dæmone vel Mundo, ab illis, quæ sunt à carne, easque dicit nec materiale nec improprium peccatum esse, nullamque inordinationem in anima ponere, & ideo illas Christum etiam pati potuisse, ac voluisse; tentationem vero carnis esse peccatum improprium & materiale, ut dictum fuit in proprio loco, quia est vitium naturæ corruptæ per peccatum originale, quod esse in Christo non poterat. Coeterum dici potest, motus istos concupiscentiæ non omni culpa præsepe carere, cum crebro ratio non satis invigilet, ne insur-

Tom. II.

gant, nec omnino conatur ad illos compescendos.

35. Difficultatem majorem nobis excitant Hæretici impie volentes non solam pravam hominis voluntatem esse causam physicam effectricem peccati, sed Deum ipsum, contra quos.

Dicendum. Nullo modo Deum esse causam physicam vel moralem effectricem peccati.

Hoc in primis tradunt Sacræ Scripturæ. Deuter. 32. *Deus fidelis, & absque ulla iniquitate.* Ecclesiast. 15. *Nemini mandavit impie agere; Non dicas, per Deum abest, quæ enim odit, ne feceris, ille me implanavit.* Psalm. 5. *Non Deus volens iniquitatem tu es.* Præter alia plura veteris testamenti. Ex novo autem ecce alia, Joan. 3. *Qui facit peccatum ex Diabolo est.* Et prima Jo. 1. *Deus lux est, & tenebræ in eo non sunt ullæ.* Ad Rom. 3. *Nunquid iniquus est Deus? absit; alioquin quomodo Deus judicabit hunc Mundum.* Ad Roman. 9. *Nunquid iniquitas apud Deum? absit.* Jacob. 1. *Nemo, cum tentatur, dicat quoniam à Deo tentatur, Deus enim intentator malorum est. Ipse autem neminem tentat.* Tandem si Deus prohibet & puniit peccatum, quo pacto esse potest causa peccati? *Nihil odisti eorum quæ fecisti.* Dictum fuit de Deo.

36. Suadent secundo plurima Sanctorum Patrum testimonia. Sanctus Justinus in Dial. cum Triph. ait: *Illud quoque ante docui, Deum non esse causam, cur ji, quorum peccata ante cognita sunt, sive Angeli, sive Homines improbi efficiantur, sed sua quippe culpa talis est.* Clemens Alex. lib. 1. Pedagogi c. 8. inquit, *Culpa est ejus, qui eligit, in Deum autem culpa conferri nequit.* Sanctus Athanas. in orat. contra idola dicit: *Non ex bono malum neque in eo est, neque per eum; Alioquin pro bono haberi non posset, cum aut miscellaneam contrariamque naturam haberet, aut causam, aut horem malorum existeret;* Prætereo Basilium hom. 2. de op. sex dierum,

R r

Gre

Gregor. Nyf. lib. 7. Philof. cap. 1. Nazianz. orat. 1. in Julian. Chryf. hom. 23. in aſt. Apoſt. & afferendo ſolum Epiph. Hær. 66. ſic habentem. *Absurdum eſt, malitiam Deo tribuere, & Divinæ, ac Eccleſiaſticae Scripturæ, character hoc conſitetur, Deum penitus alienum à malo eſſe, Deus enim nihil mali fecit, ſed omnia valde bona &c.* Neque igitur malum ſemper erat, neque ex Deo factum eſt malum. Et infra hoc magis explicat, declaraturus cauſam peccati; *Juxta permiſſionem liberi arbitrii omnibus propria voluntate uti concedit, ut quiſque quod voluerit, faciat, quod ipſe quidem malorum cauſa non ſit &c.* afferendo inquam ſolum Epiphanium, me ad Sanctum Ambroſium, & Hieronymum, & Auguſtinum reduco.

37. Sanctus Ambroſius præter ea, quæ ſcribit lib. de Parad. cap. 15. lib. 1. Exameron. cap. 8. hæc ibidem habet. *Eradicari hanc (intellige malitiam) Deus vult de animis ſingulorum. Quomodo ipſe eam generaret, cum clameſ Prophetæ, deſinite à malitiis veſtris? & præcipue S. David; Deſine à malo, & fac bonum. Quomodo ergo ei initium à Domino damus? Sed hæc opinio feralis eorum, qui perturbandam Eccleſiam putaverunt.* Vide, etiam tempore hujusce S. Doctōris eum fuiſſe errorem, quem noſtri novatores excitant.

38. S. Hieronym. præter ea, quæ habet in Com. 1. cap. ad Eph. & lib. 12. in Iſa. & in 1. lib. contra Pelagian. ita ſcribit in Com. cap. 7. Eccleſ. in illa verba, *Deus creavit hominem rectum. Ne videretur, Deum auctorem mali facere, argute præcavit, & ait, nos à Deo bonos creatos, ſed quia libero ſumus arbitrio dereliſti, vitio noſtro ad peiora delabi.*

39. Si tandem; ad Sanctum Auguſtinum mentem calamumque revocamus, pene in omnibus ejuſdem libriſ veritatem hanc reperimus, præfertim vero in tribus, quos præcipue hac de cauſa ſcripiſſe, quiſquis, qui leget, in-

telliget; aliqua tamen nos adducamus, per quæ etiam facilius rejicientur, qui perperam nobis opponentur, in ep. 105. ad Sixtum. *Iniquitatem, quam rectiſſima veritas improbat, damnare novit ipſe, non facere.* Lib. 13. de Trinitat. cap. 12. *Modus, quo traditus eſt homo in Diaboli poteſtatem, non ita debet intelligi, tanquam hoc Deus fecerit, aut fieri juſſerit, ſed quod tantum permiſerit.* Lib. 5. de Civit. cap. 9. *Sicut omnium creator eſt, ita omnium poteſtatum dator non voluntatum; Mala quippe voluntates ab illo non ſunt, quoniam contra naturam ſunt, quæ ab illo eſt.* In lib. de ſpir. & lit. cap. 31. *Nuſquam legimus, non eſt voluntas niſi à Deo, & recte non ſcriptum eſt, quia verum non eſt; Alioquin etiam peccatorum, quod abſit, auctor eſt Deus, ſi non eſt voluntas, niſi ab illo, quoniam mala voluntas jam ſola peccatum eſt, etiam ſi deſit effectus, ideſt, ſi non habet poteſtatem.* Denique, ne infinitus ſim, tract. 12. in Joan. *Quaſi due res ſunt, homo & peccator, quod audis hominem, Deus fecit, quod audis peccator, ipſe homo fecit.* Hanc Auguſtini Doctrinam tenuerunt perpetuo S. Proſper & Fulgentius. Primus in reſp. ad capit. Gall. cap. 12. ſic loquitur. *Voluntas Dei nunquam vult niſi bona. Preſcientia & bona noſcit & mala, ſed bona, quæ aut ipſe faciat, aut etiam ut nos faciamus imperat, mala autem, quæ omnino ipſe non facit, nec fieri ſuaſit, aut impulit.* Et cap. 14. diſſerens de non credentium infidelitate, ait. *Infidelitas non creditum Evangelio nequaquam ex Dei prædeſtinatione generatur, bonorum enim auctor eſt Deus, non malorum.* Secundus vero lib. 1. ad Monim. cap. 13. hæc habet. *Quos prædeſtinavit ad gloriam, prædeſtinavit ad juſtitiam, quos autem prædeſtinavit ad penam, non prædeſtinavit ad culpam, poſſet enim peccatum aliquod ex prædeſtinatione Dei eſſe, ſi poſſet aliquis hominum juſte peccare; Nullus autem hominum juſte peccat, quamvis eum Deus juſte peccare permittat.* Et infra,

fra, postquam dixerit, Deum in iustis coronare iustitiam, quam Deus ipse fecit, & gratis tribuit, subdit; *Iniquos condemnabit pro impietate vel injuria, quam in eis ipse non fecit, in illis opera sua glorificat, in istis opera non sua condemnat.*

40. Verum quod Hæretici pernegant, testati sunt ipsi idolorum cultores. Accipe Trifnegistum in Pimandro capit. ult. dicentem. *A Deo factore nihil turpe, nihil malum.* Accipe Platonem in secundo Dial. de Republ. dicentem. *Bonorum quidem Deus causa est dicendus, malorum autem quamlibet aliam, præter Deum, causam querere decet.* Accipe demum Maximum Tyrum, qui ferm. 25. differens de malo morali, ait. *Ejus nomen est improbitas, causamque ab eligentis arbitrio nanciscitur, Deo semper extra omnem causam constituto.* Sed quod olim Diis falsis tribuerunt gentiles, Deo vero non tribuunt Novatores, in hoc etiam Manichæis facti deteriores, quod cum Manichæi non auderent in Deum bonum referre causam mali, duos Deos sibi finxerunt, Calvinistæ vero eundem Deum omnium scelerum faciunt authorem.

## §. V.

*Refelluntur argumenta in oppositum.*

41. **P**Lura quidem sunt, quæ nobis opponunt Hæretici tam ex Sacris Litteris, quam ex Patribus & ratione. Igitur à primis exordium ducemus. Primo duos iustos venditos nobis exhibent. Primus fuit Joseph à fratribus, secundus Christus Jesus à Juda, & à Judæis cruci affixus. De illo dicit Scriptura Gen. 45. *Non vestro consilio, sed Dei voluntate huc missus sum;* & cap. 50. *Nolite timere, num Dei possimus resistere voluntati?* ubi excusantur fratres, quia cum ab ipsis vendi madianitis Dei voluntas fuerat, de Christo autem legitur act. 2. *Hunc desinito consilio, & præscien-*  
Tom. II.

*tia Dei traditum; per manus iniquorum affligentes interemerunt.* Proverb. 16. *Omnia propter semetipsum operatus est Dominus, impium quoque ad diem malum.* Ad Rom. 9. *An non habet potestatem figulus luti facere aliud vas in honorem, aliud in contumeliam?* Sed facere vas in honorem est facere iustum, facere vas in contumeliam est facere peccatorem. Præterea. 1. Reg. 16. *Dominus præcepit Semei, ut malediceret David.* Et 2. Reg. 24. *Addidit irasci furor Domini contra Israël, commovitque David in eis dicentem. Vade, numera Israël.* Item 3. Reg. 11. dictum fuit à Deo spiritui malo, *decipies & prævalebis, vade, & fac ita.* Ex quibus omnibus aperte liquet, Deum esse causam saltem, moralem peccati.

42. Resp. nihil omnino ex textibus ad Josephum pertinentibus evinci posse. Certum enim est non fratrum consilio, sed Dei voluntate ac providentia ingressum fuisse in Ægyptum, atque ibi ad tam excelsum honoris, & potestatis gradum evectum fuisse; Permisit igitur Deus, ipsum à fratribus vendi, sed quid de ipso vendito faciendum esset, non cogitaverant fratres, sed Deus, ad cuius consilium pertinet ex malis facere bona, potius quam mala nulla esse permittere; In secundo non est sensus, ut non potuerint fratres resistere voluntati Dei, sed verba illa referenda sunt ad ipsum Josephum, qui intelligebat Dei voluntatem esse, ut fratribus ignosceret. Hæc est explicatio S. Joan. Chrisost. Hom. ultim. in Gen. & Sancti Ambrosii lib. de Joseph. cap. 12. ubi ait, Sanctum Joseph non tam attendisse, quod à fratribus missus esset ad mortem, quam quod à Deo missus fuisset ad vitam, & ideo fraterna charitate illorum peccatum excusavit, dicens. *Nolite timere &c.*

43. Quantum attinet ad Christum à Judæis occisum, optime respondet Sanctus Augustini tract. 43. in Jo. *Fecerunt peccatum Judæi, quod eos non compul-*

*facere, cui peccatum non placet, sed futuros esse praevidit, quem nihil latet.* Et S. Leo sect. 17. de Passione ait. *Multum diversum, multumque contrarium est id, quod in malignitate Judaeorum est praecognitum, & quod in Christi est passione dispositum. Non inde processit voluntas interficiendi, unde moriendi, nec de uno extitit spiritu atrocitas sceleris, & tolerantia redemptoris; non enim impias furentium manus immisit in se Dominus, sed admisit, nec praesciendo, quod faciendum esset, coegit, ut fieret, cum tamen ad hoc carnem suscepisset, ut fieret; Praevidit ergo Deus Judaeorum peccatum futurum, non tamen fecit, ut esset futurum, ut etiam diximus in quaest. de praescientia Dei, voluit tantummodo ex Judaeorum peccato permisso ex morte Christi mundi redemptionem, propriaeque justitiae per peccatum laetae satisfactionem.*

44. Textus sumptus ex Proverb. 16. intelligendus est de impio materialiter sumpto, nimirum Deum eos creare, quos praevidet impios futuros, & eorum impietatem a se praeviam non factam, vertit in sui gloriam, idest ad ostensionem suae justitiae. Haec est responsio Sancti Augustini epist. 106. ad Paulin. & in Enchir. cap. 27. & alibi. Quod dicitur juxta exemplum allatum ab Apostolo, a nobis fuit explicatum in qu. de praescientia Dei, explicatur enim ibi maximum Dei dominium, non quo possit facere hominem peccatorem, sed quo posset etiam cruciatibus adigere hominem non peccatorem, nisi suae providentiae suavis aliter postulare. Facit igitur aliquos in vas honoris ex eadem massa, quia aliquos eligit ad gloriam, eisque confert auxilia, quibus praevidet procul dubio confensuros, alios vero facit in vas contumeliae, quatenus reliquit eos in eadem massa, quin tribuat illa auxilia, quibus liberantur certissime quicumque liberantur.

45. Ut vero salventur caetera, & quaevis alia, quae opponi possent, adno-

tandum est, in Scripturis Sanctis Deum dici aliquos movere & excitare ad malum, quatenus utitur illis tanquam instrumentis suis, quia illos male agere permittit, quamvis enim permittere, non sit proprie movere & excitare, attamen tropice hoc dici potest, dum agitur de Deo, qui si aliquem a male non cohibeat, procul dubio malum sequatur, explicari hoc potest ex iis, quae in Jobi historia leguntur; dicitur enim Sathanæ, *Ecce universa, quae habet, in manu tua sunt*, nec tamen Deus diabolum in eum movit & excitavit, sed tantum hoc ipsi permisit. Hac de re S. Augustin. de grat. & lib. arbit. cap. 23. inquit: *Cum audis, ego Dominus seduxi Prophetam illum, vel quem vult indurat, ejus merita cogita, quem sic obdurari, vel seduci permisit* aliquando etiam idem de Deo dicitur, quia non solum utitur malis hominum voluntatibus tanquam instrumentis ad finem aliquem obtinendum, sed etiam eos deserit, qui per malos affliguntur; hoc pacto praecepit spiritui, ut deciperet Achabum, quia non solum permisit, ut spiritus mendacia loqueretur, sed etiam lumen ipsi Achabo non contulit, quo mendacia cognosceret; Unde ait S. August. in epist. 89. quaest. 2. in illa verba, *& ne nos inducas in tentationem. Ne nos induci deferendo permittas.*

46. Amplius etiam dicerent Hugo de S. Viç. lib. 1. de Sacram. p. 5. cap. 29. & S. Th. in Comment. cap. 9. ad Rom. Primus asserit, Deum malis etiam hominum voluntatibus ita praesidere, ut occulta quadam virtute ad suum arbitrium inclinet, non quidem ipsas corrumpendo, sed ipsis ordinem dando, ut potius illis permittat in hoc vitium praecipites ire, quam in aliud. Secundus vero non solum Victoris dictum admittit, sed ulterius asserit, Deum non quidem per se, sed occasionaliter inclinare voluntatem ad unum malum non ad aliud, per hoc quod immittat aliquam cogitationem bonam, ex qua malus homo occasionem sumat



sumat judicandi, minus malum esse huic peccato servire quam alteri; & tandem dici potest Deum malas hominum voluntates excitare aliis positive bona conferendo; ita excitavit in Joseph ejus fratres, qui invidebant ei propter somnia sua, & quia plus ceteris à Patre diligebatur, sic excitavit Ægyptios ad persequendum Hebræos, quia istis beneficia plura conferebat, in quo sensu explicat Sanct. Augustinus illud psal. 104. *Convertit cor eorum, ut odirent populum ejus.*

47. Ita arbitrato meo rejectis, quæ ex Scripturis Sanctis similia leguntur, supersesset, & ut etiam aliqua loca Sancti Augustini, quæ videntur Hæreticis favere perpenderemus ac explicarem, nisi eodem modo forent explicanda; ut vero validius hoc demonstrem, aliqua ex Sancto Augustino hic proferre, non erit prorsus abs re; Convicium fecerat famula Matris suæ Monica in Monicam, per quod deinceps abstinuit à vino, cui incaperat esse dedita. Sic autem inquit Augustinus. *Quid egisti Deus meus? unde curasti? unde sanasti? nonne protulisti durum, & acutum ex altera anima convicium &c.* Ita lib. 9. Confess.

cap. 8. argumentatur Calvinus, ergo convicium hoc fuit à Deo, sed hoc peccatum fuit, ergo peccatum fuit à Deo. Hoc admissio negari posset minor argumentationis Calvinianæ, quo animo enim, & quo fine factum fuerit convicium illud, quod materiale dici posset, novit nemo, nisi Deus; attamen dicere possumus, convicium illud jam in famulæ animo conceptum, & voce expressum à Deo conversum fuisse in Monica medicinam; De hac re jam dictum fuit, ex malis enim Deus bona efficit, sicut ex viperis fit etiam ab hominibus; Hoc innuit idem Doctor postremo loco, ubi ait: *etiam de alterius anime insaniam sanasti alteram, ne quisquam cum hoc advertit, potentia sue tribuat, si verbo ejus alter corrigatur, quem vult corrigi.* Id igitur permittit Deus, sed in tali circumstan-

tia, in qua utile esset ad Monica correctionem.

48. Ita semper soluit clementissimus Deus. Ideo audi quid dicat Augustinus idem in Enchirid. cap. 100. *Hæc sunt magna opera Domini exquisita in omnes voluntates ejus, & tamen sapienter exquisita, ut cum Angelica, & humana natura peccassent, idest, non quod ille, sed quod voluit ipsa, fecisset, etiam per eandem creaturæ voluntatem, quæ factum est, quod creata voluit, impleret ipse quod voluit, bene utens & malis tanquam summe bonus ad eorum damnationem, quos juste prædestinavit ad pœnam, & ad eorum salutem, quos benigne prædestinavit ad gratiam; Quantum enim ad ipsos pertinet, quod Deus voluit (intellige voluntatem signi) fecerunt, quantum vero ad omnipotentiam Dei nullo modo id efficere valuerunt; Hoc quippe ipso, quod contra voluntatem Dei fecerunt, de ipsis facta est voluntas Dei. Addit deinde. Propterea namque omnia opera Domini exquisita in omnes voluntates ejus, ut miro & ineffabili modo non fiat præter ejus voluntatem, quod contra ejus sit voluntatem, quia non fieret si non sineret.*

49. Ex his duo inferas. Unum; Deum nec positive velle peccatum, nec positive nolle peccatum; non primum, aliter Deus esset causâ peccati, non secundum aliter Deus non esset omnipotens, quia homo peccando voluntatem Dei superaret, nec posset Deus impedire peccatum, sed tantum non velle peccatum. Alterum; Deum non habere, nolle peccatum positive voluntate beneplaciti quæ est absoluta, sed voluntate signi, quæ est conditionata, si fiat, & ideo dum prohibet, non vult absolute illud non fieri, sed vult aut non fieri, aut punire si fiat, & ideo semper invicta voluntas Divina servatur, quapropter quomocumque agit homo semper in Divinam incidit voluntatem, & sic servatur, quod ipso contra Dei voluntatem faciente, de ipso facta sit voluntas Dei; Alia plura tradidi in quæst. de præ-

scien-



scientia Dei. Argumenta etiam, quæ à ratione fieri possent, omitto, cum de istis agant Philosophi, ubi de concursu Dei limultaneo pertractant.

### §. VI.

*Traduntur nonnulla de distinctione  
specificâ, & numerali  
peccatorum.*

50. **F**uit aliquorum sententia præsertim Durandi & Navarri; specinam peccatorum diversitatem à specifica diversitate præceptorum esse desumendam. Hoc tamen admitti non posse ex sequenti argumento videtur evinci. Si diversitas specifica peccatorum desumenda esset, ex diversitate specifica præceptorum, tot essent peccata quot sunt specie diversa præcepta, quibus opponuntur (idem dic de diversitate numerali) sed hoc est falsum, ergo. Prob. mi. Unum numero, vel specie peccatum aliquando opponitur pluribus numero & specie præceptis, ut patet in uno eodemque furto, quod opponitur legi naturali, Divinæ, Ecclesiasticæ, ac civili, ergo.

51. Hac de re magis placet sententia Sancti Thomæ qu. 72. art. 1. quam saniore Theologi sequuntur, diversitatem specinam peccatorum repetendam esse ab objectis specie diversis, circa quæ peccata versantur, & hoc pacto qui mentitur committit peccatum specie diversum ab eo, quod committit qui furatur, quia objectum mendacii est specie diversum ab objecto furti. Clarius hoc demonstratur. Cum peccatum sit privatio rectitudinis debita, peccata ab eo debent habere specinam diversitatem, à quo habent vel privationem rectitudinis specie diversæ, si diversis virtutibus opponantur, vel privationem modi specie diversi, quod attingitur rectitudo aliquis virtutis, si eidem virtuti opponantur, sed à diversis objectis habentur huiusmodi privationes, ergo. Præstius

tamen loquendo dici potest. Diversitatem peccatorum specinam desumendam esse vel à diversis objectis, vel à diverso modo tendendi in idem etiam, objectum, in quo casu idem re objectum formaliter fit multiplex. Quod si prima opinio Durandi & Navarri admittit huiusmodi diversitatem per respectum ad diversa præcepta ratione objecti, seu finis intimi, nullo pacto à nostra recedit, qui enim non servat jejunium indictum v.g. ab Ecclesia & à Confessario, duo peccata specie distincta committit, nam per præceptum Ecclesiæ respicitur virtus temperantiæ, per præceptum Confessarii respicitur satisfactio Sacramentalis poenitentia.

52. De numerali distinctione ita senserunt aliqui, inter quos Felix à Potest. & Leandr., ut arbitrati sint, per solam unitatem vel multitudinem objectorum non haberi unitatem vel multitudinem numeralem peccatorum, quamvis enim numeralis objectorum distinctio tribueret actui diversas numero difformitates, quod à pluribus, ut Suariorio & Filliucio negatur, attamen inde non sequitur, numero peccata distingui; cujus ratio est, quia malitia se habet tanquam forma, actus vero se habent tanquam subjectum peccati, quare, sicuti in rebus physicis compositum accidentarium fit numero multiplex non per multitudinem formalem, sed subjectivam, ita peccatum fit unum vel multiplex non propter unitatem vel multitudinem difformitatum, sed actuum,

53. Est alia sententia, quam propugnant Silvius, Juvenin, Azorius, asserens, quod sicuti ex unitate vel multiplicitate objectorum in specie unitas vel diversitas specifica peccatorum, ita ex unitate vel distinctione eorundem numerali sumitur unitas vel diversitas numeralis; neque ratio superius opposita quidpiam probat, nam sicut in materia morum cum unitate, actus habetur multiplicitas in specie, ita etiam habetur multiplicitas in numero.

mero, quare à phisicis argumentum ad moralia non tenet. Hinc juxta hanc sententiam, qui unico ictu tres homines occidit, tria peccata committit, & qui unico actu plures concupiscit mulieres, tot peccatorum est reus, quot sunt mulieres, & sic loquendo de singulis, idcirco non satis est, si exprimat in confessione se plures occidisse &c. Sed numerum occisorum debet explicare, quidquid dicat Felix à potest. contra quem Silvius & Bonacina opinantur.

54. Hoc tamen non est ita intelligendum, ut solum ex unitate vel multiplicitate objectorum unitas, vel multiplicitas peccatorum proficiat, cum etiam ex unitate vel multitudinem actus voluntatis habeatur, certum enim est, quod ad peccatum constituendum requiritur actus voluntatis liber à debita rectitudine recedentis; Quamvis igitur objectum esset unum, adhuc tamen, si plures fuerint actus, plura erunt peccata; Tunc autem censentur plures actus voluntatis, quando moraliter sunt interrupti, & tunc intelligitur interruptio, quando vel prior voluntas fuit revocata, vel quando inter unum & alium actum, tantum temporis intercedit etiam per involuntariam cessationem, ut prudentium judicio unus cum alio non conjugatur, ut contingeret in eo, qui antefortium vellet inimicum occidere, & postquam expergesset fuerit, eundem renovat actum. Ab hac tamen regula excipendus est ille, qui in actu pravo perseverat virtualiter, quia perseverat prava voluntas, v. g. qui mane iter arripit, ut absentem inimicum ferotinis horis interimat, quamvis in itinere de pluribus cogitet, quæ ad inimici occisionem non referuntur, perseveret tamen virtualiter in iniqua intentione occidendi, cum iterum ad occisionem inimici mentem revolvit, unicum tantum peccatum committit.

55. Sed in hac re in duas Classes actus sunt distinguendi; aliqui enim directi sunt ad unum objectum primum, &

à Theologis vocantur ordinati, alii vero sunt hujusmodi, ut unus ad alium non referatur, & dicuntur disparati. Si de primis loquamur, isti desumunt suam unitatem vel multitudinem numeralem ab unitate, vel multitudine objecti primarii, ideo tactus, oscula, quæ fornicationem præcedunt, vel concomitantur & subsequuntur ad unicum peccatum, cum ipsa fornicatione reducuntur, dummodo moralis interruptio non intersit. Si vero de actibus disparatis fiat sermo, advertendum est, aliquas actiones reperiri, in quibus datur definitus terminus, quo compleantur, aliquas vero, in quibus terminus iste non reperitur. In priori classe sunt v. g. fornicatio, Missæ Sacrificium &c. & in istis tot peccata committuntur, quot sunt actiones. In posteriori sunt v. g. percussio, blasphemia &c. Ideo qui eodem morali tempore pluribus ictibus inimicum percutit, aut &c. unicum peccatum ex pluribus percussionibus, aut blasphemis compositum committit.

## §. VII.

*An peccatum mortale sit infinitum  
sub consideratione offensæ.*

56. **E**sset inquirendum prius, utrum peccatum lethale consistat in aliquo positivo, vel negativo, sed cum de hac re tot afferantur opiniones, ut videri potest præsertim apud Ovieta tract. 4. cont. 4. punct. 2. & parum nostra intersit quidquid dicatur, quamvis vera in negativo consistere ex eo unice dicendum videretur, quod si aliter esset, Deus esset causa peccati, sicut est cuiuscumque entis, ideo ad propositam difficultatem, quæ satis celebris est inter Scholasticos, quorum aliqui sequuntur S. Th. alii Subtilissimum Scotum, statim devenire existimavimus. Qua in re.

57. In quolibet peccato lethali tria à Theologis considerantur. 1. Malitia moralis, quæ consistit in privatione re-

clit-

ætitudinis debita, quodve conceditur à saniori Thomistarum Schola. 2. Aversio à Deo & conversio ad creaturam. 3. Offensa; quatenus Deus, qui finis ultimi sibi vindicat dignitatem, bono commutabili creatoque postponitur. Certum est apud omnes Doctores, peccatum in prima consideratione dici non posse simpliciter infinitum etiam in determinata linea, etenim, sicut rectitudo debita, est aliquid finitum, ita & aliquod finitum est ejusdem privatio. Insuper neque in secunda consideratione; quia, si de conversione ad creaturam sit sermo, necesse est hanc certis terminis coerceri, si vero de aversione à Deo, hic utique objectum omnino illimitatum est, attamen in actu non potest esse causa infinitatis, quia sicuti in actu bono non reperitur infinita bonitas, quamvis per ipsum habeatur conversio ad Deum, ita in actu malo non est infinita malitia, quamvis per ipsum habeatur aversio à Deo. Difficultas est igitur de peccato mortali, prout in ipso perpenditur ratio offensæ, quæ Deo infertur. In qua quidem resolvenda est pro parte negativa. Scotistarum Schola cum suo Doctore in 3. dis. 20. qu. unica in 2. dis. 37. qu. 1. & ubique. Pro affirmativa vero sunt plures Thomis. Cajet. Nazar. Gonet. Coninch. Salmantic. afferentes S. Thom. hic art. 2. ad 2. & in qu. 28. de verit. art. 2. & alibi. Scotistarum sententiæ subscribunt Suarez disp. 2. de pecc. sect. 3. Card. de Lugo de Incarn. sect. 4. Vasq. p. 2. disp. 99. cap. 8. quos sequuntur reliqui PP. Societatis communiter. Dixi superius, pro affirmativa esse plures Thomis. nam oppositum docuerunt Palud. in 3. dis. 20. qu. 2. art. 2. Sot. in 4. dis. 19. qu. 1. art. 2. ad 1. Corrad. 1. 2. qu. 83. art. 4. Cabreræ, alique. Qua de re quid de mente S. Th. sentiendum sit, quis extra ipsius Scholam dijudicabit, si proprii ipsius Sæctores ipsum in contrarias sententias deduxerunt? In hac igitur re, in qua ipsa Scoti sententia tot etiam Thomistas præferebat Sæctores.

Dicendum. Peccatum, ut est offensæ Dei, non esse absolute infinitum.

58. Prob. primo. Quod absolute infinitum est, incrementum aliquid non potest suscipere, id enim est infinitum, quo nec majus est, nec esse potest, ut tradidi in physicis, & hac ratione repugnat per me & per Thomistas creatura perfectione semper ulterior dari potest, & quando agimus de qualitate, debet infinitum excludere terminum tam intrinsecum, quam extrinsecum, atqui nullum est peccatum, quo non possit majus & gravius excogitari, nec ullum est, quod omnium peccatorum gravitatem contineat, ergo. Argumentum hoc sumitur etiam à S. Thom. 1. contra Gent. cap. 43. num. 2. dicente. *Vt albedo sit infinita debet excludi omnis excessus.* Et 1. 2. qu. 87. art. 4. *Non enim est infinitum infinito majus.* Hoc confirmo paritate meriti Christi, quod, cum juxta Thomistarum sententiam in linea meriti sit infinitum, tale est, ut majus meritum esse non possit, immo quodcumque opus Christi in linea meriti sit æquale; Ex quo amplius sic. Si peccatum esset absolute infinitum in ratione offensæ, omnia peccata essent equalia, quia saltem in ratione formali non potest esse unum infinitum majus alio, sed hoc non est dicendum, cum fuerit error Joviniani & Stoicorum, dicentium; omnibus peccatis eandem inesse gravitatem, paremque poenæ reatum, contra quos agunt duo præcipui Ecclesiæ Doctores, nimirum S. Hierony. lib. 2. contra Jovin. & August. epis. 29. ad Hieronym. ergo. Minor præterea patet, & videtur declarata verbis Christi Jo. 19. *Qui me tradidit tibi majus peccatum habet.* Et certe, si datur una virtus major alia, ut constat in charitate, cur non etiam unum alio majus erit peccatum?

59. Duplici modo respondent Thomistæ. Primo peccatum non esse quidem infinitum in ratione malitiæ moralis, aversionis à Deo, & conversionis ad creaturam, seu in ratione offensæ activæ,

in quo sensu peccata suscipiunt incrementum, & sunt inter se inæqualia, esse tamen infinitum in ratione offensæ passivæ, quæ consistit in ablatione passiva juris Divini, & supremi Domini, finisque ultimi, in quo sensu non datur unum peccatum majus alio. Hoc confirmari potest exemplo meritorum Christi, quæ si perpendantur juxta ordinem ad objecta, à quibus accipiunt bonitatem moralem, sunt simpliciter finita & inter se inæqualia, si vero juxta respectum ad personam Verbi, à qua procedunt, sunt simpliciter infinita, & inter se æqualia, ita ut quodlibet opus sub hac consideratione mereatur quidquid à merito respici potest. Porro error Joviniani & Stoicorum erat, omnia peccata esse æqualia, sub quacunque ratione. Ita Asturicens. Alvarez, Godoi &c.

60. Secunda responsio est. Infinitum in linea entis non posse incrementum accipere, quia hujusmodi infinitum est in omni linea, & ideo debet esse unum, ut probat Arist. 1. de Cælo, infinitum tamen in determinata linea posse esse inæquale, & hac ratione probat S. Thom. 3. par. qu. 10. art. 3. quod licet in scientia Dei, absolute loquendo, contineantur plura, quàm in scientia animæ Christi, nihilominus anima Christi cognoscit infinita. Hinc cum peccatum in ratione offensæ non sit infinitum nisi in linea determinata, poterunt esse peccata inæqualia, & unum majus alio, proinde argumentum à nobis expositum nihil concludit. Ita Araujo & Joan. à S. Th. quod approbant Salmantic. tanquam minus durum.

61. Neutra tamen responsio argumenti nostri adimit robur. Non prima; & sic ostendo. Per adversarios peccatum non est infinitum in ratione malitiæ moralis, aversionis à Deo, & conversionis ad creaturam, ergo neque in ratione offensæ. Prob. conf. Peccatum in ratione offensæ sequitur tanquam sui radicem malitiam moralem, aversionem à Deo, & conversionem ad creaturam,

ergo si &c. & quemadmodum peccatum veniale non est majus in ratione offensæ, quàm sit in ratione malitiæ moralis, ita peccatum lethale; nam si esse præter legem Divinam (quod ipsi dicunt de veniali) infert offensam juxta malitiam, præter legem Divinam, cur non esse contra legem Divinam inferet offensam juxta malitiam contra legem Divinam? an quia offensæ desumitur à dignitate personæ offensæ? sed in primis quomodo desumat, ostendetur in solutione argumenti præcipui; deinde insto eodem argumento; Esse præter legem Divinam non desumit rationem offensæ à dignitate personæ, nisi juxta mensuram malitiæ moralis, ergo à pari esse contra legem Divinam non desumet rationem offensæ nisi juxta mensuram malitiæ moralis. Neque obstat, peccatum lethale lædere jus Divinum, & supremum Dominium, tum auferre à Deo rationem ultimi finis, siquidem hujusmodi ablatio non consistit in indivisibili, ut ostendi potest exemplo Regiæ potestatis, quæ quidem violatur tum per transgressionem legis, tum per injuriam immediate factam ipsi Regi, & tamen, majorem esse offensam in secundo casu, quam in primo, quis ibi inficias? Præterea. Non minus est jus & dominium in Deo ad præcipiendum in materia levi, quam in gravi, nam in utraque linea est infinitum, & tamen offensæ in materia levi non est infinita, quia ab ipsa materia limitatur, ergo à pari offensæ in materia gravi non erit infinita, quia limitatur per eandem materiam, quæ cum æqualis non sit, esse potest capax majoris, vel minoris offensæ, proinde non infinitæ.

62. Exemplum desumptum à meritis Christi non tenet, nam admissio, merita Christi esse simpliciter infinita (quod quidem à me in sequenti opere falsum esse demonstrabitur) etenim horum infinitas non infertur ex bonitate morali habita ab objectis, sed tota progreditur à persona Verbi tanquam principio physico, & moraliter dignum reddente quod

cumque, etiam minimum opus; Quare, si admitti deberet argumentum, sic adversarios cogere. Meritum Christi, proficiens à persona infinita, est infinitum in quacumque materia versetur, etiam minima, ergo peccatum, cujus offensâ desumitur à persona infinita, erit infinitum etiam in materia minima, quod nemo concedet.

63. Secunda etiam Thomistarum, evalio non suffragatur; transmittit enim unum infinitum excedere posse aliud in linea determinata, cum de hac re pertineat ad Philosophos disputationem resolvere, hoc tamen concedi nullo modo potest, quando infinitatis ratio ab eodem principio, seu forma colligitur, & ideo merita Christi semper æqualia sunt, quia quæcumque sint, semper vim suam habent à persona Divina, atque omnia peccata lethalia in ratione offensæ desumunt eandem infinitatem ab eodem principio, nimirum à Divina dignitate, quæ denominatur contempta, ergo æquali modo erunt infinita; & hinc admittere exemplum adductum à S. Thom. de infinitis, quæ cognoscit Deus, majoribus illis, quæ cognoscit anima Christi, quia horum cognitio à diverso principio progreditur; Attamen exemplum est falsum, cum neque Deus, neque Christus infinitum cognoscat, nisi tantquam chimeram, cum per me, & per Thomistas hujusmodi infinitum repugnet; pro qua re videantur ea, quæ in physicorum libris exposui.

64. Præterea. Infinitum in omni linea, seu, ut terminis Thomistarum, utar, in linea entis, non potest in ulla linea incrementum recipere, ergo infinitum in determinata linea non poterit incrementum recipere in hac determinata linea, sed hoc, loquendo de peccato, falsum est, nam etiam si peccata considerentur intra eandem speciem, magis Deus offenditur per unum, quam per aliud, puta, si unum fiat cum majori conatu & cognitione, atque hoc juxta prudentum hominum existimationem,

ergo. Tandem redit quod superius dictum fuit. Merita Christi sunt infinita in determinata linea, & tamen inter se non sunt inæqualia, ergo licet peccata, admitterentur infinita in determinata linea, non esset inæqualia; quod magis promovetur, si ita dicamus. Quia merita Christi sunt infinita in ratione meriti (semper loquor in opposita sententia) quodcumque meretur quodvis excogitabile meritum, ergo si peccata essent infinita in ratione offensæ, cuicumque esset debita quavis excogitabilis poena, sed hoc est falsum, cum poenæ etiam in inferno inæquales sint, sicut inæqualis est gloria, ad quod probandum non est, cur aliquid dicam, ergo. Dixi superius, *fi fiat cum majori cognitione*. Qua de re.

65. Prob. secundo sententia nostra. Peccatum non est infinitum in ratione offensæ, si habeat à quo limitetur, sed ita est, ergo. Prob. mi. peccatum habet à quo limitetur in ratione offensæ, si habeat à quo limitetur in ratione liberi, ac voluntarii, nam ideo est offensâ Dei, quia est Dei contemptus liber ac voluntarius, sed peccatum habet à quo limitetur in ratione liberi ac voluntarii, ergo. Prob. mi. Ut peccatum habeat à quo limitetur in ratione liberi ac voluntarii, nihil requiritur, nisi ut limitetur per minorem cognitionem, hæc enim, si minor sit, minuit liberum ac voluntarium, auget, si major, sed ita peccatum habet à quo limitetur, nulla enim cognitio esse potest infinita, ergo.

Hoc totum confirmo, ac brevius declaro. Si nulla esset cognitio, nulla esset offensâ Dei, ergo si finita est cognitio, finita est offensâ Dei, sed in quolibet peccato cognitio est finita, ergo. Patet hoc experientia, nam si eadem injuria fiat eidem personæ à viro & à puero, minor in ratione offensæ censetur ista, quam illa, nec alia ratione, nisi, quia à viro fit cum majori, à puero cum minori cognitione.

66. Argumentum hoc evertere con-

nan-



nantur. Primo dicunt, ad constituendam offensam requiri quidem cognitionem personæ offensæ, quanta sufficit, ut personæ dignitas cognoscatur, maiorem vero, vel minorem cognitionem de materiali omnino se habere, sicuti ad producendum effectum necessaria est existentia, tanquam conditio, maiorem vero, vel minorem existentiam ad rem non facere ad magis vel minus producendum effectum. Secundo; dato argumento nostro, sequeretur v.g. perjurium, quod modo committitur, habiturum eandem gravitatem, etiamsi per impossibile Deus non esset infinitus, dummodo committatur cum eadem cognitione, sed hoc non, quia si Deus tanta dignitate non polleret, procul dubio neque tantæ foret gravitatis & offensæ perjurium, ergo quia offensam non desumitur à cognitione, sed à personæ offensam. Constat hoc exemplo; Si percutias Plebejum, quem existimas esse Regem, non habet percussus jus eam satisfactionem exigendi, quod haberet, si revera fuisset Rex, ergo non à cognitione, sed à personæ gravitas offensæ est repetenda.

67. Sed contra; ad primum falsum est, ad malitiam peccati cognitionem maiorem vel minorem de formali se non habere, etenim, quod formaliter minuit, vel auget voluntarium, formaliter etiam minuit, vel auget malitiam; cum actus ideo sit malus quia est voluntarius, ut à nobis demonstratum fuit. Hinc negamus, ad malitiam cognitionem se habere ad instar conditionis, sicut ad producendum effectum se habet existentia. Sed si etiam id concederemus, parum evinceretur, nam etiam ad combustionem, approximatio se habet ut conditio, & tamen ex majori approximatione habetur major combustio. Quare data hac responsione, negandum est suppositum, exempli adducti, non enim datur una existentia major alia, cum hæc indivisim habeatur per hoc, quod res sit posita, ut inquit, extra suas causas, & tam existit v.g. musca, quam homo, quamvis

Tom. II.

sit major perfectio in homine, quam in musca, sed hæc major perfectio non est in homine, quia existit, sed in homine qui existit, ut homo est, non ut existens est.

68. Ad secundum male ponitur instantia, non enim dicimus; gravitatem offensæ sumi dumtaxat à cognitione, sed à cognitione & simul à personæ, & inde fit, quod ubi decrescat vel cognitio, vel dignitas personæ offensæ, decrescat etiam offensam. Verum dici potest, quod in eo casu perjurium haberet eandem gravitatem affectivæ, si non effectivæ, sicut si quis percuteret servum existimans esse Regem, eandem contraheret malitiam, ejusdemque poenæ reus esset, cujus, si percuteret Regem. Quod si humana Respublica non punit eadem poena occidentem revera hominem, quem putat feram, qua punit occidentem feram, quam putat hominem, hoc evenit, quia lex humana versatur solum circa actus exteriores, nec perpendit intentionem malam, dummodò actus exterior malus non sit. Coeterum absolute loquendo etiam in humanis cognitio & existimatio locum habet, si possit probari.

Pluribus aliis momentis nostræ sententiæ propugnatores eam stabiliunt, verum ea placet omittere tanquam leviora, & ne cogamur defendere, quæ parum urgent adversarios.

## §. VIII.

*Refelluntur argumenta contraria.*

69. **P**rimo se exhibet argumentum illud tritum, quod vocant calculatorium, & est adversariorum precipuum. Offensam eo est gravior, quo dignior est personæ, cui fit injuria, etenim, ut inquit, offensam est in offenso, tanquam in subiecto, & non solum tanquam in termino, seu objecto, sicut se habet actus charitatis erga Deum, atqui per peccatum lethale fit injuria personæ infinitæ, nempe Deo, erga est in ratio-

S s 2 ne

ne offensæ infinitum. Hoc magis roboratur primo. Peccatum contra Deum debet tot gradibus excedere offensam contra hominem, quot Deus excedit hominem; atqui Deus excedit hominem gradibus infinitis, ergo peccatum contra Deum debet excedere offensam contra hominem gradibus infinitis; ideo &c. Secundo. Supponamus, injuriam cum eadem consideratione fieri personæ dignæ, ut quatuor, & alteri dignæ, ut octo, facta huic erit gravis, ut octo, facta alteri erit gravis, ut quatuor, ergo gravitas offensæ tota repetitur à dignitate personæ, ergo si persona est infinitè digna, infinita erit offensæ. Hoc est argumentum S. Th. hic art. 2. ad 2. & qu. 28. de verit. ubi habet hæc verba. *Qui rem aliquam digniorem indigniori posponit injuriam ei facit, & tanto amplius quanto persona est dignior; Quicumque autem in re temporanea finem sibi constituit, quod facit omnis mortaliter peccans, ex hoc ipso, quantum ad affectum suum preponit creaturam creatori; Cum ergo Deus in infinitum creaturam excedat, erit mortaliter peccantis contra Deum infinita offensæ ex parte dignitatis ejus.*

70. Resp. non recedendo à probationibus nostris; dis. maj. nisi fundetur in aliquo finito, & limitetur ab aliquo principio trans. maj. si fundetur in aliquo finito &c. ne. maj. conc. mi. ne. cons. ad quod explicandum omnia in antec. dicta aptanda sunt; Neque obstat, offensam per peccatum respicere Deum, tanquam subjectum, nam in primis hoc verum est tantum extrinsece, nihil enim in Deo recipi potest, deinde, quamvis etiam intime concederetur, attamen Deus licet in se infinitus, non potest tamen peccato communicare infinitatem in ratione offensæ, cum non aliter peccatum sit offensæ, nisi quia est malum, est autem solum finite, uti probatum fuit, & ne hujusmodi infinitas à subjecto infinito transfundatur, habetur limitatio tum à finito conatu peccantis, tum à cognitione, tum à deliberatione, tum ab ip-

forum peccatorum inæqualitate. Cœterum, si infinitas personæ infinitam redderet offensam, etiam si nulla esset cognitio & deliberatio, offensæ esset infinita, si infinita esset persona, quod non; & præterea sequeretur, quod sicuti persona offensæ talis est, ut contineat omnium rerum perfectiones, ita unum peccatum contineret omnium rerum imperfectiones, & sic omnes etiam offensas, quod non.

71. Optime propterea respondent adducto argumento sententiæ nostræ propugnatores, injuriam crescere juxta dignitatem personæ geometricæ, non arithmetice, ita ut quo dignior est persona, gravior sit offensæ, non tamen, ut quantum excedit personam, excedat etiam offensæ, quemadmodum eo nobilior est actus, quo nobilior est objectum, nec tamen tanta nobilitas est in actu, quanta in objecto, uti compertum est. Hinc facilis responsio alteri argumento; nimirum, fortasse esse verum, nisi aliunde habeatur limitatio; clara tamen est rectorio, quæ sic conficitur. Obsequium, & amor erga Deum debet tot gradibus excedere obsequium & amorem erga creaturam, quot gradibus Deus excedit creaturam, atqui Deus infinitis gradibus excedit creaturam, ergo erit quid simpliciter infinitum; Consequenter hanc non admitterent, neque ego illam; & quidem argumentum satis urget Thomistas, docentes, actum speciem desumere ab objecto.

72. Argumentum aliud nullum; robur habet, si perpendantur termini, non enim nos negamus, gravitatem offensæ etiam derivare à personæ offensæ, unde si eadem sit cognitio tam personæ dignæ, quam personæ dignioris, major erit offensæ, si fiat istam; sed ut cœtera sint paria, debet cognitio personæ dignæ commensurari dignæ, & cognitio dignioris commensurari digniori; Si autem fieret suppositio, quod persona digna cognosceretur & offenderetur, profecto esset offensæ, si tamen persona dignior non cognosceretur,

retur, & offenderetur, non esset offensa, semper ergo subsistit, offensam habere suam gravitatem juxta mensuram cognitionis, aliorumque, de quibus usque modo diximus, præsertim quia debemus in offensis fateri inæqualitatem, proinde majorem & minorem, nunquam ergo infinitam.

73. De mente S. Th. cogitent Thomistæ; non prohibemur tamen illum in contrarium asserere, atque ut plurimam præteream, habet hic art. 2. ad 2. Peccatum habere quandam infinitatem ex infinitate Dei, quod etiam repetit in 3. dist. 20. qu. 1. art. 2. particula autem illa excludit infinitatem simpliciter, sicuti cum 1. p. qu. 25. art. 6. ad 4. dixit, humanitatem Christi ex quo sit unita Verbo, & Beatam Virginem, ex quo sit Mater Dei, habere quandam infinitatem, negavit infinitatem simpliciter. Itaque &c.

74. Infremunt Salmant. eorumque compilatores, inter quos Paulus à Concept. qui tali pacto nos urgere contendit. Quamvis in re nostra finita sit voluntas peccans, finita cognitio ac deliberatio, attamen per peccatum moraliter aufertur prædicatum Divinum, idest ratio ultimi finis, ergo adhuc offensa erit infinita simpliciter, nam privatio alicujus formæ arithmetice crescit juxta incrementum ejusdem formæ, quia, ut docet Arist. 2. Ethic. cap. 1. *Mensura privationis est habitus*. Atque hoc magis demonstratur exemplo. Si quis enim eadem cognitione, deliberatione, & conatu destrueret tres imagines, quarum una esset valoris, ut quinque, altera ut decem, altera ut quindecim, quantitas damni cresceret arithmetice, juxta valorem imaginum, ergo à pari in re nostra. Neque dicas, omnia hæc esse vera, si loquamur in linea physica, non sic in morali; Contra enim; Si peccans mortaliter causaret physice in Deo privationem alicujus prædicati Divini, & si offensa physice reciperetur in Deo, offensa physice esset infinita, ergo si peccans mortaliter causat moraliter priva-

tionem prædicati Divini, & offensa moraliter recipitur in Deo, offensa moraliter erit infinita.

75. Sed neque hujusmodi argumentatio sententiam concutit nostram, etenim privatio prædicati Divini per peccatum non consistit in indivisibili, & est inæqualis, sicuti probatum fuit, unde in forma dis. ant. per peccatum moraliter inæqualiter aufertur prædicatum Divinum conc. æqualiter ne. ant. & conf. ad cujus prob. dis. ant. privatio physica alicujus formæ crescit &c. conc. privatio moralis inæqualis ne. ant. & Conf. Quid enim mirum, si privatio physica tanta sit, quanta est forma? consistit in destructione entitativa formæ, ergo quanta est formæ entitas, tanta est privationis non entitas; non ita loquendum de privatione morali, siquidem ista colligenda est à principiis moralitatem constituentibus, quæ cum possint esse majora, vel minora, & nunquam infinita, sequitur privationem moralem nunquam esse posse infinitam. Ex hoc habes, quid exemplo respondeas; damnum enim illatum in earum imaginum destructione physicum est, crescet ergo juxta illarum valorem, præsertim quia agitur hic de foro externo, non interno, sicut in disceptatione nostra; & de facto si probari posset, hoc non esse factum cum sufficiente cognitione, neque in foro externo ad reparandum damnum obligaretur. Accepto propterea responsum datam in argumento, & instantiæ dictum est satis pro dispari ratione afferenda.

76. Totum hoc valet, etiam admisso, offensam moraliter recipi in Deo, tanquam in subjecto, quod tamen negari posset, quia hæc denominatio, *Deus offensus* est pure denominatio extrinseca, & sicuti Deus intrinsece neque moraliter mutari potest, ita neque moraliter intrinsece potest offendi.

77. Secundo proponunt argumentum desumptum ex pœna debita peccato mortali, sic. Peccato mortali debita est

est poena simpliciter infinita in linea moralis, id est in prudenti hominum existimatione, ergo quia est malum simpliciter infinitum moraliter; Consequentia patet, quia effectus continetur in virtute suae causae, ergo poena infinita in culpa infinita, & aliter Deus esset injustus, quia puniret ultra condignum. Prob. ant. multifariam; Primo quia peccato mortali debita est carentia unionis hypostaticae, hæc autem infinita simpliciter est, sicut unio moraliter est infinita; Secundo, quia peccato mortali debita est carentia cujuscumque boni, complexum autem omnium bonorum censendum est quid infinitum. Tertio, quia ipsi debita est æterna poena, hæc vero est infinita saltem in duratione, at offensa finita non exigit vindictam infinitam, ideo &c.

78. Resp. per argumentum primum probari, etiam peccatum veniale esse infinitum, etenim etiam huic debita est carentia unionis hypostaticae, ne igitur ant. ad primam prob. sicuti gratiæ habituali non est debita unio hypostatica, ita peccato lethali non est debita carentia unionis; est itaque hujusmodi carentia extra lineam poenæ debitæ peccato, sicuti unio est extra lineam præmii debiti gratiæ, quare licet unio sit quid moraliter infinitum, non sic carentia unionis, nisi in abstracto, & sine aliquo ordine ad aliquod subiectum, atque tenendum est, quantitatem poenæ non esse attendendam præcise ex quantitate boni, quo quis privatur, sed ex majore exigentia, quam quis habet non carenti illo bono; Sic, si Principem redigas ad mediocrem statum, plus adimis, quam si à mediocri redigas ad statum mendici, & tamen plus poenæ inferitur in hoc, quam in illo casu. Privat ergo peccatum lethale gratia, beatitudine, & Deo tanquam æternæ felicitatis objecto, quod non sufficit constituenda poenæ simpliciter infinita, sicuti ex quo gratia conferat beatitudinem & Deum, non sufficit inferendo præmio simpliciter infinito, nec

gratia dici potest simpliciter infinita. Ad 2. eodem modo dis. ant. debita est carentia cujuscumque boni debiti conc. cujuscumque alterius boni, quod sit extra lineam poenæ debitæ, ne. ant. & cons. & quamvis peccator indignus sit omni bono, ipsi tamen non est debitum omne malum, sicut nec justo debitum est omne bonum. Ad 3. argumentum nimis probat, cum eadem ratione dicendum foret, etiam gratiam hominis justii esse infinitam, quia ipsi debita est gloria æterna. Hoc itaque contingit, quia tandiu perseverare debet poena, quandiu perseverat culpa, quare cum culpa in duratione æterna sit, quia nunquam retractabitur, sit etiam, poenam infinitam futuram esse in duratione, ait enim August. de fide ad Petrum. *Permanente in eis injustæ affectionis malo permanet in eis debita retributionis damnatio.* Et hoc ex Divina dispositione, quæ statuit, ibi futurum lignum ubi ceciderit, non quia non potuisset aliter puniri peccatum.

79. Tertio proponitur argumentum sumptum ex natura peccati mortalis, quod nimirum est destructivum Dei, & peccans vellet, Deum non esse legislatorem, potentem ac vindicem justum, saltem affectu & conditionate. Neque dicas, ut supra, hoc esse verum moraliter, inæqualiter, modo finito, & solum extrinsece, juxta illud Job. 35. *Si peccaveris, quid nocebis ei? Si multiplicata fuerint iniquitates tuæ, quid facies contra eum?* vel hujusmodi affectum & conditionem destruendi Deum nunquam in actum exire & motum deliberatum; etenim demus hypothesim, in qua peccator directe & formaliter vellet Deum destruere, saltem in hoc casu peccatum erit infinitum simpliciter.

80. Argumentum hoc jam superius expositum fuit; accepto itaque responsionem datam, & semper retorsio est in actu charitatis, quo quis vellet Deo dare esse quod habet, sicut peccator vellet destruere esse quod habet, nec tamen

actus

actus charitatis est infinitus. Ad hypotheseſim dico, adhuc peccatum illud simpliciter finitum esse propter eandem rationem, & alias adductas in probationibus nostris. Sed quid dicendum de peccato commissio in occasione Christi? saltem hoc fuit infinitum, quia fuit physice in personam infinitam. Respondent Amicus, Lezana, alique hoc concedendo de hoc speciali peccato, cum tamen hæc ratio de aliis non militet, ideo non est generatim concedendum; Aſſero tamen, neque hoc peccatum fuisse simpliciter infinitum, nam quod fuit destructum in occasione Christi non fuit Divinitas, sed Humanitas, & unio animæ cum corpore, quæ sunt aliquid finitum.

## §. IX.

*De Pœna debita peccato lethali.*

81. **P**œnam debitam peccato lethali duplicem esse, damni videlicet & sensus, constans est omnium Theologorum aſſertio. Illa consistit in amissione felicitatis ac beatitudinis æternæ, hæc vero in doloribus affixis, ut cum v. g. manus abscinditur. Certe utraque pœna huic debet correspondere peccato, quemadmodum enim est aversio à Deo, & conversio ad creaturam, ita debet carere Deo, & ecce pœnam damni, & debet torqueri à creatura, ecce pœnam sensus, atque hoc expressit Mat. cap. 25. Christus Dominus illis verbis, *discedite à me maledicti in ignem æternum*. Per prima verba indicatur pœna damni, per posteriora pœna sensus.

82. Quamvis Vasquez, Granadus, Azorius in omnibus damnatis esse velint æqualem, quia privatio æternæ beatitudinis nec minui nec augeri potest, attamen juxta peccatorum inæqualitatem futuram esse inæqualem docent Salmant. Gonetius, Scotistæ cum suo Doctore dicente, ex hac privatione, quæ non augeri nec minui potest, prout omnino

excludit à quovis damnato visionem Dei intuitivam, Deum efficere, ut magis torqueatur, qui magis peccaverit & ratio in promptu est; quia sicut qui majus meritum habet, visione Dei magis perfruitur, ita qui majoribus peccatis premitur privatione visionis debet magis cruciari.

83. Etiam pœnam sensus futuram, esse inæqualem, acerbiorē scilicet vel leviorē pro criminum numero & gravitate communis profert sententia, & satis colligitur ex illo Apocal. 18. *quantum glorificavit se, & in deliciis fuit tantum date illi tormentum & luctum*; idcirco S. Greg. 4. dial. cap. 43. inquit. *Vnus quidem gehenna ignis, sed non uno modo omnes cruciat peccatores, uniuscujusque etenim quantum exigit culpa tantum illic sentitur & pœna*. Et ratio hujus est eadem quæ supra, nam si gaudium in Cœlo est pro meritorum inæqualitate inæquale, etiam dolor in inferis debet pro peccatorum inæqualitate esse inæquale.

84. Ex multis quidem corporibus, quibus utitur Deus tanquam instrumentis justitiæ sug; hæc sensus pœna confurgit, unde legitur ps. 10. *Ignis sulphur & Spiritus procellarum pars Calicis eorum*, attamen ignis sit mentio frequentior in Sacris Scripturis. Mat. 7. *Omnis arbor, quæ non facit fructum bonum excidetur, & in ignem mittetur*. 25. *ite in ignem æternum*. Marci 9. *inextinguibilis ignis gehenna* nuncupatur. Apocal. 20. *missus est Diabolus in stagnum ignis*.

85. Difficultas fieri potest, an ignis iste revera sit corporeus; Qua in re nonnulla dixi, dum de potentia obedientiali in libris phisicorum pertractavi. Hic solummodo proferam varias Theologorum opiniones. Docent Recentiores, ut Suarez lib. 8. de Angelis cap. 14. Peſant. quæst. 64. art. 4. disp. 5. Arriaga &c. Spiritus torqueri per ignem obedientialiter producentem in eis qualitatem spiritalē sedantem eorum substantias, ex qua maximam concipiunt tristitiam, appre-



apprehendentes illam tanquam propria naturæ valde disconvenientem. Docet Coninch. num. 83. Deum animam separatam alicui corpori alligare, à quo nullo pacto dividi possit, & propter hoc percipiat qualitates huic corpori impressas, à quibus cruciatur, eo pacto quo dum est unita corpori, quod informat, non sine dolore percipit eas qualitates, quæ corpus afficiunt. Docent Dominicus Soto in 4. dif. 50. qu. 1. art. 2. Valentia, Albertin. Tanerus, ignem in anima separatam eum dolorem efficere per Divinam virtutem, quem efficeret, si esset corpori unita, quamvis corporis dolorem non sentiat, sed solam afflictionem ac tristitiam voluntatis, tanquam si revera ab igne cruciaretur, quæ sententia videtur eadem cum illa quam modo subdam. Docent alii, torqueri animas damnatorum non per veram actionem ignis, sed solummodo per ignis apprehensionem, qua coguntur ipsum concipere tanquam ipsis noxium, quam sententiam plures, inter quos Averſa qu. 54. fec. 7. Alberto, Egidio, Scoto, Sanctoque tribuunt Bonaventuræ, qui in 4. dif. 44. p. 2. q. 2. art. 3. inquit, per Divinam Omnipotentiam fieri, ut *Dæmones calore ignis horreant, ac si eum paterentur, quamvis revera illud pati non possint, & ita in illis adimpleri dictum Prophetæ, trepidaverunt timore, ubi non erat timor.* Utrum hoc senserint Doctores isti nullo pacto in examen vocare contendam; non me latet tamen hunc postremum dicendi modum nequaquam omnino incongruum dici posse, cui videtur adhæsisse Gregor. 4. dial. cap. laudato dicens; *eo pati, quo videt, & quia cruciari se respicit, cruciatur.* Pro qua re vide quæ tradidi in physicis loco superius indicato. Alii tandem, tam ex antiquis, quam ex recentioribus, docent, Dæmones, quod de damnatis dicendum, igni alligatos esse, ut ab ipso nequeant evadere, quique illos detineat vel ad instar carceris, vel ad instar objecti determinantis illos ad sui considerationem, vel ad in-

star vinculi potentiis animæ affixi; quo in suorum actuum exercitio cohibeantur, quam fuisse sententiam S. Th. 1. p. q. 64. art. 4. & 4. contra Gent. cap. 90. & Scoti in 4. dif. 44. qu. 2. fatetur Suarez, Joan. à S. Thom. Nazar. Amic. Averſa; atque hoc videtur evinci ex Scripturis Sanctis, cum in canonica Judæ legatur. *Angelos vero, qui non scrupaverunt suum principatum, vinculis æternis sub caligine reservavit.* Et Apocal. 20. *Apræbendit Angelus Draconem, & ligavit eum per annos mille, & misit in abyssum.*

86. Damnatorum autem pænas juxta communem legem æternum duraturas esse tanquam Dogma Fidei tenendum est, cum hoc ex pluribus tam veteris, quam novi testamenti paginis manifestissime indicetur. Isa. 66. *Vermis eorum non morietur, & ignis eorum non extinguetur.* Judit. 16. *Dabit ignem & vermes in carnes eorum, ut urantur & sentiant in sempiternum.* Job. 10. *Ubi umbra mortis & nullus ordo, sed sempiternus horror inhabitat.* Quæ in novo leguntur, tanquam omnibus nota præterire possem; Hujusmodi sunt. Mat. 25. *Discedite à me maledicti in ignem æternum, justi autem in vitam æternam.* Apoc. 20. *Cruciantur die ac nocte in secula seculorum.* Ideo prius cap. 9. dictum fuerat; *querent mortem, & non invenient eam, desiderabunt mori, & fugiet mors ab eis.* In quibus textibus æternum non potest sumi pro diuturno tempore tandem finem accepturo, sicut in aliis locis interdum usurpatur, ut patet verba considerantibus.

87. Hoc idem perpetuo docuerunt Sancti Patres. Vide Tertul. in Apolog. cap. 48. August. in ps. 48. in illa verba; *laborabit in æternum, & vivet adhuc in finem.* Et lib. 1. de Civit. Dei per plura. S. Thom. lib. 3. con. gen. cap. 11. interrim afferam Cypr. ser. de Ascen. Dom. ubi hæc habet: *Non miserebitur ultra Deus.... Carentes oleo frustra clamabunt exclusi, nullum ibi refrigerium, nullum remedium. Semel Christus descen-*  
dit

*dit ad inferos, ulterius non descendet... Irreversibilis erit illa sententia, & immutabile iudicium, & stabit damnationis hujus immutabile constitutum.* Optime propterea dixit Bernard. ser. 2. de ver. Ap. in illa verba ps. 48. *Mors depascet eos. Dure pressaque detonsi sempiternis nudis deputabuntur incendiis. Mors depascet eo, quia semper morientur ad vitam, & semper vivent ad mortem.*

88. Plures pro hac re à Doctore Theologis afferunt rationes, quæ videri possunt apud S. Thom. in 2. dis. 41. qu. 1. art. 5. in 4. dis. 46. quæst. 1. art. 3. 3. contra Gent. cap. 144. atque istæ omnes ad hoc revocantur, vel quod peccatum lethale per subtractionem gratiæ & charitatis sit suapte natura irreparabile ac perpetuum, & ideo nunquam haberi possit hominis ordo ad Deum, vel per hoc, quod qui mortaliter peccat, licet unico momento peccatum absolvat, atamen graviter peccat contra finem ultimum bonum æternum, & charitatem, quæ est societas beatorum perfecta, ergo bonis istis privari perpetuo meretur, sicut qui peccat contra humanam Rempublicam reus fit, ut privetur societate & bonis ipsius, nec non morte supplicii, quæ afficitur. Huc tamen revocari potest sententia illa Augustini, quam adduximus in antec. num. 78. in fine.

89. In hac re fuit unus ex erroribus Pelagii, qui teste S. Hieron. dial. 1. contra ipsum, & Alphon. de Castro lib. 3. adversus hæres. sentiebat, tam Dæmones quam damnatos fore aliquando à penis eruendos, & ad beatitudinem evocandos, quod etiam dixisse videtur Origen. quamvis hoc tantum de iis, qui fidem habuerunt, intelligendum esse affirmaverit, de hujus tamen mente inter Doctores Ecclesiasticos est discors sententia. Quod magis mirum censeretur posset, esset, si idem docuisset etiam S. Hieronymus, ut apparet ex iis, quæ habet loco laudato num. 33. ubi ait: *Si Origenes omnes rationales creaturas dicit non esse perdendas, & Diabolo tribuit* Tom. II.

*pœnitentiam: quid ad nos, qui & Diabolum & satellites ejus, omnesque prævaricatores dicimus perire perpetuo, & Christianos, si in peccato præventi fuerit, salvandos esse post pœnas.* Similia habet cap. 66. in Isaiam, ubi dicit: *Solius scientiæ Dei nos derelinquere debere, nunquam pœnæ peccatorum christianorum futura sint temporariæ, vel æternæ, & sic concludit. Diaboli & omnium impiorum, qui dixerunt in corde suo, non est Deus, credimus æterna tormenta, sicut peccatorum atque impiorum etiam Christianorum, quorum opera in igne probanda sunt atque purganda, moderatam arbitramur & mixtam clementiæ sententiam iudicis.*

90. Ut à tanto errore immunem ostendant maximum istum Doctorem, dixerunt aliqui, ibi non ex mente propria asseveranter, sed ex aliorum historice fuisse loquutum, ut alias etiam fecisse compertum habetur ex epist. ad Augustinum 11. alii dixerunt, intelligendum esse de fidelibus, qui in gratia decedunt, & peccato præventi dicuntur, quia moriuntur, antequam peccata sint dimissa quo ad pœnam temporalem, quæ in purgatorio remanet luenda, & sic quantum ad pœnam dicuntur impii & peccatores.

91. Sed quicumque fuerit, qui contrarium tenere ausus est, alium præter Diabolum Magistrum non habuit, qui æternæ pœnæ timorem ab hominibus amovens, effrenius pertrahit ad peccandum. Novit hoc S. Gregor. lib. 34. Moral. cap. 16. & ita scripsit. *Leviathan æstimabit abyssum quasi senescentem, quia reproborum corda sic insatuiat, ut suspicionem eis de venturo iudicio, quod quasi finiatur, infundat. Itaque antiquus iste persuasor in mentibus iniquorum futuras pœnas quasi certo fine determinat, ut eorum culpas sine termino corruptionis extendat, & eo magis peccata non finiant, quo existimant peccatorum supplicia finienda.*

92. In rem nostram placet denique afferre definitionem Concilii Lateran. T t quod

quod cap. *Firmiter* de summa Trinit. statuit, quod *mali recipiant cum Diabolo pœnam perpetuam*. Et Concil. Trident. quod cum sess. 6. cap. 14. doceat, lapsos in peccatum mortale post susceptam fidem & justificationem una cum remissione culpræ æternæ pœnæ veniam obtinere per Sacramentum poenitentiae vel contritionem perfectam, plane supponit, peccato mortali debitam esse pœnam æternam.

93. Quia vero non defuerunt quidam ex Græcis dicentes, animas eorum, qui in mortali decedunt non statim ad infernum esse perducendâs, sed expectandum esse diem finalis iudicii, ideo contra hos sint duo Scripturæ textus, Job. 21. de malis dicitur. *Ducunt in bonis dies suos, & in puncto ad inferna descendunt*. Et Luc. 16. *Mortuus est dives & sepultus est in inferno*. Tandem Benedict. XII. in Extravag. quæ incip. *Benedictus Deus*, ita decernit. *Definimus insuper, quod secundum Dei ordinationem communem animæ decedentium in peccato mortali mox post mortem suam ad inferna descendunt, ubi &c.*

94. Dixi supra juxta legem communem, quod etiam innuitur à Benedicto, quia si da absoluta Dei providentia sermonem instituere velimus, oppositum fieri posse nemo est qui dubitet vel neget; cum Deus vel definitivam sententiam suspendere possit, vel animam illam in quodam loco medio statuere, vel iterum suo corpori unire, atque ita illi conversionis locum relinquere. Utrum vero hoc aliquando factum fuerit, affirmare videtur S. Th. in 1. dis. 43. quæst. 2. & cum eo Salmantic. loco laudato, etenim ex tot, quos ad vitam Christus, & Apostoli excitarunt videtur fieri non potuisse, quin aliqui in mortali peccato decesserint, præsertim cum plures fuerint infideles, hos autem postea poenitentiam egisse, rationalius est affirmandum. Hoc immo inter ceteros affirmat Alphonsus Chaconius de anima Trajani, quam post 400. circiter annos post

mortem, precibus Sancti Gregorii Magni poenitentia gratiam existimat obtinuisse, atque ita justificationis gratiam consequutam à quodam pœnarum loco ad æthereas sedes fuisse transvectam; Hoc tanquam fabulam politiores Scriptores rejiciunt; & Baron. ad ann. Christi 600. pluribus argumentis reprobandam esse demonstrat. Nihilo tamen minus S. Joan. Damasc. in orat. de fidelibus defunctis id clarissime affirmat dicens de S. Gregorio. *Hic intensissimas pro peccatorum Trajani remissione preces ad animarum amantem, & misericordem Dominum fudit, statimque vocem divinitus emissam audivit. Preces tuas audivi, ac Trojano ignosco; tu vero post hac caveto ne mihi pro impiis supplex sis. Quodque istud verum sit, atque ab omni calumnia alienum, Oriens totus ac Occidens testatur*. In eandem sententiam devenerunt Abul. in 4. Reg. cap. 4. qu. 57. Vincent. in specul. histor. lib. 22. cap. 22. Six. Senen. lib. 6. Bibliot. annot. 47. Nacur. in in Enchir. cap. 22. Medin. 3. par. qu. 52. art. 6. pluresque alii, inter quos etiam S. Th. in 4. dis. 45. art. 2. quæstiunc. 1. ubi dicit. *Dicendum, quod de facto Trajani, hoc modo potest probabiliter existimari, quod precibus B. Gregorii ad vitam fuerit revocatus, & ibi gratiam consequutus sit*. Quod prius etiam docuerat in 1. dis. 43. qu. 2. art. 2. quæstiunc. 1. & alibi. Hinc Salmant. Baronium temeritatis reprehendunt, quod hanc narrationem fabulosam censuerit, ut videri potest apud ipsos de vitiis & peccatis tract. 13. disp. 27. dub. 3. num. 61.

95. Ex iis, quæ dicta sunt superius constat, hanc pœnam æternam debitam esse peccato mortali ex natura rei, proprioque demerito, aliter contra Scripturas Sacras magis Deus pronus esset ad puniendum, quam ad miserendum, & pœnas infligeret ultra condignum. Neque obstat quod legitur in Glof. ordin. in illud ps. 71. *Ex usuris & iniquitate &c.* ubi inquit, *usuræ esse peccata, quæ nobis cum magno senore*

pœnas

*pœnis pariunt: Deus enim plus exigit in pœnis, quam commissum sit in culpis.* Etenim illic usura, quod dicendum de aliis peccatis, sumuntur materialiter & quantum ad delectationem, vel utilitatem, quam peperit culpa, non vero quantum ad culpam ipsam. Certum autem est, majorem futuram pœnam peccatorum, quam fuerit delectatio ex peccatis percepta. Ita refello id, quod erui posset ex alio pluries dicto; *Quantum in deliciis fuit, tantum date illi tormentum & luctum.* Ex quo videtur confici hoc argumentum, fuit in deliciis tantum temporanee, ergo etiam debet esse in tormento & luctu tantum temporanee; quod si probaret, vix momentanee pati deberent qui in lethali peccato mortui sunt; attendenda est ergo culpa peccati, non delectatio, aut si ista, attendenda est istius non retractatio nunquam habenda.

§. X.

*De pœna debita peccato mortali dimisso quoad culpam.*

96. **P**unctum hoc, ubi de peccato veniali à nobis actum est, resolvi potuisset, quia tamen à Catholicis Doctoribus idem dicendum est, quantum attinet ad substantiam pœnæ, de pœna debita peccato veniali, quod de pœna infligenda peccato lethali in reatu culpe per poenitentiam Sacramentum, vel per contritionis actum remisso, ideo, ut complecteremur utrumque, ad hunc locum protracta est difficultas.

97. Quo res nostra deducatur, jam quisquis intelligit, nec enim de poenis in hoc mundo persolvendis agendum suscipimus, sed de aliis, quæ post animæ transmigrationem supersunt, quapropter de purgatorio, loco quodam ab orthodoxis asserto, ubi ab omni reatu pœnæ purgantur & absoluntur animæ, quæ tantum venialiter peccarunt, nec conjunctæ corpori poenam justam persolve-

*Tom. II.*

runt, vel si mortali culpa fuerunt coinquinatæ; attamen contrito corde & humiliato, quod Deus non despicit, culpæ veniam obtinuerunt; atque æterna pœna fuit in temporaneam commutata. Ad illud igitur propositum à nobis dubium extenditur, quo statuamus, utrum revera detur iste locus, qui purgatorium vocatur, in quo hujusmodi temporanee pœnæ etiam post decessum ab hac vita, persolvantur, & solutione facta ad æternum præmium beatæ vitæ assequendum animæ perducuntur.

98. Dicendum dari hujusmodi locum; Hunc negarunt Hæretici Apostolici appellati, sed revera pseudo Apostolici, Waldenses, Albigen. Wiclefistæ, Hussitæ, & tandem Lutherani, & Calviniani. Quod tamen negarunt Hæretici agnoverunt Gentiles, præ cæteris Virgil. 6. Eneid. qui de illis, quos & *supremo cum lumine vita reliquit*, concludit. Ergo *exercentur pœnis, veterumque malorum.*

*Supplicia expendunt &c.*

& Plato in Phædone & Gorgia hæc summam habet. Sunt homines nudi, idest sine nobilitatis insignibus, sine divitiarum præsidio, sine Regni majestate, post obitum judicandi, & Judex animum solum à suis omnibus relictum, & omnem ornatum exteriorem deponentem respiciet, Si inspexerit omnia mendacis oborta & vanitate, si lascivias, si fraudes, si injustitias, statim ignominiose illos transmittit, ubi meritis subire pœnas oportet, atque omnes fors conveniens mergit in tartarum, unde nunquam egrediuntur (ecce Infernus) si vero inspexerit sanabiles animos, idest illos, qui commiserunt peccata per retractationem doloremque sanata, aliisque bonis operibus secundum culpam comparata ad Acherontem profecti in paludem perveniunt. Acherusiam, ibique habitant, & purgantur pœnas dantes pro culpa, & cum purificati fuerint, absoluntur. (ecce Purgatorium) Quos vero inspexerit, qui præ cæteris pie sapienter-



terque vixerunt, ex his terrenis locis, tanquam è carcere solutos in altiora evocat, puramque supra terram regionem velut habitaculum ipsis concedit, ibique per totum tempus vivere permittuntur in tot talibusque deliciis, ut ipse ad narrandum se imparem fateatur (ecce gloria beatorum).

99. Sed jam rem nostram peragamus, quam si offenderimus ex Scripturis, Patribus, Conciliis, ratione, nihil à nobis exoptandum supererit. Hæc autem omnia exhibemus, atque primo non levia ex testamento veteri momenta producimus, si tamen ea Hæretici perpendere velint & acceptare, sicut à Patribus fuerunt intellecta & explicata, quod si nolint, quam peperam id faciant, videat unusquisque Arbitror ad rem esse quod legitur 1. Reg. cap. ultimo, ubi describuntur habitatores Jabès Galaad audita morte Saul septem diebus jejunasse, quod & factum fuisse pro eodem & Jonatha 2. Reg. c. 1. & pro Abner 2. Reg. cap. 3. à Davide Scriptura testatur. Utiquid autem hoc egisse, nisi ut ipsorum animis adjumentum præberent, existimandum est? nunquid tantummodo in doloris maestitæque testimonium? Hoc vix credi potest præsertim si attendamus; Regium vatem jejuniis se exercere non assuevisse, nisi vel ad sibi peccatorum veniam impetrandam, vel ad aliquid sibi aut aliis impetrandum; Vis rem videre? Attende 2. Reg. 12. ipsum jejunasse precesque fuisse pro filio suo puerulo, dum ægrotabat, ut, si fieri posset ipsius sanitatem obtineret, & dum eum mortuum esse, sibi nuntiatum est, statim jejunium precesque dimisit; cur igitur post mortem aliorum has sibi penas infligit, post obitum pueri à penis abstinet? noverat profecto jejuniis precibusque suis illos adjuvari potuisse, hunc nequaquam quia nullius culpæ ac penæ noverat reum, sed ita purgatorium admitti debet, cum existentibus in Inferno nulla sit Redemptio aut levamen, ergo. Nec minus

probat quod habetur Micheæ 7. *Si cecidi, resurgam, cum sedero in tenebris, iram Dei portabo, donec causam meam judicet; adducet ne in lucem, videbo justitiam ejus.* Locum hunc de Purgatorio intelligendum esse verba ipsa suadent, sedere siquidem in tenebris est ab hoc sæculo jam emigrasse, iram autem Dei ita portare, ut inde adducatur in lucem, est tales luere poenas, ut non sint sempiternæ, ergo non infernales, igitur purgatorii. Omnium autem, quæ quidem plurima afferri possent, clarissimum est illud 2. Machab. cap. 12. ubi postquam descripta est oblatio facta à viro fortissimo Juda pro interfectis, concluditur. *Sancta ergo & salubris est cogitatio pro defunctis exorare, ut à peccatis solvantur.*

100. Contra locum istum Hæreticos plura reponere, ine non latet. 1. libros istos non esse canonicos. 2. ex hoc ipso rejici purgatorium, siquidem pro exorandi motivo assertur resurrectio; & si Purgatorium esset, quamvis resurrectio futura non esset, adhuc pro ipsis exorare superfluum non foret ac vanum; aut dici deberet, animas simul cum corporibus mori, & aliquando cum corporibus resurrecturas, quod est manifestissimus error. 3. Judam pro mortuis orasse, non ut ipsis aliquid adjumenti conferret, sed ad ostendendum amorem & memoriam erga ipsos, ac se suosque hoc pacto consolaretur.

101. Quod primo reponitur rejecturus nihil dicam, satis in 1. Tomo dictum, ubi de Canonicis Libris pertractatum est. Ut vero secundo respondeamus; advertendum est; Quod etsi questio de animarum immortalitate distincta sit ab alia de corporum resurrectione, attamen apud Hebræos eandem fuisse, ita ut, qui unum negabat etiam aliud inficiaretur, ut erant sādūcæi, qui unum concedebat, etiam aliud concederet, ut erant Pharisei; Constat hoc ex dicto Christi Domini, qui Mat. 22. probaturus sādūcæis mortuorum resurrectio-



tionem, inquit. *Ego sum Deus Abraham, Deus Isaac, Deus Jacob.* Et addit; *Non est Deus mortuorum, sed viventium.* Quod argumentum nihil probaret, nisi eadem esset quæstio, de animæ immortalitate & de corporum resurrectione; potuissent enim respondere, esto resurrectio futura non sit, adhuc Deus non est mortuorum, sed viventium, quia est Deus animarum, quæ sunt immortales; Simili etiam argumento utitur Paulus 1. ad Corint. 15. dicens. *Quid mihi prodest, si mortui non resurgunt? comedamus & bibamus, cras enim moriemur;* ubi plane supponit, si corpora non resurgunt, animas immortales non esse; alioquin adhuc prodesset jejunare & bene vivere. In hoc igitur sensu etiam in libris Machabeorum sumitur resurrectio pro motivo exorandi pro mortuis, & ita Purgatorium non excluditur, sed rectissime & necessario insertur. 3. omnino corrui, si perpendantur illa verba; *ut à peccatis solvantur.* Et alia, *misi 12000. drachmas offerri pro peccatis mortuorum.*

102. Jam vero ad idem ostendendum testamentum novum non prætereamus, ex quo quidem plura pro veritate Catholica colligunt nostri Doctores. Hujusmodi est illud Mat. 12. ubi dicit Christus esse quodam peccatum, quod *non remittetur ei neque in hoc sæculo, neque in futuro.* Unde sic arguamur, dum dicitur esse aliquod peccatum, quod in hoc sæculo non remittitur, supponitur esse aliud, quod in hoc sæculo remittitur, ergo, dum dicitur esse aliquod peccatum, quod in futuro sæculo non remittitur, supponitur, esse peccatum aliquod, quod in futuro sæculo remittitur. Hæc fortasse fuit mens eorum, quos Catholica Romana Religio suos profitetur, quamvis in nullo hæc argumentatio reperiat.

103. Attamen multa sunt, quæ contra laudatum Textum Hæretici excogitant; Singula afferrem, nisi jam ab aliis, præsertim Eminentiss. Bellarmin. lib. 1.

cap. 4. allata essent, atque rejecta; Mihi vero satis est, si ostendero, à præclarissimis antiquæ, quæ tamen semper eadem est, Ecclesiæ sanctissimisque Doctoribus in sensu nostro fuisse intellectum. Habentur autem pro hac re clarissima testimonia S. Augustini lib. 21. de Civit. capit. 24. quem postea sequuti sunt. Gregor. Magnus lib. 4. Dialog. cap. 39. Bedæ in eundem locum, & S. Bern. hom. 66. in Cant. illis tantum verbis oppositam hæresim evelli judicavit.

104. Ea tamen nobis non sufficiunt, sed ad alia progredimur. 1. ad Corint. 3. inquit Paulus: *Unius cujusque opus quale sit, ignis probabit; Si cujus opus arserit, detrimentum patietur, ipse autem salvus erit, sic tamen quasi per ignem.* Etiam Textum hunc in diversa posse, significatione explicari, non inficiamur, attamen de Purgatorio in sano recto que sensu usurpari, negari non potest, nisi negemus Augustinum, Hieronymum, Ambrosium, ceterosque Patres. Horum verba præterire omnino non debemus. Augustin. in ps. 37. explicans illa verba: *Domine ne in furore tuo arguas me, seu, ut ipse legit, In indignatione tua arguas me, neque in ira tua emendes me* inquit, hæc emendatio in ira, per quam emendati salvabuntur, futura est post mortem, sic tamen quasi per ignem, & addit. *In hac vita purges me, & talem me reddas, cui jam emendatorio igne opus non sit.* Serm. 1. de Sanctis loquens de peccatis venialibus ait: *Quidquid de istis peccatis à nobis redemptum non fuerit, illo igne purgandum est; de quo dixit Apostolus, quia in igne revelabitur, & si cujus opus arserit, detrimentum patietur, aut enim, dum in hoc mundo vivimus, ipsi nos per penitentiam fatigamus, aut certe, volente aut permittente Deo multis tribulationibus pro istis peccatis affligimur, & si Deo gratias agimus liberamur.* Subdit deinde: *Ita peccata ipsa in hoc sæculo purgantur, ut in futuro illa ignis Purgatorius, aut non inveniat; aut certe parum inveniat quod exurat; Si autem*

autem nec in tribulatione Deo gratias agimus, nec bonis operibus peccata redimimus, ipsi tandiu in illo Purgatorio igne moras habebimus, quandiu supradicta peccata minuta, tanquam lignum, fenum, stipula consumantur. Tandem, ut alia quam plura hujus Sancti Doctoris omittamus, in lib. 50. humiliar. hom. 16. hæc habet. *Qui temporalibus penis digna gesserunt, de quibus Apostolus dicit, si cuius opus arserit, detrimentum patietur, ipse tamen saluus erit, sic quasi per ignem, per fluvium igneum (de quo Propheticus sermo commemorat) & vada ferventibus globis horrenda transibunt. Quanta fuerit peccati materia, tanta & pertranscundi mora, quantum exegerit culpa tantum sibi ex homine vindicabit quædam flammæ rationabilis disciplina.*

105. Si vero ad Sanctum Hieronymum. & Ambrosium convertamur; Primus aliquam poenam ignis temporalem post hanc vitam futuram esse diserte fatetur in cap. ultimum Isaïæ & in lib. contra Jovinian. expendens verba Apostoli adducta num. 104. sic ait. *Si sic, cuius opus arsit, & perit, & damnum sustinuit laboris sui, perdet quidem laboris præmium, sed ipse servabitur, non tamen sine probatione ignis, ergo is, cuius manserit quod superædificavit, sine ignis probatione salvabitur, & inter salvationem & salvationem erit utique diversitas aliqua.* Secundus vero clarissime nostram veritatem probat in cap. 14. Apocal. in illa verba. *Sine macula enim sunt. Dicens. Animæ Sanctorum sine macula sunt, quia si quas sordes ex mundana habitatione contraxerunt, aut per penitentiam, & lacrymas, charitatisque opera, aut per flagella, aut certe post mortem igne Purgatorio deleta sunt.* Quod si quis negaret, aut ambigeret opus hoc Ambrosium habuisse Authorem, aliquem tamen ex antiquis gravibusque Patribus habuisse, inficiari non potest; Alium tamen ejusdem Ambrosii indubium locum. asserre non prohibemur, est autem precatio secunda præpa-

rans ad Missam, in qua sic Christum exorat. *Recordare, quia advocatus meus es ipse, qui iudicas. Quod si etiam in illo adhuc sæculo aliquid in me vindicandum reservas, peto, ne me potestati Demonum tradas, dum scelus meum purgatoria pena detergis.* Et denique exponens Textum Pauli laudatum, inquit: *Cum Paulus dicit, sic tamen quasi per ignem, ostendit quidem illum salvum futurum, sed penas ignis passurum, ut per ignem purgatus fiat salvus, & non sicut perfidi æterno igne in perpetuum torquatur.*

106. Aliud fundamentum nobis exhibet parabola, quæ legitur Mat. 5. & Luc. 12. & quæ sic concluditur. *Ne mittaris in carcerem; Amen dico tibi, non exies inde, donec reddas novissimum quadrantem.* Mirum est quam varie à Sacris Doctoribus exponatur. Inter reliquos S. Augustinus existimat hic agi de poenis æternis gehennæ, & dicit per illud: *Donec reddas* nequaquam certum, tempus significari, sed æternam durationem, ita ut ultimum quadrans nunquam reddendus sit. Ut autem hoc demonstret, alia similia in medium adducit. Sic Mat. 1. *Non cognovit eam donec pareret filium suum* nec tamen sequitur eam cognovisse postquam pepererit, ps. 109. *Sede à dextris meis, donec ponam inimicos tuos scabellum pedum tuorum,* nec tamen inferitur non esse à dextris sessurum, postquam posuerit inimicos suos scabellum &c. Ita in re nostra, dum dicitur. *Non exies inde, donec reddas novissimum quadrantem* sequitur inde exiturum.

107. Sed revera hujus Augustini explicatio potius Subtilis, quam propria censenda est, nec recte illa verba, dici posse videntur, nisi aliquando futurus sit finis solutionis, & à carcere, qui missus fuerat, liberandus; atque id primo evincitur ex eadem parabola, in qua ille, cui dicitur, *ne mittaris in carcerem* &c. non comparatur aut homicidæ, aut proditori; aut raptori &c. qui perpetuo carceri, aut supplicio deputantur, sed

sed debitori, qui in carcerem conjicitur, donec solvat, & post aliquod tempus solet à carcere dimitti; secundo quia, in hoc sensu nostro illam explicarunt alii Sancti Patres, ita ut si debitum sit insolubile, nunquam concedetur egressus, si vero solubile, qui detinetur, liber evadet. Accipe inter plures S. Cyprian. lib. 4. ep. 2. dicentem. *Aliud est ad veniam stare, aliud ad gloriam pervenire, aliud missum in carcerem inde non exire, donec solvat novissimum quadrantem, aliud statim accipere fides & virtutis mercedem, aliud pro peccatis longo tempore cruciatum emendari, & purgari diu igne, aliud peccata omnia passione purgasse.* Accipe Origen. in epist. ad Rom. *Quamvis promittatur exeundum, esse quandoque de carcere, tamen designatur, non inde exire posse, nisi reddat quisque novissimum quadrantem.* Idem omnino tradunt Eusebius Emis. hom. 3. de Epiphani. Ambros. in cap. 12. Lucæ. Idem Hieronym. in cap. 5. Mat. & tandem Bernard. serm. de obitu Auberti dicit. *Illud scitote, quia post hanc vitam in purgatorii locis centupliciter, quæ fuerint hic neglecta, redduntur, usque ad novissimum quadrantem.* Ex quibus manifeste compertum sit, textum Scripturæ à nobis adductum, intellectum juxta communem Sanctorum Patrum explicationem, purgatorium esse, probare; atque ex hoc collige, quod, vel ex uno; vel alio Scripturæ loco omnes Sancti Patres purgatorium dari professi sunt, quod amplius demonstrabo, ubi defunctis fidelium orationes prodesse, declarandum probandumque suscipiam. Hæc interim ex Patribus sufficiant.

108. Neque exemplis illis Sancti Augustini aliquod contra nos apte probatur. Particula enim *donec* aliquando utrumque propositionis extremum vere affirmat, ut cum dicitur. *Donec sterilis peperit plurimos, & quæ multos habebat filios infirmata est, aliquando vero ad unum tantum extremum refertur, ut in adductis, ex quibus sic argumentum*

confici debet. *Non cognovit eam donec pareret*, ergo aliquando paritura erat. *Sede à dextris meis, donec ponam inimicos tuos scabellum pedum tuorum*, ergo aliquando inimici ponendi sunt sub pedibus ejus; & ita in re nostra; *non exies inde, donec solvas ultimum quadrantem.* Ergo aliquando solvendus est, ergo aliquando exeundum.

109. Sed nunquid rei nostræ amplius statuendæ Concilia defunt? Hoc docuit in Affrica Concil. Carthagin. 3. cap. 29. Hoc in Hispania Concil. Bracarense 1. cap. 34. Hoc in Gallia Concil. Cabilonen. & Aurelian. 2. cap. 14. Hoc in Germania Concilium Wormatiense cap. 10. Hoc in Italia Concil. VI. sub Symmaco, Lateranen. sub Innoc. III. Florent. sess. ultima in Decreto de Purgatorio, Trident. sess. 25. sub initio.

110. Ratio pro assertionem nostram desumi potest & debet ex eo, quod, vel plures lethaliter peccaverint, nec plenarie satisfacere potuerint, aut noluerint post remissionem culpam, vel solum peccaverint venialiter, & pariter satisfactio nem Deo non exhibuerint, at ex una parte his non est debita æterna poena; ex alia Regnum Cœleste adire non possunt, quia ut legitur Apocal. 21. *Non intrabit in illam Civitatem aliquid coinquinatum;* & Paulus ad Ephes. 5. dixit. *Christus dilexit Ecclesiam, & se ipsum tradidit pro ea, ut exhiberet ipse sibi gloriosam non habentem maculam, neque rugam.* Ergo esse debet aliquis locus, quo omnino ab omni poena, & culpa purgentur, & ideo &c. Quantum attinet ad peccata venialia, jam dictum est in proprio loco. Argumentum hoc tanti faciendum est, ut, etsi nihil ex Scriptura, nihil ex Patribus pro statuendo purgatorio deduci posset, adhuc illud admittendi sufficiens fuisset in Ecclesia fundamentum.

## §. XL

*Afferuntur argumenta Hæreticorum,  
& refelluntur.*

111. **F**undamentum præcipuum, unde error Hæreticorum proficiscitur, ex alio errore desumitur, nimirum ex impii justificatione, quam volunt in alio non consistere, nisi in eo, quod propter Christum hominibus peccata non imputentur, quando firma fide sibi credunt non imputari. Verum hoc totum jam à nobis rejectum fuit in priori parte hujus libri, ubi de hoc puncto singillatim actum est. Operæ igitur pretium tantummodo existimamus, alia afferre, quæ ex Scripturis, Patribus, & rationibus pro se militare contendunt & stultissime arbitrantur.

112. Primo ex Scripturis sic argumentantur. Inter justorum mortem, & Cœlestis gloriæ hæreditatem perperam excogitatur quodcumque medium, legitur enim ps. 126. *Cum dederit dilectis suis somnum, ecce hæreditas Domini.* Statim debent illi, qui in Domino moriuntur à quocumque labore, ac ærumna requiescere, habetur enim Apocal. 14. *Beati mortui, qui in Domino moriuntur, amodo jam dicit spiritus, ut requiescant a laboribus suis.* In ipsis nihil reprehendi, damnandi nihil invenitur, ait enim Apost. ad Rom. 8. *Nihil damnationis est illis, qui sunt in Christo Jesu.* Ergo ut quid locum istum ad torquendos & purgandos justos excogitamus & fingimus?

Resp. adductos textus multifariam præter Hæreticorum intentum explicari posse. Primum siquidem exponit S. August. in dictum psal. de omnium electorum dormitione, idest cum omnes electi corporali morte dormierint, tunc erit generalis resurrectio, & statim apparebit hæreditas Domini, quia omnes resurgent ad gloriam, atque in hoc sensu nullum medium reperitur, quia jam tunc purgatorium finem accipiet. Secundum exponit Sanct. Anselmus in

Comment. ejusdem loci, verbum illud *amodo* non esse intelligendum à morte, uniuscujusque, sed ab extremo judicio, de quo in toto illo capite sermonem habet Joannes. In tertio agit Apostolus de concupiscentia, & docere vult, eos, qui sunt in Christo Jesu, idest hujus gratia concupiscentiæ motibus non adhærent, nullum peccatum ex iisdem contrahere, in quo Hæreticos reprobat, volentes omnes concupiscentiæ motus etiam in justis non consentientibus esse peccatum. Prætermisissis tamen omnibus explicationibus facillime respondemus dicentes, omnia ea esse vera, sed de iis, qui sunt perfecte dilecti, perfecte moriuntur in Christo; nec aliquid damnationis habent non solum æternæ, sed neque temporanæ, si perfecte sint in Christo Jesu, ita ut nec culpa gravis, nec culpa levis, neque debitum alicujus poenæ subeunda in ipsis remanserit. Hæc nostra explicatio desumitur à Ricardo de S. Victore in laudatum locum Apocal. immo ex S. August. lib. 3. contra duas epist. Pelag. cap. 3. ubi docet, homines etiam justos partim esse filios Dei, partim filios hujus sæculi, filios Dei quantum ad mandatorum observationem substantialem, filios vero sæculi propter quædam minuta & levia peccata, propter quæ dictum est, etiam religiosa corda de mundano pulvere sordescere.

113. Secundo opponunt alia Scripturæ testimonia. Hujusmodi est illud Eccl. 11. *Si ceciderit lignum ad Austrum, aut ad Aquilonem, in quocumque loco ceciderit, ibi erit.* Non igitur datur locus, à quo egrediendum sit. Aliud Ezechiel. 18. *Cum averfus fuerit impius ab impietate sua, omnium iniquitatum ejus non recordabor.* Sed si eas adhuc in purgatorio puniret, earum recordaretur, ergo. Additur S. Paulus dicens 2. ad Corin. 5. *Si domus terrena nostræ habitationis dissolvitur, habemus domum non manufactam, æternam in Cælis* justis igitur convenit Paradisi gaudium, non purgatorii



torii dolor; & ibidem. *Omnes afflabimus ante Tribunal Christi, ut referat unusquisque prout gessit in corpore, sive bonum, sive malum.* At si purgatorum daretur, & post hanc vitam peccata remitterentur, unusquisque referret non solum prout gessit in corpore, sed etiam prout passus est extra corpus.

114. Verum horum nihil adversariis suffragatur. Si primum juxta ipsorum mentem admittatur, pro Sanctis Patribus, qui ante Christum decesserunt, nullum locum tertium fuisse fateantur necesse erit, & tamen concedi debet locus aliquis, sive dicatur sinus Abraham, sive Limbus, sive etiam Infernus, in quo perpetuo non fuerunt detenti; Dicitur igitur in primis potest, ibi sermonem esse de corporis morte, certum autem est, homines, postquam mortui fuerint, per se non esse resurrecturos, sicut lignum, postquam ceciderit, ibi manet & putrescit, ubi cecidit; Quod si etiam ad animæ statum hæc transferre velimus, quis dicere prohibet, animas ad Purgatorium pertinentes ad Austrum, id est ad statum æternæ salutis suo tempore habendæ, & nunquam amittendæ (quod probatur per illa verba, *in quocumque loco cecideris, ibi eris*) cecidisse? Præterea; ex illo textu probatur quidem cadentes ad Austrum, aut ad Aquilonem ibi perpetuo futuros, sed non probatur, omnes cadere vel ad Austrum, vel ad Aquilonem. Secundus Textus, si intelligatur de aversione perfecta, & pœnitentia includente integram satisfactionem, certe probat, Deum amplius nullo pacto iniquitatum recordari, & ita neque illos in Purgatorio punire; at si sermo sit de conversione tantum quantum ad remissionem culpæ, non pœnæ, adhuc Deus illas temporaliter punit, quamvis dici possit illarum non recordari. Deum enim iniquitatum recordari est illas æternis suppliciis mulctare, ostenditur hoc ex contextu; nam, quemadmodum dicitur. *Cum adversus fuerit impius ab impietate sua, omnium iniqui-*

Tom. II.

*tatum ejus non recordabor,* ita legitur. *Si justus averterit se à justitia, omnes justitiæ ejus non recordabuntur;* nec tamen negari potest, Deum justitias istas aliquo temporali præmio remunerari, nisi negetur, quod docent omnes Sancti Patres; Chrysost. homil. 67. ad populum Antiochi. Hieronym. in cap. 19. Ezech. August. 5. de Civit. cap. 15. &c.

115. Quantum attinet ad Sanctum Paulum, jam nos ex ejusdem Doctrina Purgatorium probavimus; dissoluta igitur domo terrenæ nostræ habitationis, nos manet domus non manufacta æterna in Coelis, statim quidem post mortem, si omnia, quæ Deo debemus, persolverimus, non vero statim, si adhuc quid remaneat persolvendum, aliqui enim salvi fiunt, sic tamen quasi per ignem, ut dictum fuit n. 104. Ultima Apostoli propositio verissima est. Reddet enim Deus unicuique secundum opera sua, & quæ seminaverit homo hæc & metet, at hoc ipsum, quod remissionis & purgationis invenerint in futuro sæculo locum probat, nihil amplius recipere, nisi quod gesserant in corpore, existentes siquidem in gratia & charitate, sed non omnino perfectè, meruerunt post mortem posse purgari.

116. Post Scripturas Sanctorum Patrum momenta nobis audent opponere; Nihil autem ex Sanctis Patribus probari, nisi post hanc vitam haberi non posse peccatorum lethalium remissionem pro certo tenendum est; non sic vero si loquamur vel de remissionis pœnæ pro peccatis lethalibus quo ad culpam jam dimissis, vel de remissione tum culpæ, tum pœnæ pro venialibus; De istorum remissione quantum ad culpam duæ sunt celebriores sententiæ; una Doctoris subtilis, altera S. Th. Primus in 4. dist. 21. qu. 1. docet; peccata venialia remitti in primo instanti, quo anima à corpore separatur, istamque remissionem fieri per opera meritoria præcedentia, cum enim opera meritoria plus Deo placeant, quam peccata venialia displiceant, hæc

V u

remittit



remittendi virtutem obtinent, & ideo in hac vita per opera bona venialia non remittuntur, quia impedit ipsius peccati complacentia si non actualis saltem habitualis, quod impedimentum primo mortis instanti prorsus aufertur. Secundus vero in 4. dif. 21. qu. 1. art. 2. asserit, in Purgatorio veniales culpas dimitti per actum dilectionis & patientiæ, sic enim acceptare pœnam à Deo inflictam, cum à charitate proficiscatur, potest appellari quædam virtualis & æquivalens poenitentia, quæ licet non sit meritoria, attamen est remissiva peccati si non per actionem, saltem per passionem. Sive prior, sive secunda sententia teneatur. His breviter præmissis; Quid Hæretici reponant, intueamur, & quod à nobis superius dictum est, perspicimus.

117. Afferunt S. Cypr. qui tract. 1. contra Demetrianum inquit. *Quando istinc excessum fuerit, nullus jam poenitentia locus est, nullius satisfactionis effectus*. S. Chrysost. hom. 2. de Lazaro dicentem. *Cum hic discesserimus, non est in nobis situm poenitere, neque commissæ diluere. Qui in præsentī vita peccatu non abluerunt, non postea consolationem aliquam inventuri sunt*. S. Ambros. lib. de bono mortis cap. 2. scribentem. *Qui hic non accepit remissionem peccatorum, illic non erit, nimirum in patria beatorum*. Tandem Sanctum August. lib. 5. Hypognost. ubi sic effatur. *Primum locum Fides Catholicorum Divina auctoritate credit. Regnum esse Cælorum, secundum; Gehennam, ubi omnis apostata, vel à Fide Christi alienus æterna supplicia experietur, tertium penitus ignoramus, immo nec esse in Scripturis Sanctis invenimus*.

118. Verum, quo pacto intelligenda sint tria priora testimonia, nimirum de peccatis lethalibus, quæ nunquam in hac vita dimissa fuerunt, constantissime affirmamus, & ex ipsis laudatis Patribus evinci potest, si ibidem legantur. Sanctum Augustinum alibi exposuimus; age-

bat enim contra Pelagium, qui inter Regnum Cælorum & Gehennam, tertium locum æterno duraturum pro parvulis non baptizatis adstruebat; Hunc excludendum esse tenet Ecclesia, admittendum vero tertium locum, qui sit aliquando finem accepturus, idest Purgatorium & Ecclesia docet, & Augustinus tradit, aliter debuisset etiam negare, fuisse ante Christi Ascensionem sinum Abraham, seu Limbum Patrum. Plura alia ex Patribus affert Petrus Martyr, sed frustra, cum ex illis probeatur vel non dari extra hanc vitam spatium & locum conversionis, vel merita & demerita non amplius minui vel augeri, vel sermo sit de animabus aut decedentibus cum peccato lethali, aut cum perfecta justitia, & ideo illas statim detrudendas esse in Inferno, istas ad cælestia sublevandas.

119. Nunc vero ad ea perpendenda, quæ ex ratione depromunt, progrediamur. Primo inquit, assertum nostrum falsum esse in supposito, supponimus namque remissa culpa non esse simul remissam, & totam pœnam, quod omnino rejiciendum esse, constat ex eo, quod remissio culpæ non aliter fit quam per meritum Passionis Christi, quod superabundans est ad tollendam omnem culpam & pœnam; quod si hoc fit per Sacramentum Baptismatis, quare non fiet per Sacramentum Poenitentia? an non in utroque operatur una & eadem virtus Christi? Certe Christus solus est noster Redemptor & liberator, at si opera nostra ad nos redimendos liberandosque necessaria sunt, nos ipsi sumus nostri Redemptores ac liberatores, quo dato, vel una est satisfactio, vel duplex, si una, vel illa Christi, vel nostra, si ista, excluditur Christus, si alia, ergo Christus satisfecit tam pro culpa, quam pro pœna; Si vero duplex, ergo uni culpæ duplex pœna correspondet, illa nimirum Christi & nostra, quod dici non debet.

120. Resp. suppositum nostrum esse verum, nec nisi stulte ac impie negari pos-

posse. Dimissum erat peccatum David dicente Nathan, Dominus quoque transulit peccatum tuum, nec tamen fuit absolutus à temporanea poena, quia enim blasphemare fecit inimicos nomen Domini, filius, qui natus est ei, mortuus est; Orante Moysè dimissa fuit culpa Mariæ, quæ contra Dominum murmur effecerat, & tamen per unam hebdomadam lepræ poena punita fuit; centum alia exempla ex Scriptura Sacra afferri possent, sed hoc punctum accuratius pertractandum est, ubi in tractatu de poenitentia de satisfactione sermo contingit. Nunc satis erit asserre in hac re verba Augustini, quæ habentur tract. 124. in Joan. sunt ista. *Cogitur homo tolerare etiam remissis peccatis, quamvis, ut in eam veniret miseriam primum fuerit causa peccatum, productior enim est poena, quàm culpa, ne parva putaretur culpa, si cum illa finiretur & poena, ac per hoc vel ad demonstrationem debitæ miserie, vel ad emendationem labilis vitæ, vel ad exercitationem necessariæ patientiæ, temporaliter hominem detinet poena etiam quem ad damnationem sempiternam reum non detinet culpa.* Supponamus itaque, quod nonnunquam contingit, aliquem plura peccata commisisse, & tantum in mortis articulo se ad Deum convertere, huic certe dimissa culpa est, at quam satisfactionem exhibuit pro poena, cum statim mortuus sit? Supererit ergo poena temporaria persolvenda, aut hæc ubi, nisi purgatorium concedatur, ut dictum fuit num. 110. Dices fortasse per mortem omnia puniri; sed perperam hoc dicis, nisi velis asserere poenam debitam peccatis actualibus non esse distinctam à poena peccato originali statuta, aut eandem poenam stabiliis peccatis magnis ac parvis, plurimis ac paucissimis, in quo Divinam providentiam, ac justitiam non mediocriter reprehenderes ac condemnares.

121. Haudquaquam ignoro, Calvinum lib. 3. in tit. cap. 4. §. 31. duplex genus poenarum, quas Deus hominibus

infligit, distinguere. Unum earum est, quæ à Deo infliguntur ut Iudice in præteritarum culparum vindictam; Alterum vero earum, quæ à Deo infliguntur ut Patre, non ad puniendam peccata præterita, sed ad hominem admonendum, ne peccet. Primo modo puniit Deus tantum inimicos suos, proinde nihil poenæ hujusmodi servari potest in purgatorio. Secundo vero modo non est opus quis puniatur post mortem, cum peccandi periculum amplius non supersit; sed quo pacto frustranei sunt hujusmodi Calvini conatus, constat ex dictis num. superiori. Certe David & Mariæ post culpam dimissam erant amici Dei, & tamen poenam luerunt propter peccatum præteritum; Fatemur igitur poenas, quas justi subeunt, esse etiam paternas admonitiones, ne ulterius peccent, attamen sunt etiam poenæ & satisfactiones culpis præteritis debitæ ex justitia, non enim dictum fuit, *Filius, qui natus est tibi morte morietur* ne iterum pecces, sed quia blasphemare fecisti nomen Domini quod refertur ad peccatum præteritum esto dimissum. Quo pacto porro cohercat hæc Calvinii doctrina ejusdem principii non intelligo; etenim mors per ipsum est vera poena peccati, & flagellum paternum, at quomodo potest esse instituta ad peccatum præcavendum, cum ille, qui moritur, non possit amplius peccare?

122. Ad reliqua num. 119. exposita diluenda progrediamur. Fatemur remissionem culpæ haberi per meritum passionis Christi, quod superabundans est ad tollendam & culpam & poenam, attamen meritum & satisfactio Christi applicari debet per opera nostra, sicut & per Sacramenta, quæ nobis volentibus, & nos ad ea disponentibus passionis fructum in nobis causant, alioquin omnibus aequali modo prodescent, quod est contra Paulum 1. ad Corint. 15. dicentem: *Stella differt à stella in claritate, sic & resurrectio mortuorum.* Et Christus Joan. 14. inquit; *In Domo Pa-*

*tris mei mansiones multae sunt.* In quæ verba Augusti, tract. 67. in Joan. *Multae*, ait, *mansiones diversas meritorum in una vita aeterna significant Dignitates.* Sed de hac re pluries & effusius alibi dicendum continget. Quantum ad argumentum desumptum à Sacramento poenitentiae comparato Sacramento baptismatis, primo dico, si sumatur Sacramentum poenitentiae adaequatè tam iuxta essentialia, quam integralia pari modo discurrendum esse, quare nihil contra nos concluditur, secundo dico, multum inter hæc duo Sacramenta reperiri discriminis; In baptismo siquidem omnino liberaliter agit Deus, ita ut per ablutionem illam auferatur culpa & omnis poena futuri sæculi; at in poenitentia contrahit aliquantulum manum suam, ita ut applicet quidem Christi merita, ad tollendam culpam & poenam æternam, non tamen omnem temporaneam, nisi per nostra opera satisfactoria. Hinc est, quod à Patribus & Conciliis baptismus comparatur rati, qua facile trahunt flumina & maria, poenitentia vero comparatur secundæ tabulae post naufragium, cui qui inintuntur salvantur quidem, sed proprio labore ac sudore; ratio etiam id suadere videtur, nam qui post acceptam baptismatis gratiam peccat, gravius peccat, & magis ingratum se exhibet Deo, debet igitur etiam magis puniri. Quod additur de Christo redemptore ac liberatore alibi solum est in Questione de Justificatione, & Merito. Certe in Scripturis Sanctis homo dicitur sui ipsius redemptor ac salvator. Sic Dan. 4. *Peccata tua eleemosynis redime* ad Philip. 2. *Cum metu & tremore vestram salutem operamini.* Hoc autem nihil Christo Redemptori ac servatori asserti iniuriæ, etenim tota virtus operum & satisfactionum nostrarum à Christi meritis pendet. Hinc unicam satisfactionem illam dicimus, quæ à nobis est, & quæ à Christo, sicut unica est actio illa, qua Deus, & creatura aliquem effectum producant; sed, ut

præmonui, de hac re alibi satis.

123. Instabis contra superius dicta; crescente culpa crescit & poena, ergo remissa culpa remittitur & poena; Quod si hoc non dicatur, non est cur confingamus ad remissionem poenae obtinendam in purgatorio, in quo sicut nullum meritum esse potest, ita esse nequit aliqua satisfactio, omnis namque satisfactio meritoria est.

Sed contra. Verum est, crescente culpa crescere & poenam, non tamen verum esse remissa culpa remitti & poenam, nam licet poena dependeat à culpa quantum ad fieri, non tamen quantum ad esse, est enim debita etiam post præteritam culpam, mutatur utique, & in hoc sensu remittitur, omnino tamen non remittitur, ut à nobis declaratum fuit. Ad secundum falsa est consequentia paritatis, nam & esse potest meritum sine satisfactione, & esse potest satisfactio sine merito; Aliqua sunt communia tam satisfactioni, quam merito, v.g. habere gratiam sanctificantem, aliqua vero sunt peculiariora. Ad satisfactionem necessarium est, opus esse poenale, quod ad meritum non requiritur; Ad meritum necessarium est status libertatis & viæ, quod non requiritur ad satisfactionem, si quis enim cogatur à Iudice ad solvendum debitum, revera satisfacit, quamvis coacte solvat. Res igitur ita se habet, ut animæ in purgatorio mediæ existentes inter nos, & damnatos ac beatos, aliquid possint quod medium sit; nos possumus mereri & satisfacere, damnati ac beati nec mereri nec satisfacere, illæ igitur satisfacere, non mereri.

124. Oppones ultimo argumento, quod inter Catholicos promoveri potest, Animæ decedentes vel statim damnari debent, vel statim ad patriam Paradisi perducuntur, ergo omnino fingitur Purgatorium; Prob. ant. Animæ decedentes vel sunt peccato lethali inquinatæ, vel gratia & charitate præditæ, si primum, statim damnari debent, si secundum

dum statim &c. ergo. Prima pars mi. conceditur; Secunda prob. ab opposito; Animæ decedentes in peccato lethali statim damnantur, ergo animæ decedentes cum gratia & charitate statim &c. quod quidem potiori ratione dicendum videtur, cum Deus prior sit ad largiendā præmia, quam ad poenas infligendas; & si Deus præcepit reddendam statim esse mercedem operariis, non enim morabitur opus mercenarii tui apud te usque mane, quanto magis id dicendum de Deo? Ad summum igitur dici poterit, animas decedentes cum aliqua veniali culpa minus fruituras esse Deo, non autem absolute & statim non esse fruituras, eo pacto quo animæ decedentes cum peccato lethali, quamvis cum aliquo levi bono opere, minus punientur in Inferno, absolute tamen & statim puniuntur.

125. Resp. ne. ant. ad prob. conc. animas decedentes in peccato lethali statim esse damnandas, sed nego, animas decedentes in gratia & charitate, si aliqua veniali culpa teneantur, statim ad Paradisum perducī; ratio hujus est, præter Scripturas adductas num. 110., quia, si anima peccato lethali sit infecta, absolute est mala, statim igitur puniri debet, & anima charitate prædita, si culpæ venialis, aut alicujus debiti rea sit, absolute non est bona, cum malum defumatur ex quocumque defectu, & prohibetur, ne ad castissimos sponsi sui amplexus perveniat, donec etiam illas, etsi minutæ sint, sordes depulerit. Est nihilominus Deus prior ad remunerationem, quam ad poenas, siquidem istas ac citra condignum infligit, illas ultra; sed tempore à sua iustitia definito, & hominibus apto, quod hujusmodi non est, donec sint ab omni labe tum culpæ, tum poenæ defæcati, in quo sensu opus mercenarii non moratur in ejus manu, sed perficitur atque purgatur, ut ad purissimum omnisque mali expertem valeat pervenire mercedem. Ad ultimum, jam adducta disparitas est, quia qui de-

cedit cum peccato lethali, etsi aliqua levia bona opera secum trahat, attamen absolute, immundus est; non ita qui decessit cum gratia & charitate, & secum aliqua levia peccata trahat, absolute mundus censendus est, proinde prorsus mundari debet; beati enim mundi corde, quoniam ipsi Deum videbunt. Hinc &c.

## §. XII.

*Fidelium Orationes profunt Defunctis.*

126. **S**I præter ea, quæ diximus, Fidelium Orationes Defunctis prodesse, à nobis declarabitur, aliud efficace argumentum pro Purgatorio statuendo producemus. Illud autem sic proponimus. Fidelium orationes profunt defunctis, sed neque profunt beatis, neque damnatis, ergo admittendi sunt aliqui defuncti, qui neque sint beati, neque damnati, sed sic admittitur purgatorium, ergo. Majorem nostræ interest probare, sed si negaretur etiam minor propter aliqua fundamenta, hæc prius refellamus oportet.

127. Videtur igitur primo. Preces ac suffragia prodesse etiam beatis, Epiphanius enim hæc. 75. Cyrillus. cathec. 5. mystagogica, & Chrysostomus in sua liturgia asserunt pro Apostolis, Martyribus, Prophetis, aliisque Deo Sacrificium offerri; immo postremus Sanctus Doctor hom. 33. in Matt. excitans fideles ad eleemosynas pro filiis defunctis, hæc habet. *Putas cum maculis inguinatum? da illi sua, ut illis se à maculis detergat: putas in iustitia decessisse? præbe ipsi sua, ad mercedis & retributionis adjectionem.* Hæc præterea fuit etiam mens Ecclesiæ, etenim in antiquis Missalibus, teste Innocentio III. cap. Cum Martine extra de celebrat. Missarum in die S. Leonis legabatur. *Annue quesumus Domine, ut anima B. Leonis hæc pro sit oblatio.* Et nunc etiam in oratione secreta pro ejusdem-



festio sic dicimus. *Sancti Leonis Confessoris tui atque Pontificis annua Solemnitas nos tibi reddat acceptos, ut per hac pie placationis officia illum beata retributio &c.* Tandem frequenter in orationibus de Sanctis sic oramus. *Sumpsimus Domine Sancte Mysteria, quae sicut Sanctis tuis profunt ad gloriam, ita &c.* ex quibus inferre licet, ergo Fidelium orationes & suffragia profunt etiam beatis,

128. Sed quod prodesse possint etiam damnatis, pluribus ostendi posse videtur. Primo quia S. August. in Ench. cap. 110. dicit: *Quibus autem profunt suffragia, aut ad hoc profunt, ut plena fiat remissio aut tolerabilior sit ipsa damnatio.* Et capit. 112. *Penas damnatorum certis temporum intervallis existiment, si hoc eis placet, aliquatenus mitigari, dummodo intelligatur in eis manere ira Dei, hoc est, ipsa damnatio.* Secundo Innoc. III. cap. Cum *Marthe* hanc ponit divisionem. Quidam sunt valde boni, & suffragiis non egent, quidam valde mali, & suffragiis adjuvari non possunt, quidam mediocriter boni, quibus suffragia profunt ad expiationem, quidam mediocriter mali, quibus profunt ad propitiationem, at isti quinam esse possunt, nisi pueri existentes in Limbo? sed hi sunt damnati, ergo etiam damnatis profunt suffragia. Hoc etiam tradidit Prudentius in Hymno de novo lumine Sabbathi Paschalis inquiring:

*Sunt & spiritibus saepe nocentibus*

*Penarum celebres sub sige feræ &c.*

129. Neutrum tamen a nobis admittitur. Non primum; etenim si Sacrificia offeruntur pro Sanctis, & pro ipsis orationes funduntur, hoc tantummodo fit, ut pro gloria illis collata Deo gratias agamus, aut si etiam aliquid pro ipsis petimus, hoc pertinebit ad ipsorum gloriam accidentariam, id est, ut ipsorum gloria toti mundo innotescat, & ubique magis, ac magis eorum praeclara gesta celebrentur, aliisque imitanda proponantur. Ceterum Augustinus serm. 17. de verbis Apost. aperte docet,

*injuriam facere Martyri, qui pro Martyre orat*, quod intelligendum est de oratione illa, quae fieret, vel ad ipsi peccati remissionem obtinendam, vel gloriam essentialem comparandam, tanquam si vel peccato aliquo teneretur, vel gloria essentiali careret. Sic rejecta habes quae primo loco opponebantur.

130. Quantum ad secundum; Augustinus in primo dicto per damnationem tolerabiliorem loquitur de poenarum mitigatione in Purgatorio, quod ostendam explicando divisionem positam ab Innocentio, In secundo non profert sententiam suam, sed aliorum, quam permittit non alio titulo, nisi quia Deus punit citra condignum; Unde de hoc puncto, quod modo pertractamus, nullam movet quaestionem. Quod vero attinet ad quadrimembrem Innoc. III. divisionem, fortasse deceptus fuit existimans talem fuisse apud Augustinum, quod tamen falsum est, nam per istum, idem est esse mediocriter bonum & esse mediocriter malum, ut etiam ratio naturalis expositulat & ex terminis patet; sed si velimus illum admittere, dicemus, illos esse mediocriter bonos, qui nullam habent culpam, habent tamen reatum poenae, illos esse mediocriter malos, qui, licet careant culpa lethali, non carent tamen omni veniali, & ita non est cur concedamus pueris in Limbo damnatis suffragia prodesse. Prudentius poeticè loquitur est.

131. Nunc igitur superest probemus majorem propositionem argumenti sub initio propositi. Illam autem probō juxta perennem Sanctorum Patrum Doctrinam & traditionem, Dionys. de Ecclesiast. Hierarch. par. 3. cap. 7. ait: *Accedens deinde Venerandus Antistes, precem sacram super mortuum peragit, deprecatur oratio illa Divinam clementiam, ut cuncta dimittat per infirmitatem humanam admissa peccata defuncto, eumque in lucē statuat, & regione vivorum*, Gregor. Nazianz. in orat. ad Caesarium, inquit: *Ipsi Deo & nostras, &*



eorum, qui quasi in via parationes prius ad hospitium pervenerunt, animas commendamus. Cyril. catech. 5. Mystagogica hæc habet. Denique pro omnibus oramus, qui inter nos vita sancti sunt, maximum credentes esse animarum juvenum, pro omnibus offertur obsecratio Sancti illius, & tremendi Sacrificii, Chrysost. hom. 69. ad populum, Non temere ab Apostolis hæc sancita fuerunt, ut in tremendis mysteriis Defunctorum agatur commemoratio, sciunt enim inde multum illis contingere lucrum, utilitatem multam.

132. Hucusque attulimus, ex plurimis, quos præterire placuit, Græcos Patres; Quid vero si Latinos in medium adducamus? Infinitus essem, si omnia proferre contenderem; Bernar. ser. 66. in Cantica, & Petrum Cluniacem. in lib. contra Petrobusian. ex instituto de hac re scribentes omitam, atque etiam Gregor. lib. 4. Dialog. cap. 55. Ibid. lib. 1. de offic. cap. 18. Victorem lib. 2. de perse; Wandal. & mihi satis erunt Ambros. Hieronym. & Augustinus. Porro Ambros. lib. 2. ep. 8. ad Faustina. de obitu Sororis ait: *Non tam deplorandam, quam prosequendam orationibus reor, nec massificandam lacrymis tuis, sed magis oblationibus animam ejus Deo commendandam.* Idem habet in orat. de obitu Valentiniani, Theodosii, Satyri. S. Hieronym. in epist. ad Pammach. differens de obitu Pauline Sororis, inquit: *Cæteri Mariti super tumulos conjugum, spargunt violas, rosas, lilia, floresque purpureos, Pammachius noster sanctam favillam, ossaque veneranda eleemosynæ balsamis rigat &c. sciens scriptum, sicut aqua extinguit ignem, ita eleemosyna peccatum.* Tandem S. Augustinus lib. de cura pro mortuis cap. 1. dicit: *In Machabæorum libro legimus oblatum pro mortuis Sacrificium, sed et si nusquam in Scripturis veteribus legeretur, non parva est universæ Ecclesiæ, quæ in hac consuetudine claret auctoritas, ubi in precibus Sacerdotis, quæ Domino Deo ad ejus*

*Altare funduntur, locum suum habet etiam commendatio mortuorum.* Leges in hac re, si hæc tibi non sufficiunt, Sanctum Doctorem in Enchirid. cap. 110. lib. 9. Confess. cap. 13. lib. 21. de Civit. cap. 24. aliiq. in locis.

133. Hæc omnia non mediocriter Hæreticos premunt; atque ut respondeant ineptias proferunt & mendacia. Respondet primo Calvin. lib. 3. instit. §. 10. cap. 5. Orare pro mortuis per 1300. annos in Ecclesia fuisse receptum, sed omnes tunc errasse. Proh digna responsio? An non juxta Calvinum Ecclesia primis sæculis infallibilis fuit? Satis ita respondendo se damnat. Respondet secundo preces pro mortuis effusas esse, non ut ipsis aliquid adjumenti præberent, sed ut erga eos amorem ostenderent, ac se ipsos consolarentur; sed hæc responsio satis refellitur perpendicularibus verba, quæ nos attulimus. Respondet tertio. Hoc fuisse commune apud rudem Populum, & vulgus Christianorum, quibus Patres se accommodare voluerunt; verum & hoc omnino falsum est, si hoc factum esse ab ipsis sanctissimis æque ac Doctissimis Patribus; qui etiam alios hortabantur, ut id facerent, perpendamus, & Aerium in hoc contrarium sentientem tanquam Hæreticum existimarent, ut videri potest apud S. Augustinum lib. de hæres. cap. 53. Quod tandem dicat Petrus Pseudo-Martyr, fere omnes Patres in aliqua re errasse, hoc concedi potest in aliquibus privatis opinionibus, at in uno errore omnes convenire non potuerunt, ut in re nostra contineret.

134. Quod usque modo ex communi Patrum consensione declaravimus alio etiam momento demonstrare non prohibemur sic. Servari debet communicatio inter vivos ac defunctos, sed nulla servaretur, nisi per vivos posset adjumentum afferri defunctis, & per defunctos vivis, ergo. Proh. maj. servari debet communicatio inter vivos ac de-

defunctos, si vivi, ac defuncti sint unum corpus pertinens ad eandem Ecclesiam, juxta id quod ait Apostol. ad Corint. 12. *Si quid patitur unum membrum, compatiuntur omnia membra*. Sed vivi ac defuncti sunt unum corpus pertinens &c. juxta Augustinum lib. 20. de Civit. cap. 9. dicentem: *Piorum animæ defunctorum, ab Ecclesia Dei non separantur, quæ est Regnum Christi*; ergo.

135. Porro etiam defuncti multum adjumenti afferunt vivis. Quis enim ignorat quod legitur 2. Machab. cap. 16. Oniam & Jeremiam jam mortuos viros esse orare pro Populo? Legatur August. lib. 22. de Civit. cap. 3. & Theodoret. in libro de Martyribus, innumera reperientur exempla, quibus, quot, & qualia beneficia collata fuerint à mortuis compertum habebitur.

136. Neque obstat quod docet Sanctus Thom. 2. 2. qu. 83. art. 3. Etenim si mortui nequeunt pro vivis orare, vel est quia Deum non vident, vel quia sunt in maximis tormentis, vel quia sunt nobis inferiores; primum non probat, nam tempore veteris Testamenti Sancti defuncti Deum non videbant, & tamen pro vivis orabant; secundum neque, etenim Martyres Sancti in maximis erant tormentis constituti, & tamen Deum deprecabantur, ut patet in Martyre Stephano, & in omnium Martyrum capite Christo Domino, qui pro crucifixoribus Patrem oravit; ratio autem est, quia Purgatorii poenæ rationem non perturbant, nec bonum voluntatis affectum impediunt. Tertium neque, nam in primis possunt inferiores pro superioribus orare, deinde animæ Purgatorii inferiores quidem nobis: sunt propter poenas, superiores tamen propter gratiam & charitatem, in qua sunt confirmate, ergo.

137. Ita profecto exigit membro Christi conditio, ut sicut Christus vivus profuit mortuis, ut constat, quando Lazarum revocavit ad vitam, & mortuus profuit vivis morte sua mortem

omnium superando, ita & ejus membra viva prosint membris mortuis, & membra mortua membris vivis, & sic &c.

Non desunt tamen aliqua argumenta, quibus contrarium probari posse videtur: & primo ex Scriptura. Eccles. 9. legitur: *Mortui nihil noverunt amplius, nec habent ultra mercedem, nec partem in hoc sæculo in opere*. Ergo nec mortui possunt prodesse viventibus, nec viventes mortuis. Sed contra; ex hoc textu aliud non innuitur, nisi mortuos non posse uti bonis à se in hac vita relictis, non tamen à nobis adjuvari non posse.

138. Secundo arguitur auctoritate S. Hieronymi, qui in cap. 6. epist. ad Galat. hæc habet. *Docemur, dum in presenti sæculo sumus, sive orationibus, sive consiliis invicem posse nos adjuvari, cum autem ante Tribunal Christi venerimus non Job, non Daniel, non Noe rogare posse pro quoquam, sed unumquemque portare onus suum*. Sed contra; Vel Hieronymus loquitur de illis, qui decesserunt in peccato lethali, vel de apparitione ante Tribunal Judicis in judicio finali, quando non erit amplius Purgatorium, tunc enim etiam suffragia desinant, necesse erit. Quænam autem fuerit mens Hieronymi, patet ex eo, quod scripsit contra Vigilantium, negantem posse nos orare pro invicem, dum vivimus, aut post mortem nullius pro altero orationem prodesse.

139. Tertio assertur Ambros. lib. 1. de Abrahamo cap. 9. inquiens: *Docemur, ut non diutius inbareamus mortuis, sed quantum satis est officii deferamus*. Ergo superflua est eorum sollicitudo, qui pro mortuis orant, jejunant &c. Sed contra; insinuat Sanctus Doctor luctum & pompam funeris esse moderatione restringendam. Quantum vero curæ adhibendum sit in orationibus fundendis, & eleemosynis dispensandis, aliisque operibus impendendis, colligitur ex locis ejusdem à nobis adductis.

140. Ultimo proponitur ratio. Nemmo debet pati malis alienis, non enim, Eze-

Ezechiel. 18. *Portabit Pater, iniquitatem filii*; ergo neque debet frui bonis alienis, ergo. Secundo orando pro mortuis eorundem gloriam minui-  
mus, prob. orando pro mortuis satisfacimus pro ipsis, sed ita eorum gloriam minui-  
mus, nam melius est, si quis satisfaciat per se, quam per alium, ergo. Sed con-  
tra. Patitur quis malis alienis, si fiant alterius consensu & voluntate; Unde Ex. 20. habetur. *Deus punit peccata Pa-  
trum in filiis in tertiam & quartam ge-  
nerationem*. Ita quis fruitur bonis alienis, si fiant utriusque consensu & vo-  
luntate; Hoc autem pacto vivi orant pro defunctis, isti enim cupiunt adjuvari,  
& nos volumus adjuvare; Deinde puni-  
re unum pro alterius culpa injustitiæ vi-  
tio tribuendum esset, acceptare autem

bona ubi pro alio, opus est misericor-  
diæ, ac liberalitatis. Ad secundum lo-  
quendo de hac vita, in qua potest quis-  
que per se mereri gratiæ & gloriæ aug-  
mentum, ratio concludit, loquendo ve-  
ro de alia vita, in qua merito locus non  
datur, non est melior satisfactio propria,  
quam aliena. Hæc, quæ de Purgatorio  
diximus Divina Fide tenenda sunt, re-  
liqua vero, quæ inquiri possunt, & solent,  
plenariam certitudinem non habent;  
ideo nobis Theologice rem pertractan-  
tibus hæc dixisse sufficiat, & ita Quæ-  
stionibus de Peccatis tanquam de Divi-  
næ Gratix oppositis finem imponimus,  
omnia Sanctæ Catholicæ, & Apostolicæ  
Romanæ Ecclesiæ infallibili iudicio sub-  
dentes.



F I N I S.

## ERRATA.

## CORRIGE.

**P**<sup>Ag.</sup> 36. alerius  
 38. fecit  
 56. Deus  
 100. calefactionem  
 127. Afferuntur  
 174. injustitia  
 199. capisse  
 233. argumentum  
 246. malam  
 249. proxitatem  
 257. removetur  
 290. dedecentes  
 313. quippe  
 322. meritum  
 322. ne.

alterius  
 scit  
 Deum  
 approximationem  
 Afferitur  
 in justitia  
 cepisse  
 augmentum  
 malum  
 pronitatem  
 remoretur  
 decedentes  
 quisque  
 præmium  
 me

*In cæteris levioribus veniam petit Typographus.*

